



An Bhruiséil, 25 Samhain 2022
(OR. en)

14954/22

**Comhad Idirinstiúideach:
2021/0106(COD)**

LIMITE

**TELECOM 472
JAI 1494
COPEN 396
CYBER 374
DATAPROTECT 320
EJUSTICE 89
COSI 293
IXIM 267
ENFOPOL 569
RELEX 1556
MI 843
COMPET 918
CODEC 1773**

NÓTA

ó: Coiste na mBuanionadaithe (Cuid 1)

chuig: An Chomhairle

Uimh. an doic. 14336/22
roimhe seo:

Uimh. an doic. ón 8115/21
gCoim.:

Ábhar: Togra le haghaidh Rialachán ó Pharlaimint na hEorpa agus ón gComhairle lena leagtar síos rialacha comhchuibhithe maidir leis an intleacht shaorga (Gníomh um an Intleacht Shaorga) agus lena leasaítear gníomhartha áirithe reachtacha de chuid an Aontais
- Cur chuige ginearálta

I. RÉAMHRÁ

1. Ghlac an Coimisiún an togra le haghaidh Rialachán lena leagtar síos rialacha comhchuibhithe maidir leis an intleacht shaorga (**Gníomh um an Intleacht Shaorga**) an 21 Aibreán 2021.

2. Is iad cuspóirí an togra ón gCoimisiún a áirithiú go bhfuil córais intleachta saorga a chuirtear ar mhargadh an Aontais agus a úsáidtear san Aontas sábháilte agus go n-urramaíonn siad an dlí atá ann cheana maidir le cearta bunúsacha agus luachanna an Aontais, chun deimhneacht dhlíthiúil a áirithiú d'fhonn infheistíocht agus nuálaíocht san intleacht shaorga a éascú, chun rialachas agus forfheidhmiú éifeachtach an dlí atá ann cheana maidir le cearta bunúsacha agus sábháilteacht a fheabhsú, agus chun forbairt margaidh aonair a éascú d'fheidhmchláir intleachta saorga dhleathacha shábháilte iontaofa, agus ilroinnt sa mhargadh a sheachaint ag an am céanna.

II. AN OBAIR SNA hINSTITIÚIDÍ EILE

3. I bParlaimint na hEorpa, tá an plé faoi stiúir an Choiste um an Margadh Inmheánach agus um Chosaint an Tomhaltóra (IMCO; rapóirtéir: Brando Benifei, S&D, an Iodáil) agus an Coiste um Shaoirsí Sibhialta, um Cheartas agus um Ghnóthaí Baile (LIBE; rapóirtéir: Dragos Tudorache, Renew, an Rómáin) faoi nós imeachta comhchoiste. Tá baint ag an gCoiste um Ghnóthaí Dlíthiúla (JURI), ag an gCoiste um Thionsclaíocht, um Thaighde agus um Fhuinneamh (ITRE) agus ag an gCoiste um Chultúr agus um Oideachas (CULT) leis an obair reachtach a bhfuil inniúlachtaí comhroinnte agus/nó eisiacha acu. D'fhoilsigh an dá chomhrapóirtéir a ndrúacht-tuarascáil i mí Aibreáin 2022, agus tá an vótáil ar thuarascáil chomhpháirteach IMCO-LIBE sceidealaithe don chéad ráithe de 2023.
4. Thug Coiste Eacnamaíoch agus Sóisialta na hEorpa a thuairim uaidh maidir leis an togra an 22 Meán Fómhair 2021, agus thug Coiste Eorpach na Réigiún a thuairim siúd uaidh ina dhiaidh sin an 2 Nollaig 2021.
5. An 18 Meitheamh 2021, d'eisigh an Bord Eorpach um Chosaint Sonraí (EDPB) agus an Maoirseoir Eorpach ar Chosaint Sonraí (MECS) tuairim chomhpháirteach maidir leis an togra.
6. D'eisigh an Banc Ceannais Eorpach (BCE) a thuairim an 29 Nollaig 2021 agus chuir sé i láthair ag an gcrúinniú den Mheitheal um Theileachumarsáid agus um an tSochaí Faisnéise (dá ngairfear: an Mheitheal TELECOM anseo feasta) an 10 Feabhra 2022 í.

III. AN STAID MAR ATÁ SA CHOMHAIRLE

1. Scrúdaigh an Mheitheal TELECOM an togra sa Chomhairle. Chuir an Mheitheal TELECOM tús leis an bplé faoin togra faoi Uachtaránacht na Portaingéile, agus tionóladh roinnt cruinnithe agus ceardlann idir mí Aibreáin agus mí an Mheithimh 2021. Leanadh den obair ar an togra faoi Uachtaránacht na Slóivéine, a dhréachtaigh an chéad togra comhréitigh páirteach lena gcumhdaítear **Airteagail 1-7 agus Iarscríbhinní I-III**. Ina theannta sin, d'eagraigh Uachtaránacht na Slóivéine cruinniú neamhfhoirmiúil leath lae den Chomhairle de na hairí teileachumarsáide a bhí dírithe ar an togra le haghaidh an Ghnímh um an Intleacht Shaorga amháin agus inar dhearbhaigh na hairí go dtacaíonn siad leis an gcur chuige cothrománach maidir le rialáil na hintleachta saorga, ar cur chuige é atá duinelárnach. Lean Uachtaránacht na Fraince den phróiseas scrúdaithe agus faoi dheireadh a téarma d'athdhréachtaigh sí na codanna den téacs a bhí fágtha (**Airteagail 8-85 agus Iarscríbhinní IV-IX**) agus thíolaic sí an chéad togra comhréitigh comhdhlúite iomlán maidir leis an nGníomh um an Intleacht Shaorga an 17 Meitheamh 2022.
2. An 5 Iúil 2022, bhí díospóireacht bheartais ag Uachtaránacht na Seicia ag cruinniú den Mheitheal TELECOM ar bhonn doiciméid maidir le roghanna beartas, ar úsáideadh na torthaí a d'eascair as chun **an dara téacs comhréitigh** a ullmhú. Bunaithe ar fhreagairtí na dtoscaireachtaí maidir leis an gcomhréiteach sin, d'ullmhaigh Uachtaránacht na Seicia **an tríú téacs comhréitigh**, a cuireadh i láthair agus a pléadh ag cruinnithe den Mheitheal TELECOM an 22 agus an 29 Meán Fómhair 2022. Tar éis an phlé sin, iarradh ar na toscaireachtaí tuilleadh barúlacha i scríbhinn a chur ar fáil, barúlacha a d'úsáid Uachtaránacht na Seicia chun **an ceathrú togra comhréitigh** a dhréachtú. Bunaithe ar an bplé ar an gceathrú togra comhréitigh a rinneadh ag cruinnithe den Mheitheal TELECOM an 25 Deireadh Fómhair 2022 agus an 8 Samhain 2022, agus na barúlacha deiridh i scríbhinn ó na Ballstáit á gcur san áireamh, tá **an leagan críochnaitheach den téacs comhréitigh** ullmhaithe ag Uachtaránacht na Seicia, a bhfuil teacht air san Iarscríbhinn. An 18 Samhain, scrúdaigh Coreper an togra comhréitigh seo agus **chomhaontaigh sé d'aon toil é a chur faoi bhráid na Comhairle Iompair, Teileachumarsáide agus Fuinnimh (Teileachumarsáid), gan aon athrú, d'fhonn teacht ar chur chuige ginearálta** ag an gcruinniú a bhí aici an 6 Nollaig 2022.

IV. PRÍOMHGHNÉITHE AN TOGRA COMHRÉITIGH

1. Sainmhíniú ar chóras intleachta saorga, cleachtais intleachta saorga atá toirmiscthe, liosta de chásanna ina n-úsáidtear córais intleachta saorga ardríosca atá in Iarscríbhinn III, agus córais intleachta saorga a aicmiú mar chórais ardríosca

1.1 Chun a áirithiú go soláthrófar leis an sainmhíniú ar chóras intleachta saorga critéir atá soiléir go leor chun idirdhealú a dhéanamh idir an intleacht shaorga agus córais bogearraí níos clasaicí, laghdaíonn an téacs comhréitigh an sainmhíniú in **Airteagal 3(1)** chuig córais a fhorbraítear trí chuir chuige mheaisínfhoghlama agus cuir chuige loighicbhunaithe agus eolasbhunaithe.

1.2 A mhéid a bhaineann le tarmligean cumhachtaí chuig an gCoimisiún i ndáil leis an sainmhíniú ar chóras intleachta saorga a leasú chun dáta, scriosadh **Iarscríbhinn I** agus an chumhacht chomhfhreagrach a tugadh don Choimisiún chun é a thabhairt cothrom le dáta trí bhíthin gníomhartha tarmligthe. Ina ionad sin, cuireadh **Aithrisí** nua **6a agus 6b** isteach chun soiléiriú a dhéanamh ar an tuiscint ba cheart a bheith ar chuir chuige mheaisínfhoghlama agus cuir chuige loighicbhunaithe agus eolasbhunaithe. Chun a áirithiú go leanfaidh an Gníomh um an Intleacht Shaorga de bheith solúbtha agus go seasfaidh sé an aimsir, cuireadh isteach in **Airteagal 4** an fhéidearthacht gníomhartha cur chun feidhme a ghlacadh chun teicnící a shonrú agus a uasdátú a thuilleadh faoi chuir chuige mheaisínfhoghlama agus cuir chuige loighicbhunaithe agus eolasbhunaithe.

1.3 Maidir le cleachtais intleachta saorga atá toirmiscthe, cuimsítear in **Airteagal 5** den téacs comhréitigh an toirmeasc ar úsáid na hintleachta saorga le haghaidh scóráil shóisialta a leathnú chuig gníomhaithe príobháideacha freisin. Thairis sin, maidir leis an bhforáil lena dtoirmisctear córais intleachta saorga a úsáid a bhaineann leas as leochaileachtaí grúpa daoine ar leith, cumhdaítear léi anois daoine atá leochaileach mar gheall ar a staid shóisialta nó eacnamaíoch. Maidir leis an toirmeasc ar na húdaráis forfheidhmithe dlí cianchórais sainaitheanta bithmhéadraí ‘fíor-ama’ a úsáid i spásanna a bhfuil rochtain ag an bpobal orthu, soiléirítear sa téacs comhréitigh na cuspóirí i gcás ina meastar go bhfuil géarghá leis an úsáid sin chun críocha fhorfheidhmiú an dlí agus inar cheart, dá bhrí sin, cead eisceachtúil a thabhairt d’údaráis forfheidhmithe dlí na córais sin a úsáid ina leith.

1.4 A mhéid a bhaineann leis an liosta de chásanna ina n-úsáidtear córais intleachta saorga ardriosca atá in **Iarscríbhinn III**, scriosadh trí cinn acu (braith domhainbhrionnuithe ag údaráis forfheidhmithe dlí, anailísíocht choireachta, fíorú barántúlachta doiciméad taistil), cuireadh dhá cheann leis an liosta (bonneagar digiteach criticiúil agus árachas saoil agus sláinte) agus rinneadh mionchoigeartú ar chinn eile. Ag an am céanna, modhnaíodh **Airteagal 7(1)** chun foráil a dhéanamh don fhéidearthacht ní hamháin maidir le cásanna ina n-úsáidtear córais intleachta saorga ardriosca a chur leis an liosta trí bhíthin gníomhartha tarmligthe, ach iad a scriosadh freisin. Chun a áirithiú go ndéanfar cearta bunúsacha a chosaint go leordhóthanach i gcás scriosadh den sórt sin, cuireadh forálacha breise isteach in **Airteagal 7(3)**, lena sonraítear na coinníollacha ba ghá a chomhlíonadh sular féidir gníomh tarmligthe a ghlacadh.

1.5 Maidir le córais intleachta saorga a aicmiú mar chórais ardriosca, áirítear sa togra comhréitigh sraith chothrománach bhreise sa bhreis ar an aicmiú ardriosca a dhéantar in **Iarscríbhinn III** chun a áirithiú nach gcuimseofar córais intleachta saorga nach dócha go n-eascróidh sárúithe tromchúiseacha ar chearta bunúsacha nó rioscaí suntasacha eile astu. Go sonrach, tá forálacha nua in **Airteagal 6(3)** ar dá réir ba cheart tábhacht aschur an chórais intleachta saorga i ndáil leis an ngníomhaíocht ábhartha nó cinneadh atá le déanamh a chur san áireamh freisin agus córais intleachta saorga á n-aicmiú mar chórais ardriosca. Dhéanfaí measúnú ar thábhacht aschuir córais intleachta saorga bunaithe ar cé acu an bhfuil nó nach bhfuil sé go hiomlán coimhdeach i leith na ngníomhaíochta ábhartha nó an chinnidh atá le déanamh.

2. **Ceanglais maidir le córais intleachta saorga ardriosca agus freagrachtaí gníomhaithe éagsúla i slabhra luacha na hintleachta saorga**

2.1 Rinneadh go leor de na ceanglais maidir le córais intleachta saorga ardriosca, dá bhforáiltear i **gCaibidil 2 de Theideal III** den togra, a shoiléiriú agus a choigeartú sa chaoi go mbeidh siad níos indéanta go teicniúil agus go mbeidh ualach níos lú ar gheallsealbhoirí iad a chomhlíonadh, mar shampla a mhéid a bhaineann le cáilíocht na sonraí, nó i ndáil leis an doiciméadacht theicniúil ar cheart do FBManna iad a tharraingt suas chun a léiriú go gcomhlíonann a gcórais intleachta saorga ardriosca na ceanglais.

2.2 Ós rud é go ndéantar córais intleachta saorga a fhorbairt agus a dháileadh trí shlabhraí luacha casta, áirítear sa téacs comhréitigh athruithe lena soiléirítear leithdháileadh na bhfreagrachtaí agus na ról. Mar shampla, cuireadh isteach roinnt forálacha breise in **Airteagail 13 agus 14** lena gceadaítear comhar níos éifeachtaí idir soláthraithe agus úsáideoirí. Is é is aidhm freisin don téacs comhréitigh an gaol idir na freagrachtaí faoin nGníomh um an Intleacht Shaorga agus na freagrachtaí atá ann cheana faoi reachtaíocht eile, ar nós reachtaíocht ábhartha an Aontais maidir le cosaint sonraí nó reachtaíocht earnálach, lena n-áirítear a mhéid a bhaineann le hearnáil na seirbhísí airgeadais, a shoiléiriú. Thairis sin, le h**Airteagal** nua **23a**, léirítear ar bhealach níos soiléire na cásanna ina bhfuil sé d'oibleagáid ar ghníomhaithe eile sa slabhra luacha freagrachtaí an tsoláthraí a ghlacadh orthu féin.

3. Córais intleachta saorga ilchuspóireacha

3.1 Cuireadh **Teideal** nua **IA** isteach chun cásanna a chur san áireamh inar féidir córais intleachta saorga a úsáid chun a lán críoch éagsúil (intleacht shaorga ilchuspóireach), agus i gcás ina bhféadfadh imthosca a bheith ann ina ndéanfaí teicneolaíocht intleachta saorga ilchuspóireach a chomhtháthú i gcóras eile, córas a d'fhéadfadh ardriosca a bheith ag baint leis amach anseo. Sonraítear sa téacs comhréitigh in **Airteagal 4b(1)** go mbeadh feidhm ag ceanglais áirithe maidir le córais intleachta saorga ardriosca freisin i ndáil le córais intleachta saorga ilchuspóireacha. Seachas na ceanglais sin a chur i bhfeidhm go díreach, áfach, sonrúfaí i ngníomh cur chun feidhme conas ba cheart iad a chur i bhfeidhm i ndáil le córais intleachta saorga ilchuspóireacha, bunaithe ar chomhairliúchán agus ar mheasúnú tionchair mionsonraithe agus saintréithe sonracha na gcóras sin agus an slabhra luacha gaolmhar, an indéantacht theicniúil agus na forbairtí margaidh agus teicneolaíocha á gcur san áireamh. Trí ghníomh cur chun feidhme a úsáid, áiritheofar go mbeidh na Ballstáit rannpháirteach mar is ceart agus gur fúthu a bheidh sé an cinneadh deiridh a dhéanamh fós maidir leis an gcaoi a gcuirfear na ceanglais i bhfeidhm sa chomhthéacs sin.

3.2 Thairis sin, áirítear freisin i dtéacs comhréitigh **Airteagal 4b(5)** an fhéidearthacht maidir le gníomhartha cur chun feidhme breise a ghlacadh lena leagfaí síos módúlachtaí an chomhair idir soláthraithe córas intleachta saorga ilchuspóireach agus soláthraithe eile a bhfuil sé ar intinn acu córais den sórt sin a chur i mbun seirbhíse nó ar mhargadh an Aontais mar chórais intleachta saorga ardriosca, go háirithe a mhéid a bhaineann le faisnéis a sholáthar.

4. **Raon feidhme an Ghnímh um an Intleacht Shaorga atá beartaithe agus forálacha a bhaineann le húdaráis forfheidhmithe dlí a shoiléiriú**

4.1 In **Airteagal 2**, rinneadh tagairt shainráite d'eisiamh na gcríoch slándála náisiúnta, cosanta agus míleata ó raon feidhme an Ghnímh um an Intleacht Shaorga. Ar an gcaoi chéanna, soiléiríodh nár cheart feidhm a bheith ag an nGníomh um an Intleacht Shaorga maidir le córais intleachta saorga agus a n-aschuir a úsáidtear chun críche taighde agus forbartha amháin agus i ndáil le hoibleagáidí daoine a úsáideann an intleacht shaorga chun críocha neamhghairmiúla, rud a bheadh lasmuigh de raon feidhme an Ghnímh um an Intleacht Shaorga, cé is moite de na hoibleagáidí trédhearcachta.

4.2 Chun sainiúlachtaí ar leith na n-údarás forfheidhmithe dlí a chur san áireamh, rinneadh roinnt leasuithe ar na forálacha maidir le húsáid na gcóras intleachta saorga chun críocha fhorfheidhmiú an dlí. Go háirithe, rinneadh mionchoigeartú ar roinnt de na sainmhínte gaolmhara in **Airteagal 3**, ar nós 'cianchóras sainaitheanta bithmhéadraí' agus 'cianchóras sainaitheanta bithmhéadraí fíor-ama', chun a shoiléiriú cad iad na cásanna a thioctadh faoin toirmeasc gaolmhar maidir le gcás úsáide ardriosca agus cad iad na cásanna nach dtiocfadh faoi sin. Tá modhnuithe eile sa togra comhréitigh freisin arb é is aidhm dóibh, faoi réir coimircí iomchuí, leibhéal iomchuí solúbthachta a áirithiú maidir le húsáid córas intleachta saorga ardriosca ag údaráis forfheidhmithe dlí nó machnamh a dhéanamh ar an ngá atá le rúndacht sonraí oibríochtúla íogaire a urramú i ndáil lena ngníomhaíochtaí.

5. **Measúnuithe comhréireachta, creat rialachais, faireachas margaidh, forfheidhmiú agus pionóis**

5.1 Chun an creat comhlíontachta don Gníomh um an Intleacht Shaorga a shimpliú, tá roinnt soiléirithe agus simplithe ar na forálacha maidir leis na nósanna imeachta um measúnú comhréireachta sa téacs comhréitigh. Rinneadh na forálacha maidir le faireachas margaidh a shoiléiriú agus a shimpliú freisin ionas go mbeidís níos éifeachtaí agus ionas gur fusa iad a chur chun feidhme, agus an gá atá le cur chuige comhréireach ina leith sin á chur san áireamh. Thairis sin, rinneadh athbhreithniú críochnúil ar Airteagal 41 chun rogha an Choimisiúin a theorannú maidir le glacadh gníomhartha cur chun feidhme lena mbunaítear sonraíochtaí teicniúla coiteanna do na ceanglais maidir le córais intleachta saorga ardriosca agus córais intleachta saorga ilchuspóireacha.

5.2 Leis an téacs comhréitigh, déantar modhnú suntasach freisin ar na forálacha a bhaineann leis an gCoiste um an Intleacht Shaorga ('an Coiste'), leis na cuspóirí chun a neamhspleáchas méadaithe a áirithiú agus a ról i struchtúr rialachais an Ghnámh um an Intleacht Shaorga a neartú. Sa chomhthéacs sin, rinneadh athbhreithniú ar **Airteagail 56 agus 58** chun ról an Choiste a neartú ionas gur fearr a bheadh sé in ann tacaíocht a thabhairt do na Ballstáit i ndáil le cur chun feidhme agus forfheidhmiú an Ghnámh um an Intleacht Shaorga. Go sonrach, leathnaíodh cúraimí an Choiste agus sonraíodh a chomhdhéanamh. Chun rannpháirtíocht na ngeallsealbhóirí a áirithiú i ndáil leis na saincheisteanna uile a bhaineann le cur chun feidhme an Ghnámh um an Intleacht Shaorga, lena n-áirítear gníomhartha cur chun feidhme agus tarmligthe a ullmhú, cuireadh ceanglas nua isteach ar an gCoiste foghrúpa buan a chruthú a fheidhmeoidh mar ardán do raon leathan geallsealbhóirí. Ba cheart dhá bhuan-fhoghrúpa eile do na húdaráis um fhaireachas margaidh agus ba cheart na húdaráis a thugann fógra a bhunú freisin chun comhsheasmhacht rialachais agus forfheidhmithe an Ghnámh um an Intleacht Shaorga a threisiú ar fud an Aontais.

5.3 Chun an creat rialachais a fheabhsú a thuilleadh, áirítear sa téacs comhréitigh **Airteagail nua 68a agus 68b**. Tá ceanglas in **Airteagal 68a** ar an gCoimisiún saoráid tástála amháin nó níos mó de chuid an Aontais a ainmniú i réimse na hintleachta saorga, lena cheart comhairle neamhspleách theicniúil nó eolaíoch a sholáthar arna iarraidh sin don Choiste nó do na húdaráis um fhaireachais margaidh, ach le **Airteagal 68b**, leagtar síos oibleagáid ar an gCoimisiún díorma lárnach saineolaithe neamhspleácha a chruthú chun tacú leis na gníomhaíochtaí forfheidhmithe a cheanglaítear faoin Acht um an Intleacht Shaorga. Ar deireadh, tá Airteagal nua 58a ann freisin lena leagtar síos oibleagáid ar an gCoimisiún treoir a thabhairt maidir le cur i bhfeidhm an Ghnámh um an Intleacht Shaorga.

5.4 A mhéid a bhaineann leis na pionóis i leith sárúithe ar fhorálacha an Ghnámh um an Intleacht Shaorga, in **Airteagal 71** foráiltear sa téacs comhréitigh d'uasteorainneacha níos comhréirí ar mhéid na bhfíneálacha riaracháin le haghaidh FBManna agus gnólachtaí nuathionscanta. Thairis sin, in **Airteagal 71(6)**, cuireadh ceithre chritéar breise isteach maidir le cinneadh a dhéanamh i ndáil le méid na bhfíneálacha riaracháin chun a gcomhréireacht fhoriomlán a chosaint a thuilleadh.

6. Trédhearcacht agus forálacha eile i bhfabhar na ndaoine a ndéantar difear dóibh

6.1 Áirítear sa togra comhréitigh roinnt athruithe a mhéadaíonn an trédhearcacht maidir le húsáid córas intleachta saorga ardriosca. Go háirithe, tugadh **Airteagal 51** cothrom le dáta chun a léiriú go mbeidh sé d'oibleagáid freisin ar úsáideoirí áirithe córas intleachta saorga ardriosca - ar údaráis, gníomhaireachtaí nó comhlachtaí poiblí iad - clárú i mbunachar sonraí an Aontais le haghaidh córais intleachta saorga ardriosca a liostaítear in Iarscríbhinn III. Thairis sin, leagtar béim in **Airteagal 52(2a)** - airteagal a cuireadh isteach - ar oibleagáid a bheith ar úsáideoirí córais aitheanta mothúcháin daoine nádúrtha a chur ar an eolas nuair atá córas den sórt sin os a gcomhair amach.

6.2 Tá sé soiléir sa togra comhréitigh freisin in **Airteagal 63(11)** - airteagal a cuireadh isteach - go bhféadfadh duine nádúrtha nó dlítheanach a bhfuil cúiseanna aige le ceapadh go ndearnadh sárú ar fhorálacha an Ghnímh um an Intleacht Shaorga gearán a dhéanamh leis an údarás ábhartha um fhaireachais margaidh agus go bhféadfadh sé a bheith ag súil go láimhseálfaí an gearán sin i gcomhréir le nósanna imeachta tiomnaithe an údaráis sin.

7. Bearta chun tacú leis an nuálaíocht

7.1 Agus é mar chuspóir creat dlíthiúil a chruthú atá níos fabhraí don nuálaíocht agus chun foghlaim rialála fhianaisebhunaithe a chur chun cinn, rinneadh na forálacha a bhaineann le bearta chun tacú leis an nuálaíocht in **Airteagal 53** a mhodhnú go suntasach sa téacs comhréitigh. Go háirithe, soiléiríodh gur cheart do bhoscaí gainimh rialála na hintleachta saorga, atá ceaptha timpeallacht rialaithe a bhunú chun córais nuálacha intleachta saorga a fhorbairt, a thástáil agus a bhailíochtú faoi mhaoirseacht dhíreach agus faoi threoir na n-údarás inniúil náisiúnta, ligean do chórais nuálacha intleachta saorga a thástáil i bhfiordhálaí. Thairis sin, cuireadh isteach forálacha nua in **Airteagail 54a agus 54b** lena gceadaítear tástáil i bhfiordhálaí ar chórais intleachta saorga gan mhaoirseacht, faoi choinníollacha agus coimircí sonracha. Sa dá chás, soiléirítear sa téacs comhréitigh conas is ceart na rialacha nua sin a léirmhíniú i ndáil le reachtaíocht earnála eile atá ann cheana maidir le boscaí gainimh rialála.

7.2 Ar deireadh, chun an t-ualach riaracháin ar chuideachtaí beaga a laghdú, in **Airteagal 55** sa téacs comhréitigh tá liosta gníomhaíochtaí atá le déanamh ag an gCoimisiún chun tacú le hoibreoírí den sórt sin, agus foráiltear in **Airteagal 55a** do roinnt maoluithe atá teoranta agus sonraithe go soiléir.

V. CONCLÚID

1. I bhfianaise an mhéid sin thuas, iarrtar ar an gComhairle an méid seo a leanas a dhéanamh:
 - scrúdú a dhéanamh ar an téacs comhréitigh a leagtar amach san Iarscríbhinn a ghabhann leis an nóta seo;
 - cur chuige ginearálta a dhearbhu maidir leis an togra le haghaidh Rialachán lena leagtar síos rialacha comhchuibhithe maidir leis an intleacht shaorga (Gníomh um an Intleacht Shaorga) ag an gcruinniú den Chomhairle Iompair, Teileachumarsáide agus Fuinnimh (Teileachumarsáid) an 6 Nollaig 2022.

Togra le haghaidh

RIALACHÁN Ó PHARLAIMINT NA hEORPA AGUS ÓN gCOMHAIRLE

**LENA LEAGTAR SÍOS RIALACHA COMHCHUIBHITHE MAIDIR LEIS AN
INTLEACTH SHAORGA (GNÍOMH UM AN INTLEACTH SHAORGA) AGUS LENA
LEASAÍTEAR GNÍOMHARTHA ÁIRITHE REACTACHA DE CHUID AN AONTAIS**

(Téacs atá ábhartha maidir le LEE)

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagail 16 agus 114 de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Choiste Eacnamaíoch agus Sóisialta na hEorpa¹,

Ag féachaint don tuairim ó Choiste na Réigiún²,

Ag féachaint don tuairim ón mBanc Ceannais Eorpach³,

Ag gníomhú dóibh i gcomhréir leis an ngnáthnós imeachta reachtach,

De bharr an mhéid seo a leanas:

¹ IO C [...], [...], lch. [...].

² IO C [...], [...], lch. [...].

³ Tagairt don tuairim ó BCE

- (1) Is é is cuspóir don Rialachán seo feidhmiú an mhargaidh inmheánaigh a fheabhsú trí chreat dlíthiúil aonfhoirmeach a leagan síos go háirithe maidir le forbairt, margú agus úsáid na hintleachta saorga i gcomhréir le luachanna an Aontais. Leis an Rialachán seo, déantar roinnt cúiseanna sárraitheacha a bhaineann le leas an phobail a shaothrú, amhail ardleibhéal cosanta maidir le sláinte, sábháilteacht agus cearta bunúsacha, agus áirithítear leis saorghluaiseacht trasteorann earraí agus seirbhísí IS-bhunaithe, rud a chuireann cosc ar na Ballstáit srianta a fhorchur ar fhorbairt, margú agus úsáid córas intleachta saorga, ach amháin i gcás údarú sainráite ag an Rialachán seo.
- (2) Is féidir córais intleachta saorga (córais IS) a úsáid go héasca in earnálacha éagsúla an gheilleagair agus na sochaí, lena n-áirítear ar bhonn trasteorann, agus a bheith i gcursaíocht ar fud an Aontais. Tá fiosruithe déanta ag Ballstáit áirithe cheana féin maidir le rialacha náisiúnta a ghlacadh chun a áirithiú go bhfuil an intleacht shaorga sábháilte agus go bhforbraítear agus go n-úsáidtear í i gcomhréir le hoibleagáidí i ndáil le cearta bunúsacha. Ilroinnt an mhargaidh inmheánaigh agus laghdú ar an deimhneacht dhlíthiúil le haghaidh oibreoirí a fhorbraíonn, a allmhairíonn nó a úsáideann córais intleachta saorga, sin a d'fhéadfadh a bheith mar thoradh ar rialacha náisiúnta éagsúla a bheith ann. Ba cheart, dá bhrí sin, ardleibhéal comhsheasmhach cosanta a áirithiú, agus dibhéirseachtaí a chuireann isteach ar shaorghluaiseacht córas intleachta saorga laistigh den mhargadh inmheánach, mar aon leis na táirgí agus na seirbhísí a bhaineann leo, a chosc trí oibleagáidí aonfhoirmeacha le haghaidh oibreoirí a leagan síos agus trí chosaint aonfhoirmeach cúiseanna sárraitheacha a ráthú a bhaineann le leas an phobail agus cosaint daoine ar fud an mhargaidh inmheánaigh de réir Airteagal 114 den Chonradh ar Fheidhmiú an Aontais Eorpaigh (CFAE). Sa mhéid go bhfuil rialacha sonracha sa Rialachán seo maidir le cosaint daoine aonair i dtaca le próiseáil sonraí pearsanta a bhaineann le srianta ar úsáid córas intleachta saorga le haghaidh cian-sainaithint bhithmhéadrach 'fíor-ama' i spásanna a bhfuil rochtain ag an bpobal orthu chun críche fhorfheidhmiú an dlí, is iomchuí an Rialachán seo a bhunú ar Airteagal 16 de CFAE a mhéid a bhaineann leis na rialacha sonracha sin. I bhfianaise na rialacha sonracha sin agus iontaoibh Airteagal 16 de CFAE, is iomchuí dul i gcomhairle leis an mBord Eorpach um Chosaint Sonraí.

- (3) Grúpa teicneolaíochtaí atá san intleacht shaorga, atá ag athrú go tapa agus lenar féidir cur le réimse leathan tairbhí eacnamaíocha agus sochaíocha sa raon iomlán earnálacha agus gníomhaíochtaí sóisialta trí chéile. Trí fheabhas a chur ar an tuar, oibríochtaí optamúcháin agus leithdháileadh acmhainní agus réitigh dhigiteacha atá ar fáil le haghaidh daoine aonair agus eagraíochtaí a phearsantú, le húsáid na hintleachta saorga, féadfar príomhbhuntaistí iomaíocha a sholáthar do chuideachtaí agus tacú le torthaí atá chun tairbhe an chomhshaoil agus na sochaí, mar shampla, maidir le cúram sláinte, feirmeoireacht, oideachas agus oiliúint, bainistíocht bonneagair, fuinneamh, iompar agus lóistíocht, seirbhísí poiblí, slándáil, ceartas, éifeachtúlacht acmhainní agus fuinnimh, maolú ar an athrú aeráide agus oiriúnú don athrú aeráide.
- (4) Ag an am céanna, ag brath ar na himthosca maidir lena húsáid agus cur i bhfeidhm, d'fhéadfadh rioscaí a bheith ag baint leis an intleacht shaorga agus d'fhéadfadh sí díobháil a dhéanamh do leasanna agus cearta an phobail atá faoi chosaint dhlí an Aontais. D'fhéadfadh an díobháil sin a bheith ábhartha nó neamhábhartha.
- (5) Dá bhrí sin, tá gá le creat dlíthiúil de chuid an Aontais lena leagtar síos rialacha comhchuibhithe maidir leis an intleacht shaorga chun forbairt, úsáid agus glacadh na hintleachta saorga a chothú sa mhargadh inmheánach agus ag an am céanna ardleibhéal cosanta maidir le leasanna poiblí a bhaint amach, amhail an tsláinte agus an tsábháilteacht agus cosaint na gceart bunúsach, mar a aithnítear agus a chosnaítear faoi dhlí an Aontais. Chun an cuspóir sin a bhaint amach, ba cheart rialacha a leagan síos lena rialaítear cur ar an margadh agus cur i mbun seirbhíse córas intleachta saorga áirithe, agus sa dóigh sin dea-fheidhmiú an mhargaidh inmheánaigh a áirithiú agus ligeann do na córais sin tairbhe a bhaint as prionsabal na saorghluaiseachta earraí agus seirbhísí. Trí na rialacha sin a leagan síos agus ag tógáil ar an obair a dhéanann an Grúpa Ardleibhéil Saineolaithe um an Intleacht Shaorga mar a léirítear sna Treoirínte maidir le hIntleacht Shaorga Iontaofa san Aontas, tacaíonn an Rialachán seo le cuspóir an Aontais a bheith ina cheannródaí domhanda i bhforbairt na hintleachta saorga sláine iontaofa eiticíúil, mar a shonraigh an Chomhairle Eorpach⁴, agus áirithítear leis go ndéantar prionsabail eiticíúla a chosaint, arna iarraidh sin go sonrath ag Parlaimint na hEorpa⁵.

⁴ An Chomhairle Eorpach, Cruinniú urghnách den Chomhairle Eorpach (an 1 agus an 2 Deireadh Fómhair 2020), – Conclúidí, EUCO 13/20, 2020, lch. 6.

⁵ Rún ó Parlaimint na hEorpa an 20 Deireadh Fómhair 2020 le moltaí don Choimisiún maidir le creat gnéithe eiticíúla den intleacht shaorga, den róbataic agus de theicneolaíochtaí gaolmhara, 2020/2012(INL).

(5a) Ba cheart feidhm a bheith ag na rialacha comhchuibhithe a leagtar síos sa Rialachán seo maidir le córais intleachta saorga 20a chur ar an margadh, a chur i mbun seirbhíse agus a úsáid thar earnálacha agus, i gcomhréir lena chur chuige maidir leis an gCreat Reachtach Nua, ba cheart go mbeidís gan dochar do dhlí an Aontais atá ann cheana, go háirithe maidir le cosaint sonraí, cosaint tomhaltóirí, cearta bunúsacha, fostaíocht agus sábháilteacht táirgí, lena bhfuil an Rialachán seo comhlántach. Dá bhrí sin, maidir leis na cearta agus na leigheasanna uile a thugtar le dlí sin an Aontais do thomhaltóirí agus do dhaoine eile a bhféadfadh tionchar diúltach a bheith ag córais intleachta saorga orthu, lena n-áirítear a mhéid a bhaineann le cúiteamh ar dhamáistí a d'fhéadfadh a bheith ann de bhun Threoir 85/374/CEE ón gComhairle an 25 Iúil 1985 maidir le comhfhogasú fhorálacha reachtaíochta, rialúcháin agus riaracháin na mBallstát a bhaineann le dliteanas i leith táirgí lochtacha, ní dhéantar difear dóibh agus tá siad infheidhme go hiomlán. Anuas air sin, is é is aidhm don Rialachán seo éifeachtacht na gceart agus na leigheasanna sin atá ann cheana a neartú trí cheanglais agus oibleagáidí sonracha a bhunú, lena n-áirítear i ndáil le trédhearcacht, doiciméadacht theicniúil agus coimeád taifead na gcórais intleachta saorga. Thairis sin, ba cheart feidhm a bheith ag na hoibleagáidí a chuirtear ar oibreoírí éagsúla a bhfuil baint acu le slabhra luacha na hintleachta saorga faoin Rialachán seo gan dochar do dhlíthe náisiúnta, i gcomhréir le dlí an Aontais, a bhfuil d'éifeacht acu úsáid córais intleachta saorga áirithe a theorannú i gcás ina dtagann na dlíthe sin lasmuigh de raon feidhme an Rialacháin seo nó ina saothraíonn siad cuspóirí dlisteanacha eile maidir le leas an phobail ná na cuspóirí a shaothraítear leis an Rialachán seo. Mar shampla, níor cheart don Rialachán seo difear a dhéanamh don dlí saothair náisiúnta agus do na dlíthe maidir le cosaint mionaoiseach (i.e. daoine faoi bhun 18 mbliana d'aois) agus Barúil Ghinearálta Uimh. 25 (2021) ó na Náisiúin Aontaithe maidir le cearta an linbh á gcur san áireamh, sa mhéid nach mbaineann siad go sonrach le córais intleachta saorga agus go saothraíonn siad cuspóirí dlisteanacha eile maidir le leas an phobail.

- (6) Ba cheart coincheap an chórais intleachta saorga a shainmhíniú go soiléir chun deimhneacht dhlíthiúil a áirithiú, agus solúbthacht a sholáthar chun freastal ar fhorbairtí teicneolaíocha a bheidh ann amach anseo. Ba cheart an sainmhíniú a bheith bunaithe ar phríomhthréithe feidhmiúla na hintleachta saorga amhail a cumais foghlama, réasúnaíochta nó samhaltaithe, agus í a idirdhealú ó chórais bogearraí agus ó chuir chuige ríomhchlárúcháin níos simplí. Go háirithe, chun críocha an Rialacháin seo, ba cheart go mbeadh córais intleachta saorga in ann, ar bhonn sonraí agus ionchur atá meaisínbhunaithe agus/nó duinebhunaithe, an bealach a oibriú amach chun tacar cuspóirí críochnaitheacha a thugann duine dóibh a bhaint amach, trí úsáid a bhaint as cur chuige mheaisínfhoghlama agus cuir chuige loighicbhunaithe agus eolasbhunaithe agus chun aschur a tháirgeadh amhail inneachar do chórais intleachta saorga giniúna (e.g. téacs, físeán nó íomhánna), tuartha, moltaí nó cinntí, a mbeadh tionchar acu ar an timpeallacht lena mbíonn an córas ag idirghníomhú, bíodh sé sin i ngné fhisiciúil nó dhigiteach. Níor cheart córas lena n-úsáidtear rialacha arna sainiú ag daoine nádúrtha amháin chun oibríochtaí a chur i gcrích go huathoibríoch a mheas mar chóras intleachta saorga. Is féidir córais intleachta saorga a dhearadh ionas go n-oibreoidh siad le leibhéal éagsúla neamhspleáchais agus is féidir iad a úsáid ar bhonn neamhspleách nó mar chomhpháirt táirge, gan beann ar cé acu an bhfuil nó nach bhfuil an córas comhtháite go fisiciúil sa táirge (leabaithe) nó ag freastal ar fheidhm an táirge gan a bheith comhtháite ann (neamhleabaithe). Baineann coincheap neamhspleáchas córais intleachta saorga leis an méid a fheidhmíonn córas den sórt sin gan rannpháirtíocht an duine.
- (6a) Díríonn cuir chuige mheaisínfhoghlama ar chórais a fhorbairt atá in ann foghlaim agus tuiscint a fháil ó shonraí chun fadhb maidir le feidhmiú a réiteach gan a bheith ríomhchlárúithe go sainráite le sraith teoracha céim ar chéim ó ionchur go haschur. Tagraíonn an fhoghlaim don phróiseas ríomhaireachtúil maidir le paraiméadair na samhla, ar comhstruchtúr matamaiticiúil í lena ngintear aschur bunaithe ar shonraí ionchuir, a bharrfheabhsú ó shonraí. Maidir le réimse na bhfadhbanna a dtugann meaisínfhoghlaim aghaidh orthu, is iondúil go mbíonn tascanna a dteipeann ar chineálacha eile cur chuige ina leith i gceist leo, toisc nach bhfuil an fhadhb curtha ar bhonn foirmiúil go hiomchuí, nó toisc go bhfuil an fhadhb doréitithe le cuir chuige neamhfoghlama. Áirítear le cuir chuige mheaisínfhoghlama, mar shampla, foghlaim faoi mhaoirseacht, foghlaim neamh-mhaoirsithe agus foghlaim atreisithe, lena mbaintear úsáid as modhanna éagsúla lena n-áirítear an domhainfhoghlaim le líonraí néaracha, teicnící staidrimh don fhoghlaim agus don infheireas (lena n-áirítear mar shampla cúlchéimniú loighisticiúil, meastachán Bayes) agus modhanna cuardaigh agus optamúcháin.

- (6b) Díríonn cuir chuige loighicbhunaithe agus eolasbhunaithe ar fhorbairt córas a bhfuil cumais réasúnaíochta loighciúil acu i ndáil le heolas chun fadhb maidir le feidhmiú a réiteach. Is iondúil go mbíonn bonn eolais agus inneall infearis i gceist le córais den sórt sin a ghineann aschur trí réasúnú ar an mbonn eolais. Is éard atá sa bhonn eolais, arna ionchódú ag saineolaithe ar daoine iad de ghnáth, eintitis agus caidrimh loighciúla atá ábhartha don fhadhb maidir le feidhmiú trí fhoirmiúlachas bunaithe ar rialacha, ointeolaíochtaí, nó graif eolais. Gníomhaíonn an t-inneall infearis leis an mbonn eolais agus eastóscann sé faisnéis nua trí oibríochtaí amhail sórtáil, cuardach, meaitseáil nó slabhrú. Áirítear leis na cuir chuige loighicbhunaithe agus eolasbhunaithe, mar shampla, léiriú ar eolas, ríomhchlárú ionduchtach (loighciúil), bunachair eolais, innill infearis agus asbhainte, córais réasúnaíochta agus shaineolacha (siombalach) agus modhanna cuardaigh agus optamúcháin.
- (6c) Chun coinníollacha aonfhoirmeacha a áirithiú do chur chun feidhme an Rialacháin seo maidir le cuir chuige mheaisínfhoghlama agus cuir chuige loighicbhunaithe agus eolasbhunaithe agus chun forbairtí sa mhargadh agus forbairtí teicneolaíocha a chur san áireamh, ba cheart cumhachtaí cur chun feidhme a thabhairt don Choimisiún.
- (6d) Ba cheart coincheap an ‘úsáideora’ dá dtagraítear sa Rialachán seo a léirmhíniú mar aon duine nádúrtha nó dlítheanach, lena n-áirítear údarás poiblí, gníomhaireacht nó comhlacht eile, a úsáideann córas intleachta saorga faoina n-údarás a n-úsáidtear an córas. Ag brath ar an gcineál córais intleachta saorga, d’fhéadfadh úsáid an chórais difear a dhéanamh do dhaoine nach iad an t-úsáideoir iad.

- (7) Maidir le coincheap na sonraí bithmhéadracha a úsáidtear sa Rialachán seo, ba cheart é a léiriú i gcomhréir le coincheap na sonraí bithmhéadracha mar a shainmhínítear in Airteagal 4(14) de Rialachán (AE) 2016/679 ó Pharlaimint na hEorpa agus ón gComhairle⁶, Airteagal 3(18) de Rialachán (AE) 2018/1725 ó Pharlaimint na hEorpa agus ón gComhairle⁷ agus Airteagal 3(13) de Threoir (AE) 2016/680 ó Pharlaimint na hEorpa agus ón gComhairle⁸.

⁶ Rialachán (AE) 2016/679 ó Pharlaimint na hEorpa agus ón gComhairle an 27 Aibreán 2016 maidir le daoine nádúrtha a chosaint i ndáil le sonraí pearsanta a phróiseáil agus maidir le saorghluaiseacht sonraí den sórt sin, agus lena n-aisghairtear Treoir 95/46/CE (An Rialachán Ginearálta maidir le Cosaint Sonraí) (IO L 119, 4.5.2016, lch. 1).

⁷ Rialachán (AE) 2018/1725 ó Pharlaimint na hEorpa agus ón gComhairle an 23 Deireadh Fómhair 2018 maidir le daoine nádúrtha a chosaint i ndáil le sonraí pearsanta a phróiseáil ag institiúidí, comhlachtaí, oifigí agus gníomhaireachtaí an Aontais agus maidir le saorghluaiseacht sonraí den sórt sin, agus lena n-aisghairtear Rialachán (CE) Uimh. 45/2001 agus Cinneadh Uimh. 1247/2002/CE (IO L 295, 21.11.2018, lch. 39)

⁸ Treoir (AE) 2016/680 ó Pharlaimint na hEorpa agus ón gComhairle an 27 Aibreán 2016 maidir le daoine nádúrtha a chosaint i ndáil le sonraí pearsanta a phróiseáil ag údaráis inniúla chun cionta coiriúla a chosc, a imscrúdú, a bhrath nó a ionchúiseamh nó chun pionóis choiriúla a fhorghníomhú, agus saorghluaiseacht sonraí den sórt sin, agus lena n-aisghairtear Cinneadh Réime 2008/977/CGB ón gComhairle (Treoir maidir le Forfheidhmiú an Dlí) (IO L 119, 4.5.2016, lch. 89).

- (8) Ba cheart coincheap an chianchórais sainaitheanta bithmhéadraí mar a úsáidtear sa Rialachán seo a shainmhíniú ar bhonn feidhmiúil mar chóras intleachta saorga atá beartaithe chun daoine nádúrtha a shainaithint go cianda de ghnáth, gan iad a bheith rannpháirteach go gníomhach, trí chomparáid a dhéanamh idir sonraí bithmhéadracha an duine agus na sonraí bithmhéadracha atá i stór sonraí tagartha, gan beann ar an teicneolaíocht, próisis nó cineálacha sonraí bithmhéadracha áirithe a úsáidtear. Is iondúil go n-úsáidtear cianchórais sainaitheanta bithmhéadraí den sórt sin chun roinnt daoine nó a n-iompar a bhrath (scanadh) ag an am céanna chun sainaithint roinnt daoine a éascú go suntasach gan iad a bheith rannpháirteach go gníomhach. Le sainmhíniú den sórt sin, ní áirítear córais fíorúcháin/fíordheimhniúcháin arb é an t-aon chuspóir a bheadh leo a dheimhniú gurb é duine nádúrtha ar leith an duine a mhaíonn sé a bheith ann, chomh maith le córais a úsáidtear chun aitheantas duine nádúrtha a dheimhniú chun críche rochtain a bheith aige ar sheirbhís, ar ghaires nó ar áitreabh agus chun na críche sin amháin. Tá údar lena bhfágáil ar lár toisc gur dócha go mbeidh tionchar beag ag córais den sórt sin ar chearta bunúsacha daoine nádúrtha i gcomparáid le cianchórais sainaitheanta bithmhéadraí a d'fhéadfaí a úsáid chun sonraí bithmhéadracha líon mór daoine a phróiseáil. I gcás na gcóras 'fíor-ama', déantar gabháil na sonraí bithmhéadracha, an chomparáid agus an tsainaithint ar fad go meandrach, go meandrach nach mór nó in aon chás gan moill mhór. I dtaca leis sin, níor cheart aon fhéidearthacht a bheith ann dul timpeall ar rialacha an Rialacháin seo maidir le húsáid 'fíor-ama' na gcóras intleachta saorga atá i gceist trí fhoráil a dhéanamh maidir le mionmhoilleanna. Bíonn úsáid ábhair 'bheo' nó 'neasbheo' i gceist le córais 'fíor-ama', amhail píosa scannánaíochta, arna ghiniúint le ceamara nó le gaires eile ag a bhfuil feidhmiúlacht chomhchosúil. I gcás na gcóras 'iar-aimseartha', i gcodarsnacht leis sin, tá na sonraí bithmhéadracha gafa cheana féin agus déantar an chomparáid agus an tsainaithint tar éis moill mhór. Is éard atá i gceist leis sin ábhar amhail pictiúir nó píosa scannánaíochta, arna nginiúint le ceamaraí teilifíse ciorcaid iata nó le gairis phríobháideacha, a gineadh roimh úsáid an chórais i leith na ndaoine nádúrtha lena mbaineann.

- (9) Chun críocha an Rialacháin seo, ba cheart coincheap an spáis atá inrochtana don phobal a thuiscint mar thagairt d'aon áit fhisiciúil atá inrochtana do líon neamhchinntithe daoine nádúrtha, agus gan beann ar an áit atá i gceist a bheith faoi úinéireacht phríobháideach nó phoiblí agus ar an ngníomhaíocht a bhféadfar an áit a úsáid ina leith, amhail tráchtáil (mar shampla siopaí, bialanna, caiféanna), seirbhísí (mar shampla bainc, gníomhaíochtaí gairmiúla, fáilteachas), spórt (mar shampla, linnte snámha, giomnásiamáí, staideanna), iompar (mar shampla, stáisiúin bus, meitreo agus iarnróid, aerfoirt, modhanna iompair), siamsaíocht (mar shampla, pictiúrlanna, amharclanna, músaeim, hallaí ceolchoirme agus comhdhálacha) fóillíocht nó eile (mar shampla, bóithre agus cearnóga poiblí, páirceanna, foraoisí, clóis súgartha). Ba cheart áit a aicmiú mar áit a bhfuil rochtain ag an bpobal uirthi freisin más rud é, gan beann ar acmhainneacht nó srianta slándála a d'fhéadfadh a bheith ann, go bhfuil rochtain faoi réir coinníollacha réamhshocráithe áirithe, ar féidir le líon neamhchinntithe daoine iad a chomhlíonadh, amhail ticéad a cheannach nó ticéad iompair a cheannach, clárúchán roimh ré nó aois áirithe a bheith slánaithe agat. Os a choinne sin, níor cheart a mheas go bhfuil áit inrochtana ag an bpobal má tá rochtain teoranta do dhaoine nádúrtha sonracha agus sainithe trí dhlí an Aontais nó tríd an dlí náisiúnta a bhaineann go díreach le sábháilteacht nó slándáil phoiblí nó trí thoil an duine a bhfuil an t-údarás ábhartha aige san áit a léiriú go soiléir. Ní thugtar le tuiscint go bhfuil rochtain ag an bpobal ar an áit toisc gur féidir rochtain a fháil uirthi (e.g. doras nach bhfuil glas air, geata oscailte i bhfál) agus comharthaí nó imthosca inti a thugann a mhalairt le fios (e.g. comharthaí lena dtoirmiscear nó lena sriantar rochtain). Is áiteanna iad nach bhfuil rochtain ag an bpobal orthu áitribh chuideachta agus mhonarchan chomh maith le hoifigi agus ionaid oibre, ach amháin fostaithe ábhartha agus soláthraithe seirbhíse, mar a bheartaítear é. Níor cheart príosúin nó limistéir rialaithe teorann a áireamh i spásanna atá inrochtana don phobal. D'fhéadfadh roinnt áiteanna eile a bheith comhdhéanta de limistéir nach bhfuil inrochtana don phobal agus a bhfuil rochtain ag an bpobal orthu, amhail halla foirgnimh chónaithe phríobháidigh atá riachtanach chun rochtain a fháil ar oifig dochtúra nó an t-aerfort. Ní chumhdaítear spásanna ar líne ach oiread, ós rud é nach spásanna fisiciúla iad. Cé acu atá spás a bhfuil rochtain ag an bpobal air nó nach bhfuil, áfach, ba cheart sin a chinneadh ar bhonn cás ar chás, ag féachaint do shonraíochtaí an cháis aonair faoi chaibidil.
- (10) Chun cothrom na Féinne agus cosaint éifeachtach cearta agus saoirsí daoine aonair ar fud an Aontais a áirithiú, ba cheart feidhm a bheith ag na rialacha a bhunaítear leis an Rialachán seo maidir le soláthraithe córas intleachta saorga ar bhonn neamh-idirdhealaitheach, gan beann ar iad a bheith bunaithe laistigh den Aontas nó i dtríú tír, agus maidir le húsáideoirí córas intleachta saorga atá bunaithe laistigh den Aontas.

- (11) I bhfianaise a nádúr digiteach, ba cheart córais intleachta saorga áirithe a theacht faoi raon feidhme an Rialacháin seo fiú mura gcuirtear ar an margadh iad, nó mura gcuirtear i mbun seirbhíse iad nó mura n-úsáidtear san Aontas iad. Is amhlaidh atá, mar shampla, i gcás oibreoir atá bunaithe san Aontas a dhéanann Conradh maidir le seirbhísí áirithe le hoibreoir atá bunaithe lasmuigh den Aontas i ndáil le gníomhaíocht atá le déanamh ag córas intleachta saorga a cháileodh mar ghníomhaíocht ardriosca. Sna himthosca sin, maidir leis an gcóras intleachta saorga a úsáideann an oibreoir lasmuigh den Aontas, d'fhéadfadh sé sonraí a bhailítear san Aontas agus a aistrítear amach as an Aontas go dlíthiúil a phróiseáil, agus aschur an chórais intleachta saorga sin atá mar thoradh ar an bpróiseáil sin a sholáthar don oibreoir conarthach san Aontas, gan an córas intleachta saorga sin a chur ar an margadh, a chur i mbun seirbhíse nó a úsáid san Aontas. Chun dul timpeall ar an Rialachán seo a chosc agus chun cosaint éifeachtach daoine nádúrtha atá lonnaithe san Aontas a áirithiú, ba cheart feidhm a bheith ag an Rialachán seo maidir le soláthraithe agus úsáideoirí córas intleachta saorga atá bunaithe i dtríú tír, sa mhéid a úsáidtear an t-aschur san Aontas a tháirgtear leis na córais sin. Mar sin féin, chun socruithe atá ann cheana a chur san áireamh chomh maith le riachtanais speisialta i gcás comhar amach le páirtithe eachtracha amach anseo a ndéantar malartú faisnéise agus fianaise leo, níor cheart feidhm a bheith ag an Rialachán seo maidir le húdaráis phoiblí tríú tír agus eagraíochtaí idirnáisiúnta agus iad ag gníomhú faoi chuimsiú comhaontuithe idirnáisiúnta a tugadh i gcrích ar an leibhéal náisiúnta nó ar an leibhéal Eorpach le haghaidh fhorfheidhmiú an dlí agus comhar breithiúnach leis an Aontas nó leis na Ballstáit. Tá comhaontuithe den sórt sin tugtha i gcrích go déthaobhach idir na Ballstáit agus tríú tíortha nó idir an tAontas Eorpach, Europol agus gníomhaireachtaí eile de chuid an Aontais agus tríú tíortha agus eagraíochtaí idirnáisiúnta. Údaráis na mBallstát is faighteoirí agus institiúidí, oifigí agus comhlachtaí agus gníomhaireachtaí an Aontais a bhaineann úsáid as aschur den sórt sin san Aontas, leanann siadsan de bheith cuntasach chun a áirithiú go gcomhlíonann siad dlí an Aontais. Nuair a dhéanfar na comhaontuithe idirnáisiúnta sin a athbhreithniú nó nuair a thabharfar comhaontuithe nua i gcrích amach anseo, ba cheart do na páirtithe conarthacha a ndícheall a dhéanamh na comhaontuithe sin a ailíniú le ceanglais an Rialacháin seo.
- (12) Ba cheart feidhm a bheith ag an Rialachán seo freisin maidir le hinstitiúidí, oifigí, comhlachtaí agus gníomhaireachtaí an Aontais agus iad ag gníomhú mar sholáthraí nó úsáideoir córais intleachta saorga.

(-12a) Má dhéantar, agus a mhéid a dhéantar, córais intleachta saorga a chur ar an margadh, a chur i mbun seirbhíse, nó a úsáid le modhnú nó gan mhodhnú na gcóras sin chun críocha míleata, cosanta nó slándála náisiúnta, ba cheart iad sin a eisiáimh ó raon feidhme an Rialacháin seo gan beann ar an gcineál eintitis atá i mbun na gníomhaíochtaí sin, mar shampla más eintiteas poiblí nó príobháideach é. A mhéid a bhaineann le críocha míleata agus cosanta, tá údar leis an eisiáimh sin de bharr Airteagal 4(2) CAE agus sonraíochtaí na mBallstát agus chomhbheartas cosanta an Aontais a chumhdaítear le Caibidil 2 de Theideal V den Chonradh ar an Aontas Eorpach (CAE) atá faoi réir an dlí idirnáisiúnta phoiblí, arb é, dá bhrí sin, an creat dlíthiúil is iomchuí chun córais intleachta saorga a rialáil i gcomhthéacs úsáid fornirt mharfaigh agus córas intleachta saorga eile i gcomhthéacs gníomhaíochtaí míleata agus cosanta. A mhéid a bhaineann le cuspóirí slándála náisiúnta, tá údar cuí leis an eisiáimh toisc gurb iad na Ballstáit amháin atá freagrach as an tslándáil náisiúnta i gcomhréir le hAirteagal 4(2) CAE agus mar gheall ar chineál sonracha agus riachtanais oibríochtúla na gníomhaíochtaí slándála náisiúnta agus rialacha náisiúnta sonracha is infheidhme maidir leis na gníomhaíochtaí sin. Mar sin féin, maidir le córas intleachta saorga a cuireadh ar an margadh, a cuireadh i mbun seirbhíse nó a úsáideadh - ar forbraíodh é chun críocha míleata, cosanta nó slándála náisiúnta - má úsáidtear an córas intleachta saorga sin lasmuigh de na críocha sin go sealadach nó go buan chun críocha eile (mar shampla, chun críocha sibhialta nó daonnúla, chun críocha fhorfheidhmiú an dlí nó na slándála poiblí), thiocfadh córas den sórt sin faoi raon feidhme an Rialacháin seo. Sa chás sin, ba cheart don eintiteas a úsáideann an córas chun críocha eile seachas críocha míleata, cosanta nó slándála náisiúnta a áirithiú go gcomhlíonann an córas an Rialachán seo, ach amháin i gcás go gcomhlíonann an córas sin an Rialachán seo cheana féin. Maidir le córais intleachta saorga a chuirtear ar an margadh nó i mbun seirbhíse chun críocha eisiata (i.e. míleata, cosanta nó slándála náisiúnta) agus chun críche amháin nó níos mó nach bhfuil eisiata (e.g. críocha sibhialta, forfheidhmiú an dlí, etc.), tagann siad faoi raon feidhme an Rialacháin seo agus ba cheart do sholáthraithe na gcóras sin comhlíonadh an Rialacháin seo a áirithiú. Sna cásanna sin, ós rud é go bhféadfadh córas intleachta saorga teacht faoi raon feidhme an Rialacháin seo, níor cheart dó difear a dhéanamh don fhéidearthacht go bhféadfadh eintitis gníomhaíochtaí slándála náisiúnta, cosanta agus míleata a dhéanamh, gan beann ar an gcineál eintitis a dhéanann na gníomhaíochtaí sin, córais intleachta saorga a úsáid chun críocha slándála náisiúnta, míleata agus cosanta, a bhfuil a n-úsáid eisiata ó raon feidhme an Rialacháin seo. Maidir le córas intleachta saorga a chuirtear ar an margadh chun críocha sibhialta nó fhorfheidhmiú an dlí agus a úsáidtear le modhnú nó gan mhodhnú chun críocha míleata, cosanta nó slándála náisiúnta, níor cheart dó teacht faoi raon feidhme an Rialacháin seo, gan beann ar an gcineál eintitis a dhéanann na gníomhaíochtaí sin.

- (12a) Ba cheart don Rialachán seo a bheith gan dochar do na forálacha maidir le dliteanas na soláthraithe seirbhíse idirghabhálacha a leagtar amach i dTreoir 2000/31/CE ó Pharlaimint na hEorpa agus ón gComhairle [arna leasú leis an Ionstraim um Sheirbhísí Digiteacha].
- (12b) Níor cheart don Rialachán seo an bonn a bhaint ó ghníomhaíocht taighde agus forbartha agus ba cheart dó saoirse na heolaíochta a urramú. Is gá, dá bhrí sin, córais intleachta saorga a fhorbraítear agus a chuirtear i mbun seirbhíse go sonracha a eisiáimh óna raon feidhme chun críche taighde agus forbartha eolaíche, agus chun na críche sin amháin, agus chun a áirithiú nach ndéanfaidh an Rialachán seo difear ar shlí eile do ghníomhaíocht eolaíochta taighde agus forbartha maidir le córais intleachta saorga. A mhéid a bhaineann le gníomhaíocht taighde atá dírithe ar tháirgí arna déanamh ag soláthraithe, níor cheart feidhm a bheith ag forálacha an Rialacháin seo ach oiread. Tá an méid sin gan dochar don oibleagáid maidir leis an Rialachán seo a chomhlíonadh nuair a chuirtear córas intleachta saorga a thagann faoi raon feidhme an Rialacháin seo ar an margadh nó i mbun seirbhíse mar thoradh ar an ngníomhaíocht taighde agus forbartha sin agus do chur i bhfeidhm na bhforálacha maidir le boscaí gainimh rialála agus tástáil i bhfíordhálaí. Thairis sin, gan dochar don mhéid thuas maidir le córais intleachta saorga a fhorbraítear agus a chuirtear i mbun seirbhíse go sonracha chun críche taighde agus forbartha eolaíche agus chun na críche sin amháin, ba cheart d'aon chóras intleachta saorga eile a d'fhéadfaí a úsáid chun aon ghníomhaíocht taighde agus forbartha a dhéanamh leanúint de bheith faoi réir fhorálacha an Rialacháin seo. I ngach uile chás, ba cheart aon ghníomhaíocht taighde agus forbartha a dhéanamh i gcomhréir le caighdeáin eiteiciúla proifisiúnta aitheanta don taighde eolaíoch.

(12c) I bhfianaise chineál agus chastacht an tslabhra luacha do chórais intleachta saorga, tá sé ríthábhachtach soiléiriú a dhéanamh ar ról na ngníomhaithe a d'fhéadfadh rannchuidiú le forbairt córas intleachta saorga, go háirithe córais intleachta saorga ardriosca. Go háirithe, is gá a shoiléiriú gur córais intleachta saorga ilchuspóireacha iad córais intleachta saorga atá beartaithe ag an soláthraí chun feidhmeanna is infheidhme go ginearálta a chomhlíonadh, amhail aitheantas íomhánna/chainte, agus in iolracht chomhthéacsanna. Féadfar iad a úsáid mar chórais intleachta saorga ardriosca leo féin nó féadfar iad a úsáid mar chomhpháirteanna de chórais intleachta saorga ardriosca eile. Dá bhrí sin, mar gheall ar a gcineál ar leith agus chun comhroinnt chothrom freagrachtaí feadh shlabhra luacha na hintleachta saorga a áirithiú, ba cheart na córais sin a bheith faoi réir ceanglais agus oibleagáidí comhréireacha agus níos sonraí faoin Rialachán seo agus ardleibhéal cosanta do chearta bunúsacha, sláinte agus sábháilteacht á áirithiú ag an am céanna. Ina theannta sin, ba cheart do sholáthraithe córas intleachta saorga ilchuspóireach, gan beann ar cé acu a fhéadfar nó nach féidir iad a úsáid mar chórais intleachta saorga ardriosca sa cháil sin ag soláthraithe eile nó mar chomhpháirteanna de chórais intleachta saorga ardriosca, comhoibriú, de réir mar is iomchuí, le soláthraithe na gcóras intleachta saorga ardriosca faoi seach chun a gcomhlíontacht leis na hoibleagáidí ábhartha faoin Rialachán seo agus leis na húdaráis inniúla a bhunaítear faoin Rialachán seo a chumasú. Chun saintréithe sonracha na gcóras intleachta saorga ilchuspóireach agus na forbairtí margaidh agus teicneolaíochta atá ag athrú go tapa sa réimse a chur san áireamh, ba cheart cumhachtaí cur chun feidhme a thabhairt don Choimisiún chun cur i bhfeidhm na gceanglas a bhunaítear faoin Rialachán seo a shonrú agus a oiriúnú do chórais intleachta saorga ilchuspóireacha agus chun an fhaisnéis atá le comhroinnt ag soláthraithe córas intleachta saorga ilchuspóireach a shonrú chun a chur ar chumas sholáthraithe an chórais intleachta saorga ardriosca faoi seach a n-oibleagáidí faoin Rialachán seo a chomhlíonadh.

- (13) Chun ardleibhéal comhsheasmhach cosanta a áirithiú do leasanna poiblí maidir le sláinte, sábháilteacht agus cearta bunúsacha, ba cheart caighdeáin normatacha choiteanna a bhunú le haghaidh gach córais intleachta saorga ardriosca. Ba cheart na caighdeáin sin a bheith i gcomhréir leis an gCairt um Chearta Bunúsacha an Aontais Eorpaigh (an Chairt) agus ba cheart dóibh a bheith neamh-idirdhealaitheach agus i gcomhréir le gealltanais idirnáisiúnta trádála an Aontais.
- (14) Chun tacar rialacha ceangailteacha atá comhréireach agus éifeachtach a thabhairt isteach maidir le córais intleachta saorga, ba cheart cur chuige rioscabhunaithe atá sainithe go soiléir a leanúint. Leis an gcur chuige sin, ba cheart cineál agus inneachar na rialacha sin a chur in oiriúint do dhéine agus raon feidhme na rioscaí a d'fhéadfadh a bheith ag baint le córais intleachta saorga. Is gá, dá bhrí sin, toirmeasc a chur ar chleachtais intleachta saorga áirithe, ceanglais a leagan síos maidir le córais intleachta saorga ardriosca agus oibleagáidí a leagan síos le haghaidh na n-oibreoirí ábhartha, agus oibleagáidí trédhearcachta a leagan síos maidir le córais intleachta saorga áirithe.
- (15) Cé is moite de na húsáidí tairbhiúla éagsúla a bhaineann leis an intleacht shaorga, d'fhéadfaí an teicneolaíocht sin a mhí-úsáid freisin agus uirlisí úra cumhachtacha a sholáthar le haghaidh cleachtais ionramhálacha dhúshaothraithe agus cleachtais smachta shóisialta. D'fhéadfadh cleachtais den chineál sin dochar ar leith a dhéanamh agus ba cheart iad a thoirmeasc toisc go dtagann siad salach ar luachanna an Aontais maidir le meas ar dhínit an duine, an tsaoirse, an daonlathas, an combhionannas, an smacht reachta agus cearta bunúsacha an Aontais, lena n-áirítear an ceart chun neamh-idirdhealú, an ceart chun cosaint sonraí, an ceart chun príobháideachais agus cearta an linbh.

(16) Is féidir teicnící ionramhála atá cumasaithe ag intleacht shaorga a úsáid chun a chur ina luí ar dhaoine dul i mbun iompraíocht neamh-inmhianaithe, nó chun iad a mheabhlú trí thathant orthu cinntí a dhéanamh ar bhealach a threascraíonn agus a chuireann isteach ar a neamhspleáchas, a gcinnteoireacht agus a roghanna. Maidir le córais intleachta saorga áirithe a chur ar an margadh, a chur i mbun seirbhíse nó iad a úsáid, ar córais iad a dhéanann iompraíocht an duine a shaobhadh go hábhartha, i gcás inar dócha go ndéanfaí díobháil fhisiciúil nó shíceolaíoch, tá siad thar a bheith contúirteach agus ba cheart na córais sin a thoirmeasc. Imscarann na córais intleachta saorga sin comhpháirteanna fothairseachúla amhail spreagthaigh fuaime, íomhá, fise nach féidir le daoine a bhrath ós rud é go bhfuil siad lasmuigh de dhearcadh an duine nó teicnící fothairseachúla eile a threascraíonn nó a chuireann isteach ar neamhspleáchas, ar chinnteoireacht nó ar roghanna daoine ar bhealach nach bhfuil daoine ar an eolas fúthu go comhfhiosach, nó fiú má tá siad ar an eolas fúthu, níl smacht acu orthu nó ní féidir leo cur ina n-aghaidh, mar shampla i gcásanna comhéadan meaisín-inchinne nó réaltacht fhíorúil. Ina theannta sin, féadfaidh córais intleachta saorga leas a bhaint as leochaileachtaí grúpa shonraigh daoine mar gheall ar a n-aois, a míchumas de réir bhrí Threoir (AE) 2019/882, nó staid shóisialta nó eacnamaíoch shonrach ar dócha go mbeidh na daoine sin níos leochailí i leith dúshaothrú amhail daoine atá ag maireachtáil faoi fhíorbhochtaineacht, mionlaigh eitneacha nó reiligiúnacha. Is féidir na córais intleachta saorga sin a chur ar an margadh, a chur i mbun seirbhíse nó a úsáid leis an gcuspóir nó an éifeacht iompar duine a shaobhadh go hábhartha agus ar bhealach is cúis le díobháil fhisiceach nó shíceolaíoch nó ar dhócha is cúis le díobháil fhisiceach nó shíceolaíoch don duine sin nó do dhuine eile nó do ghrúpaí daoine, lena n-áirítear díobháil a d'fhéadfaí a charnadh le himeacht ama. Ní fhéadfar a thoimhdiú go bhfuil rún ann an t-iompar a shaobhadh má eascraíonn an saobhadh as fachtóirí lasmuigh den chóras intleachta saorga nach bhfuil smacht ag an soláthraí ná ag an úsáideoir orthu, rud a chiallaíonn fachtóirí nach bhféadfadh soláthraí ná úsáideoir an chórais intleachta saorga a thuar agus a mhaolú go réasúnta. I gcás ar bith, ní gá go mbeadh sé ar intinn ag an soláthraí ná ag an úsáideoir díobháil fhisiciúil nó shíceolaíoch a dhéanamh, fad is a eascraíonn an díobháil sin as na cleachtais ionramhála nó dhúshaothraithe atá cumasaithe ag intleacht shaorga. Tá na toirmisc ar na cleachtais intleachta saorga sin comhlántach leis na forálacha atá i dTreoir 2005/29/CE, go háirithe go dtoirmisctear i ngach cás cleachtais tráchtála éagóracha as a n-eascraíonn díobháil eacnamaíoch nó airgeadais do thomhaltóirí, gan beann ar iad a bheith curtha i bhfeidhm trí chórais intleachta saorga nó ar bhealach eile. Níor cheart go ndéanadh na toirmisc ar chleachtais ionramhála agus dhúshaothraithe sa Rialachán seo difear do chleachtais dhleathacha i gcomhthéacs cóireála leighis amhail cóireáil shíceolaíoch do ghalar meabhrach nó athshlánú fhisiciúil, nuair a dhéantar na cleachtais sin i gcomhréir leis na caighdeáin leighis agus leis an reachtaíocht leighis is infheidhme. Ina theannta sin, níor cheart cleachtais tráchtála choiteanna agus dhlisteanacha atá i gcomhréir leis an dlí is infheidhme a mheas iontu féin mar chleachtais ionramhála dhíobhálacha intleachta saorga.

- (17) D’fhéadfadh sé go mbeadh torthaí idirdhealaitheacha agus eisiámh grúpaí áirithe ann de thoradh scóráil shóisialta daoine nádúrtha ag údaráis phoiblí nó gníomhaithe príobháideacha, rud a sholáthraítear le córais intleachta saorga áirithe. D’fhéadfadh sé go sárófaí leo an ceart chun dínite agus an ceart chun neamh-idirdhealú agus luachanna maidir le comhionannas agus an ceartas. Déanann na córais intleachta saorga sin meastóireacht agus rangú ar dhaoine nádúrtha bunaithe ar iompraíocht shóisialta na ndaoine sin i gcomhthéacsanna éagsúla nó bunaithe ar shaintréithe pearsanta nó saintréithe pearsantachta aitheanta nó tuartha. De thoradh an scóir shóisialta arna fháil ó na córais intleachta saorga sin, d’fhéadfadh sé go gcaithfí go neamhfhabhrach nó go díobhálach le daoine nádúrtha nó grúpaí iomlána daoine nádúrtha i gcomhthéacsanna sóisialta nach bhfuil aon bhaint acu leis an gcomhthéacs inar gineadh nó inar bailíodh na sonraí i dtosach báire nó d’fhéadfadh sé go gcaithfí leo go díobhálach ar bhealach atá gan údar nó díréireach le tromchúis a n-iompraíochta sóisialta. Ba cheart, dá bhrí sin, cosc a chur ar chórais intleachta saorga a bhfuil na cleachtais scórála neamh-inghlactha sin i gceist leo. Níor cheart don toirmeasc sin difear a dhéanamh do chleachtais mheastóireachta dhleathacha daoine nádúrtha a dhéantar chun críche sonraí amháin nó níos mó i gcomhréir leis an dlí.
- (18) Maidir le húsáid córas intleachta saorga le haghaidh cian-sainathint bhithmhéadrach ‘fíor-ama’ daoine nádúrtha i spásanna a bhfuil rochtain ag an bpobal orthu chun críoch fhorfheidhmiú an dlí, measfar í a bheith an-ionrach maidir le cearta agus saoirsí na ndaoine lena mbaineann, sa mhéid go bhfuil féidearthacht ann go ndéanfadh sé difear do shaol príobháideach cuid mhór den phobal, go nginfeadh sé mothúchán go bhfuiltear faoi fhaireachas leanúnach agus go ndéanfadh sé feidhmiú saoirse tionóla agus cearta bunúsacha eile a dhíspreagadh. Thairis sin, i bhfianaise neasacht an tionchair agus na ndeiseanna teoranta atá ann maidir le seiceálacha agus ceartuithe breise i ndáil le húsáid na gcóras sin a oibríonn i ‘bhfíor-am’, bíonn rioscaí níos mó ann i leith chearta agus saoirsí na ndaoine a mbaineann na gníomhaíochtaí forfheidhmithe dlí leo.

(19) Ba cheart, dá bhrí sin, toirmeasc a chur ar úsáid na gcóras sin chun críoch fhorfheidhmiú an dlí, ach amháin maidir le cásanna atá liostaithe go cuimsitheach agus sainithe go cúng, cásanna lena bhfuil dianghá le húsáid na gcóras sin chun freastal ar leas substaintiúil maidir leis an bpobal, ina mheastar gur mó a dtábhacht ná na rioscaí. Baineann na cásanna sin le cuardach daoine a d'fhéadfadh a bheith ina n-íospartaigh coireachta, lena n-áirítear leanaí ar iarraidh; bagairtí áirithe ar bheatha nó sábháilteacht fhisiciúil daoine nádúrtha nó ionsaí sceimhlitheoireachta; agus brath, logánú, sainaitheantú nó ionchúiseamh duine faoi dhrochamhras nó dhéantóirí na gcionta coiriúla dá dtagraítear i gCinneadh Réime 2002/584/CGB⁹ ón gComhairle más cionta cóiriúla iad atá inphionóis sa Bhallstát lena mbaineann le pianbhreith choimeádta nó le hordú coinneála ar feadh uastréimhse 3 bliana ar a laghad agus mar a dhéantar sainmhíniú orthu i ndlí an Bhallstáit sin. An tairseach sin maidir leis an bpianbhreith choimeádta nó ordú coinneála i gcomhréir leis an dlí náisiúnta, rannchuidíonn sé chun a áirithiú gur cheart an cion a bheith tromchúiseach go leor le húdar a thabhairt le húsáid cianchóras sainaitheanta bithmhéadraí 'fíor-ama'. Thairis sin, ar an 32 chion chóiriúla a liostaítear i gCinneadh Réime 2002/584/CGB ón gComhairle, is dócha, i gcleachtas, go mbeidh cuid acu níos ábhartha ná a chéile, ós rud é go mbeidh gá ar leibhéal éagsúla go hintuartha le hiontaoibh cian-sainaitheanta bithmhéadraí 'fíor-ama' agus go mbeadh sé comhréireach ar leibhéal éagsúla den chur chun cinn praiticiúil maidir le brath, logánú, sainaitheantú nó ionchúiseamh duine faoi dhrochamhras nó dhéantóirí na gcionta coiriúla éagsúla a liostaítear agus ag féachaint do na héagsúlachtaí dóchúla maidir le tromchúis, dóchúlacht agus leibhéal na díobhála nó na hiarmhairtí diúltacha a d'fhéadfadh a bheith ann. Ina theannta sin, ba cheart go gcaomhnófaí leis an Rialachán seo cumas na n-údarás forfheidhmithe dlí, rialaithe teorann, inimirce nó na n-údarás tearmainn seiceálacha aitheantais a dhéanamh i láthair an duine lena mbaineann i gcomhréir leis na coinníollacha a leagtar amach i ndlí an Aontais agus sa dlí náisiúnta maidir leis na seiceálacha sin. Go háirithe, ba cheart d'údaráis forfheidhmithe dlí, rialaithe teorann, inimirce nó tearmainn a bheith in ann úsáid a bhaint as córais faisnéise, i gcomhréir le dlí an Aontais nó leis an dlí náisiúnta, chun duine a shainaitheantú a dhiúltaíonn a bheith sainaitheanta nó nach bhfuil in ann a aitheantas a shonrú nó a chruthú, gan ceangal a bheith orthu leis an Rialachán seo réamhúdarú a fháil. D'fhéadfadh a bheith i gceist leis seo, mar shampla, duine a raibh baint aige le coir, nó duine nach bhfuil toilteanach, nó nach bhfuil ar a chumas, mar gheall ar thimpiste nó riocht sláinte, a aitheantas a nochtadh d'údaráis forfheidhmithe dlí.

⁹ Cinneadh Réime 2002/584/CGB ón gComhairle an 13 Meitheamh 2002 maidir leis an mbarántas gabhála Eorpach agus na nósanna imeachta um thabhairt suas idir na Ballstáit (IO L 190, 18.7.2002, lch. 1).

- (20) Chun a áirithiú go n-úsáidtear na córais sin ar bhealach freagrach comhréireach, tá sé tábhachtach freisin a shuí gur cheart eilimintí áirithe a chur san áireamh i ngach ceann de na cásanna a liostaítear go cuimsitheach agus a sainítear go cúng, go háirithe a mhéid a bhaineann le nádúr an cháis ba chúis leis an iarraidh agus iarmhairtí na húsáide i leith chearta agus shaoirsí na ndaoine uile lena mbaineann agus na coimircí agus coinníollacha dá bhforáiltear leis an úsáid. Thairis sin, maidir le húsáid córas intleachta saorga le haghaidh cianchórais sainaitheanta bithmhéadraí ‘fíor-ama’ i spásanna a bhfuil rochtain ag an bpobal orthu chun críoch fhorfheidhmiú an dlí, ba cheart í a bheith faoi réir teorainneacha iomchuí i dtaca le ham agus spás, ag féachaint go háirithe don fhianaise nó do na tásca maidir leis na bagairtí, na híospartaigh nó an déantóir. Ba cheart bunachar sonraí tagartha na ndaoine a bheith iomchuí lena úsáid i ngach ceann de na cásanna a luaitear thuas.
- (21) Maidir le gach úsáid de chianchóras sainaitheanta bithmhéadraí ‘fíor-ama’ i spásanna a bhfuil rochtain ag an bpobal orthu chun críoch fhorfheidhmiú an dlí, ba cheart di a bheith faoi réir údarú sonrach sainráite ag údarás breithiúnach nó ag údarás riaracháin neamhspleách Ballstáit. Ba cheart, i bprionsabal, an t-údarú sin a fháil sula n-úsáidfean an córas d’fhonn duine nó daoine a shainaitheint. Ba cheart eisceachtaí ar an riail seo a cheadú i gcásanna práinneacha a bhfuil údar leo, is é sin, cásanna ina bhfuil sé dodhéanta go héifeachtúil agus go hoibiachtúil údarú a fháil sula n-úsáidfean an córas de thairbhe na húsáide sin. Sna cásanna práinneacha sin, ba cheart an úsáid a theorannú don íosmhéid a bhfuil géarghá leis agus í a bheith faoi réir na gcoimircí agus na gcoinníollacha iomchuí, de réir mar a chinntear leis an dlí náisiúnta agus a shonraítear i gcomhthéacs gach cás práinneach ar leith ag an údarás forfheidhmithe dlí féin. Ina theannta sin, ba cheart don údarás forfheidhmithe dlí féachaint le húdarú a fháil a luaithe is féidir sna cásanna sin, agus na cúiseanna nach rabhthas in ann é a iarraidh níos luaithe a thabhairt.

- (22) Thairis sin, is iomchuí a fhoráil, laistigh de chreat uileghabhálach an Rialacháin seo, nár cheart úsáid den sórt sin ar chríoch Bhallstáit i gcomhréir leis an Rialachán seo a bheith indéanta ach amháin i gcás inar chinn an Ballstát i dtrácht, agus sa mhéid gur chinn an Ballstát i dtrácht, foráil a dhéanamh go sainráite go bhféadfaí an úsáid sin a údarú ina rialacha mionsonraithe den dlí náisiúnta. Dá réir sin, beidh sé de shaoirse ag na Ballstáit faoin Rialachán seo gan foráil a dhéanamh in aon chor maidir le féidearthacht den sórt sin nó gan foráil a dhéanamh maidir le féidearthacht den sórt sin ach amháin i leith cuid de na cuspóirí a bhfuil sé de chumas acu údar a thabhairt le húsáid údaraithe a shainaitheann sa Rialachán seo.
- (23) Is gá sonraí bithmhéadracha a phróiseáil chun córas intleachta saorga a úsáid le haghaidh cian-sainaitheant bhithmhéadrach ‘fíor-ama’ daoine nádúrtha i spásanna a bhfuil rochtain ag an bpobal orthu chun críoch fhorfheidhmiú an dlí. Na rialacha sa Rialachán seo maidir le toirmeasc a chur ar an úsáid sin, faoi réir eisceachtaí áirithe, atá bunaithe ar Airteagal 16 CFAE, ba cheart feidhm a bheith acu mar *lex specialis* i leith na rialacha atá in Airteagal 10 de Threoir (AE) 2016/680 maidir le próiseáil sonraí bithmhéadracha, agus dá bhrí sin an úsáid sin agus an phróiseáil sonraí bithmhéadracha lena mbaineann a rialáil go cuimsitheach. Dá bhrí sin, ba cheart an úsáid agus an phróiseáil sin gan bheith ach indéanta a mhéid atá siad comhoiriúnach leis an gcreat a leagtar amach leis an Rialachán seo, gan féidearthacht a bheith ann, lasmuigh den chreat sin, do na húdaráis inniúla, agus iad ag gníomhú chun críoch fhorfheidhmiú an dlí, na córais sin a úsáid agus na sonraí sin lena mbaineann a phróiseáil ar na forais a liostaítear in Airteagal 10 de Threoir (AE) 2016/680. Sa chomhthéacs seo, níl an Rialachán seo beartaithe a bheith ina bhunús dlí leis an bpróiseáil sonraí pearsanta faoi Airteagal 8 de Threoir 2016/680. Maidir le húsáid cianchórais sainaitheanta bithmhéadraí ‘fíor-ama’ i spásanna a bhfuil rochtain ag an bpobal orthu chun críoch eile cé is moite d’fhorfheidhmiú an dlí, lena n-áirítear úsáid ag údaráis inniúla, níor cheart í a chumhdach, áfach, leis an gcreat sonrath maidir leis an úsáid sin chun críoch fhorfheidhmiú an dlí a shocraítear leis an Rialachán seo. An úsáid sin chun críoch eile cé is moite d’fhorfheidhmiú an dlí, níor cheart, dá bhrí sin, í a bheith faoi réir an cheanglais údaraithe faoin Rialachán seo ná na rialacha mionsonraithe is infheidhme sa dlí náisiúnta lena dtabharfaí éifeacht dó.

- (24) Maidir le próiseáil sonraí bithmhéadracha agus sonraí pearsanta eile a bhaineann le húsáid córas intleachta saorga le haghaidh sainaitheant bithmhéadrach, ach amháin i ndáil le húsáid cianchóras sainaitheanta bithmhéadraí ‘fíor-ama’ i spásanna a bhfuil rochtain ag an bpobal orthu chun críoch fhorfheidhmiú an dlí mar a rialaítear leis an Rialachán seo, ba cheart an phróiseáil sin leanúint de bheith i gcomhréir leis na ceanglais atá mar thoradh ar Airteagal 10 de Threoir (AE) 2016/680. Chun críocha seachas forfheidhmiú an dlí, toirmiscear le hAirteagal 9(1) de Rialachán (AE) 2016/679 agus le hAirteagal 10(1) de Rialachán (AE) 2018/1725 próiseáil sonraí bithmhéadracha chun duine nádúrtha a shainaitheant go huathúil, ach amháin má tá feidhm ag ceann de na cásanna sa dara mír faoi seach den dá airteagal sin.
- (25) I gcomhréir le hAirteagal 6a de Phrótacal Uimh. 21 maidir le seasamh na Ríochta Aontaithe agus na hÉireann i dtaca leis an limistéar saoirse, slándála agus ceartais, atá i gceangal leis an gConradh ar an Aontas Eorpach agus leis an gConradh ar Fheidhmiú an Aontais Eorpaigh, na rialacha a leagtar amach in Airteagal 5(1), pointe (d), (2), (3) agus (4) den Rialachán seo arna ghlacadh ar bhonn Airteagal 16 de CFAE a bhaineann le sonraí pearsanta a bheith á bpróiseáil ag na Ballstáit agus gníomhaíochtaí á gcur i gcrích acu a thagann faoi raon feidhme Chaibidil 4 nó Chaibidil 5 de Theideal V de Chuid a Trí de CFAE, níl siad ina gceangal ar Éirinn nuair nach mbeidh na rialacha ina gceangal uirthi lena rialaítear cineálacha an chomhair bhreithiúnaigh in ábhair choiriúla nó cineálacha an chomhair phóilíneachta a cheanglaíonn na forálacha a leagtar síos ar bhonn Airteagal 16 a chomhlíonadh.
- (26) I gcomhréir le hAirteagal 2 agus 2a de Phrótacal 22 maidir le seasamh na Danmhairge, atá i gceangal leis an gConradh ar an Aontas Eorpach agus leis an gConradh ar Fheidhmiú an Aontais Eorpaigh, na rialacha a leagtar síos in Airteagal 5(1), pointe (d), (2), (3) agus (4) den Rialachán seo a glacadh ar bhonn Airteagal 16 de CFAE a bhaineann le sonraí pearsanta a bheith á bpróiseáil ag na Ballstáit agus gníomhaíochtaí á gcur i gcrích acu a thagann faoi raon feidhme Chaibidil 4 nó Chaibidil 5 de Theideal V de Chuid a Trí de CFAE, níl siad ina gceangal ar an Danmhairg.

(27) Níor cheart córais intleachta saorga ardriosca a chur ar mhargadh an Aontais nó a chur i mbun seirbhíse ach amháin má chomhlíonann siad ceanglais shainordaitheacha áirithe. Leis na ceanglais sin, ba cheart a áirithiú, maidir le córais intleachta saorga ardriosca atá ar fáil san Aontas nó a úsáidtear a n-aschur san Aontas ar shlite eile, nach mbeadh rioscaí do-ghlactha ag baint leo do leasanna tábhachtacha poiblí an Aontais mar atá aitheanta agus faoi chosaint ag dlí an Aontais. Ba cheart líon na gcóras intleachta saorga a shainithnítear mar chórais ardriosca a teorannú dóibh siúd a bhfuil tionchar suntasach díobhálach acu ar an tsláinte, an tsábháilteacht agus cearta bunúsacha na ndaoine san Aontas agus leis an teorannú sin laghdaítear aon srian a d'fhéadfadh a bheith ann maidir le trádáil idirnáisiúnta, más ann dó.

(28) D'fhéadfadh sé go mbeadh torthaí neamhfhabhracha ag córais intleachta saorga ar shláinte agus sábháilteacht daoine, go háirithe i gcás ina n-oibríonn na córais sin mar chomhpháirteanna táirgí. I gcomhréir le cuspóirí reachtaíocht chomhchuibhithe an Aontais, chun saorghluaiseacht táirgí sa mhargadh inmheánach a éascú agus chun a áirithiú nach gcuirfear ach táirgí atá sábháilte agus comhlíontach ar bhealach eile ar an margadh, tá sé tábhachtach go ndéanfar na rioscaí sábháilteachta a sheachaint nó a mhaolú go hiomchuí, ar rioscaí iad a d'fhéadfadh a bheith ann mar gheall ar tháirge ina iomláine de thoradh a chomhpháirteanna digiteacha, lena n-áirítear córais intleachta saorga. Cuir i gcás, róbait uathrialaitheacha a bhfuil a n-uathriaíl ag dul i méid de réir a chéile, cé acu a bhfuil siad i gcomhthéacs monaraíochta nó cúnaimh phearsanta agus cúraim, ba cheart iad a bheith in ann oibriú agus a bhfeidhmeanna a dhéanamh go sábháilte i dtimpeallachtaí casta. Ar an gcuma chéanna, san earnáil sláinte, áit a bhfuil go leor i ngeall léi maidir le beatha agus sláinte, ba cheart córais diagnóisice agus córais a thacaíonn cinntí daonna, ar córais iad atá ag éirí níos sofaisticiúla, a bheith iontaofa agus cruinn. Tá ábharthacht ar leith ag baint le fairsinge tionchar díobhálach an chórais intleachta saorga ar na cearta bunúsacha atá faoi chosaint ag an gCairt, go háirithe agus córas intleachta saorga á aicmiú mar chóras ardriosca. Áirítear ar na cearta sin an ceart chun dínite daonna, an ceart maidir le meas ar an saol príobháideach agus ar shaol an teaghlaigh, an ceart ar chosaint sonraí pearsanta, an ceart chun tuairimí a nochtadh agus faisnéis a fháil, an ceart chun saoirse comhthionóil agus comhlachais, an ceart chun neamh-idirdhealú, cearta cosanta tomhaltóirí, cearta oibrithe, cearta daoine faoi mhíchumas, an ceart chun leighis éifeachtaigh agus chun trialach córa, an ceart chun toimhde na neamhchiontachta agus ceart na cosanta, an ceart chun dea-riaracháin. I dteanna na gceart sin, tá sé tábhachtach a chur i dtábhacht go bhfuil cearta sonracha ag leanaí mar a chumhdaítear in Airteagal 24 den Chairt um Chearta Bunúsacha an Aontais agus i gCoinbhinsiún na Náisiún Aontaithe um Chearta an Linbh (a léirmhíniódh tuilleadh i mBarúil Ghinearálta Uimh. 25 ó UNCRC a mhéid a bhaineann leis an timpeallacht dhigiteach), ós rud é go gceanglaítear leis an dá cheann breithniú ar leochaileachtaí na leanaí agus an chosaint agus an cúram is gá a sholáthar ar mhaithe lena ndea-bhail. An ceart chun ardleibhéal cosanta don chomhshaol a chumhdaítear sa Chairt agus a chuirtear chun feidhme i mbeartais an Aontais, ba cheart é a chur san áireamh freisin agus measúnú á dhéanamh ar dhéine na díobhála ar féidir córas intleachta saorga a dhéanamh, lena n-áirítear i ndáil le sláinte agus sábháilteacht daoine.

(29) Maidir le córais intleachta saorga ardriosca is comhpháirteanna sábháilteachta táirgí nó córais iad, nó is táirgí nó córais iad féin, a thagann faoi raon feidhme Rialachán (CE) Uimh. 300/2008 ó Pharlaimint na hEorpa agus ón gComhairle¹⁰, Rialachán (AE) Uimh. 167/2013 ó Pharlaimint na hEorpa agus ón gComhairle¹¹, Rialachán (AE) Uimh. 168/2013 ó Pharlaimint na hEorpa agus ón gComhairle¹², Treoir 2014/90/AE ó Pharlaimint na hEorpa agus ón gComhairle¹³, Treoir (AE) 2016/797 ó Pharlaimint na hEorpa agus ón gComhairle¹⁴, Rialachán (AE) 2018/858 ó Pharlaimint na hEorpa agus ón gComhairle¹⁵, Rialachán (AE) 2018/1139 ó Pharlaimint na hEorpa agus ón gComhairle¹⁶, agus Rialachán (AE) 2019/2144 ó Pharlaimint na hEorpa agus ón gComhairle¹⁷, is iomchuí na gníomhartha sin a leasú chun a áirithiú, ar bhonn sainiúlachtaí teicniúla agus rialála gach earnála, agus gan cur isteach ar shásraí rialachais, measúnaithe comhréireachta agus forfheidhmithe atá ann cheana agus na húdaráis arna mbunú iontu, go gcuirfidh an Coimisiún san áireamh na ceanglais shainordaitheacha le haghaidh córais intleachta saorga ardriosca a leagtar síos sa Rialachán seo agus aon ghníomh ábhartha tarmilgthe nó cur chun feidhme á ghlacadh aige amach anseo ar bhonn na ngníomhartha sin.

¹⁰ Rialachán (CE) Uimh. 300/2008 ó Pharlaimint na hEorpa agus ón gComhairle an 11 Márta 2008 maidir le rialacha comhchoiteanna i réimse slándála na heitlíochta sibhialta agus lena n-aisghairtear Rialachán (CE) Uimh. 2320/2002 (IO L 97, 9.4.2008, lch. 72).

¹¹ Rialachán (AE) Uimh. 167/2013 ó Pharlaimint na hEorpa agus ón gComhairle an 5 Feabhra 2013 maidir le formheas agus le faireachas margaidh ar fheithiclí talmhaíochta agus foraoiseachta (IO L 60, 2.3.2013, lch. 1).

¹² Rialachán (AE) Uimh. 168/2013 ó Pharlaimint na hEorpa agus ón gComhairle an 15 Eanáir 2013 maidir le ceadú agus le faireachas margaidh ar fheithiclí dhá nó trí roth agus cuadrothair (IO L 60, 2.3.2013, lch. 52).

¹³ Treoir 2014/90/AE ó Pharlaimint na hEorpa agus ón gComhairle an 23 Iúil 2014 maidir le trealamh muirí agus lena n-aisghairtear Treoir 96/98/CE ón gComhairle (IO L 257, 28.8.2014, lch. 146).

¹⁴ Treoir (AE) 2016/797 ó Pharlaimint na hEorpa agus ón gComhairle an 11 Bealtaine 2016 maidir le hidir-inoibritheacht an chórais iarnróid laistigh den Aontas Eorpach (IO L 138, 26.5.2016, lch. 44).

¹⁵ Rialachán (AE) 2018/858 ó Pharlaimint na hEorpa agus ón gComhairle an 30 Bealtaine 2018 maidir le ceadú mótarfheithiclí agus a leantóirí, agus córas, comhpháirteanna agus aonad teicniúil ar leithligh atá ceaptha le haghaidh feithiclí den sórt sin, agus faireachas margaidh orthu, lena leasaítear Rialachán (CE) Uimh. 715/2007 agus Rialachán (CE) Uimh. 595/2009 agus lena n-aisghairtear Treoir 2007/46/CE (IO L 151, 14.6.2018, lch. 1).

¹⁶ Rialachán (AE) 2018/1139 ó Pharlaimint na hEorpa agus ón gComhairle an 4 Iúil 2018 maidir le rialacha comhchoiteanna i réimse na heitlíochta sibhialta agus lena mbunaítear Gníomhaireacht Sábháilteachta Eitlíochta na hEorpa, agus lena leasaítear Rialachán (CE) Uimh. 2111/2005, Rialachán (CE) Uimh. 1008/2008, Rialachán (AE) Uimh. 996/2010, Rialachán (AE) Uimh. 376/2014 agus Treoir 2014/30/AE agus Treoir 2014/53/AE ó Pharlaimint na hEorpa agus ón gComhairle agus lena n-aisghairtear Rialachán (CE) Uimh. 552/2004 agus Rialachán (CE) Uimh. 216/2008 ó Pharlaimint na hEorpa agus ón gComhairle agus Rialachán (CEE) Uimh. 3922/91 ón gComhairle (IO L 212, 22.8.2018, lch. 1).

¹⁷ Rialachán (AE) 2019/2144 ó Pharlaimint na hEorpa agus ón gComhairle an 27 Samhain 2019 maidir le ceanglais chineálcheadaithe do mhótarfheithiclí agus a leantóirí, agus córais, comhpháirteanna agus aonaid theicniúla ar leithligh le haghaidh feithiclí den sórt sin, a mhéid a bhaineann lena sábháilteacht ghinearálta agus cosaint na ndaoine atá i bhfeithiclí agus úsáideoirí soghonta bóthair, lena leasaítear Rialachán (AE) 2018/858 ó Pharlaimint na hEorpa agus ón gComhairle agus lena n-aisghairtear Rialachán (CE) Uimh. 78/2009, (CE) Uimh. 79/2009 agus (CE) Uimh. 661/2009 ó Pharlaimint na hEorpa agus ón gComhairle agus Rialachán (CE) Uimh. 631/2009, (AE) Uimh. 406/2010, (AE) Uimh. 672/2010, (AE) Uimh. 1003/2010, (AE) Uimh. 1005/2010, (AE) Uimh. 1008/2010, (AE) Uimh. 1009/2010, (AE) Uimh. 19/2011, (AE) Uimh. 109/2011, (AE) Uimh. 458/2011, (AE) Uimh. 65/2012, (AE) Uimh. 130/2012, (AE) Uimh. 347/2012, (AE) Uimh. 351/2012, (AE) Uimh. 1230/2012 agus (AE) 2015/166 ón gCoimisiún (IO L 325, 16.12.2019, lch. 1.).

- (30) Maidir le córais intleachta saorga ardriosca is comhpháirteanna sábháilteachta táirgí nó córas iad, nó is táirgí nó córais iad féin, a thagann faoi raon feidhme reachtaíocht chomhchuibhithe áirithe an Aontais, is iomchuí iad a aicmiú mar chórais ardriosca faoin Rialachán seo má chuirtear an nós imeachta um measúnú comhréireachta i bhfeidhm ar an táirge i gceist le comhlacht tríú páirtí um measúnú comhréireachta de bhun na reachtaíochta chomhchuibhithe ábhartha sin de chuid an Aontais. Go sonrach, is éard atá i gceist leis na táirgí sin innealra, bréagáin, ardaitheoirí, trealamh agus córais chosanta atá ceaptha chun úsáid in atmaisféir a d'fhéadfadh a bheith pléascach, i dtrealamh raidió, i mbrú-threalamh, i dtrealamh le haghaidh árthaí áineas, i suiteálacha cábla-bhealaigh, i bhfearais a dhóinn breoslaí gásacha, i bhfeistí leighis agus i bhfeistí leighis diagnóiseacha in vitro.
- (31) Maidir le haicmiú córas intleachta saorga mar chóras ardriosca de bhun an Rialacháin seo, níor cheart go gciallódh sin go measfar an táirge a bhfuil an córas intleachta saorga ann mar chomhpháirt sábháilteachta, nó an córas intleachta saorga féin mar tháirge, a bheith 'ardriosca' faoi na critéir a bhunaítear sa reachtaíocht chomhchuibhithe ábhartha de chuid an Aontais a bhfuil feidhm aici ar an táirge. Is amhlaidh atá go háirithe i gcás Rialachán (AE) Uimh. 2017/745 ó Pharlaimint na hEorpa agus ón gComhairle¹⁸ agus Rialachán (AE) 2017/746 ó Pharlaimint na hEorpa agus ón gComhairle¹⁹, ina soláthraítear measúnú comhréireachta tríú páirtí le haghaidh táirgí meánriosca agus ardriosca.

¹⁸ Rialachán (AE) 2017/745 ó Pharlaimint na hEorpa agus ón gComhairle an 5 Aibreán 2017 maidir le feistí leighis, lena leasaítear Treoir 2001/83/CE, Rialachán (CE) Uimh. 178/2002 agus Rialachán (CE) Uimh. 1223/2009 agus lena n-aisghairtear Treoracha 90/385/CEE agus 93/42/CEE ón gComhairle, IO L 117, 5.5.2017, lch. 1).

¹⁹ Rialachán (AE) 2017/746 ó Pharlaimint na hEorpa agus ón gComhairle an 5 Aibreán 2017 maidir le feistí leighis diagnóiseacha in vitro agus lena n-aisghairtear Treoir 98/79/CE agus Cinneadh 2010/227/AE ón gCoimisiún (IO L 117, 5.5.2017, lch. 176).

- (32) A mhéid a bhaineann le córais intleachta saorga ardriosca cé is moite de na córais is comhpháirteanna sábháilteachta iad, nó is táirgí iad féin, is íomchuí iad a aicmiú mar chórais ardriosca más rud é, i bhfianaise na críche atá beartaithe dóibh, go bhfuil ardriosca díobhála ag baint leo do shláinte, sábháilteacht nó cearta bunúsacha daoine, agus ag cur san áireamh déine na díobhála féideartha agus an dóchúlacht go dtarlódh an díobháil agus más rud é go n-úsáidtear iad i roinnt limistéir réamhshainithe shonracha a shonraítear sa Rialachán. Tá sainathint na gcóras sin bunaithe ar an modheolaíocht chéanna agus na critéir chéanna atá beartaithe freisin maidir le haon leasú a dhéanfar amach anseo ar liosta na gcórais intleachta saorga ardriosca. Tá sé tábhachtach a shoiléiriú freisin, laistigh de na cásanna ardriosca dá dtagraítear in Iarscríbhinn III, go bhféadfadh córais a bheith ann nach mbeadh riosca suntasach do na leasanna dlíthiúla a chosnaítear sna cásanna sin mar thoradh orthu, agus an t-aschur arna tháirgeadh ag an gcóras intleachta saorga á chur san áireamh. Dá bhrí sin, ach amháin i gcás ina bhfuil leibhéal ard tábhachta ag baint leis an aschur sin (i.e. nach ní gabhálach amháin atá ann) i leith na gníomhaíochta nó an chinnidh ábhartha chun riosca suntasach a chruthú do na leasanna dlíthiúla atá á gcosaint, ba cheart a mheas gur córas ardriosca é an córas intleachta saorga a ghineann an t-aschur sin. Mar shampla, i gcás inarb é atá san fhaisnéis arna soláthar ag córais intleachta saorga don duine próifiliú daoine nádúrtha de réir bhrí Airteagal 4(4) de Rialachán (AE) 2016/679 agus Airteagal 3(4) de Threoir (AE) 2016/680 agus Airteagal 3(5) de Rialachán (AE) 2018/1725, níor cheart a mheas de ghnáth gur faisnéis ghabhálach í an fhaisnéis sin i gcomhthéacs na gcórais intleachta saorga ardriosca dá dtagraítear in Iarscríbhinn III. Mar sin féin, más rud é nach bhfuil ach ábharthacht dhiomaibhseach nó mionábharthacht ag aschur an chórais intleachta saorga maidir le gníomhaíocht nó cinneadh ón duine, féadfar a mheas gur aschur gabhálach amháin é, lena n-áirítear, mar shampla, córais intleachta saorga a úsáidtear le haghaidh aistriúcháin chun críoch faisnéiseach nó chun doiciméid a bhainistiú.
- (33) Maidir le míchruinnis theicniúla i gcórais intleachta saorga atá beartaithe le haghaidh cian-sainathint bhithmhéadrach daoine nádúrtha, d'fhéadfadh siad a bheith ina gcúis le torthaí claonta agus éifeachtaí idirdhealaithe. Tá sé sin ábhartha go háirithe a mhéid a bhaineann le haois, bunadh eitneach, cine, gnéas nó míchumais. Dá bhrí sin, ba cheart cianchórais sainaitheanta bithmhéadraí ‘fíor-ama’ agus ‘iar-aimseartha’ araon a aicmiú mar chórais ardriosca. I bhfianaise na rioscaí a bhaineann leo, ba cheart an dá chineál cianchóras sainaitheanta bithmhéadraí a bheith faoi réir ceanglais shonracha maidir le cumais logála agus formhaoirseacht dhaonna.

- (34) Maidir le bonneagar criticiúil a bhainistiú agus a oibriú, is iomchuí aicme ardriosca a thabhairt ar na córais intleachta saorga atá beartaithe lena n-úsáid mar comhphárteanna sábháilteachta i mbainistíocht agus oibriú bonneagair dhigitigh chriticiúil mar a liostaítear in Iarscríbhinn I pointe 8 den Treoir maidir le hathléimneacht eintiteas criticiúil, trácht bóthair agus soláthar uisce, gáis, téimh agus leictreachais, ós rud é go bhféadfadh a dteip nó a mífheidhmiú beatha agus sláinte daoine a chur i mbaol agus go bhféadfadh cur isteach suntasach a bheith ann i ngnáthchúrsa na ngníomhaíochtaí sóisialta agus eacnamaíocha de bharr na gcóras sin. Is éard atá i gcomhphárteanna sábháilteachta bonneagair chriticiúil, lena n-áirítear bonneagar digiteach criticiúil, córais a úsáidtear chun sláine fhisiceach an bhonneagair chriticiúil nó sláinte agus sábháilteacht daoine agus maoine a chosaint go díreach ach nach bhfuil riachtanach chun go bhfeidhmeoidh an córas. D'fhéadfadh rioscaí do shláine fhisiciúil an bhonneagair chriticiúil a bheith mar thoradh ar chliseadh nó mífheidhmiú na gcomhphárteanna sin agus, dá bhrí sin, d'fhéadfadh rioscaí do shláinte agus do shábháilteacht daoine agus maoine a bheith mar thoradh air sin. Níor cheart comhphárteanna atá beartaithe lena n-úsáid chun críoch cibearshláindála amháin a cháiliú mar chomhphárteanna sábháilteachta. D'fhéadfaí a áireamh ar shamplaí de chomhphárteanna sábháilteachta an bhonneagair chriticiúil sin córais chun faireachán a dhéanamh ar bhrú uisce nó ar chórais rialaithe aláirim dóiteáin in ionaid néalríomhaireachta.
- (35) Córais intleachta saorga a úsáidtear san oideachas nó sa ghairmoiliúint, go sonrach na córais maidir le cinní a dhéanamh faoi rochtain, iontráil nó daoine a chur chuig institiúidí nó cláir oideachais agus gairmoiliúna ar gach leibhéal nó meastóireacht a dhéanamh ar thorthaí foghlama, ba cheart iad a mheas mar chórais ardriosca, ós rud é go bhféadfadh siad cúrsaí oideachais agus treo gairme duine a chinneadh agus dá bhrí sin difear a dhéanamh dá gcumas a slí bheatha a bhaint amach. Má dheantar nó má úsáidtear iad go míchuí, d'fhéadfadh na córais sin an ceart chun oideachais agus oiliúna chomh maith leis an gceart nach ndéantar idirdhealú ina n-aghaidh a shárú agus d'fhéadfadh siad patrúin idirdhealaitheacha stairiúla a bhuanú.

(36) Córais intleachta saorga a úsáidtear i bhfostaíocht, bainistíocht fostaithe agus rochtain ar an bhféinfhostaíocht, go sonrath maidir le daoine a earcú agus a roghnú, maidir le cinntí a dhéanamh i dtaca le hardú céime agus foirceannadh agus maidir le sannadh cúraimí bunaithe ar iompar aonair nó tréithe nó saintréithe pearsanta, faireachán agus meastóireacht a dhéanamh ar dhaoine i gcaidrimh chonarhacha a bhaineann leis an obair, ba cheart iad a aicmiú mar chórais ardriosca, ós rud é go bhféadfadh siad mórthionchar a bheith acu ar ghairmréime agus slite beatha na ndaoine sin amach anseo. Maidir le caidrimh chonarhacha a bhaineann leis an obair, ba cheart fostaithe agus daoine a sholáthraíonn seirbhísí trí ardáin dá dtagraítear i gClár Oibre an Choimisiúin le haghaidh 2021 a bheith rannpháirteach iontu. Níor cheart na daoine sin a mheas, i bprionsabal, mar úsáideoirí de réir bhrí an Rialacháin seo. Le linn an phróisis earcaíochta agus i dtaca le meastóireacht a dhéanamh ar dhaoine i gcaidrimh chonarhacha a bhaineann leis an obair, nó ardú céime a thabhairt dóibh nó iad a choinneáil, d'fhéadfadh na córais sin patrúin idirdhealaitheacha stairiúla a bhuanú, mar shampla, in aghaidh na mban, aoisghrúpaí áirithe, daoine faoi mhíchumas nó daoine de bhunadh ciníoch nó eitneach áirithe nó gnéaschlaonta áirithe. Córais intleachta saorga a úsáidtear chun monatóireacht a dhéanamh ar fheidhmíocht agus iompraíocht na ndaoine sin, d'fhéadfadh siad tionchar a bheith acu ar a gcearta chun cosaint sonraí agus príobháideachais.

(37) Réimse eile ar cheart aird ar leith a thabhairt air is ea rochtain ar sheirbhísí agus sochair áirithe fíor-riachtanacha príobháideacha agus poiblí agus tairbhiú díobh chun go mbeidh daoine in ann a bheith rannpháirteach go hiomlán sa tsochaí nó feabhas a chur ar a gcaighdeán maireachtála. Go sonrach, córais intleachta saorga a úsáidtear chun meastóireacht a dhéanamh ar scór creidmheasa nó acmhainneacht chreidmheasa daoine nádúrtha, ba cheart iad a aicmiú mar chórais intleachta saorga ardriosca, ós rud é go gcinneann siad rochtain na ndaoine sin ar acmhainní airgeadais nó seirbhísí bunriachtanacha ar nós tithíochta, leictreachais agus seirbhísí teileachumarsáide. De thoradh na gcórais intleachta saorga a úsáidtear chun na críche sin, d'fhéadfadh sé go mbeadh idirdhealú in aghaidh daoine nó grúpaí, agus go mbuanófar patrúin idirdhealaitheacha stairiúla, mar shampla, bunaithe ar bhunadh ciníoch nó eitneach, míchumais, aois, gnéaschlaonadh nó go gcothófar cineálacha nua tionchar idirdhealaithe. Mar gheall ar scála teoranta an tionchair agus na roghanna eile atá ar an margadh, is iomchuí córais intleachta saorga a dhíolmhú chun críche measúnaithe acmhainneachta creidmheasa agus scórála creidmheasa nuair a chuireann fiontair bheaga nó micrifhiontair mar a shainmhínítear san Iarscríbhinn a ghabhann le Moladh 2003/361/CE ón gCoimisiún i mbun seirbhíse iad le haghaidh a n-úsáide féin. Daoine nádúrtha a bhfuil iarratas á dhéanamh acu ar shochair chúnamh phoiblí bhunriachtanacha nó ar sheirbhísí cúnamh poiblí nó a fhaigheann na sochair nó na seirbhísí sin ó údarais phoiblí, is iondúil a bhíonn siad ag brath ar na sochair agus seirbhísí sin agus is iondúil a bhíonn siad i riocht soghonta i ndáil leis na húdarais fhreagracha. Má úsáidtear córais intleachta saorga chun a chinneadh cé acu a dhéanfaidh na húdarais na tairbhí agus seirbhísí sin a dhiúltú, a laghdú, a chúlghairm nó a aiséileamh, lena n-áirítear cé acu an bhfuil tairbhíthe i dteideal na dtairbhí nó na seirbhísí sin go dlisteanach nó nach bhfuil, d'fhéadfadh sé go mbeadh tionchar suntasach ag na córais sin ar shlí bheatha na ndaoine agus go ndéanfaí a gcearta bunúsacha a shárú, amhail an ceart chun cosanta sóisialta, an ceart chun neamh-idirdhealú, an ceart chun dínite daonna nó an ceart chun leighis éifeachtaigh. Ba cheart, dá bhrí sin, na córais sin a aicmiú mar chórais ardriosca. Mar sin féin, níor cheart don Rialachán seo bac a chur ar fhorbairt ná úsáid cur chuige nuálacha sa riarachán poiblí, ar riarachán é a bhainfeadh leas as úsáid níos forleithne a bhaint as córais intleachta saorga chomhlíontacha shábháilte, ar choinníoll nach mbeadh ardriosca ag baint leo do dhaoine dlítheanacha agus nádúrtha. Ar deireadh, córais intleachta saorga a úsáidtear chun seirbhísí céad fhreagartha éigeandála a sheoladh nó tosaíocht a thabhairt maidir le seoladh na seirbhísí sin, ba cheart iad a aicmiú freisin mar chórais ardriosca, ós rud é go ndéanann siad cinntí i gcásanna criticiúla maidir le beatha agus sláinte daoine agus a maoin. Ina theannta sin, tá méadú ag teacht ar an úsáid a bhaintear as córais intleachta saorga le haghaidh measúnú riosca i ndáil le daoine nádúrtha agus le praghsáil i gcás árachais saoil agus árachais sláinte, rud a d'fhéadfadh iarmhairtí tromchúiseacha a bheith ann do shaol agus do shláinte daoine, lena n-áirítear eisiámh airgeadais agus idirdhealú mura ndéantar iad a dhearadh, a fhorbairt agus a úsáid go cuí. Chun cur chuige comhsheasmhach a áirithiú laistigh d'earnáil na seirbhísí airgeadais, ba cheart feidhm a bheith ag an eisceacht thuasluaite do mhicrifhiontair nó d'fhiontair bheaga dá n-úsáid féin, a mhéid a sholáthraíonn siad féin córais intleachta saorga agus a chuireann siad i mbun seirbhíse é chun a dtáirgí árachais féin a dhíol.

(38) Gníomhaíochtaí a dhéanann údaráis forfheidhmithe dlí a bhaineann le húsáidí áirithe córas intleachta saorga, is iad saintréithe na ngníomhaíochtaí sin éagothroime cumhachta suntasach agus dá thoradh sin d'fhéadfadh sé go ndéanfaí faireachas ar dhuine nádúrtha, nó é a ghabháil nó saoirse a bhaint dó chomh maith le tionchair dhíobhálacha eile maidir leis na cearta bunúsacha a ráthaítear sa Chairt. Go sonrach, mura gcuirtear oiliúint ar an gcóras intleachta saorga le sonraí ardcháilíochta, mura gcomhlíonann an córas ceanglais leormhaithe i dtéarmaí cruinnis nó stóinseachta, nó mura ndéantar é a dhearadh agus a thástáil go hiomchuí sula gcuirfear é ar an margadh nó i mbun seirbhíse ar shlí eile, d'fhéadfadh sé go ndíreofaí ar dhaoine i mbealach idirdhealaithe nó ar shlí eile atá mícheart nó éagórach. Thairis sin, d'fhéadfadh sé go gcuirfí isteach ar fheidhmiú cearta nós imeachta bunúsacha, amhail an ceart chun leighis éifeachtaigh agus chun trialach córa chomh maith le cearta na cosanta agus an ceart chun toimhde na neamhchiontachta, i gcás nach bhfuil na córais intleachta saorga sin trédhearcach, inmhiníthe agus doiciméadaithe go leor. Dá bhrí sin, is iomchuí aicme ardriosca a thabhairt ar roinnt córais intleachta saorga atá beartaithe lena n-úsáid i gcomhthéacs forfheidhmithe an dlí, comhthéacs ina bhfuil tábhacht ar leith ag baint le cruinneas, iontaofacht agus trédhearcacht chun tionchair dhíobhálacha a sheachaint, muinín an phobail a chaomhnú agus cuntasacht agus cúiteamh éifeachtach a áirithiú. I bhfianaise chineál na ngníomhaíochtaí i gceist agus na rioscaí a bhaineann leo, leis na córais intleachta saorga ardriosca sin, ba cheart, go háirithe, córais intleachta saorga a chumhdach atá beartaithe lena n-úsáid ag údaráis forfheidhmithe dlí le haghaidh measúnuithe riosca aonair, brathadóirí éithigh agus uirlisí comhchosúla nó chun staid mhothúchánach duine nádúrtha a bhrath, chun meastóireacht a dhéanamh ar iontaofacht fianaise in imeachtaí coiriúla, chun tarlú nó atarlú cionta cóiriúla iarbhír nó féideartha a thuar bunaithe ar phróifiliú daoine nádúrtha, nó measúnú a dhéanamh ar thréithe agus saintréithe pearsantachta nó iompraíocht choiriúil daoine nádúrtha nó grúpaí roimhe seo, le haghaidh próifiliú a dhéantar le linn na gcionta coiriúla a bhrath, a imscrúdú nó a ionchúiseamh. Córais intleachta saorga atá beartaithe go sonrach lena n-úsáid le haghaidh imeachtaí riaracháin ag na húdaráis chánach nó na húdaráis chustaim chomh maith le haonaid faisnéise airgeadais atá i mbun cúraimí riaracháin lena ndéantar anailís ar fhaisnéis de bhun reachtaíocht an Aontais chun an sciúradh airgid a chomhrac, níor cheart iad a mheas mar chórais intleachta saorga ardriosca a úsáideann údaráis forfheidhmithe dlí chun cionta coiriúla a chosc, a bhrath, a imscrúdú nó a ionchúiseamh.

(39) Le córais intleachta saorga a úsáidtear i mbainistíocht imirce, bainistíocht tearmainn agus bainistíocht rialaithe teorann, d'fhéadfadh sé go ndéanfaí difear do dhaoine a bhíonn i riocht soghonta go minic agus a bhíonn ag brath ar thorthaí ghníomhaíochtaí na n-údarás poiblí inniúil. Dá bhrí sin, tá tábhacht ar leith ag baint le cruinneas, neamh-idirdhealaitheacht agus trédhearcacht na gcóras intleachta saorga a úsáidtear sna comhthéacsanna sin chun urramú chearta bunúsacha an duine a ndearnadh difear dóibh a ráthú, go háirithe maidir lena gcearta chun saorghluaiseachta, chun neamh-idirdhealú, chun an saol príobháideach agus sonraí pearsanta a chosaint, chun cosaint idirnáisiúnta a fháil agus chun dea-riaracháin. Is iomchuí, dá bhrí sin, aicme ardriosca a thabhairt ar chórais intleachta saorga atá beartaithe lena n-úsáid ag na húdaráis phoiblí inniúla a bhfuil cúraimí orthu i réimse na bainistíochta imirce, tearmainn agus rialaithe teorann mar bhrathadóirí éithigh agus uirlisí comhchosúla nó chun staid mhothúchánach duine nádúrtha a bhrath; chun rioscaí áirithe a mheasúnú a bhaineann le daoine nádúrtha ag teacht isteach i gcórais Bhallstáit nó ag déanamh iarratas ar víosa nó ar thearmann; chun cúnaimh a thabhairt d'údarais phoiblí inniúla i dtaca le scrúdú a dhéanamh ar iarratais ar thearmann, ar víosa nó ar cheadanna cónaithe agus na gearáin lena mbaineann maidir leis an gcuspóir incháilitheacht na ndaoine nádúrtha a bhfuil iarratas ar stádas á dhéanamh acu a dheimhniú. Maidir le córais intleachta saorga i réimse na bainistíochta imirce, tearmainn agus rialaithe teorann a chumhdaítear leis an Rialachán seo, ba cheart dóibh na ceanglais nós imeachta ábhartha a chomhlíonadh a leagtar síos le Treoir 2013/32/AE ó Pharlaimint na hEorpa agus ón gComhairle²⁰, le Rialachán (CE) Uimh. 810/2009 ó Pharlaimint na hEorpa agus ón gComhairle²¹ agus le haon reachtaíocht ábhartha eile.

²⁰ Treoir 2013/32/AE ó Pharlaimint na hEorpa agus ón gComhairle an 26 Meitheamh 2013 maidir leis na nósanna imeachta comhchoiteanna chun cosaint idirnáisiúnta a dheonú agus a tharraingt siar (IO L 180, 29.6.2013, lch. 60).

²¹ Rialachán (CE) Uimh. 810/2009 ó Pharlaimint na hEorpa agus ón gComhairle an 13 Iúil 2009 lena mbunaítear Cód Comhphobail maidir le Víosaí (Cód Víosaí) (IO L 243, 15.9.2009, lch. 1).

- (40) Maidir le córais intleachta saorga áirithe atá beartaithe lena n-úsáid chun próisis ceartais agus dhaonlathacha a riar, ba cheart iad a aicmiú mar chórais ardriosca, mar gheall ar an tionchar suntasach a d'fhéadfaí a bheith acu ar an daonlathas, ar an smacht reachta, ar shaoirsí aonair agus ar an gceart chun leighis éifeachtaigh agus chun trialach córa. Go sonrach, chun aghaidh a thabhairt ar rioscaí claonta, earráidí agus doiléireachta a d'fhéadfadh a bheith ann, is iomchuí aicme ardriosca a thabhairt ar chórais intleachta saorga atá beartaithe lena n-úsáid chun cúnamh a thabhairt d'údarais bhreithiúnachta maidir le léiriú fíoras agus an dlí agus maidir leis an dlí a chur i bhfeidhm ar thacar coincreíteach fíoras. Níor cheart an cháilíocht sin a leathnú, áfach, chun córais intleachta saorga a chumhdach atá beartaithe lena n-úsáid le haghaidh gníomhaíochtaí riaracháin atá coimhdeach amháin agus nach ndéanann difear do riaradh iarbhir an cheartais i gcásanna aonair, amhail anaithnidiú nó bréagainmniú cinntí breithiúnacha, doiciméad nó sonraí, cumarsáid idir pearsanra, cúraimí riaracháin.
- (41) Ós rud é go dtugtar aicme ardriosca ar chóras intleachta saorga faoin Rialachán seo, níor cheart a léiriú leis sin go léirítear gur gá úsáid an chórais a bheith dleathach faoi ghníomhartha eile de dhlí an Aontais nó faoi dhlí náisiúnta atá comhoiriúnach le dlí an Aontais, amhail cosaint sonraí pearsanta, úsáid brathadóirí éithigh agus uirlisí comhchosúla nó córais eile chun staid mhothúchánach duine nádúrtha a bhrath. Ba cheart leanúint den úsáid sin i gcomhréir leis na ceanglais is infheidhme atá mar thoradh ar an gCairt agus ar na gníomhartha is infheidhme de dhlí tánaisteach an Aontais agus den dlí náisiúnta agus i gcomhréir leis na ceanglais sin amháin. Níor cheart a thuiscint leis an Rialachán seo go bhforáiltear maidir leis an bhforas dlíthiúil le sonraí pearsanta a phróiseáil, lena n-áirítear catagóirí speisialta sonraí pearsanta, i gcás inarb ábhartha, mura bhforáiltear go sonrach a mhalairt sa Rialachán.
- (42) Na rioscaí a bhaineann le córais ardriosca intleachta saorga a chuirtear ar mhargadh an Aontais nó a chuirtear i mbun seirbhíse ar shlí eile, chun na rioscaí sin a mhaolú, ba cheart feidhm a bheith ag roinnt ceanglais shainordaitheacha, agus an chríoch atá beartaithe d'úsáid an chórais á cur san áireamh agus de réir an chórais bainistíochta riosca atá le bunú ag an soláthraí. Go sonrach, is éard ar cheart a bheith sa chóras bainistíochta riosca próiseas atriallach leanúnach a phleanáiltear agus a réachtáiltear ar feadh shaolré an chórais intleachta saorga ardriosca. Ba cheart a áirithiú leis an bpróiseas sin go sainathneoidh agus go ndéanfaidh an soláthraí anailís ar na rioscaí do shláinte, sábháilteacht agus cearta bunúsacha na ndaoine a bhféadfadh an córas difear a dhéanamh dóibh i bhfianaise na críche atá beartaithe dó, lena n-áirítear na rioscaí a d'fhéadfadh teacht as an idirghníomhaíocht idir an córas intleachta saorga agus an timpeallacht ina n-oibríonn sé, agus dá réir sin go nglacfaidh sé bearta oiriúnacha bainistithe riosca i bhfianaise na húrscothachta.

- (43) Ba cheart feidhm a bheith ag na ceanglais ar chórais intleachta saorga ardriosca maidir le cáilíocht na dtacar sonraí a úsáidtear, doiciméadacht theicniúil agus coimeád taifead, trédhearcacht agus soláthar faisnéise d'úsáideoirí, formhaoirseacht dhaonna agus stóinseacht, cruinneas agus cibearshlándaíl. Tá gá leis na ceanglais sin chun na rioscaí i dtaca leis an tsláinte, an tsábháilteacht agus cearta bunúsacha a mhaolú go héifeachtach, de réir mar is infheidhme i bhfianaise na gcríche atá beartaithe don chóras, agus nach bhfuil aon bheart trádála is lú srianadh ar fáil go réasúnta, chun srianta trádála nach bhfuil údar leo a sheachaint.
- (44) Tá sonraí ardcháilíochta fíor-riachtanach i dtaca le feidhmíocht roinnt mhaith córas intleachta saorga, go háirithe i gcásanna ina n-úsáidtear teicnící a bhaineann le hoiliúint a chur ar shamhlacha, d'fhonn a áirithiú go bhfeidhmíonn an córas intleachta saorga ardriosca go sábháilte agus de réir mar atá beartaithe dó agus nach mbeidh sé mar fhoinse d'idirdhealú, rud atá toirmisceithe faoi dhlí an Aontais. Le tacair sonraí oiliúna, bailíochtaithe agus tástála ar ardcháilíocht, is gá cleachtais iomchuí rialachais sonraí agus bhainistíochta a chur chun feidhme. Ba cheart do thacair sonraí oiliúna, bailíochtaithe agus tástála a bheith ábhartha agus ionadaíoch a ndóthain agus ba cheart na hairíonna staidrimh iomchuí a bheith acu, lena n-áirítear a mhéid a bhaineann leis na daoine nó na grúpaí daoine a bhfuil sé beartaithe an córas intleachta saorga ardriosca a úsáid orthu. Ba cheart na tacair sonraí sin a bheith chomh saor ó earráidí agus a bheith chomh iomlán agus is féidir i bhfianaise chuspóir beartaithe an chórais intleachta saorga, agus indéantacht theicniúil agus úrscothacht, infhaighteacht sonraí agus cur chun feidhme beart bainistithe riosca iomchuí á gcur san áireamh, ar bhealach comhréireach, ionas go dtabharfar aghaidh go cuí ar na heasnaimh a d'fhéadfadh a bheith sna tacair sonraí. An ceanglas go mbeadh na tacair sonraí iomlán agus saor ó earráidí, níor cheart dó difear a dhéanamh d'úsáid teicnící caomhnaithe príobháideachais i gcomhthéacs fhorbairt agus thástáil na gcóras intleachta saorga. Leis na tacair sonraí oiliúna, bailíochtaithe agus tástála, ba cheart a chur san áireamh, sa mhéid a cheanglaítear i bhfianaise na críche atá beartaithe dóibh, na gnéithe, saintréithe nó eilimintí a bhaineann go sonrach leis an suíomh nó comhthéacs geografach, iompraíochta nó feidhmiúil ina bhfuil sé beartaithe an córas intleachta saorga a úsáid. Chun cearta daoine eile a chosaint ar an idirdhealú a d'fhéadfadh a bheith ann de thoradh claonta sna córais intleachta saorga, ba cheart do na soláthraithe a bheith in ann catagóirí speisialta sonraí pearsanta a phróiseáil, mar ábhar a bhaineann le leas an phobail de bhrí Airteagal 9(2)(g) de Rialachán (AE) 2016/679 agus Airteagal 10(2)(g) de Rialachán (AE) 2018/1725, chun faireachán, brath agus ceartú an chlaonta a áirithiú i ndáil le córais intleachta saorga ardriosca.

- (44a) Agus na prionsabail dá dtagraítear in Airteagal 5(1)(c) de Rialachán 2016/679 agus in Airteagal 4(1)(c) de Rialachán 2018/1725 á gcur i bhfeidhm, go háirithe prionsabal an íoslaghdaíthe sonraí, maidir le tacair sonraí oiliúna, bailíochtaithe agus tástála faoin Rialachán seo, ba cheart aird chuí a thabhairt ar shaolré iomlán an chórais intleachta saorga.
- (45) Maidir le forbairt na gcóras intleachta saorga, ba cheart d'úsáideoirí áirithe, amhail soláthraithe, comhlachtaí faoina dtugtar fógra dóibh agus eintitis ábhartha eile, amhail moil nuálaíochta digití, saoráidí agus taighdeoirí tástála agus turgnamhaíochta, a bheith in ann tacair sonraí ardcháilíochta a rochtain agus a úsáid laistigh dá réimsí gníomhaíochtaí faoi seach a bhaineann leis an Rialachán seo. Beidh tábhacht ar leith ag baint le spásanna coiteanna sonraí Eorpacha arna mbunú ag an gCoimisiún agus le héascú comhroinnte sonraí idir gnólachtaí agus leis an rialtas ar mhaithe le leas an phobail chun rochtain iontaofa, chuntasach agus neamh-idirdhealaithe a sholáthar ar shonraí ardcháilíochta chun córais intleachta saorga a bhailíochtú, a thástáil agus oiliúint a chur orthu. Mar shampla, i gcás sonraí sláinte, leis an spás Eorpach sonraí sláinte, éascófar rochtain neamh-idirdhealaithe ar shonraí sláinte agus oiliúint na n-algartam intleachta saorga maidir leis na tacair sonraí sin, ar bhealach slán tráthúil trédhearcach agus iontaofa a chosnaíonn an phríobháideacht, agus le rialachas iomchuí institiúideach. Údaráis inniúla ábhartha, lena n-áirítear údaráis eárnála, a sholáthraíonn an rochtain ar shonraí nó a thacaíonn leis, féadfaidh siad tacú freisin leis an soláthar sonraí ardcháilíochta chun córais intleachta saorga a bhailíochtú, a thástáil agus oiliúint a chur orthu.
- (46) Tá sé fíor-riachtanach faisnéis a bheith ann maidir leis an mbealach a fhorbraítear córais intleachta saorga agus an bealach a fheidhmíonn na córais ar feadh a saolré chun comhlíonadh cheanglais an Rialacháin seo a fhíorú. Chuige sin, is gá taifid a choimeád agus doiciméadacht theicniúil a chur ar fáil, ina bhfuil an fhaisnéis is gá chun measúnú a dhéanamh ar chomhlíontacht an chórais intleachta saorga leis na ceanglais ábhartha. Ba cheart a chur san áireamh, leis an bhfaisnéis sin, na saintréithe, cumais agus teorainneacha ginearálta maidir leis na córais, na halgartaim, na sonraí, na nósanna imeachta tástála agus bailíochtaithe arna n-úsáid chomh maith le doiciméadacht i dtaca leis an gcóras ábhartha bainistíochta riosca. Ba cheart an doiciméadacht theicniúil a choimeád cothrom le dáta. Thairis sin, ba cheart do sholáthraithe nó d'úsáideoirí logaí arna nginiúint go huathoibríoch ag an gcóras intleachta saorga ardriosca a choinneáil, lena n-áirítear, mar shampla, sonraí aschuir, dáta tosaigh agus am etc., a mhéid atá an córas sin agus na logaí gaolmhara faoina rialú, ar feadh tréimhse is iomchuí chun a chur ar a gcumas a n-oibleagáidí a chomhlíonadh.

- (47) Chun aghaidh a thabhairt ar an doiléireacht a d'fhéadfadh a fhágáil go mbeadh córais intleachta saorga áirithe dothuigthe nó róchasta le haghaidh daoine nádúrtha, ba cheart ceangal a bheith ann maidir le méid áirithe trédhearcachta i ndáil le córais intleachta saorga ardriosca. Ba cheart úsáideoirí a bheith in ann aschur an chórais a léirmhíniú agus a úsáid go hiomchuí. Ba cheart, dá bhrí sin, doiciméadacht ábhartha agus treoracha maidir le húsáid a bheith ag gabháil le córais intleachta saorga ardriosca, ina gcumhdófaí faisnéis ghonta shoiléir, lena n-áirítear faisnéis i ndáil le rioscaí a d'fhéadfadh a bheith ann do chearta bunúsacha agus maidir le hidirdhealú na ndaoine a d'fhéadfadh an córas difear a dhéanamh dóibh i bhfianaise an chuspóra a bheartaítear leis, i gcás inarb iomchuí. Chun tuiscint na n-úsáideoirí ar na treoracha úsáide a éascú, ba cheart samplaí léiritheacha a bheith iontu, de réir mar is iomchuí.
- (48) Ba cheart córais intleachta saorga ardriosca a dhearadh agus a fhorbairt sa chaoi gur féidir le daoine nádúrtha formhaoirseacht a dhéanamh ar fheidhmiú na gcóras sin. Chun na críche sin, ba cheart do sholáthraí an chórais bearta iomchuí maidir le formhaoirseacht dhaonna a shainaithint sula gcuirfear an córas ar an margadh nó i mbun seirbhíse. Go sonrath, i gcás inarb iomchuí, ba cheart a ráthú leis na bearta sin go bhfuil an córas faoi réir srianta oibríochtúla ionsuite nach féidir leis an gcóras é féin a shárú agus atá freagrúil don oibreoir daonna, agus go bhfuil an inniúlacht, oiliúint agus údarás is gá ag na daoine nádúrtha ar sannadh an fformhaoirseacht dhaonna orthu chun an ról sin a dhéanamh. I bhfianaise na n-iarmhairtí suntasacha do dhaoine i gcás meaitseanna míchearta ó chórais áirithe um shainaithint bhithmhéadrach, is iomchuí foráil a dhéanamh maidir le ceanglas feabhsaithe formhaoirseachta daonna do na córais sin ionas nach bhféadfaidh an t-úsáideoir aon ghníomh ná cinneadh a dhéanamh ar bhonn an tsainaitheantais a d'eascair as an gcóras mura rud é go ndearna beirt daoine nádúrtha ar a laghad é sin a fhíorú agus a dhearbhu ar leithligh. D'fhéadfadh na daoine sin a bheith ó eintiteas amháin nó níos mó agus ba cheart dóibh an duine a oibríonn nó a úsáideann an córas a áireamh. Níor cheart ualach ná moilleanna nach bhfuil gá leo a chruthú leis an gceanglas sin agus d'fhéadfadh sé a bheith leordhóthanach go ndéanfaí na fíoruithe ar leithligh a dhéanann na daoine éagsúla a thairfeadh go huathoibríoch sna logaí arna nginiúint ag an gcóras.
- (49) Ba cheart do chórais intleachta saorga ardriosca feidhmiú go comhsheasmhach ar feadh a saolré agus leibhéal iomchuí cruinnis, stóinseachta agus cibearshlándála a bhaint amach i gcomhréir leis an úrscothacht a nglactar léi i gcoitinne. Ba cheart an leibhéal cruinnis agus an mhéadracht chruinnis a chur in iúl do na húsáideoirí.

- (50) Is ceanglas bunriachtanach é an stóinseacht theicniúil le haghaidh córais intleachta saorga ardriosca. Ba cheart dóibh a bheith athléimneach i ndáil le hiompraíocht dhíobhálach nó neamh-inmhianaithe ar shlí eile a d'fhéadfadh a bheith mar thoradh ar shrianta laistigh de na córais nó den timpeallacht ina n-oibríonn na córais (e.g. earráidí, lochtanna, neamhréireachtaí, cásanna nach raibh coinne leo). Dá bhrí sin, ba cheart córais intleachta saorga ardriosca a dhearadh agus a fhorbairt le réitigh theicniúla iomchuí chun an iompraíocht atá díobhálach nó neamh-inmhianaithe ar bhealach eile a chosc nó a íoslaghdú, amhail mar shampla sásraí lena gcuirtear ar chumas an chórais a oibriú a stopadh go sábháilte (pleananna atá sábháilte ar theip) i gcás aimhrialtachtaí áirithe nó i gcás ina dtarlaíonn oibríocht lasmuigh de theorainneacha réamhchinntithe áirithe. D'fhéadfadh sé go mbeadh tionchair ar an tsábháilteacht nó go mbeadh éifeachtaí diúltacha ar chearta bunúsacha mar thoradh ar mhainneachtain na rioscaí sin a chosaint, mar shampla, de bharr cinntí earráideacha nó aschuir mhíchearta nó chlaonta a ghin an córas intleachta saorga.
- (51) Tá ról ríthábhachtach ag an gcibearshlándaíl chun a áirithiú go bhfuil na córais intleachta saorga athléimneach in aghaidh iarrachtaí a dhéanfaidh tríú páirtithe mailíseacha úsáid, iompraíocht nó feidhmíocht na gcóras a athrú nó cur isteach ar a n-airíonna slándála agus leochaileachtaí an chórais á saothrú acu. Féadfaidh cibirionsaithe in aghaidh córais intleachta saorga sócmhainní sonracha intleachta saorga a ghíaráil, amhail tacair sonraí oiliúna (e.g. nimhiú sonraí) nó samhlacha oilte (e.g. ionsaithe sáraíochta), nó leochaileachtaí i sócmhainní digiteacha an chórais nó ina bhonneagar foluiteach TFC a shaothrú. Chun leibhéal cibearshlándála atá i gcomhréir leis na rioscaí a áirithiú, ba cheart do sholáthraithe na gcóras intleachta saorga ardriosca bearta oiriúnacha a dhéanamh, agus an bonneagar foluiteach TFC á cur san áireamh freisin de réir mar is iomchuí.

- (52) Mar chuid de reachtaíocht chomhchuibhithe an Aontais, ba cheart na rialacha maidir le córais intleachta saorga ardriosca a chur ar an margadh, a chur i mbun seirbhíse nó a úsáid a leagan síos i gcomhréir le Rialachán (CE) Uimh. 765/2008 ó Pharlaimint na hEorpa agus ón gComhairle²² lena leagtar amach na ceanglais maidir le creidiúnú agus maidir le faireachas margaidh a bhaineann le táirgí a mhargú, Cinneadh Uimh. 768/2008/CE ó Pharlaimint na hEorpa agus ón gComhairle²³ maidir le creat comhchoiteann chun táirgí a mhargú agus Rialachán (AE) 2019/1020 ó Pharlaimint na hEorpa agus ón gComhairle²⁴ maidir le faireachas margaidh ar tháirgí agus comhlíonadh táirgí ('Creat Reachtach Nua chun Táirgí a Mhargú').
- (52a) I gcomhréir le prionsabail an Chreata Reachtaigh Nua, ba cheart oibleagáidí sonracha a shocrú le haghaidh oibreoírí ábhartha laistigh den slabhra luacha intleachta saorga, chun deimhneacht dhlíthiúil a áirithiú agus chun comhlíonadh an Rialacháin seo a éascú. I gcásanna áirithe, d'fhéadfadh na hoibreoírí sin gníomhú i níos mó ná ról amháin ag an am céanna agus, dá bhrí sin, ba cheart dóibh na hoibleagáidí ábhartha uile a bhaineann leis na ról sin a chomhlíonadh go carnach. Mar shampla, d'fhéadfadh oibreoír gníomhú mar dháileoir agus mar allmhaireoir ag an am céanna.
- (53) Is iomchuí go nglacfadh duine sonrach nádúrtha nó dlítheanach, atá sainmhínithe mar an soláthraí, an fhreagracht maidir le córas intleachta saorga ardriosca a chur ar an margadh nó a chur i mbun seirbhíse, gan beann ar cé acu a ndearna an duine nádúrtha nó dlítheanach an córas a dhearadh nó a fhorbairt nó nach ndearna.

²² Rialachán (CE) Uimh. 765/2008 ó Pharlaimint na hEorpa agus ón gComhairle an 9 Iúil 2008 lena leagtar amach na ceanglais maidir le creidiúnú agus maidir le faireachas margaidh a bhaineann le táirgí a mhargú, agus lena n-aisghairtear Rialachán (CEE) Uimh. 339/93 (IO L 218, 13.8.2008, lch. 30).

²³ Cinneadh Uimh. 768/2008/CE ó Pharlaimint na hEorpa agus ón gComhairle an 9 Iúil 2008 maidir le creat comhchoiteann le haghaidh margú táirgí, agus lena n-aisghairtear Cinneadh 93/465/CEE ón gComhairle (IO L 218, 13.8.2008, lch. 82).

²⁴ Rialachán (AE) 2019/1020 ó Pharlaimint na hEorpa agus ón gComhairle an 20 Meitheamh 2019 maidir le faireachas margaidh ar tháirgí agus ar chomhlíontacht táirgí agus lena leasaítear Treoir 2004/42/CE agus Rialacháin (CE) Uimh. 765/2008 agus (AE) Uimh. 305/2011 (Téacs atá ábhartha maidir le LEE) (IO L 169, 25.6.2019, lgh. 1–44).

- (54) Ba cheart don soláthraí córas bainistíochta cáilíochta fóna a bhunú, a áirithiú go gcomhlíontar an nós imeachta um measúnú comhréireachta is gá, an doiciméadacht ábhartha a tharraingt suas agus córas faireacháin iarmhargaidh stóinseach a bhunú. Féadfaidh na húdaráis phoiblí a chur córais intleachta saorga ardriosca i mbun seirbhíse le haghaidh a n-úsáide féin na rialacha maidir leis an gcóras bainistíochta cáilíochta a ghlacadh agus a chur chun feidhme mar chuid den chóras bainistíochta cáilíochta a glacadh ar an leibhéal náisiúnta nó réigiúnach, de réir mar is iomchuí, agus sainiúlachtaí na hearnála agus inniúlachtaí agus eagrú an údaráis phoiblí i gceist á gcur san áireamh.
- (54a) Chun deimhneacht dhlíthiúil a áirithiú, is gá a shoiléiriú gur cheart, faoi choinníollacha sonracha áirithe, aon duine nádúrtha nó dlítheanach a mheas mar sholáthraí córais intleachta saorga ardriosca nua agus, dá bhrí sin, ba cheart dó na hoibleagáidí ábhartha uile a ghlacadh chuige féin. Mar shampla, bheadh sé sin amhlaidh dá gcuirfeadh an duine sin a ainm nó a thrádmharc ar chóras intleachta saorga ardriosca atá curtha ar an margadh nó i mbun seirbhíse cheana féin, nó má mhodhnaíonn an duine sin an chríoch atá beartaithe do chóras intleachta saorga nach bhfuil ardriosca agus atá curtha ar an margadh nó i mbun seirbhíse cheana, ar bhealach a fhágann gur córas intleachta saorga ardriosca é an córas modhnaithe. Ba cheart feidhm a bheith ag na forálacha sin gan dochar d'fhorálacha níos sonraí arna mbunú i reachtaíocht eárnalach áirithe de chuid an Chreata Reachtaigh Nua lenar cheart feidhm a bheith ag an Rialachán seo go comhpháirteach. Mar shampla, Airteagal 16, mír 2 de Rialachán 745/2017, lena mbunaítear nár cheart a mheas gur modhnuithe ar fheiste a d'fhéadfadh difear a dhéanamh do chomhlíonadh na gceanglas is infheidhme iad athruithe áirithe, ba cheart feidhm a bheith aige fós maidir le córais intleachta saorga ardriosca ar feistí leighis iad de réir bhrí an Rialacháin sin.
- (55) I gcás ina bhfuil córas intleachta saorga ardriosca ina chomhpháirt sábháilteachta de tháirge a chumhdaítear le reachtaíocht eárnála ábhartha den Chreat Reachtach Nua agus nach gcuirtear an córas ardriosca intleachta saorga sin ar an margadh ná i mbun seirbhíse go neamhspleách ar an táirge, ba cheart do mhonaróir an táirge, mar a shainmhínítear faoi reachtaíocht ábhartha an Chreata Reachtaigh Nua, oibleagáidí an tsoláthraí a bhunaítear sa Rialachán seo a chomhlíonadh agus ba cheart dó a áirithiú, go háirithe, go gcomhlíonann an córas intleachta saorga, atá leabaithe sa táirge deiridh, ceanglais an Rialacháin seo.

- (56) Chun gur féidir an Rialachán seo a fhorfheidhmiú agus chun cothrom na Féinne a chruthú le haghaidh oibreoirí, agus ag cur san áireamh na bhfoirmeacha éagsúla chun táirgí digiteacha a chur ar fáil, tá sé tábhachtach a áirithiú, i ngach cás, gur féidir le duine atá bunaithe san Aontas an fhaisnéis uile is gá a sholáthar do na húdaráis maidir le comhlíontacht an chórais intleachta saorga. Dá bhrí sin, sula gcuirfear a gcórais intleachta saorga ar fáil san Aontas, i gcás nach féidir an t-allmhaireoir a shainaithint, ainmneoidh soláthraithe atá bunaithe lasmuigh den Aontas ionadaí údaraithe atá bunaithe san Aontas, trí shainordú i scríbhinn.
- (56a) I gcás soláthraithe nach bhfuil bunaithe san Aontas, tá ról ríthábhachtach ag an ionadaí údaraithe maidir lena áirithiú go mbeidh na córais intleachta saorga ardriosca a chuireann na soláthraithe sin ar an margadh nó i seirbhís san Aontas ag comhlíonadh na gceanglas maidir le bheith ina dhuine teagmhála acu bunaithe san Aontas. I bhfianaise an róil ríthábhachtaigh sin, agus chun a áirithiú go nglacfar freagracht chun críocha fhorfheidhmiú an Rialacháin seo, is iomchuí an t-ionadaí údaraithe a chur faoi dhliteanas i gcomhpháirt agus go leithleach leis an soláthraí as córais intleachta saorga ardriosca lochtacha. Tá dliteanas an ionadaí údaraithe dá bhforáiltear sa Rialachán seo gan dochar d'fhorálacha Threoir 85/374/CEE maidir le dliteanas i leith táirgí lochtacha.
- (57) [scriosta]
- (58) I bhfianaise chineál na gcóras intleachta saorga agus na rioscaí maidir leis an tsábháilteacht agus cearta bunúsacha a d'fhéadfadh a bheith ag baint le húsáid na gcóras sin, lena n-áirítear a mhéid a bhaineann leis an ngá faireachán iomchuí ar fheidhmíocht córais intleachta saorga i suíomh fíorshaoil a áirithiú, is iomchuí freagrachtaí sonracha a shocrú le haghaidh úsáideoirí. Ba cheart, go háirithe, d'úsáideoirí na córais intleachta saorga ardriosca a úsáid i gcomhréir leis na treoracha maidir le húsáid agus ba cheart a fhoráil maidir le hoibleagáidí eile a mhéid a bhaineann le faireachán a dhéanamh ar fheidhmiú na gcóras intleachta saorga agus a mhéid a bhaineann le coimeád taifead, de réir mar is iomchuí. Ba cheart na hoibleagáidí sin a bheith gan dochar d'oibleagáidí eile úsáideoirí i ndáil le córais intleachta saorga ardriosca faoi dhlí an Aontais nó faoin dlí náisiúnta, agus níor cheart feidhm a bheith acu i gcás ina ndéantar an úsáid le linn gníomhaíocht phearsanta neamhghairmiúil.

(58a) Is iomchuí a shoiléiriú nach ndéanann an Rialachán seo difear d'oibleagáidí soláthraithe agus úsáideoirí córas intleachta saorga ina ról mar rialaitheoirí nó próiseálaithe sonraí a eascraíonn as dlí an Aontais maidir le cosaint sonraí pearsanta a mhéid a bhaineann le dearadh, forbairt nó úsáid córas intleachta saorga le próiseáil sonraí pearsanta. Is iomchuí a shoiléiriú freisin go leanann na hábhair sonraí de bheith ag tairbhiú de na cearta agus na ráthaíochtaí go léir a bhronntar orthu le dlí sin an Aontais, lena n-áirítear na cearta a bhaineann le cinnteoireacht aonair uathoibrithe amháin, lena n-áirítear próifiliú. Le rialacha comhchuibhithe maidir le córais intleachta saorga a bhunaítear faoin Rialachán seo a chur ar an margadh, a chur i mbun seirbhíse agus a úsáid, ba cheart cur chun feidhme éifeachtach chearta na n-ábhar sonraí a éascú agus feidhmiú na gceart sin agus leigheasanna eile a ráthaítear faoi dhlí an Aontais maidir le cosaint sonraí pearsanta agus cearta bunúsacha eile a chumasú.

(59) [scriosta]

(60) [scriosta]

(61) Ba cheart ról lárnach a bheith ag an gcaighdeánú chun réitigh theicniúla a sholáthar do sholáthraithe chun comhlíonadh an Rialacháin seo a áirithiú, i gcomhréir leis an úrscothacht. Comhlíonadh na gcaighdeán comhchuibhithe mar a shainmhínítear i Rialachán (AE) Uimh. 1025/2012 ó Pharlaimint na hEorpa agus ón gComhairle²⁵, a mbeifí ag súil leis go léireofaí an úrscothacht leo, ba cheart an comhlíonadh sin a bheith ina mhodh ag soláthraithe chun comhréireacht le ceanglais an Rialacháin seo a léiriú. In éagmais tagairtí ábhartha do chaighdeán chomhchuibhithe, áfach, ba cheart don Choimisiún a bheith in ann sonraíochtaí coiteanna a bhunú, trí ghníomhartha cur chun feidhme, le haghaidh ceanglais áirithe faoin Rialachán seo mar réiteach cúltaca eisceachtúil chun éascú a dhéanamh ar oibleagáid an tsoláthraí ceanglais an Rialacháin seo a chomhlíonadh, nuair atá an próiseas caighdeánaithe blocáilte nó nuair a bhíonn moill ann maidir le caighdeán comhchuibhithe iomchuí a bhunú. Más é castacht theicniúil an chaighdeán atá i gceist is cúis leis an moill sin, ba cheart don Choimisiún é sin a mheas sula mbeartaíonn sé sonraíochtaí coiteanna a bhunú. Is den ríthábhacht go mbeadh baint iomchuí ag frontair bheaga agus mheánmhéide le forbairt caighdeán a thacaíonn le cur chun feidhme an Rialacháin seo chun nuálaíocht agus iomaíochas a chur chun cinn i réimse na hintleachta saorga laistigh den Aontas. Ba cheart rannpháirtíocht den sórt sin a áirithiú go hiomchuí i gcomhréir le hAirteagail 5 agus 6 de Rialachán 1025/2012.

²⁵ Rialachán (AE) Uimh. 1025/2012 ó Pharlaimint na hEorpa agus ón gComhairle an 25 Deireadh Fómhair 2012 maidir le caighdeánú Eorpach, lena leasaítear Treoir 89/686/CEE agus Treoir 93/15/CEE ón gComhairle agus Treoracha 94/9/CE, 94/25/CE, 95/16/CE, 97/23/CE, 98/34/CE, 2004/22/CE, 2007/23/CE, 2009/23/CE agus 2009/105/CE ó Pharlaimint na hEorpa agus ón gComhairle agus lena n-aisghairtear Cinneadh 87/95/CEE ón gComhairle agus Cinneadh Uimh. 1673/2006/CE ó Pharlaimint na hEorpa agus ón gComhairle (IO L 316, 14.11.2012, lch. 12).

- (61a) Is iomchuí, gan dochar d'úsáid caighdeán comhchuibhithe agus sonraíochtaí coiteanna, go dtairbheodh soláthraithe de thoimhde comhréireachta leis an gceanglas ábhartha maidir le sonraí nuair a bheidh a gcóras intleachta saorga ardriosca oilte agus tástáil ar shonraí lena léirítear an suíomh sonrath geografach, iompraíochta nó feidhmiúil ina bhfuil sé beartaithe an córas intleachta saorga a úsáid. Ar an gcaoi chéanna, i gcomhréir le hAirteagal 54(3) de Rialachán (AE) 2019/881 ó Pharlaimint na hEorpa agus ón gComhairle, maidir le córais intleachta saorga ardriosca a deimhníodh nó ar eisíodh ráiteas comhréireachta ina leith faoi scéim cibearshlándála de bhun an Rialacháin sin agus ar foilsíodh a dtagairtí in *Iris Oifigiúil an Aontais Eorpaigh*, ba cheart a thoimhdiú go bhfuil siad i gcomhréir le ceanglas cibearshlándála an Rialacháin seo. Tá an méid sin gan dochar do chineál deonach na scéime cibearshlándála sin.
- (62) Chun ardleibhéal iontaofachta a áirithiú i gcórais intleachta saorga ardriosca, ba cheart na córais sin a bheith faoi réir measúnú comhréireachta sula gcuirfear ar an margadh nó i mbun seirbhíse iad.

- (63) Chun an t-ualach ar oibreoirí a íoslaghdú agus chun aon dúbláil a d'fhéadfadh a bheith ann a sheachaint, maidir le córais intleachta saorga ardriosca a bhaineann le táirgí a chumhdaítear faoi reachtaíocht chomhchuibhithe an Aontais atá ann cheana mar thoradh ar chur chuige an Chreata Reachtaigh Nua, is iomchuí gur cheart comhlíontacht na gcóras intleachta saorga sin le ceanglais an Rialacháin seo a mheasúnú mar chuid den mheasúnú comhréireachta dá bhforáiltear cheana faoin reachtaíocht sin. Níor cheart d'infheidhmeacht na gceanglas sa Rialachán seo difear a dhéanamh do loighic, modheolaíocht nó struchtúr ginearálta an mheasúnaithe comhréireachta faoi reachtaíocht ábhartha shonrach an Chreata Reachtaigh Nua. Léirítear an cur chuige sin go hiomlán san idirghníomhú idir an Rialachán seo agus an [Rialachán maidir le hInnealra]. Cé go dtugtar aghaidh ar rioscaí sábháilteachta córas intleachta saorga le ceanglais an Rialacháin seo, lena n-áirithítear feidhmeanna sábháilteachta in innealra, le ceanglais shonracha áirithe sa [Rialachán maidir le hInnealra], áiritheofar go ndéanfar an córas intleachta saorga a chomhtháthú go sábháilte san innealra foriomlán, ionas nach gcuirfeadh isteach ar shábháilteacht an innealra ar an iomlán. Is ionann an sainmhíniú ar chóras intleachta saorga atá sa [Rialachán maidir le hInnealra] agus atá sa Rialachán seo. Maidir le córais intleachta saorga ardriosca a bhaineann le táirgí a chumhdaítear le Rialacháin 745/2017 agus 746/2017 maidir le feistí leighis, ba cheart infheidhmeacht cheanglais an Rialacháin seo a bheith gan dochar agus ba cheart go gcuirfí san áireamh leo loighic an bhainistithe riosca agus an measúnú tairbhe is riosca a dhéantar faoin gcreat um fheistí leighis.
- (64) I bhfianaise thaithí fhairsing na ndeimhneoirí réamh-mhargaidh gairmiúla i réimse na sábháilteachta táirgí agus chineál éagsúil na rioscaí lena mbaineann, is iomchuí, ar a laghad le linn na chéad chéime de chur i bhfeidhm an Rialacháin seo, an raon feidhme a theorannú maidir le cur i bhfeidhm measúnaithe comhréireachta tríú páirtithe le haghaidh córais intleachta saorga ardriosca cé is moite dóibh siúd a bhaineann leis na táirgí. Dá bhrí sin, mar riail ghinearálta, ba cheart don soláthraí measúnú comhréireachta na gcóras sin a dhéanamh faoina fhreagracht féin, ach amháin i gcás córais intleachta saorga atá beartaithe lena n-úsáid le haghaidh cian-sainaithint bhithmhéadrach daoine, lena cheart a fhoráil maidir le rannpháirtíocht comhlacht a dtugtar fógra dóibh sa mheasúnú comhréireachta, sa mhéid nach mbeidh toirmeasc orthu.

- (65) Chun measúnuithe comhréireachta tríú páirtithe a dhéanamh le haghaidh córais intleachta saorga ardriosca atá beartaithe lena n-úsáid le haghaidh cian-sainaithe bhithmhéadrach daoine, ba cheart fógra a thabhairt faoin Rialachán seo do na húdaráis inniúla náisiúnta comhlachtaí faoina dtugtar fógra, ar choinníoll go gcomhlíonann siad le tacar ceanglas, go sonrach maidir leis an neamhspleáchas, an inniúlacht agus nach bhfuil aon choinbhleacht leasa ann. Ba cheart d'údarais inniúla náisiúnta fógra faoi na comhlachtaí sin a sheoladh chuig an gCoimisiún agus chuig na Ballstáit eile trí bhíthin na huirlise leictreonaí um fhógra a thabhairt arna forbairt agus arna bainistiú ag an gCoimisiún de bhun Airteagal R23 de Chinneadh 768/2008.
- (66) Aon uair a tharlaíonn athrú a d'fhéadfadh difear a dhéanamh do chomhlíontacht córais intleachta saorga ardriosca leis an Rialachán seo (e.g. athrú ar an gcóras oibriúcháin nó ar ailtireacht na mbogearraí), nó nuair a thagann athrú ar an gcríoch atá beartaithe don chóras, is iomchuí gur cheart a mheas gur córas intleachta saorga nua é an córas intleachta saorga sin ar cheart measúnú comhréireachta nua a dhéanamh air i gcomhréir le coincheap an mhodhnaithe shubstantiúil a bhunaítear go coitianta le haghaidh táirgí a rialaítear le reachtaíocht comhchuibhithe an Aontais. Níor cheart, áfach, gur modhnú substantiúil iad athruithe a thagann ar an algartam agus ar fheidhmíocht na gcóras intleachta saorga a leanann de bheith 'ag foghlaim' tar éis iad a chur ar an margadh nó i seirbhís (i.e. oiriúnú go huathoibríoch don chaoi a ndéantar feidhmeanna), ar choinníoll go ndearna an soláthraí na hathruithe sin a réamhchinneadh agus go ndearnadh measúnú orthu tráth an mheasúnaithe comhréireachta.
- (67) Ba cheart an mharcáil CE a bheith ar chórais intleachta saorga ardriosca chun a shonrú go bhfuil siad i gcomhréir leis an Rialachán seo sa dóigh is gur féidir leo gluaiseacht gan bhac laistigh den mhargadh inmheánach. Níor cheart do na Ballstáit constaicí éagóracha a chruthú maidir le córais intleachta saorga ardriosca a chomhlíonann na ceanglais a leagtar síos sa Rialachán seo agus a bhfuil an mharcáil CE orthu, a chur ar an margadh nó a chur i mbun seirbhíse.
- (68) Faoi choinníollacha áirithe, d'fhéadfadh rochtain thapa ar theicneolaíochtaí nuálacha a bheith ríthábhachtach do shláinte agus sábháilteacht na ndaoine agus na sochaí ina hiomláine. Dá bhrí sin, is iomchuí i gcás cúiseanna eisceachtúla a bhaineann leis an tslándáil phoiblí nó le cosaint beatha nó sláinte daoine nádúrtha agus cosaint maoinne tionsclaíche agus tráchtálaí, go bhféadfadh na Ballstáit údarú a thabhairt maidir le córais intleachta saorga nach ndearnadh measúnú comhréireachta orthu a chur ar an margadh nó a chur i mbun seirbhíse.

(69) Chun obair an Choimisiúin agus na mBallstát i réimse na hintleachta saorga a éascú chomh maith leis an trédhearcacht i leith an phobail a mhéadú, ba cheart é a bheith de cheangal ar sholáthraithe córas intleachta saorga ardriosca, cé is moite dóibh siúd a bhaineann le táirgí a thagann faoi raon feidhme reachtaíocht chomhchuíbhithe áirithe an Aontais, iad féin agus faisnéis faoina gcóras intleachta saorga ardriosca a chlárú i mbunachar sonraí an Aontais, bunachar sonraí atá le bunú agus le bainistiú ag an gCoimisiún. Sula n-úsáidfeadh córas intleachta saorga ardriosca a liostaítear in Iarscríbhinn III, déanfaidh úsáideoirí na gcóras intleachta saorga ardriosca ar údarais phoiblí, gníomhaireachtaí poiblí nó comhlachtaí poiblí iad, cé is moite d'údarais forfheidhmithe dlí, údarais rialaithe teorann, údarais inimirce nó tearmainn, agus údarais ar úsáideoirí na gcóras intleachta saorga ardriosca iad i réimse an bhonneagair chriticiúil, déanfaidh siad iad féin a chlárú sa bhunachar sonraí sin freisin agus roghnóidh siad an córas atá beartaithe acu a úsáid. Ba cheart don Choimisiún a bheith ina rialaitheoir ar an mbunachar sonraí sin, i gcomhréir le Rialachán (AE) Uimh. 2018/1725 ó Pharlaimint na hEorpa agus ón gComhairle²⁶. Chun feidhmiúlacht iomlán an bhunachair sonraí a áirithiú, nuair atá sé in úsáid, ba cheart mionsaothrú na sonraíochtaí feidhmiúla ag an gCoimisiún agus ag tuarascáil neamhspleách iniúchóireachta a áireamh mar chuid den nós imeachta chun an bunachar sonraí a shocrú.

²⁶ Rialachán (AE) 2016/679 ó Pharlaimint na hEorpa agus ón gComhairle an 27 Aibreán 2016 maidir le daoine nádúrtha a chosaint i ndáil le sonraí pearsanta a phróiseáil agus maidir le saorghluaiseacht sonraí den sórt sin, agus lena n-aisghairtear Treoir 95/46/CE (An Rialachán Ginearálta maidir le Cosaint Sonraí) (IO L 119, 4.5.2016, lch. 1).

(70) Córtais intleachta saorga áirithe atá beartaithe le hidirghníomhú le daoine nádúrtha nó le hinneachar a ghiniúint, d'fhéadfadh siad rioscaí sonracha a chothú maidir le pearsanú nó meabhlaireacht gan beann ar cé acu a bhfuil siad incháilithe mar ardriosca nó nach bhfuil. In imthosca áirithe, ba cheart, dá bhrí sin, úsáid na gcóras sin a bheith faoi réir oibleagáidí sonracha trédhearcachta gan dochar do na ceanglais agus na hoibleagáidí le haghaidh córas intleachta saorga ardriosca. Go háirithe, ba cheart fógra a thabhairt do dhaoine nádúrtha go bhfuil siad ag idirghníomhú le córas intleachta saorga, ach amháin más léir sin ó thaobh duine nádúrtha atá réasúnta eolach, géarchúiseach agus cáiréiseach, agus na himthosca agus comhthéacs na húsáide á gcur san áireamh. Agus an oibleagáid sin á cur chun feidhme, ba cheart saintréithe daoine aonair, a bhaineann le grúpaí leochaileacha mar gheall ar a n-aois nó a míchumas, a chur san áireamh a mhéid atá sé beartaithe leis an gcóras intleachta saorga idirghníomhú leis na grúpaí sin chomh maith. Thairis sin, ba cheart fógra a thabhairt do dhaoine nádúrtha nuair a nochtar córais dóibh ar féidir leo, trína sonraí bithmhéadracha a phróiseáil, mothúcháin nó intinn na ndaoine sin a shainnithint nó a thabhairt le tuiscint nó iad a shannadh do chatagóirí sonracha. D'fhéadfadh baint a bheith ag catagóirí sonracha den sórt sin le gnéithe amhail gnéas, aois, dath gruaige, dath súile, tatúnna, tréithe pearsanta, bunús eitneach, roghanna pearsanta agus leasanna pearsanta nó le gnéithe eile amhail gnéaschlaonadh nó claonadh polaitiúil. Ba cheart an fhaisnéis agus na fógraí sin a sholáthar i bhformáidí inrochtana le haghaidh daoine faoi mhíchumas. Thairis sin, maidir le húsáideoirí a úsáideann córas intleachta saorga chun inneachar íomhá, fuaimne nó físe a ghiniúint nó a láimhsiú atá an-chosúil le daoine, áiteanna nó imeachtaí atá ann cheana agus a mbeadh an chuma bhréige air do dhuine go bhfuil sé barántúil, ba cheart dóibh a nochtadh gur cruthaíodh nó gur láimhsíodh an t-inneachar go saorga trí aschur na hintleachta saorga a lipéadú dá réir sin agus a thionscnamh saorga a nochtadh. Níor cheart comhlíonadh na n-oibleagáidí faisnéise dá dtagraítear thuas a léirmhíniú mar léiriú go bhfuil úsáid nó aschur an chórais dleathach faoin Rialachán seo nó faoi dhlí eile de chuid an Aontais agus na mBallstát agus ba cheart é a bheith gan dochar d'oibleagáidí trédhearcachta eile d'úsáideoirí na gcóras intleachta saorga a leagtar síos i ndlí an Aontais nó sa dlí náisiúnta. Ina theannta sin, níor cheart a léirmhíniú leis sin go dtugtar le fios go gcuireann úsáid an chórais nó a aschur bac ar an gceart maidir le saoirse chun tuairimí a nochtadh agus ar an gceart maidir le saoirse na n-ealaíon agus na n-eolaíochtaí a ráthaítear i gCairt um Chearta Bunúsacha an Aontais Eorpaigh, go háirithe i gcás ina bhfuil an t-ábhar ina chuid de shaothar nó de chlár atá cruthaitheach, aorach, ealaíonta nó ficseanúil, faoi réir coimirce íomchuí do chearta agus saoirsí tríú páirtithe.

(71) Grúpa teicneolaíochtaí atá san intleacht shaorga atá ag forbairt go tapa agus lena bhfuil cineálacha nua formhaoirseachta rialála agus spás sábháilte le haghaidh turgnamhaíochta ag teastáil, ach lena n-áirithítear nuálaíocht fhreagrach agus comhtháthú coimircí iomchuí agus bearta maolaithe riosca. Chun creat dlíthiúil atá fabhrach don nuálaíocht, stóinseach don todhchaí agus athléimneach in aghaidh suaite a áirithiú, ba cheart na húdaráis iniúla náisiúnta ó Bhallstát amháin nó níos mó a spreagadh boscaí gainimh rialála intleachta saorga a bhunú chun forbairt agus tástáil na gcóras intleachta saorga nuálach faoi fhormhaoirseacht rialála dhian a éascú sula gcuirfear na córais sin ar an margadh nó i mbun seirbhíse ar shlí eile.

(72) Ba cheart é a bheith de chuspóir ag boscaí gainimh rialála na hintleacha saorga nuálaíocht na hintleachta saorga a chothú trí thimpeallacht rialaithe turgnamhaíochta agus tástála a bhunú ag an gcéim forbartha agus ag an gcéim réamh-mhargaidh d'fhonn comhlíontacht na gcóras intleacht saorga leis an Rialachán seo agus reachtaíocht ábhartha eile de chuid an Aontais agus na mBallstát a áirithiú; chun deimhneacht dhlíthiúil a fheabhsú le haghaidh nuálaithe agus formhaoirseacht agus tuiscint na n-údarás inniúla ar na deiseanna, na rioscaí atá ag teacht chun cinn agus tionchair na húsáide intleachta saorga a fheabhsú, agus chun dlús a chur le rochtain ar an margadh, lena n-áirítear trí dheireadh a chur le bacainní le haghaidh fiontair bheaga agus mheánmhéide (FBManna), lena n-áirítear gnólachtaí nuathionscanta. Ba cheart go ndíreofaí le rannpháirtíocht sa bhosca gainimh rialála IS ar shaincheisteanna lena n-ardaítear éiginnteacht dhlíthiúil do sholáthraithe agus do sholáthraithe ionchasacha chun nuálaíocht a dhéanamh, triail a bhaint as IS san Aontas agus cur le foghlaim rialála atá bunaithe ar fhianaise. Dá bhrí sin, ba cheart go gcumhdófaí leis an maoirseacht ar na córais intleachta saorga sa bhosca gainimh rialála IS a bhforbairt, a n-oiliúint, a dtástáil agus a mbailíochtú sula gcuirfear na córais ar an margadh nó i mbun seirbhíse, chomh maith leis an gcoincheap maidir le modhnú substaintiúil agus tarlú an mhodhnaithe shubstaintiúil a bhféadfadh nós imeachta nua um measúnú comhréireachta a bheith ag teastáil ina leith. I gcás inarb iomchuí, ba cheart d'údaráis inniúla náisiúnta a bhunaíonn boscaí gainimh rialála IS oibriú i gcomhar le húdaráis ábhartha eile, lena n-áirítear iad siúd a dhéanann maoirseacht ar chosaint na gceart bunúsach, agus d'fhéadfaidís rannpháirtíocht gníomhaithe eile a cheadú laistigh den éiceachóras IS amhail eagraíochtaí náisiúnta nó Eorpacha um chaighdeánú, comhlachtaí faoina dtugtar fógra, saoráidí tástála agus turgnamhaíochta, saotharlanna taighde agus turgnamhaíochta, moil nuálaíochta agus eagraíochtaí ábhartha geallsealbhóirí agus eagraíochtaí ábhartha na sochaí sibhialta. Chun chur chun feidhme aonfhoirmeach ar fud an Aontais agus barainneacht scála a áirithiú, is iomchuí rialacha comhchoiteanna a bhunú maidir leis na boscaí gainimh rialála a chur chun feidhme agus creat a bhunú maidir le comhar idir na húdaráis ábhartha atá rannpháirteach i maoirseacht na mboscaí gainimh. Ba cheart boscaí gainimh rialála IS a bhunaítear faoin Rialachán seo a bheith gan dochar do reachtaíocht eile lena gceadaítear boscaí gainimh eile a bhunú arb é is aidhm dóibh comhlíonadh reachtaíochta, cé is moite den Rialachán seo, a áirithiú. I gcás inarb iomchuí, ba cheart do na húdaráis inniúla ábhartha atá i gceannas ar na boscaí gainimh rialála eile féachaint ar na tairbhí a bhaineann leis na boscaí gainimh sin a úsáid freisin chun comhlíonadh na gcóras intleachta saorga leis an Rialachán seo a áirithiú. Féadfar tástáil faoi fhíordhálaí domhanda a oibriú agus a mhaoirsiú freisin faoi chuimsiú an bhosca gainimh rialála IS, faoi réir comhaontú idir na húdaráis inniúla náisiúnta agus na rannpháirtithe sa bhosca gainimh rialála IS.

- (-72a) Ba cheart an Rialachán seo a bheith ina bhunús dlí le haghaidh na rannpháirtithe sa bhosca gainimh rialála IS chun sonraí pearsanta a bhailítear chun críoch eile a úsáid chun córais intleachta saorga áirithe a fhorbairt ar mhaithe le leas an phobail faoi chuimsiú an bhosca gainimh rialála IS, i gcomhréir le hAirteagail 6(4) agus 9(2)(g) de Rialachán (AE) 2016/679, agus Airteagail 5 agus 10 de Rialachán (AE) 2018/1725, agus gan dochar d'Airteagail 4(2) agus 10 de Threoir (AE) 2016/680. Beidh feidhm i gcónaí ag na hoibleagáidí eile ar fad atá ar rialaitheoirí sonraí agus ag cearta na n-ábhar sonraí faoi Rialacháin (AE) 2016/679 agus (AE) 2018/1725 agus Treoir (AE) 2016/680. Go háirithe, níor cheart bunús dlí a sholáthar leis an Rialachán seo de réir bhrí Airteagal 22(2)(b) de Rialachán (AE) 2016/679 agus Airteagal 24(2)(b) de Rialachán (AE) 2018/1725. Ba cheart do rannpháirtithe an bhosca gainimh rialála coimircí iomchuí a áirithiú agus oibriú i gcomhar leis na húdaráis inniúla, lena n-áirítear trína dtreoir a leanúint agus trí ghníomhú go tapa agus de mheon macánta chun aon ardriosca a mhaolú maidir le sábháilteacht nó cearta bunúsacha a d'fhéadfadh teacht chun cinn le linn na forbartha agus na turgnamhaíochta sa bhosca gainimh. Ba cheart iompar na rannpháirtithe sa bhosca gainimh a chur san áireamh agus cinneadh á dhéanamh ag na húdaráis inniúla an ngearrfar fineáil riaracháin faoi Airteagal 83(2) de Rialachán 2016/679 agus Airteagal 57 de Threoir 2016/680.
- (72a) Chun dlús a chur leis an bpróiseas chun córais intleachta saorga ardriosca a liostaítear in Iarscríbhinn III a fhorbairt agus a chur ar an margadh, tá sé tábhachtach go bhféadfaidh soláthraithe nó soláthraithe ionchasacha na gcóras sin tairbhiú de chóras sonrath chun na córais sin a thástáil faoi fhíordhálaí domhanda, gan a bheith rannpháirteach sa bhosca gainimh rialála IS. I gcásanna den sórt sin, áfach, agus na hiarmhairtí, a d'fhéadfadh a bheith ag tástáil den sórt sin, ar dhaoine aonair á gcur san áireamh, ba cheart a áirithiú go dtabharfar isteach leis an Rialachán ráthaíochtaí agus coinníollacha iomchuí agus leordhóthanacha do sholáthraithe nó do sholáthraithe ionchasacha. Ba cheart a áireamh ar na ráthaíochtaí sin, i measc nithe eile, toiliú feasach a iarraidh ó dhaoine nádúrtha chun páirt a ghlacadh sa tástáil faoi fhíordhálaí domhanda, cé is moite d'fhorfheidhmiú an dlí i gcásanna ina gcuirfeadh cosc ar thástáil an chórais intleachta saorga mar gheall ar thoiliú feasach a bheith á lorg. Tá toiliú na ndaoine is ábhar don tástáil chun páirt a ghlacadh i dtástáil den sórt sin faoin Rialachán seo éagsúil ó thoiliú na n-ábhar sonraí chun a sonraí pearsanta a phróiseáil faoin dlí ábhartha maidir le cosaint sonraí agus gan dochar don toiliú sin.

- (73) Chun an nuálaíocht a chur chun cinn agus a chosaint, tá sé tábhachtach go dtabharfaí aird ar leith ar leasanna sholáthraithe FBManna agus úsáideoirí córas intleachta saorga. I bhfianaise an chuspóra sin, ba cheart do na Ballstáit tionscnaimh a fhorbairt atá dírithe ar na hoibreoirí sin, lena n-áirítear maidir le hardú feasachta agus cumarsáid faisnéise. Thairis sin, cuirfear leasanna sonracha agus riachtanais shonracha na soláthraithe FBManna san áireamh agus táilli an mheasúnaithe comhréireachta á socrú ag na comhlachtaí faoina dtugtar fógra. D'fhéadfadh costais suntasach a bheith i gceist le costais aistriúcháin a bhaineann le doiciméadacht shainordaitheach agus cumarsáid leis na húdaráis, le haghaidh soláthraithe agus oibreoirí eile, eadhon iad siúd ar mhionscála. Ba cheart do na Ballstáit a áirithiú, más féidir, maidir leis na teangacha a chinnfidh siad agus a ghlacfaidh siad le doiciméadacht ábhartha na soláthraithe agus cumarsáid leis na soláthraithe inti, gur teanga í ceann amháin de na teangacha sin a bhfuil tuiscint éigin ag an líon is mó úsáideoirí trasteorann is féidir uirthi.
- (73a) Chun nuálaíocht a chur chun cinn agus a chosaint, ba cheart don Ardán um Intleacht Shaorga ar éileamh, gach clár agus tionscadal cistiúcháin ábhartha de chuid an Aontais, amhail an Clár don Eoraip Dhigiteach, Fís Eorpach, arna gcur chun feidhme ag an gCoimisiún agus ag na Ballstáit ar an leibhéal náisiúnta nó ar leibhéal an Aontais, a bheith ina rannchuidiú le cuspóirí an Rialacháin seo a bhaint amach.
- (74) Go háirithe, chun na rioscaí maidir le cur chun feidhme mar thoradh ar easpa eolais agus saineolais sa mhargadh a íoslaghdú agus chun comhlíontacht na soláthraithe, go háirithe FBManna, agus na gcomhlachtaí faoina dtugtar fógra lena n-oibleagáidí faoin Rialachán seo a éascú, ba cheart don Ardán um Intleacht Shaorga ar éileamh, do na Moil Nuálaíochta Digtí Eorpacha agus do na Saoráidí Tástála agus Turgnamhaíochta arna mbunú ag an gCoimisiún agus na Ballstáit ar an leibhéal náisiúnta nó ar leibhéal an Aontais rannchuidiú le cur chun feidhme an Rialacháin seo. Laistigh dá misean agus réimsí inniúlachta faoi seach, féadfaidh siad tacaíocht theicniúil agus eolaíoch go háirithe a thabhairt do sholáthraithe agus comhlachtaí a dtugtar fógra dóibh.
- (74a) Thairis sin, chun comhréireacht i bhfianaise mhéid an-bheag oibreoirí áirithe maidir le costais nuálaíochta a áirithiú, is iomchuí micrifhiontair a dhíolmhú ó na hoibleagáidí is costasaí, mar shampla, an oibleagáid córas bainistithe cáilíochta a bhunú lena laghdófaí an t-ualach riaracháin agus na costais do na fiontair sin gan difear a dhéanamh don leibhéal cosanta agus don ghá atá leis na ceanglais maidir le córais intleachta saorga ardriosca a chomhlíonadh.

(75) Is iomchuí go n-éascóidh an Coimisiún, a mhéid agus is féidir, rochtain ar Shaoráidí Tástála agus Turgnamhaíochta le haghaidh comhlachtaí, grúpaí nó saotharlanna arna mbunú nó arna gcreidiúnú de bhun aon reachtaíocht chomhchuibhithe ábhartha de chuid an Aontais agus a chomhlíonann cúraimí i gcomhthéacs measúnaithe comhréireachta táirgí nó gaireas a chumhdaítear leis an reachtaíocht chomhchuibhithe sin de chuid an Aontais. Is amhlaidh atá go háirithe i gcás painéil saineolaithe, sain-saotharlanna agus saotharlanna tagartha i réimse na bhfeistí leighis de bhun Rialachán (AE) 2017/745 agus Rialachán (AE) 2017/746.

(76) Chun cur chun feidhme rianúil éifeachtach agus comhchuibhithe an Rialacháin seo a éascú, ba cheart Bord Eorpach um Intleacht Shaorga a bhunú. Ba cheart don Bhord leasanna éagsúla an éiceachórais IS a léiriú agus ba cheart ionadaithe ó na Ballstáit a bheith air. Chun rannpháirtíocht na ngeallsealbhóirí ábhartha a áirithiú, ba cheart buan-fhoghrúpa den Bhord a chruthú. Ba cheart don Bhord a bheith freagrach as roinnt cúraimí comhairleacha, lena n-áirítear tuairimí, moltaí, comhairle a thabhairt nó cur le treoir maidir le hábhair a bhaineann leis an Rialachán seo a chur chun feidhme, lena n-áirítear maidir le cúrsaí forfheidhmiúcháin, sonraíochtaí teicniúla nó caighdeáin atá ann cheana i dtaca leis na ceanglais a bhunaítear sa Rialachán seo agus comhairle a thabhairt don Choimisiún agus na Ballstáit agus a n-údaráis inniúla náisiúnta maidir le ceisteanna sonracha a bhaineann leis an intleacht shaorga. Chun solúbthacht áirithe a thabhairt do na Ballstáit maidir lena n-ionadaithe ar an mBord um an Intleacht Shaorga a ainmniú, féadfaidh aon duine a bhaineann le heintitis phoiblí ar cheart na hinniúlachtaí agus na cumhachtaí ábhartha a bheith acu chun comhordú a éascú ar an leibhéal náisiúnta agus chun rannchuidiú le baint amach chúraimí an Bhoird a bheith ina n-ionadaithe sin. Ba cheart don Bhord dhá bhuan-fhoghrúpa a bhunú chun ardán comhair agus malartaithe a chur ar fáil i measc na n-údarás faireachais margaidh agus na n-údarás a thugann fógra maidir le saincheisteanna a bhaineann le faireachas margaidh agus le comhlachtaí faoina dtugtar fógra faoi seach. Ba cheart don bhuan-fhoghrúpa um fhaireachas margaidh gníomhú mar an Grúpa Comhair Riaracháin (ADCO) don Rialachán seo de réir bhrí Airteagal 30 de Rialachán (AE) 2019/1020. I gcomhréir le ról agus cúraimí an Choimisiúin de bhun Airteagal 33 de Rialachán (AE) 2019/1020, ba cheart don Choimisiún tacú le gníomhaíochtaí an bhuan-fhoghrúpa um fhaireachas margaidh trí mheastóireachtaí margaidh nó staidéir mhargaidh a dhéanamh, go háirithe d'fhonn gnéithe den Rialachán seo a shainnithint a dteastaíonn comhordú sonracha agus práinneach ina leith i measc na n-údarás um fhaireachas margaidh. Féadfaidh an Bord buan-fhoghrúpaí nó foghrúpaí sealadacha eile a bhunú de réir mar is iomchuí chun scrúdú a dhéanamh ar cheisteanna sonracha. Ba cheart don Bhord dul i gcomhar freisin, de réir mar is iomchuí, le comhlachtaí, grúpaí saineolaithe agus líonraí ábhartha de chuid an Aontais atá gníomhach i gcomhthéacs reachtaíocht ábhartha an Aontais, lena n-áirítear go háirithe iad siúd atá gníomhach faoi rialachán ábhartha an Aontais maidir le sonraí, táirgí agus seirbhísí digiteacha.

- (76a) Ba cheart don Choimisiún tacú go gníomhach leis na Ballstáit agus leis na hoibreoírí i gcur chun feidhme agus i bhforfheidhmiú an Rialacháin seo. I ndáil leis an méid sin, ba cheart dó treoirlínte a fhorbairt maidir le hábhair ar leith arb é is aidhm dóibh cur i bhfeidhm an Rialacháin seo a éascú, agus aird ar leith á tabhairt ar riachtanais FBManna agus ar riachtanais na bhfiontar nuathionscanta sna hearnálacha is mó ar dócha a ndéanfar difear dóibh. Chun tacú le forfheidhmiú leordhóthanach agus le haemhainneachtaí na mBallstát, ba cheart saoráidí tástála an Aontais maidir leis an intleacht shaorga agus díorma saineolaithe ábhartha a chur ar bun agus a chur ar fáil do na Ballstáit.
- (77) Tá ról lárnach ag na Ballstáit ó thaobh an Rialacháin seo a chur i bhfeidhm agus a fhorfheidhmiú. Ina thaobh sin, ba cheart do gach Ballstát údarás inniúil náisiúnta amháin nó níos mó a ainmniú chun maoirseacht a dhéanamh ar chur i bhfeidhm agus cur chun feidhme an Rialacháin seo. Féadfaidh na Ballstáit cinneadh a dhéanamh eintiteas poiblí d'aon chineál a cheapadh chun cúraimí na n-údarás inniúil náisiúnta a dhéanamh de réir bhrí an Rialacháin seo, i gcomhréir lena saintréithe agus lena riachtanais eagraíochtúla náisiúnta shonracha.
- (78) Chun a áirithiú gur féidir le soláthraithe na gcóras intleachta saorga ardriosca taithí a chur san áireamh maidir le húsáid na gcóras intleachta saorga ardriosca chun feabhas a chur ar a gcórais agus ar an bpróiseas deartha agus forbartha nó gur féidir leo aon bheart ceartaitheach a dhéanamh go tráthúil, ba cheart do gach soláthraí córas faireacháin iarmhargaidh a bheith i bhfeidhm aige. Tá an córas sin rithábhachtach freisin chun a áirithiú gur féidir dul i ngleic ar bhealach níos éifeachtúla agus níos tráthúla le rioscaí a d'fhéadfadh eascairt as córais intleachta saorga a leanann de bheith 'ag foghlaim' tar éis iad a chur ar an margadh nó i mbun seirbhíse. Sa chomhthéacs sin, ba cheart a cheangal ar sholáthraithe freisin córas a bheith i bhfeidhm acu chun tuairisciú do na húdaráis ábhartha maidir le haon teagmhas tromchúiseach, atá mar thoradh ar úsáid a gcóras intleachta saorga.

- (79) Chun a áirithiú go ndéantar na ceanglais agus na hoibleagáidí a leagtar amach sa Rialachán seo a fhorfheidhmiú go hiomchuí agus go héifeachtach, ar reachtaíocht chomhchuibhithe an Aontais í, ba cheart feidhm a bheith ag an gcóras maidir le faireachas margaidh ar tháirgí agus comhlíontacht táirgí, ina iomláine, a bhunaítear le Rialachán (AE) 2019/1020. Ba cheart na cumhachtaí forfheidhmiúcháin go léir faoin Rialachán seo agus faoi Rialachán (AE) 2019/1020 a bheith ag na húdaráis um fhaireachas margaidh arna n-ainmniú de bhun an Rialacháin seo agus ba cheart dóibh a gcumhachtaí a fheidhmiú agus a ndualgais a chomhlíonadh go neamhspleách, go neamhchlaonta agus gan laofacht. Cé nach bhfuil formhór na gcórais intleachta saorga faoi réir ceanglais shonracha agus oibleagáidí sonracha faoin Rialachán seo, féadfaidh na húdaráis um fhaireachas margaidh bearta a dhéanamh i ndáil leis na córais intleachta saorga uile nuair a bhaineann riosca leo i gcomhréir leis an Rialachán seo. De bharr chineál sonracha na n-institiúidí, na gníomhaireachtaí agus na gcomhlachtaí de chuid an Aontais a thagann faoi raon feidhme an Rialacháin seo, is iomchuí an Maoirseoir Eorpach ar Chosaint Sonraí a ainmniú mar údarás inniúil um fhaireachas margaidh dóibh. Ba cheart an méid sin a bheith gan dochar d'ainmniú údarás inniúil náisiúnta ag na Ballstáit. Níor cheart go ndéanfaí difear le gníomhaíochtaí faireachais margaidh do chumas na n-eintiteas faoi mhaoirseacht a gcúraimí a dhéanamh go neamhspleách, nuair a cheanglaítear an neamhspleáchas sin le dlí an Aontais.
- (79a) Tá an Rialachán seo gan dochar d'inniúlachtaí, cúraimí, cumhachtaí agus neamhspleáchas na n-údarás nó na gcomhlachtaí poiblí náisiúnta ábhartha a dhéanann maoirseacht ar chur i bhfeidhm dhlí an Aontais lena gcosnaítear cearta bunúsacha, lena n-áirítear comhlachtaí comhionannais agus údarás cosanta sonraí. I gcás inar gá sin dá sainordú, ba cheart rochtain a bheith ag na húdaráis nó comhlachtaí poiblí náisiúnta sin freisin ar aon doiciméadacht a chruthaítear faoin Rialachán seo. Ba cheart nós imeachta cosanta sonracha a leagan síos chun forfheidhmiú leordhóthanach tráthúil a áirithiú i gcoinne córais intleachta saorga a bhfuil riosca don tsláinte, don tsábháilteacht agus do chearta bunúsacha ag baint leo. Ba cheart an nós imeachta le haghaidh córais intleachta saorga den sórt sin a bhfuil riosca ag baint leo a chur i bhfeidhm ar chórais intleachta saorga ardriosca a bhfuil riosca ag baint leo, córais thoirmisce a cuireadh ar an margadh, a cuireadh i mbun seirbhíse nó a úsáideadh de shárú ar na cleachtais thoirmisce a leagtar síos sa Rialachán seo agus ar chórais intleachta saorga a cuireadh ar fáil de shárú ar na ceanglais trédhearcachta a leagtar síos sa Rialachán seo agus a bhfuil riosca ag baint leo.

(80) Le reachtaíocht an Aontais maidir le seirbhísí airgeadais, cumhdaítear rialachas inmheánach agus rialacha agus ceanglais i dtaca le bainistíocht riosca is infheidhme maidir le hinstitiúidí airgeadais a rialaítear le linn sholáthar na seirbhísí sin, lena n-áirítear nuair a bhaineann siad úsáid as córais intleachta saorga. Chun cur i bhfeidhm agus forfheidhmiú comhleanúnach na n-oibleagáidí faoin Rialachán seo agus chun rialacha agus ceanglais ábhartha reachtaíocht sheirbhísí airgeadais an Aontais a áirithiú, ba cheart na húdaráis atá freagrach as maoirseacht agus forfheidhmiú na reachtaíochta seirbhísí airgeadais a ainmniú mar údaráis inniúla chun cur chun feidhme an Rialacháin seo a mhaoirsiú, lena n-áirítear le haghaidh gníomhaíochtaí faireachais margaidh, a mhéid a bhaineann le córais intleachta saorga arna soláthar nó arna n-úsáid ag institiúidí airgeadais rialáilte faoi mhaoirseacht, ach amháin i gcás ina gcinnfidh na Ballstáit údaráis eile a ainmniú chun na cúraimí faireachais margaidh a chomhlíonadh. Ba cheart gach cumhacht a bheith ag na húdaráis inniúla sin faoin Rialachán seo agus faoi Rialachán (AE) 2019/1020 maidir le faireachas margaidh chun ceanglais agus oibleagáidí an Rialacháin seo a fhorfheidhmiú, lena n-áirítear cumhachtaí chun ár ngníomhaíochtaí faireachais margaidh *ex post* a dhéanamh, cumhachtaí is féidir a chomhtháthú, de réir mar is iomchuí, ina sásraí maoirseachta agus ina nósanna imeachta maoirseachta atá ann cheana faoi reachtaíocht ábhartha an Aontais maidir le seirbhísí airgeadais. Agus iad ag gníomhú mar údaráis náisiúnta um fhaireachas margaidh faoin Rialachán seo, na húdaráis náisiúnta atá freagrach as maoirseacht a dhéanamh ar institiúidí creidmheasa arna rialáil faoi Threoir 2013/36/AE, atá rannpháirteach sa Sásra Maoirseachta Aonair (SMA) arna bhunú le Rialachán Uimh. 1024/2013 ón gComhairle, is iomchuí a bheartú gur cheart do na húdaráis sin tuairisciú gan mhoill don Bhanc Ceannais Eorpach aon fhaisnéis a shainaithnítear le linn a ngníomhaíochtaí faireachais margaidh a d'fhéadfadh a bheith ina hábhar spéise do chúraimí maoirseachta stuamachta an Bhainc Cheannais Eorpaigh mar a shonraítear sa Rialachán sin. Chun an chomhsheasmhacht a fheabhsú idir an Rialachán seo agus na rialacha is infheidhme maidir le hinstitiúidí creidmheasa a rialaítear faoi Threoir 2013/36/AE ó Pharlaimint na hEorpa agus ón gComhairle²⁷, is iomchuí freisin cuid d'oibleagáidí nós imeachta na soláthraithe maidir le bainistiú riosca, faireachán iarmhargaidh agus doiciméadacht a chomhtháthú sna hoibleagáidí agus nósanna imeachta atá ann cheana faoi Threoir 2013/36/AE. Chun forluí a sheachaint, ba cheart maoluithe teoranta a bheartú i ndáil le córas bainistíochta cáilíochta na soláthraithe agus an oibleagáid maidir le faireachán a chuirtear ar úsáideoirí córas intleachta saorga ardríosca sa mhéid go bhfuil feidhm acu ar institiúidí creidmheasa a rialaítear faoi Threoir 2013/36/AE. Ba cheart feidhm a bheith ag an gcóras céanna maidir le gnóthais árachais agus atharachais agus

²⁷ Treoir 2013/36/AE ó Pharlaimint na hEorpa agus ón gComhairle an 26 Meitheamh 2013 maidir le rochtain ar ghníomhaíocht institiúidí creidmheasa agus maoirseacht stuamachta ar institiúidí creidmheasa agus ar ghnóilachtaí infheistíochta, lena leasaítear Treoir 2002/87/CE agus lena n-aisghairtear Treoir 2006/48/CE agus Treoir 2006/49/CE (IO L 176, 27.6.2013, lch. 338).

cuideachtaí sealbhaíochta árachais faoi Threoir 2009/138/AE (Sócmhainneacht II) agus maidir leis na hidirghabhálaithe árachais faoi Threoir (AE) 2016/97 agus cineálacha eile institiúidí airgeadais faoi réir na gceanglas maidir le rialachas inmheánach, socruithe nó próisis arna mbunú de bhun reachtaíocht ábhartha an Aontais maidir le seirbhísí airgeadais chun comhsheasmhacht agus cóir chomhionann a áirithiú san earnáil airgeadais.

- (81) De thoradh forbairt córas intleachta saorga cé is moite de chórais intleachta saorga ardriosca i gcomhréir le ceanglais an Rialacháin seo, d'fhéadfadh sé go mbeadh glacadh níos fairsinge ar intleacht shaorga iontaofa san Aontas. Ba cheart soláthraithe córas intleachta saorga neamh-ardriosca a spreagadh chun cóid iompair a chruthú atá beartaithe chun cur chun feidhme deonach na gceanglas is infheidhme maidir le córais intleachta saorga ardriosca a chothú, agus iad a oiriúnú i bhfianaise an chuspóra a bheartaítear leis na córais agus an riosca níos lú a mbaineann leo. Ba cheart soláthraithe a spreagadh freisin chun ceanglais bhreise a chur i bhfeidhm ar bhonn deonach, ceanglais a bhaineann le, mar shampla, inbhuanaitheacht chomhshaoil, inrochtaineacht le haghaidh daoine faoi mhíchumas, rannpháirtíocht na ngeallsealbhóirí i ndearadh agus i bhforbairt na gcóras intleachta saorga, agus éagsúlacht na bhfoirne forbartha. D'fhéadfadh an Coimisiún tionscnaimh a fhorbairt, lena n-áirítear tionscnaimh de chineál earnála, chun laghdú baic theicniúla a éascú, lena gcuirtear isteach ar mhalartú sonraí trasteorann maidir le forbairt intleachta saorga, lena n-áirítear sonraí maidir le bonneagar rochtana sonraí, idir-inoibritheacht shéimeantach agus theicniúil cineálacha éagsúla sonraí.
- (82) Maidir le córais intleachta saorga a bhaineann le táirgí nach meastar a bheith ina n-ardriosca i gcomhréir leis an Rialachán seo agus sa chaoi sin nach gceanglaítear orthu na ceanglais a leagtar amach sa Rialachán seo a chomhlíonadh, tá sé tábhachtach go mbeidh siad sábháilte, mar sin féin, nuair a chuirtear iad ar an margadh nó i mbun seirbhíse. Chun rannchuidiú leis an gcuspóir sin, beidh feidhm ag Treoir 2001/95/CE ó Pharlaimint na hEorpa agus ón gComhairle²⁸ mar líontán sábhála.
- (83) Chun comhar iontaofa cuiditheach a áirithiú idir na húdaráis inniúla ar leibhéal an Aontais agus ar an leibhéal náisiúnta, ba cheart do na páirtithe ar fad atá páirteach i gcur i bhfeidhm an Rialacháin seo rúndacht faisnéise agus sonraí a fhaightear agus a gcúraimí á ndéanamh acu a urramú, i gcomhréir le dlí an Aontais nó leis an dlí náisiúnta.

²⁸ Treoir 2001/95/CE ó Pharlaimint na hEorpa agus ón gComhairle an 3 Nollaig 2001 maidir le sábháilteacht ghinearálta táirgí (IO L 11, 15.1.2002, lch. 4).

- (84) Ba cheart do na Ballstáit gach beart is gá a dhéanamh chun a áirithiú go gcuirfear forálacha an Rialacháin seo chun feidhme, lena n-áirítear trí phionóis éifeachtúla, chomhréireacha agus athchomhairleacha ar shárú na bhforálacha sin a leagan síos, agus prionsabal *ne bis in idem* á urramú. I gcás sáruithe sonracha áirithe, ba cheart do na Ballstáit na corrlaigh agus na critéir a leagtar amach sa Rialachán seo a chur san áireamh. Ba cheart é a bheith de chumhacht ag an Maoirseoir Eorpach ar Chosaint Sonraí fineálacha a ghearradh ar institiúidí, gníomhaireachtaí agus comhlachtaí an Aontais a thagann faoi raon feidhme an Rialacháin seo.
- (85) Chun a áirithiú gur féidir an creat rialála a oiriúnú i gcás inar gá, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligean chuig an gCoimisiún chun leasú a dhéanamh ar reachtaíocht chomhchuibhithe an Aontais a liostaítear in Iarscríbhinn II, na córais intleachta saorga ardriosca a liostaítear in Iarscríbhinn III, na forálacha maidir le doiciméadacht teicniúil a liostaítear in Iarscríbhinn IV, ábhar an dearbhaithe comhréireachta de chuid an Aontais in Iarscríbhinn V, na forálacha maidir leis na nósanna imeachta um measúnú comhréireachta in Iarscríbhinní VI agus VII agus na forálacha lena mbunaítear na córais intleachta saorga ardriosca ar cheart feidhm ina leith a bheith ag an nós imeachta um measúnú comhréireachta bunaithe ar mheasúnú an chórais bainistíochta cáilíochta agus measúnú na doiciméadachta teicniúla. Tá sé tábhachtach, go háirithe, go rachadh an Coimisiún i mbun comhairliúcháin iomchuí le linn a chuid oibre ullmhúcháin, lena n-áirítear ar leibhéal na saineolaithe, agus go ndéanfaí na comhairliúcháin sin i gcomhréir leis na prionsabail a leagtar síos i gComhaontú Idirinstitiúideach an 13 Aibreán 2016 maidir le Reachtóireacht Níos Ferr²⁹. Go sonrath, chun rannpháirtíocht chomhionann in ullmhú na ngníomhartha tarmligthe a áirithiú, faigheann Parlaimint na hEorpa agus an Chomhairle na doiciméid uile ag an am céanna leis na saineolaithe sna Ballstáit, agus bíonn rochtain chórasach ag a gcuid saineolaithe ar chruinnithe ghrúpaí saineolaithe an Choimisiúin a bhíonn ag déileáil le hullmhú na ngníomhartha tarmligthe. Ba cheart comhairliúcháin den sórt sin a dhéanamh agus tacaíocht chomhairleach a thabhairt faoi chuimsiú ghníomhaíochtaí an Bhoird um Intleacht Shaorga agus a fhoghrúpaí freisin.

²⁹ IO L 123, 12.5.2016, lch. 1.

- (86) Chun coinníollacha aonfhoirmeacha a áirithiú maidir leis an Rialachán seo a chur chun feidhme, ba cheart cumhachtaí cur chun feidhme a thabhairt don Choimisiún. Ba cheart na cumhachtaí sin a fheidhmiú i gcomhréir le Rialachán (AE) Uimh. 182/2011 ó Pharlaimint na hEorpa agus ón gComhairle³⁰. I gcomhréir leis na prionsabail a leagtar síos i gComhaontú Idirinstitiúideach an 13 Aibreán 2016 maidir le Reachtóireacht Níos Fearr, aon uair is gá saineolas níos leithne i luathullmhúchán dréachtghníomhartha cur chun feidhme, tá sé tábhachtach, go háirithe, go mbainfeadh an Coimisiún úsáid as sainghrúpaí, go rachadh sé i gcomhairle le geallsealbhóirí spriocdhírithé nó go ndéanfadh sé comhairliúcháin phoiblí, de réir mar is iomchuí. Ba cheart comhairliúcháin den sórt sin a dhéanamh agus tacaíocht chomhairleach den sórt sin a thabhairt faoi chuimsiú ghníomhaíochtaí an Bhoird um Intleacht Shaorga agus a fhoghrúpaí freisin, lena n-áirítear gníomhartha cur chun feidhme a ullmhú i ndáil le hAirteagail 4, 4b agus 6.
- (87) Ós rud é nach féidir leis na Ballstáit cuspóir an Rialacháin seo a ghnóthú go leormhaith agus, de bharr fairsinge nó éifeachtaí na gníomhaíochta, gur fearr is féidir iad a ghnóthú ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Rialachán seo thar a bhfuil riachtanach chun an cuspóir sin a ghnóthú.
- (87a) Chun deimhneacht dhlíthiúil a áirithiú, tréimhse oiriúnaithe iomchuí a áirithiú d'oibreoírí agus suaitheadh ar an margadh a sheachaint, lena n-áirítear trí leanúnachas úsáid na gcóras intleachta saorga a áirithiú, is iomchuí feidhm a bheith ag an Rialachán seo maidir leis na córais intleachta saorga ardriosca a cuireadh ar an margadh nó a cuireadh i mbun seirbhíse roimh dháta ginearálta chur i bhfeidhm na gcóras sin, más rud é, ón dáta sin, go mbeidh na córais sin faoi réir athruithe suntasacha ar a ndearadh nó ar an gcríoch atá beartaithe dóibh. Is iomchuí a shoiléiriú, i ndáil leis sin, gur cheart coincheap an athraithe shuntasach a thuiscint mar choincheap atá coibhéiseach ó thaobh substainte de le coincheap an mhodhnaithe shubstaintiúil, coincheap a úsáidtear i ndáil le córais intleachta saorga ardriosca amháin mar a shainmhínítear sa Rialachán seo.

³⁰ Rialachán (AE) Uimh. 182/2011 ó Pharlaimint na hEorpa agus ón gComhairle an 16 Feabhra 2011 lena leagtar síos na rialacha agus na prionsabail ghinearálta a bhaineann leis na sásraí maidir le rialú ag na Ballstáit ar fheidhmiú cumhachtaí cur chun feidhme ag an gCoimisiún (IO L 55, 28.2.2011, lch. 13).

- (88) Ba cheart feidhm a bheith ag an Rialachán seo ón ... [*Oifig na bhFoilseachán – cuir isteach an dáta arna bhunú in Airteagal 85*]. Ba cheart an bonneagar a bhaineann leis an rialachas agus an córas um measúnú comhréireachta a bheith i mbun oibríochta roimh an dáta sin, áfach, agus dá bhrí sin ba cheart feidhm a bheith ag na forálacha maidir le comhlachtaí faoina dtugtar fógra agus struchtúr rialachais ón ... [*Oifig na bhFoilseachán – cuir isteach an dáta – 3 mhí tar éis dháta theacht i bhfeidhm an Rialacháin seo*]. Ina theannta sin, ba cheart do na Ballstáit na rialacha maidir le pionóis a leagan síos agus fógra a thabhairt don Choimisiún ina leith, lena n-áirítear fineálacha riaracháin, agus a áirithiú go gcuirtear na pionóis sin chun feidhme go héifeachtach iomchuí faoi dháta chur i bhfeidhm an Rialacháin seo. Dá bhrí sin, ba cheart feidhm a bheith ag na forálacha maidir le pionóis ón [*Oifig na bhFoilseachán – cuir isteach an dáta – 12 mhí tar éis dháta theacht i bhfeidhm an Rialacháin seo*].
- (89) Chuathas i gcomhairle leis an Maoirseoir Eorpach ar Chosaint Sonraí agus an Bord Eorpach um Chosaint Sonraí i gcomhréir le hAirteagal 42(2) de Rialachán (AE) 2018/1725 agus thug siad tuairim uathu an [...]’.

TAR ÉIS AN RIALACHÁN SEO A GHLACADH:

TEIDEAL I

FORÁLACHA GINEARÁLTA

Airteagal 1

Ábhar

Sa Rialachán seo leagtar síos na nithe seo a leanas:

- (a) rialacha comhchuibhithe maidir le córais intleachta saorga (‘córais IS’) a chur ar an margadh, a chur i mbun seirbhíse agus a úsáid san Aontas;
- (b) toirmisc ar chleachtais intleachta saorga áirithe;
- (c) ceanglais shonracha maidir le córais intleachta saorga ardriosca agus oibleagáidí oibreoirí na gcóras sin;

- (d) rialacha trédhearcachta comhchuibhithe maidir le córais intleachta saorga áirithe;
- (e) rialacha maidir le faireachán margaidh, faireachas margaidh agus rialachas;
- (f) bearta chun tacú leis an nuálaíocht.

Airteagal 2
Raon feidhme

1. Tá feidhm ag an Rialachán seo maidir leis an méid seo a leanas:
 - (a) soláthraithe a chuireann córais intleachta saorga ar an margadh nó i mbun seirbhíse san Aontas, gan beann ar cé acu an i láthair go fisiciúil nó bunaithe san Aontas nó i dtríú tír atá na soláthraithe sin;
 - (b) úsáideoirí na gcóras intleachta saorga atá i láthair go fisiciúil nó bunaithe san Aontas;
 - (c) soláthraithe agus úsáideoirí córas intleachta saorga atá i láthair go fisiciúil nó bunaithe i dtríú tír, i gcás gur san Aontas a úsáidtear an t-aschur a tháirgtear leis an gcóras;
 - (d) allmhaireoirí agus dáileoirí na gcóras intleachta saorga;
 - (e) monaróirí táirgí a chuireann córas intleachta saorga ar an margadh nó a chuireann i mbun seirbhíse mar aon lena dtáirge agus faoina n-ainm nó faoina dtrádmharc féin;
 - (f) ionadaithe údaraithe na soláthraithe, atá bunaithe san Aontas;

2. Córais intleachta saorga a aicmítear mar chórais intleachta saorga ardriosca i gcomhréir le hAirteagail 6(1) agus 6(2) a bhaineann le táirgí a chumhdaítear le reachtaíocht chomhchuibhithe an Aontais a liostaítear i Roinn B d'Iarscríbhinn II, ní bheidh feidhm ach ag Airteagal 84 den Rialachán seo maidir leo. Ní bheidh feidhm ag Airteagal 53 ach amháin a mhéid a dhéanfar na ceanglais maidir le córais intleachta saorga ardriosca faoin Rialachán seo a chomhtháthú faoin reachtaíocht comhchuibhithe sin de chuid an Aontais.

3. Ní bheidh feidhm ag an Rialachán seo maidir le córais intleachta saorga más rud é go ndéanfar, agus a mhéid a dhéanfar, na córais sin a chur ar an margadh, a chur i mbun seirbhíse, nó a úsáid le modhnú nó gan mhodhnú chun críche gníomhaíochtaí nach dtagann faoi raon feidhme dhlí an Aontais, agus in aon chás, gníomhaíochtaí a bhaineann leis an míleata, leis an gcosaint nó leis an tslándáil náisiúnta, gan beann ar an gcineál eintitis a dhéanann na gníomhaíochtaí sin.

Ina theannta sin, ní bheidh feidhm ag an Rialachán seo maidir le córais intleachta saorga nach gcuirtear ar an margadh nó nach gcuirtear i mbun seirbhíse san Aontas, i gcás ina n-úsáidtear an t-aschur san Aontas chun críche gníomhaíochtaí nach dtagann faoi raon feidhme dhlí an Aontais, agus in aon chás, gníomhaíochtaí a bhaineann leis an míleata, leis an gcosaint nó leis an tslándáil náisiúnta, gan beann ar an gcineál eintitis a dhéanann na gníomhaíochtaí sin.

4. Ní bheidh feidhm ag an Rialachán seo maidir le húdaráis phoiblí i dtríú tír ná le heagraíochtaí idirnáisiúnta a thagann faoi raon feidhme an Rialacháin seo de bhun mhír 1, i gcás ina n-úsáideann na húdaráis nó na heagraíochtaí sin córais intleachta saorga faoi chuimsiú comhaontuithe idirnáisiúnta maidir le forfheidhmiú an dlí agus comhar breithiúnach leis an Aontas nó le Ballstát amháin nó níos mó.
5. Ní dhéanfaidh an Rialachán seo difear do chur i bhfeidhm na bhforálacha maidir le dliteanas na soláthraithe seirbhíse idirghabhálacha a leagtar amach i gCaibidil II, Roinn 4 de Threoir 2000/31/CE ó Pharlaimint na hEorpa agus ón gComhairle³¹ [*faoi mar atá forálacha comhfhreagracha na hIonstraimhe um Sheirbhísí Digiteacha le cur ina n-ionad*].
6. Ní bheidh feidhm ag an Rialachán seo maidir le córais IS, lena n-áirítear a n-aschur, a fhorbraítear go sonrach agus a chuirtear i mbun seirbhíse chun críche taighde eolaíoch agus forbairt eolaíoch, agus chun na críche sin amháin.
7. Ní bheidh feidhm ag an Rialachán seo maidir le haon ghníomhaíocht taighde agus forbartha a bhaineann le córais intleachta saorga.
8. Ní bheidh feidhm ag an Rialachán seo maidir le hoibleagáidí d'úsáideoirí ar daoine nádúrtha iad a úsáideann córais intleachta saorga le linn gníomhaíocht phearsanta neamhghairmiúil amháin, cé is moite d'Airteagal 52.

³¹ Treoir 2000/31/CE ó Pharlaimint na hEorpa agus ón gComhairle an 8 Meitheamh 2000 maidir le gnéithe áirithe dlí de sheirbhísí na sochaí faisnéise, an trádáil leictreonach, go háirithe, sa Mhargadh Inmheánach ('an Treoir maidir le tráchtáil leictreonach') (IO L 178, 17.7.2000, lch. 1).

Airteagal 3
Sainmhínte

Chun críocha an Rialacháin seo, tá feidhm ag na sainmhínte seo a leanas:

- (1) ciallaíonn ‘córas intleachta saorga’ (córas IS) córas atá deartha chun oibriú le méid áirithe neamhspleáchais agus, bunaithe ar shonraí agus ionchuir arna gcur ar fáil ag meaisín agus/nó ag an duine, a chuireann in iúl conas tacar áirithe cuspóirí a bhaint amach trí úsáid a bhaint as cur chuige meaisínfhoghlama agus/nó loighicbhunaithe agus eolasbhunaithe, agus a tháirgeann aschuir arna nginiúint ag córas amhail inneachar (córais intleachta saorga ghiniúna), tuartha, moltaí nó cinntí, a imríonn tionchar ar na timpeallachtaí lena n-idirghníomhaíonn an córas intleachta saorga;
- (1a) ciallaíonn ‘saolré córais intleachta saorga’ ré an chórais intleachta saorga, ón dearadh go dtí an cur as feidhm. Gan dochar do chumhachtaí na n-údarás faireachais margaidh, d’fhéadfadh cur as feidhm den sórt sin tarlú tráth ar bith le linn na céime faireacháin iarmhargaidh ar chinneadh an tsoláthraí agus tugann sé le tuiscint nach bhféadfar an córas a úsáid a thuilleadh. Cuirtear deireadh le saolré córais intleachta saorga freisin trí mhodhnú substaintiúil ar an gcóras intleachta saorga arna dhéanamh ag an soláthraí nó ag aon duine nádúrtha nó dlítheanach eile, agus sa chás sin measfar gur córas intleachta saorga nua é an córas intleachta saorga atá modhnaithe go substaintiúil.
- (1b) ciallaíonn ‘córas intleachta saorga ilchuspóireach’ córas intleachta saorga atá beartaithe ag an soláthraí - gan beann ar an gcaoi a gcuirtear ar an margadh é nó ina gcuirtear i mbun seirbhíse é, lena n-áirítear mar bhogearraí foinse oscailte - chun feidhmeanna is infheidhme go ginearálta a chomhlíonadh amhail aithint íomhánna agus cainte, giniúint fuaime agus físe, brath patrún, freagairt ceisteanna, aistriúchán agus eile; féadfar córas intleachta saorga ilfhóinteach a úsáid in iolracht chomhthéacsanna agus a chomhtháthú in iolracht córas intleachta saorga eile;
- (2) ciallaíonn ‘soláthraí’ duine nádúrtha nó dlítheanach, údarás poiblí, gníomhaireacht nó comhlacht eile a fhorbraíonn córas intleachta saorga nó a bhfuil córas intleachta saorga forbartha aige agus a chuireann an córas sin ar an margadh nó a chuireann é i mbun seirbhíse faoina ainm nó faoina thrádmharc féin, bíodh sin ar íocaíocht nó saor in aisce;

- (3) [scriosta];
- (3a) ‘fiontair bheaga agus meánmhéide’ (FBManna) mar a shainítear san Iarscríbhinn a ghabhann le Moladh 2003/361/CE ón gCoimisiún maidir le micreafhiontair, fiontair bheaga agus fiontair mheánmhéide a shainmhíniú;
- (4) ciallaíonn ‘úsáideoir’ aon duine nádúrtha nó dlítheanach, lena n-áirítear údarás poiblí, gníomhaireacht nó comhlacht eile a n-úsáidtear an córas intleachta saorga faoina údarás;
- (5) ciallaíonn ‘ionadaí údaraithe’ aon duine nádúrtha nó dlítheanach atá i latháir go fisiciúil nó bunaithe san Aontas a bhfuil sainordú i scríbhinn faighte agus glactha aige ó sholáthraí córais intleachta saorga chun oibleagáidí agus nósanna imeachta an tsoláthraí sin a bhunaítear leis an Rialachán seo a dhéanamh agus a chur i gcrích;
- (5a) ciallaíonn ‘monaróir táirgí’ monaróir de réir brí aon chuid de reachtaíocht chomhchuibhithe an Aontais a liostaítear in Iarscríbhinn II;
- (6) ciallaíonn ‘allmhaireoir’ duine nádúrtha nó dlítheanach atá i lathair go fisiciúil nó bunaithe san Aontas a chuireann córas intleachta saorga ar an margadh nó i mbun seirbhíse a bhfuil ainm nó trádmharc duine nádúrtha nó dhlítheanaigh atá bunaithe lasmuigh den Aontas air;
- (7) ciallaíonn ‘dáileoir’ aon duine nádúrtha nó dlítheanach sa slabhra soláthair, seachas an soláthraí nó an t-allmhaireoir, ar duine é a chuireann córas intleachta saorga ar fáil ar mhargadh an Aontais;
- (8) ciallaíonn ‘oibreoir’ an soláthraí, monaróir an táirgeora, an t-úsáideoir, an t-ionadaí údaraithe, an t-allmhaireoir nó an dáileoir;
- (9) ciallaíonn ‘cur ar an margadh’ córas intleachta saorga a chur ar mhargadh an Aontais den chéad uair;
- (10) ciallaíonn ‘cur ar fáil ar an margadh’ aon soláthar de chóras intleachta saorga lena dháileadh nó lena úsáid ar mhargadh an Aontais le linn gníomhaíochta tráchtála, ar íocaíocht nó saor in aisce;

- (11) ciallaíonn ‘cur i mbun seirbhíse’ córas intleachta saorga a sholáthar go díreach don úsáideoir lena úsáid den chéad uair nó dá úsáid féin san Aontas chun na críche atá beartaithe dó;
- (12) ciallaíonn ‘an chríoch atá beartaithe dó’ an úsáid a beartaigh an soláthraí do chóras intleachta saorga, lena n-áirítear an comhthéacs sonrath agus na coinníollacha sonracha úsáide, a shonraítear san fhaisnéis arna soláthar ag an soláthraí sna treoracha úsáide, sna hábhair agus ráitis fógraíochta nó sna hábhair agus ráitis díolacháin, mar aon leis an doiciméadacht theicniúil;
- (13) ciallaíonn ‘mí-úsáid atá measartha intuartha’ úsáid córais intleachta saorga ar bhealach nach bhfuil i gcomhréir leis an gcríoch atá beartaithe dó ach a d’fhéadfadh a bheith ann mar thoradh ar iompraíocht an duine atá measartha intuartha nó mar thoradh ar idirghníomhaíocht le córais eile;
- (14) ciallaíonn ‘comhpháirt sábháilteachta de tháirge nó de chóras’ comhpháirt de tháirge nó de chóras a chomhlíonann feidhm sábháilteachta don táirge sin nó don chóras sin nó a gcuireann a teip nó a mífhéidhmiú sláinte agus sábháilteacht daoine nó maoine i mbaol;
- (15) ciallaíonn ‘treoracha úsáide’ an fhaisnéis arna soláthar ag an soláthraí chun an t-úsáideoir a chur ar an eolas, go háirithe, faoin gcríoch atá beartaithe do chóras intleachta saorga agus an úsáid cheart atá beartaithe dó;
- (16) ciallaíonn ‘córas intleachta saorga a aisghairm’ aon bheart arb é is aidhm dó córas intleachta saorga a cuireadh ar fáil d’úsáideoirí a thabhairt ar ais don soláthraí nó é a thógáil as seirbhís nó a úsáid a dhíchumasú;
- (17) ciallaíonn ‘córas intleachta saorga a aistarraingt’ aon bheart arb é is aidhm dó cosc a chur ar chóras intleachta saorga sa slabhra soláthair a chur ar fáil ar an margadh;
- (18) ciallaíonn ‘feidhmíocht córais intleachta saorga’ an inniúlacht atá ag córas intleachta saorga an chríoch atá beartaithe dó a bhaint amach;
- (19) ciallaíonn ‘measúnú comhréireachta’ an próiseas chun a fhíorú ar comhlíonadh na ceanglais a leagtar amach i dTeideal III, Caibidil 2 den Rialachán seo maidir le córas intleachta saorga ardriosca;

- (20) ciallaíonn ‘an t-údarás a thugann fógra’ an t-údarás atá freagrach as na nósanna imeachta is gá a chur ar bun agus a dhéanamh maidir leis na comhlachtaí um measúnú comhréireachta a mheasúnú, a ainmniú agus maidir le fógra a thabhairt dóibh mar aon le maidir le faireachán a dhéanamh orthu;
- (21) ciallaíonn ‘comhlacht um measúnú comhréireachta’ comhlacht a dhéanann gníomhaíochtaí measúnaithe ar chomhréireacht tríú páirtí, lena n-áirítear tástáil, deimhniúchán agus iniúchadh;
- (22) ciallaíonn ‘comhlacht a dtugtar fógra dó’ comhlacht um measúnú comhréireachta arna ainmniú i gcomhréir leis an Rialachán seo agus le reachtaíocht chomhchuibhithe ábhartha eile an Aontais;
- (23) ciallaíonn ‘modhnú substaintiúil’ athrú ar an gcóras intleachta saorga tar éis é a chur ar an margadh nó é a chur i mbun seirbhíse, athrú lena ndéantar difear do chomhlíontacht an chórais intleachta saorga i dtaca leis na ceanglais a leagtar amach i dTeideal III, Caibidil 2 den Rialachán seo modhnú ar an gcríoch atá beartaithe don chóras IS agus a ndearnadh measúnú air ina leith. Maidir le córais intleachta saorga ardriosca a leanann de bheith ag foghlaim tar éis iad a bheith curtha ar an margadh nó curtha i mbun seirbhíse, ní modhnú substaintiúil a bheidh in athruithe ar an gcóras intleachta saorga ardriosca agus ar a fheidhmíocht, athruithe arna réamhchinntiú ag an soláthraí tráth an mheasúnaithe comhréireachta tosaigh agus ar cuid iad den fhaisnéis atá sa doiciméadacht theicniúil dá dtagraítear i bpointe 2(f) d’Iarscríbhinn IV.
- (24) ciallaíonn ‘marcáil comhréireachta CE’ (marcáil CE) marcáil lena léiríonn an soláthraí go bhfuil córas IS i gcomhréir leis na ceanglais a leagtar amach i dTeideal III, Caibidil 2 nó in Airteagal 4b den Rialachán seo agus le haon ghníomh dlí infheidhme eile de chuid an Aontais lena gcomhchuíbítear na coinníollacha maidir le táirgí a mhargú (‘reachtaíocht chomhchuibhithe an Aontais’) agus lena ndéantar foráil maidir lena ghreamú;
- (25) ciallaíonn ‘córas faireacháin iarmhargaidh’ na gníomhaíochtaí uile a dhéanann soláthraithe na gcóras intleachta saorga taithí a bhailiú agus athbhreithniú, ar taithí í a fhaightear ó úsáid na gcóras intleachta saorga a chuireann siad ar an margadh nó a chuireann siad i mbun seirbhíse d’fhonn a shainnithint an gá aon ghníomhaíocht riachtanach cheartaitheach nó choisctheach a chur i bhfeidhm láithreach;
- (26) ciallaíonn ‘údarás um fhaireachas margaidh’ an t-údarás náisiúnta a dhéanann na gníomhaíochtaí agus a dhéanann na bearta de bhun Rialachán (AE) 2019/1020;

- (27) ciallaíonn ‘caighdeán comhchuibhithe’ caighdeán Eorpach mar a shainmhínítear in Airteagal 2(1)(c) de Rialachán (AE) Uimh. 1025/2012 é;
- (28) ciallaíonn ‘sonraíocht choiteann’ tacar sonraíochtaí teicniúla, mar a shainmhínítear i bpointe 4 d’Airteagal 2 de Rialachán (AE) Uimh. 1025/2012 lena soláthraítear modhanna chun ceanglais áirithe a bhunaítear faoin Rialachán seo a chomhlíonadh;
- (29) ciallaíonn ‘sonraí oiliúna’ sonraí a úsáidtear chun córas intleachta saorga a oiliúint trína pharaiméadair infhoghlamtha a choigeartú;
- (30) ciallaíonn ‘sonraí bailíochtaithe’ sonraí a úsáidtear chun meastóireacht a dhéanamh ar an gcóras intleachta saorga oilte agus chun a pharaiméadair neamh-infhoghlamtha agus a phróiseas foghlama a choigeartú, i measc nithe eile, d’fhonn ró-oiriúnú a chosc; is féidir leis an tacar sonraí bailíochtaithe a bheith ina thacar sonraí ar leithligh nó ina chuid den tacar sonraí oiliúna, bíodh sin mar scoilt sheasta nó mar scoilt athraitheach;
- (31) ciallaíonn ‘sonraí tástála’ sonraí a úsáidtear chun meastóireacht neamhspleách a dhéanamh ar an gcóras intleachta saorga oilte agus bailíochtaithe chun feidhmíocht ionchasach an chórais sin a dheimhniú sula gcuirtear ar an margadh é nó sula gcuirtear i mbun seirbhíse é;
- (32) ciallaíonn ‘sonraí ionchuir’ sonraí arna soláthar do chóras intleachta saorga, nó sonraí arna bhfáil go díreach ag an gcóras sin, ar ar a mbonn a tháirgeann an córas aschur;
- (33) ciallaíonn ‘sonraí bithmhéadracha’ sonraí pearsanta a eascraíonn as próiseáil theicniúil ar leith agus a bhaineann le saintréithe fisiciúla, fiseolaíocha nó iompraíochta duine nádúrtha, amhail íomhánna den aghaidh nó sonraí dachtalascópacha;
- (34) ciallaíonn ‘córas aitheanta mothúcháin’ córas intleachta saorga atá ceaptha chun mothúcháin nó rúin daoine nádúrtha a shainnithint ar bhonn a sonraí bithmhéadracha nó chun staideanna síeolaíocha, mothúcháin nó rúin a tharraingt as a gcuid sonraí bithmhéadracha;
- (35) ciallaíonn ‘córas catagóirithe bhithmhéadraigh’ córas intleachta saorga chun críche daoine nádúrtha a shannadh do chatagóirí sonracha ar bhonn a sonraí bithmhéadracha;

- (36) ciallaíonn ‘cianchóras sainaitheanta bithmhéadraí’ córas intleachta saorga chun daoine nádúrtha a shainaitheint go cianda de ghnáth, gan iad a bheith rannpháirteach go gníomhach, trí shonraí bithmhéadracha duine a chur i gcomparáid leis na sonraí bithmhéadracha atá i stór sonraí tagartha;
- (37) ciallaíonn ‘cianchóras sainaitheanta bithmhéadraí fíor-ama’ cianchóras sainaitheanta bithmhéadraí lena ndéantar an ghabháil sonraí bithmhéadracha, an chomparáid agus an tsainaitheint láithreach nó beagnach láithreach;
- (38) [scriosta]
- (39) ciallaíonn ‘spás atá inrochtana don phobal’ aon áit fhisiciúil faoi úinéireacht phoiblí nó phríobháideach a bhfuil rochtain ag líon neamhchinntithe daoine nádúrtha uirthi gan beann ar cibé acu atá nó nach bhfuil coinníollacha nó imthosca áirithe maidir le rochtain réamhchinntithe, agus gan beann ar na srianta acmhainneachta a d’fhéadfadh a bheith ann;
- (40) ciallaíonn ‘údarás forfheidhmithe dlí’:
- (a) aon údarás poiblí atá inniúil maidir le cionta coiriúla a chosc, a imscrúdú, a bhrath nó a ionchúiseamh agus pionóis choiriúla a fhorghníomhú, lena n-áirítear an coimirciú i gcoinne bagairtí ar an tsláinte phoiblí agus bagairtí ar an tsláinte phoiblí a chosc; nó
 - (b) aon chomhlacht nó eintiteas eile a bhfuil an cúram curtha orthu ag dlí Ballstáit údarás poiblí agus cumhachtaí poiblí a fheidhmiú chun críoch cionta coiriúla a chosc, a imscrúdú, a bhrath nó a ionchúiseamh agus pionóis choiriúla a fhorghníomhú, lena n-áirítear an coimirciú i gcoinne bagairtí ar an tsláinte phoiblí agus bagairtí ar an tsláinte phoiblí a chosc;
- (41) ciallaíonn ‘forfheidhmiú an dlí’ gníomhaíochtaí a dhéanann údaráis forfheidhmithe dlí nó a dhéantar thar a gceann chun cionta coiriúla a chosc, a imscrúdú, a bhrath nó a ionchúiseamh agus pionóis choiriúla a fhorghníomhú, lena n-áirítear an coimirciú i gcoinne bagairtí ar an tsláinte phoiblí agus bagairtí ar an tsláinte phoiblí a chosc;
- (42) [scriosta]

- (43) ciallaíonn ‘údarás inniúil náisiúnta’ aon cheann díobh seo a leanas: an t-údarás a thugann fógra agus an t-údarás um fhaireachas margaidh. A mhéid a bhaineann le córais intleachta saorga a chuireann institiúidí, gníomhaireachtaí, oifigí agus comhlachtaí an Aontais i mbun seirbhíse nó a úsáideann siad, comhlíonfaidh an Maoirseoir Eorpach ar Chosaint Sonraí na freagrachtaí a chuirtear de chúram ar an údarás inniúil náisiúnta sna Ballstáit agus, de réir mar is ábhartha, aon tagairt d’údarás inniúla náisiúnta nó d’údarás um fhaireachas margaidh sa Rialachán seo, tuigfear gur tagairt don Mhaoirseoir Eorpach ar Chosaint Sonraí í;
- (44) ciallaíonn ‘teagmhas tromchúiseach’ aon teagmhas nó mífhéidhmiú a bhaineann le córas intleachta saorga arb é an toradh díreach nó indíreach atá air aon cheann díobh seo a leanas:
- (a) bás duine nó damáiste tromchúiseach do shláinte duine;
 - (b) cur isteach tromchúiseach agus do-athraithe ar bhainistíocht agus ar oibriú bonneagair chriticiúil;
 - (c) sárú ar oibleagáidí faoi dhlí an Aontais atá ceaptha cearta bunúsacha a chosaint;
 - (d) damáiste tromchúiseach do mhaoin nó don chomhshaol.
- (45) ciallaíonn ‘bonneagar criticiúil’ sócmhainn, córas nó cuid de chóras atá riachtanach chun seirbhís a sholáthar atá bunriachtanach chun feidhmeanna sochaíocha nó gníomhaíochtaí eacnamaíocha ríthábhachtacha a chothabháil de réir bhrí Airteagal 2(4) agus (5) de Threoir/..... maidir le hathléimneacht na n-eintiteas criticiúil;
- (46) ciallaíonn ‘sonraí pearsanta’ sonraí pearsanta mar a shainítear i bpointe (1) d’Airteagal 4 de Rialachán (AE) 2016/679 iad;
- (47) ciallaíonn ‘sonraí neamhphearsanta’ sonraí seachas sonraí pearsanta mar a shainítear i bpointe (1) d’Airteagal 4 de Rialachán (AE) 2016/679 iad;

- (48) ciallaíonn ‘tástáil i bhfíordhálaí domhanda’ tástáil shealadach ar chóras intleachta saorga chun na críche atá beartaithe dó i bhfíordhálaí domhanda lasmuigh de shaotharlann nó i dtimpeallacht ionsamhlaithe ar bhealach eile d’fhonn sonraí iontaofa agus stóinsithe a bhailiú agus d’fhonn measúnú agus fíorú a dhéanamh ar chomhréireacht an chórais intleachta saorga le ceanglais an Rialacháin seo; ní mheasfar gurb ionann tástáil i bhfíordhálaí domhanda agus an córas intleachta saorga a chur ar an margadh nó é a chur i mbun seirbhíse de réir bhrí an Rialacháin seo, ar choinníoll go gcomhlíontar na coinníollacha uile faoi Airteagal 53 nó Airteagal 54a;
- (49) ciallaíonn ‘plean tástála fíordhomhanda’ doiciméad ina ndéantar cur síos ar chuspóirí, modheolaíocht, tíreolaíocht, daonra agus raon feidhme ama, faireachán, eagrú agus déanamh tástála i bhfíordhálaí domhanda;
- (50) ciallaíonn ‘ábhar’ chun críoch na tástála fíordhálaí domhanda duine nádúrtha a ghlacann páirt i dtástáil i bhfíordhálaí domhanda;
- (51) ciallaíonn ‘toiliú feasach’ nochtadh saor agus deonach an duine is ábhar don tástáil go bhfuil sé nó sí toilteanach páirt a ghlacadh i dtástáil ar leith i bhfíordhálaí domhanda, tar éis dó nó di a bheith curtha ar an eolas faoi gach gné den tástáil atá ábhartha maidir le cinneadh an duine is ábhar don tástáil a bheith rannpháirteach; i gcás mionaoiseach agus daoine is ábhar don tástáil atá éagumasaithe, is é a n-ionadaí arna ainmniú de réir dlí a thabharfaidh an toiliú feasach;
- (52) Ciallaíonn ‘bosca gainimh rialála intleachta saorga’ creat nithiúil arna chur ar bun ag údarás inniúil náisiúnta lena dtugtar an deis do sholáthraithe nó do sholáthraithe ionchasacha chórais intleachta saorga córas intleachta saorga nuálach a fhorbairt, a oiliúint, a bhailíochtú agus a thástáil, i gcás inarb iomchuí i bhfíordhálaí domhanda, de bhun plean sonrach ar feadh tréimhse theoranta faoi mhaoirseacht rialála.

Airteagal 4

Gníomhartha cur chun feidhme

Chun coinníollacha aonfhoirmeacha a áirithiú do chur chun feidhme an Rialacháin seo maidir le cur chuige meaisínfhoghlama agus cineálacha cur chuige bunaithe ar loighic agus ar eolas dá dtagraítear in Airteagal 3(1), féadfaidh an Coimisiún gníomhartha cur chun feidhme a ghlacadh chun eilimintí teicniúla na gcineálacha cur chuige sin a shonrú, agus forbairtí margaidh agus teicneolaíochta á gcur san áireamh. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 74(2).

TEIDEAL IA

CÓRAIS INTLEACHTA SAORGA ILCHUSPÓIREACHA

Airteagal 4a

Comhlíonadh an Rialacháin seo maidir le córais intleachta saorga ilchuspóireacha

1. Gan dochar d'Airteagail 5, 52, 53 agus 69 den Rialachán seo, ní chomhlíonfaidh córais intleachta saorga ilchuspóireacha ach na ceanglais agus na hoibleagáidí a leagtar amach in Airteagal 4b.
2. Beidh feidhm ag na ceanglais agus na hoibleagáidí sin gan beann ar cé acu a chuirtear nó nach gcuirtear an córas intleachta saorga ilchuspóireach ar an margadh nó i mbun seirbhíse mar shamhail réamhoilte agus cibé acu a dhéanfaidh úsáideoir an chórais intleachta saorga ilchuspóirigh mionchoigeartú breise ar an tsamhail nó nach ndéanfaidh.

Airteagal 4b

*Ceanglais maidir le córais intleachta saorga ilchuspóireacha agus oibleagáidí
sholáthraithe na gcóras sin*

1. Córais intleachta saorga ilchuspóireacha is féidir a úsáid mar chórais intleachta saorga ardriosca nó mar chomhpháirteanna de chórais intleachta saorga ardriosca de réir bhrí Airteagal 6, comhlíonfaidh siad na ceanglais a bhunaítear i dTeideal III, Caibidil 2 den Rialachán seo ó dháta chur i bhfeidhm na ngníomhartha cur chun feidhme arna nglacadh ag an gCoimisiún i gcomhréir leis an nós imeachta scrúdúcháin dá dtagraítear in Airteagal 74(2) tráth nach déanaí ná 18 mí tar éis theacht i bhfeidhm an Rialacháin seo. Leis na ngníomhartha cur chun feidhme sin, déanfar cur i bhfeidhm na gceanglas a bhunaítear i dTeideal III, Caibidil 2 a shonrú agus a oiriúnú do chórais intleachta saorga ilchuspóireacha i bhfianaise a saintréithe, a n-indéantacht theicniúil, shonraíochtaí an tslabhra luacha intleachta saorga agus forbairtí margaidh agus teicneolaíochta. Agus na ceanglais sin á gcomhlíonadh, cuirfear san áireamh an úrscothacht a nglactar léi i gcoitinne.
2. Comhlíonfaidh soláthraithe chórais intleachta saorga ilchuspóireacha dá dtagraítear i mír 1, ó dháta chur i bhfeidhm na ngníomhartha cur chun feidhme dá dtagraítear i mír 1, na hoibleagáidí a leagtar amach in Airteagail 16aa, 16e, 16f, 16 g, 16i, 16j, 25, 48 agus 61.
3. Chun na hoibleagáidí a leagtar amach in Airteagal 16e a chomhlíonadh, leanfaidh soláthraithe an nós imeachta um measúnú comhréireachta bunaithe ar rialú inmheánach a leagtar amach in Iarscríbhinn VI, pointí 3 agus 4.
4. Ina theannta sin, coinneoidh soláthraithe na gcóras sin an doiciméadacht theicniúil dá dtagraítear in Airteagal 11 ar fáil do na húdaráis inniúla náisiúnta ar feadh tréimhse dar críoch 10 mbliana tar éis an córas intleachta saorga ilchuspóireach a chur ar mhargadh an Aontais nó a chur i mbun seirbhíse san Aontas.

5. Oibreoidh soláthraithe chórais intleachta saorga ilchuspóireacha i gcomhar le soláthraithe eile, agus soláthróidh siad an fhaisnéis is gá dóibh, a bhfuil sé beartaithe acu na córais sin a chur i mbun seirbhíse nó a chur ar mhargadh an Aontais mar chórais intleachta saorga ardriosca nó mar chomhpháirteanna de chórais intleachta saorga ardriosca, d'fhonn a chur ar chumas na soláthraithe sin a n-oibleagáidí faoin Rialachán seo a chomhlíonadh. Leis an gcomhar sin idir soláthraithe caomhnófar, de réir mar is iomchuí, cearta maoinne intleachtúla, agus faisnéis rúnda gnó nó rúin trádála i gcomhréir le hAirteagal 70. Chun coinníollacha aonfhoirmeacha a áirithiú le haghaidh chur chun feidhme an Rialacháin seo a mhéid a bhaineann leis an bhfaisnéis atá le comhroinnt ag soláthraithe chórais intleachta saorga ilchuspóireacha, féadfaidh an Coimisiún gníomhartha cur chun feidhme a ghlacadh i gcomhréir leis an nós imeachta scrúdúcháin dá dtagraítear in Airteagal 74(2).
6. Agus na ceanglais agus na hoibleagáidí dá dtagraítear i míreanna 1, 2 agus 3 á gcomhlíonadh:
- aon tagairt don chríoch atá beartaithe tuigfear gur tagairt í d'úsáid fhéideartha na gcórais intleachta saorga ilchuspóireach mar chórais intleachta saorga ardriosca nó mar chomhpháirteanna de chórais intleachta saorga ardriosca de réir bhrí Airteagal 6;
 - aon tagairt do na ceanglais maidir le córais intleachta saorga ardriosca i gCaibidil II, Teideal III, tuigfear nach dtagraíonn sí ach do na ceanglais a leagtar amach san Airteagal seo.

Airteagal 4c

Eisceachtaí ó Airteagal 4b

1. Ní bheidh feidhm ag Airteagal 4b nuair a bheidh gach úsáid ardriosca eisiata go sainráite ag an soláthraí sna teoracha úsáide nó san fhaisnéis a ghabhann leis an gcóras intleachta saorga ilchuspóireach.
2. Déanfar an t-eisiamh sin de mheon macánta agus ní mheasfar údar a bheith leis má bhíonn cúiseanna leordhóthanacha ag an soláthraí lena mheas go bhféadfaí mí-úsáid a bhaint as an gcóras.
3. Nuair a bhraitheann an soláthraí mí-úsáid margaidh nó nuair a chuirtear ar an eolas é maidir le mí-úsáid margaidh, déanfaidh sé gach beart is gá agus is comhréireach chun mí-úsáid bhreise den sórt sin a chosc, agus aird á tabhairt go háirithe ar scála na mí-úsáide agus ar a thromchúisí atá na rioscaí gaolmhara.

TEIDEAL II

CLEACHTAIS INTLEACHTA SAORGA A bhFUIL TOIRMEASC ORTHU

Airteagal 5

1. Toirmeascfar ar na cleachtais intleachta saorga seo a leanas:
 - (a) córas intleachta saorga a chur ar an margadh, a chur i mbun seirbhíse nó a úsáid, ar córas é a gcuirtear teicnící fothairseachúla in úsáid nach bhfuil fios ag an duine orthu agus é de chuspóir iompar an duine a shaobhadh go hábhartha ar mhodh is cúis le díobháil fhisiciúil nó shíceolaíoch don duine sin nó do dhuine eile, nó ar dócha gurb é is cúis leis sin;
 - (b) córas intleachta saorga a chur ar an margadh, a chur i mbun seirbhíse nó a úsáid, ar córas é a théann i dtír ar aon cheann de leochaileachtaí atá ag grúpa sonrach daoine i ngeall ar a n-aois, ar a míchumas nó staid shonrach shóisialta nó eacnamaíoch, agus é de chuspóir nó d'éifeacht iompar duine a bhaineann leis an ngrúpa sin a shaobhadh go hábhartha ar mhodh is cúis le díobháil fhisiciúil nó shíceolaíoch don duine sin nó do dhuine eile, nó ar dócha gurb é is cúis leis sin;
 - (c) córas intleachta saorga a chur ar an margadh, a chur i mbun seirbhíse nó a úsáid chun meastóireacht nó aicmiú a dhéanamh ar dhaoine nádúrtha i gcaitheamh tréimhse áirithe ama bunaithe ar a n-iompraíocht shóisialta nó a saintréithe pearsanta nó pearsantachta atá ar eolas nó tuartha, agus an scór sóisialta as a dtiocfaidh ceachtar díobh seo a leanas nó an dá cheann díobh seo a leanas:
 - (i) cóir dhíobhálach nó neamhfhabhrach a dhéanamh le daoine nádúrtha áirithe nó le grúpaí díobh i gcomhthéacsanna sóisialta nach mbaineann leis na comhthéacsanna inar gineadh nó inar bailíodh na sonraí i dtosach;

- (ii) cóir dhíobhálach nó neamhfhabhrach a dhéanamh le daoine nádúrtha áirithe nó le grúpaí díobh nach bhfuil údar léi nó atá díreireach lena n-íompraíocht shóisialta nó le thromchúis na híompraíochta sin;
- (d) cianchórais sainaitheanta bithmhéadraí fíor-ama a bheith á n-úsáid i spásanna atá inrochtana don phobal ag údarais forfheidhmithe dlí nó thar a gceann chun críoch fhorfheidhmiú an dlí, ach amháin a mhéid atá géarghá le húsáid den sórt sin le haghaidh ceann de na cuspóirí seo a leanas:
 - (i) cuardach spriocdhírithé ar íospartaigh shonracha coireachta a d'fhéadfadh a bheith ann;
 - (ii) bagairt shonrach shubstaintiúil láithreach ar bhonneagar criticiúil, ar bheatha, ar shláinte nó ar shábháilteacht fhisiciúil daoine nádúrtha a chosc nó ionsaí sceimhlitheoireachta a chosc;
 - (iii) logánú nó sainaitheantú duine nádúrtha chun críoch imscrúdú coiriúil, ionchúiseamh coiriúil a dhéanamh nó pionós coiriúil a fhorghníomhú i leith cionta dá dtagraítear in Airteagal 2(2) de Chinneadh Réime 2002/584/CGB ón gComhairle³² agus atá inphionóis sa Bhallstát lena mbaineann le pianbhreith choimeádta nó le hordú coinneála ar feadh uastréimhse 3 bliana ar a laghad, nó cionta sonracha eile atá inphionóis sa Bhallstát lena mbaineann le pianbhreith choimeádta nó le hordú coinneála ar feadh uastréimhse 5 bliana ar a laghad, de réir mar a chinntear le dlí an Bhallstáit sin.

2. Maidir le cianchórais sainaitheanta bithmhéadraí 'fíor-ama' a úsáid i spásanna atá inrochtana don phobal chun críoch fhorfheidhmiú an dlí le haghaidh aon cheann de na cuspóirí dá dtagraítear i mír 1 pointe d), cuirfear san áireamh na heilimintí seo a leanas:

- (a) staid an cháis a d'fhágfadh go bhféadfaí é a úsáid, go háirithe i gcás nach n-úsáidtear an córas, a thromchúisí a bheadh an díobháil agus dóchúlacht agus scála na díobhála sin;

³² Cinneadh Réime 2002/584/CGB ón gComhairle an 13 Meitheamh 2002 maidir leis an mbarántas gabhála Eorpach agus na nósanna imeachta um thabhairt suas idir na Ballstáit (IO L 190, 18.7.2002, lch. 1).

- (b) iarmhairtí úsáid an chórais do chearta agus saoirsí gach duine lena mbaineann, go háirithe a thromchúisí a bheadh na hiarmhairtí sin agus dóchúlacht agus scála na n-iarmhairtí sin.

Ina theannta sin, maidir le cianchórais sainaitheanta bithmhéadraí ‘fíor-ama’ i spásanna atá inrochtana don phobal chun críoch fhorfheidhmiú an dlí le haghaidh aon cheann de na cuspóirí dá dtagraítear i mír 1 pointe d), comhlíonfar na coimircí agus na coinníollacha is gá agus is comhréireach i ndáil leis an úsáid sin, go háirithe a mhéid a bhaineann leis na teorainneacha ama, geografacha agus pearsanta.

3. A mhéid a bhaineann le mír 1, pointe (d) agus mír 2, maidir le gach úsáid a bhaintear as an gcianchóras sainaitheanta bithmhéadraí ‘fíor-ama’ chun críoch fhorfheidhmiú an dlí i spásanna atá inrochtana don phobal, beidh an úsáid sin faoi réir údarú roimh ré arna dheonú ag údarás breithiúnach nó ag údarás riaracháin neamhspleách de chuid an Bhallstáit ina bhfuil an úsáid le baint as an gcóras, údarú arna eisiúint ar iarraidh réasúnaíthe agus i gcomhréir le rialacha mionsonraithe an dlí náisiúnta dá dtagraítear i mír 4. Mar sin féin, i gcás práinn a bhfuil údar cuí léi, féadfar tús a chur le húsáid an chórais gan údarú ar choinníoll go n-iarrfar an t-údarú sin gan moill mhíchuí le linn úsáid an chórais intleachta saorga, agus má dhiúltaítear an t-údarú sin, go gcuirfear deireadh lena úsáid láithreach.

Ní thabharfaidh an t-údarás inniúil breithiúnach nó riaracháin an t-údarú ach amháin i gcás inar deimhin leis, bunaithe ar fhianaise oibiachtúil nó ar thásca soiléire arna gcur faoina bhráid, gur gá an cianchóras sainaitheanta bithmhéadraí ‘fíor-ama’ atá i gceist a úsáid agus gur comhréireach é a úsáid chun ceann de na cuspóirí a shonraítear i mír 1, pointe (d), a bhaint amach, faoi mar a shainítear san iarraidh. Agus cinneadh á dhéanamh maidir leis an iarraidh sin, cuirfidh an t-údarás inniúil breithiúnach nó riaracháin na gnéithe dá dtagraítear i mír 2 san áireamh.

4. Féadfaidh Ballstát a chinneadh foráil a dhéanamh maidir leis an bhféidearthacht úsáid cianchóras sainaitheanta bithmhéadraí ‘fíor-ama’ a údarú go hiomlán nó i bpáirt i spásanna atá inrochtana don phobal chun críoch fhorfheidhmiú an dlí laistigh de na teorainneacha agus faoi na coinníollacha a liostaítear i míreanna 1, pointe (d), 2 agus 3. Leagfaidh an Ballstát sin síos ina dhlí náisiúnta na rialacha mionsonraithe is gá maidir leis na húdaruithe dá dtagraítear i mír 3 a iarraidh, a eisiúint agus a fheidhmiú mar aon le maoirseacht agus tuairisciú a bhaineann leis na húdaruithe sin. Maidir leis na cuspóirí a liostaítear i mír 1, pointe (d), lena n-áirítear na cionta coiriúla dá dtagraítear i bpointe (iii) de, sonrófar sna rialacha sin freisin cé acu de na cuspóirí sin agus cé acu de na cionta sin a bhféadfaidh na húdaráis inniúla a údarú ina leith na córais sin a úsáid chun críoch fhorfheidhmiú an dlí.

TEIDEAL III

CÓRAIS INTLEACHTA SAORGA ARDRIOSCA

CAIBIDIL 1

CÓRAS INTLEACHTA SAORGA A AICMIÚ MAR CHÓRAIS ARDRIOSCA

Airteagal 6

Rialacha aicmithe maidir le córais intleachta saorga ardriosca

1. Maidir le córas intleachta saorga ar táirge é freisin a chumhdaítear leis an reachtaíocht chomhchuibhithe de chuid an Aontais a liostaítear in Iarscríbhinn II, measfar gur córas ardriosca é más gá measúnú comhréireachta tríú páirtí a dhéanamh air d’fhonn é a chur ar an margadh nó i mbun seirbhíse de bhun na reachtaíochta thuasluaite.

2. Maidir le córas intleachta saorga atá beartaithe lena úsáid mar chomhpháirt sábháilteachta de tháirge a chumhdaítear leis an reachtaíocht dá dtagraítear i mír 1, measfar gur córas ardriosca é más gá measúnú comhréireachta tríú páirtí a dhéanamh air d'fhonn é a chur ar an margadh nó i mbun seirbhíse de bhun na reachtaíochta thuasluaite. Beidh feidhm ag an bhforáil seo gan beann ar cé acu a chuirtear nó nach gcuirtear an córas intleachta saorga ar an margadh nó i mbun seirbhíse go neamhspleách ar an táirge.
3. Measfar gur córais ardriosca iad na córais intleachta saorga dá dtagraítear in Iarscríbhinn III mura rud é gur aschur coimhdeach amháin é aschur an chórais i ndáil leis an ngníomhaíocht ábhartha nó leis an gcinneadh ábhartha atá le déanamh agus nach dócha, dá bhrí sin, go mbeidh riosca suntasach do shláinte, sábháilteacht nó cearta bunúsacha mar thoradh air.

Chun coinníollacha aonfhoirmeacha a áirithiú maidir leis an Rialachán seo a chur chun feidhme, déanfaidh an Coimisiún, tráth nach déanaí ná bliain amháin tar éis theacht i bhfeidhm an Rialacháin seo, gníomhartha cur chun feidhme a ghlacadh chun na himthosca a shonrú ina mbeadh aschur na gcóras intleachta saorga dá dtagraítear in Iarscríbhinn III go hiomlán coimhdeach i leith na ngníomhaíochta nó an chinnidh ábhartha atá le déanamh. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 74, mír 2.

Airteagal 7

Leasuithe ar Iarscríbhinn III

1. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 73 chun an liosta in Iarscríbhinn III a leasú trí chórais intleachta saorga ardriosca a chur leis i gcás ina gcomhlíontar na coinníollacha seo a leanas:
 - (a) go bhfuil na córais intleachta saorga ceaptha lena n-úsáid in aon cheann de na réimsí a liostaítear i bpointí 1 go 8 d'Iarscríbhinn III;
 - (b) go bhfuil baol ann mar gheall ar na córais intleachta saorga go ndéanfar díobháil don tsláinte agus don tsábháilteacht, nó go n-imreofar drochthionchar ar chearta bunúsacha, atá cothrom leis an mbaol atá ann mar gheall ar na córais intleachta saorga ardriosca dá dtagraítear in Iarscríbhinn III, nó níos mó ná sin, i ndáil lena thromchúisí agus a dhóchúla atá an díobháil sin nó an drochthionchar sin.

2. Nuair a dhéantar measúnú chun críocha mhír 1 an bhfuil baol ann mar gheall ar chóras intleachta saorga go ndéanfar díobháil don tsláinte agus don tsábháilteacht nó go n-imreofar drochthionchar ar chearta bunúsacha, atá cothrom leis an mbaol atá ann mar gheall ar na córais intleachta saorga ardriosca dá dtagraítear in Iarscríbhinn III, nó níos mó ná sin, cuirfidh an Coimisiún na critéir seo a leanas san áireamh:
- (a) an chríoch atá beartaithe don chóras intleachta saorga;
 - (b) a mhéid a úsáideadh córas intleachta saorga nó a mhéid is dócha go n-úsáidfear é;
 - (c) a mhéid a bhfuil díobháil déanta cheana leis an gcóras intleachta saorga, díobháil don tsláinte agus don tsábháilteacht nó ar imríodh drochthionchar cheana ar na cearta bunúsacha mar gheall ar úsáid córais intleachta saorga nó a mhéid atá an úsáid sin ina cúis le húdair imní thromchúiseacha maidir le teacht ann don díobháil nó drochthionchar sin, faoi mar a léirítear i dtuairiscí nó i líomhaintí doiciméadaithe arna gcur faoi bhráid na n-údarás inniúil náisiúnta;
 - (d) méid na díobhála nó an drochthionchair sin a d'fhéadfadh a bheith ann, go háirithe ó thaobh dhéine na díobhála sin agus ó thaobh chumas na díobhála sin difear a dhéanamh d'iolrachas daoine;
 - (e) maidir le daoine a bhféadfadh díobháil a bheith déanta dóibh nó drochthionchar a bheith imeartha orthu, a mhéid atá na daoine sin ag brath ar an toradh a tháirgtear le córas intleachta saorga, go háirithe toisc nach féidir le réasún gan a bheith páirteach sa toradh sin ar chúiseanna praiticiúla nó dlíthiúla;
 - (f) maidir le daoine a bhféadfadh díobháil a bheith déanta dóibh nó drochthionchar a bheith imeartha orthu, a mhéid atá na daoine sin i staid leochaileach i ndáil le húsáid an chórais intleachta saorga, go háirithe mar gheall ar éagothroime cumhachta, eolais, imthosca eacnamaíocha nó sóisialta, nó aoise;
 - (g) a mhéid nach féidir an toradh a thagann as córas intleachta saorga a mhalartú go héasca, sa chaoi nach measfar torthaí a bhfuil tionchar acu ar shláinte nó ar shábháilteacht daoine a bheith inmhalartaithe go héasca;

- (h) i ndáil le reachtaíocht an Aontais atá ann faoi láthair, a mhéid a dhéantar foráil maidir leis an méid a leanas:
- (i) bearta éifeachtacha sásaimh i ndáil leis na rioscaí a bhaineann le córas intleachta saorga agus éilimh ar dhamáistí a eisiamh uathu;
 - (ii) bearta éifeachtacha chun na rioscaí sin a chosc nó a mhaolú go suntasach;
- (i) méid agus dóchúlacht úsáid na hintleachta saorga do dhaoine aonair, do ghrúpaí nó don tsochaí i gcoitinne.
3. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 73 chun an liosta in Iarscríbhinn III a leasú trí chórais intleachta saorga ardriosca a bhaint i gcás ina gcomhlíontar na coinníollacha seo a leanas:
- (a) níl aon rioscaí suntasacha do chearta bunúsacha, do shláinte ná do shábháilteacht ag baint leis an gcóras intleachta saorga ardriosca nó leis na córais intleachta saorga lena mbaineann a thuilleadh, agus na critéir a liostaítear i mír 2 á gcur san áireamh;
 - (b) ní laghdaíonn an scriosadh an leibhéal foriomlán cosanta don tsláinte, don tsábháilteacht ná do chearta bunúsacha faoi dhlí an Aontais.

CAIBIDIL 2

CEANGLAIS MAIDIR LE CÓRAIS INTLEACHTA SAORGA ARDRIOSCA

Airteagal 8

Ceanglais a chomhlíonadh

1. Comhlíonfaidh gach córas intleachta saorga ardriosca na ceanglais a bhunaítear sa Chaibidil seo, agus an úrscothacht a admhaítear go ginearálta á cur san áireamh.

2. An chríoch atá beartaithe don chóras intleachta saorga ardriosca agus don chóras bainistíochta riosca dá dtagraítear in Airteagal 9, cuirfear san áireamh iad agus comhlíontacht leis na ceanglais sin á háirithiú.

Airteagal 9

Córas bainistíochta riosca

1. Bunófar córas bainistíochta riosca, cuirfear chur chun feidhme é, déanfar é a dhoiciméadú agus a choimeád ar bun i ndáil le córais intleachta saorga ardriosca.
2. Is é a thuigfear le córas bainistíochta riosca próiseas atriallach leanúnach a phleanáiltear agus a reáchtáiltear ar feadh shaolré an chórais intleachta saorga ardriosca, próiseas inar gá nuashonrú rialta córasach. Is éard a chuimseofar ann an méid seo a leanas:
- (a) sainaitheint agus anailisiú na rioscaí is eol agus is intuartha don tsláinte, don tsábháilteacht agus do chearta bunúsacha i bhfianaise an chuspóra atá beartaithe don chóras intleachta saorga ardriosca;
 - (b) [scriosta];
 - (c) meastóireacht ar rioscaí eile a d'fhéadfadh a bheith ann bunaithe ar anailís ar shonraí arna mbailiú ón gcóras faireacháin iarmhargaidh dá dtagraítear in Airteagal 61;
 - (d) bearta bainistíochta riosca oiriúnacha a ghlacadh i gcomhréir leis na forálacha sna míreanna seo a leanas.

Ní bhainfidh na rioscaí dá dtagraítear sa mhír seo ach leo siúd a d'fhéadfaí a mhaolú nó deireadh a chur leo go réasúnta trí fhorbairt nó trí dhearadh an chórais intleachta saorga ardriosca, nó trí fhaisnéis theicniúil leormhaith a sholáthar.

3. Leis na bearta bainistíochta riosca dá dtagraítear i mír 2, pointe (d) tabharfar aird chuí ar na héifeachtaí agus ar an idirghníomhaíocht a d'fhéadfadh a bheith ann mar thoradh ar chur i bhfeidhm comhpháirteach na gceanglas a leagtar amach i gCaibidil 2, d'fhonn rioscaí a íoslaghú ar bhealach níos éifeachtaí agus cothroime iomchuí a bhaint amach i gcur chun feidhme na mbeart chun na ceanglais sin a chomhlíonadh.
4. Fágfaidh na bearta bainistíochta riosca dá dtagraítear i mír 2, pointe (d) go measfar go bhfuil aon riosca iarmharach a bhaineann le gach guais ar leith agus riosca iarmharach foriomlán na gcóras intleachta saorga ardriosca inghlactha.

Agus na bearta bainistíochta riosca is iomchuí á sainaitheint, áiríteofar an méid seo a leanas:

- (a) díothú nó laghdú rioscaí arna sainaitheint agus arna measúnú de bhun mhír 2 a mhéid is féidir trí dhearadh agus forbairt leormhaithe an chórais intleachta saorga ardriosca;
- (b) i gcás inarb iomchuí, cur chun feidhme beart maolaithe agus rialaithe leormhaithe maidir le rioscaí nach féidir a dhíothú;
- (c) soláthar faisnéise leormhaithe de bhun Airteagal 13, go háirithe a mhéid a bhaineann leis na rioscaí dá dtagraítear i mír 2, pointe (b) den Airteagal seo, agus, i gcás inarb iomchuí, oiliúint a chur ar úsáideoirí.

D'fhonn na rioscaí a bhaineann le húsáid an chórais intleachta saorga ardriosca á dhíothú nó á laghdú, tabharfar aird chuí ar an eolas teicniúil, ar an taithí, ar an oideachas agus ar an oiliúint ar cheart don úsáideoir a bheith ag súil leo agus ar an timpeallacht ina bhfuil sé beartaithe an córas a úsáid.

5. Déanfar córais intleachta saorga ardriosca a thástáil chun a áirithiú go bhfeidhmíonn siad ar bhealach atá i gcomhréir leis an gcríoch atá beartaithe dóibh agus go gcomhlíonann siad na ceanglais a leagtar amach sa Chaibidil seo.
6. Féadfar tástáil i bhfiordhálaí domhanda a áireamh sna nósanna imeachta tástála i gcomhréir le hAirteagal 54a.

7. Déanfar an tástáil ar na córais intleachta saorga ardriosca, de réir mar is iomchuí, tráth ar bith le linn an phróisis forbartha, agus in aon chás, sula gcuirfear ar an margadh nó sula gcuirfear i mbun seirbhíse iad. Déanfar tástáil in aghaidh méadrachtaí a shaineofar roimh ré agus tairseach dhóchúil a bheidh iomchuí don chríoch atá beartaithe don chóras intleachta saorga ardriosca.
8. Leis an gcóras bainistíochta riosca a dtugtar tuairisc air i míreanna 1 go 7 tabharfar aird ar leith ar cibé an dócha go mbeidh rochtain ag daoine faoi 18 mbliana d'aois ar an gcóras intleachta saorga ardriosca nó an mbeidh tionchar aige orthu.
9. I gcás soláthraithe córas intleachta saorga ardriosca atá faoi réir ceanglais maidir le próisis inmheánacha bainistíochta riosca faoi dhlí earnála ábhartha an Aontais, féadfaidh na gnéithe a dtugtar tuairisc orthu i míreanna 1 go 8 a bheith mar chuid de na nósanna imeachta bainistíochta riosca a bhunaítear de bhun an dlí sin.

Airteagal 10

Sonraí agus rialachas sonraí

1. Maidir le córais intleachta saorga ardriosca a bhaineann úsáid as teicnící lena mbaineann oiliúint samhlacha le sonraí, déanfar iad a fhorbairt ar bhonn tacar sonraí oiliúna, bailíochtaithe agus tástála a chomhlíonann na critéir cháilíochta dá dtagraítear i míreanna 2 go 5.
2. Beidh tacair sonraí oiliúna, bailíochtaithe agus tástála faoi réir cleachtais iomchuí rialachais sonraí agus bainistíochta. Bainfidh na cleachtais sin go háirithe leis an méid seo a leanas,
 - (a) na roghanna ábhartha maidir le dearadh;
 - (b) próisis bailithe sonraí;
 - (c) oibríochtaí próiseála ullmhúcháin i gcomhair sonraí ábhartha, amhail anótáil, lipéadú, glanadh, saibhriú agus comhiomlánú;

- (d) toimhdí ábhartha a fhoirmliú, go háirithe maidir leis an bhfaisnéis a bhfuil na sonraí ceaptha a thomhas agus ionadaíocht a dhéanamh uirthi;
 - (e) measúnú roimh ré ar infhaighteacht, ar chainníocht agus ar oiriúnacht na dtacar sonraí a bhfuil gá leo;
 - (f) iniúchadh i bhfianaise claontaí a d'fhéadfadh a bheith ann ar dóigh dóibh difear a dhéanamh do shláinte agus do shábháilteacht daoine nádúrtha nó a mbeadh de thoradh orthu idirdhealú a thoirmistear le dlí an Aontais;
 - (g) aon bhearnaí nó easnaimh sonraí a d'fhéadfadh a bheith ann a shainaitheint, agus conas is féidir aghaidh a thabhairt ar na bearnaí agus na heasnaimh sin.
3. Maidir leis na tacair sonraí oiliúna, bailíochtaithe agus tástála, beidh siad ábhartha, ionadaíoch, agus a mhéid is féidir, saor ó earráidí agus iomlán. Beidh na hairíonna staidrimh iomchuí acu, lena n-áirítear i gcás inarb iomchuí, a mhéid a bhaineann leis na daoine nó na grúpaí daoine a bhfuil sé beartaithe an córas intleachta saorga ardriosca a úsáid orthu. Féadfar saintréithe na dtacar sonraí sin a chomhlíonadh ar leibhéal na dtacar aonair sonraí nó ar mheascán díobh sin.
4. Maidir leis na tacair sonraí oiliúna, bailíochtaithe agus tástála, a mhéid a cheanglaítear i bhfianaise na críche atá beartaithe dóibh, cuirfear san áireamh na saintréithe nó eilimintí a bhaineann go sonrach leis an suíomh geografach, iompraíochta nó feidhmiúil ina bhfuil sé beartaithe an córas intleachta saorga ardriosca a úsáid.
5. A mhéid a bhfuil géarghá leis chun faireachán, brath agus ceartú claontachta a áirithiú i ndáil leis na córais intleachta saorga ardriosca, féadfaidh soláthraithe na gcóras sin catagóirí speisialta sonraí pearsanta dá dtagraítear in Airteagal 9(1) de Rialachán (AE) 2016/679, Airteagal 10 de Threoir (AE) 2016/680 agus Airteagal 10(1) de Rialachán (AE) 2018/1725 a phróiseáil, faoi réir coimircí iomchuí maidir le cearta bunúsacha agus saoirsí bunúsacha daoine nádúrtha, lena n-áirítear srianta teicniúla ar bhearta slándála úrscothacha agus ar bhearta cosanta príobháideachais a athúsáid agus a úsáid, amhail bréagaimniú nó criptiú i gcás ina bhféadfadh anaithnidiú difear suntasach a dhéanamh don chuspóir atá leis na córais sin.

6. Chun córais intleachta saorga ardriosca a fhorbairt nach n-úsáideann teicnící lena mbaineann oiliúint samhlacha, ní bheidh feidhm ag míreanna 2 go 5 ach amháin maidir leis na tacair sonraí tástála.

Airteagal 11

Doiciméadacht theicniúil

1. Déanfar an doiciméadacht theicniúil a bhaineann le córas intleachta saorga ardriosca a tharraingt suas sula gcuirfear an córas sin ar an margadh nó i mbun seirbhíse agus coinneofar cothrom le dáta í.

Déanfar an doiciméadacht theicniúil a tharraingt suas ar bhealach ina léireofar go gcomhlíonann an córas intleachta saorga ardriosca na ceanglais a leagtar amach sa Chaibidil seo agus cuirfear an fhaisnéis go léir is gá, i bhfoirm shoiléir chuimsitheach, ar fáil d'údarais inniúla náisiúnta agus do chomhlachtaí náisiúnta faoina dtugtar fógra chun measúnú a dhéanamh ar chomhlíontacht na gcóras intleachta saorga ardriosca leis na ceanglas sin. Beidh, ar a laghad, na heilimintí a leagtar amach in Iarscríbhinn IV inti nó, i gcás FBManna, lena n-áirítear gnólachtaí nuathionscanta, aon doiciméadacht choibhéiseach a chomhlíonann na cuspóirí céanna, mura measann an t-údarais inniúil í a bheith mí-oiriúnach.

2. Maidir le córas intleachta saorga ardriosca a bhaineann le táirge, a bhfuil feidhm ag na gníomhartha dlí a liostaítear i Roinn A d'Iarscríbhinn II maidir leis, i gcás ina gcuirtear ar an margadh é nó ina gcuirtear i mbun seirbhíse é, déanfar doiciméadacht theicniúil aonair amháin a tharraingt suas ina mbeidh an fhaisnéis go léir a leagtar amach in Iarscríbhinn IV chomh maith leis an bhfaisnéis a cheanglaítear faoi na gníomhartha dlí sin.
3. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 73 chun Iarscríbhinn IV a leasú i gcás inar gá chun a áirithiú, i bhfianaise an dul chun cinn theicniúil, go soláthraíonn an doiciméadacht theicniúil an fhaisnéis uile is gá chun comhlíontacht an chórais leis na ceanglais a leagtar amach sa Chaibidil seo a mheasúnú.

Airteagal 12
Taifid a choimeád

1. Ceadóidh córais intleachta saorga ardriosca go teicniúil taifeadadh uathoibríoch a dhéanamh ar theagmhais ('logaí') ar feadh shaolré an chórais.
2. Chun leibhéal inrianaitheachta a áirithiú maidir le feidhmiú an chórais intleachta saorga atá iomchuí don chuspóir atá beartaithe don chóras, leis na cumais logála beifear in ann taifeadadh a dhéanamh ar imeachtaí atá ábhartha maidir leis an méid seo a leanas:
 - (i) cásanna a shainnithint ina bhféadfadh riosca a theacht ón gcóras intleachta saorga de réir bhrí Airteagal 65(1) nó ina bhféadfadh modhnú substaintiúil a bheith mar thoradh orthu;
 - (ii) an faireachán iarmhargaidh dá dtagraítear in Airteagal 61 a éascú; agus
 - (iii) faireachán ar oibriú na gcóras intleachta saorga ardriosca dá dtagraítear in Airteagal 29(4).
4. Maidir leis na córais intleachta saorga ardriosca dá dtagraítear i mír 1, pointe (a) d'Iarscríbhinn III, soláthrófar an méid seo a leanas ar a laghad leis na hacmhainní logála:
 - (a) taifead ar thréimhse gach úsáide den chóras (dáta agus am tosaigh agus dáta deiridh agus am gach úsáide);
 - (b) an bunachar sonraí tagartha ar seiceáladh na sonraí ionchuir ina leith leis an gcóras;
 - (c) na sonraí ionchuir ar tháinig meaitseáil ina leith as an gcuardach;
 - (d) sainnithint na ndaoine nádúrtha a bhfuil baint acu le fíorú na dtorthaí, dá dtagraítear in Airteagal 14 (5).

Airteagal 13

Trédhearcacht agus soláthar na faisnéise d'úsáideoirí

1. Déanfar córais intleachta saorga ardriosca a dhearadh agus a fhorbairt sa chaoi is go n-áiritheofar go mbeidh a n-oibriú trédhearcach go leor d'fhonn comhlíonadh oibleagáidí ábhartha an úsáideora agus an tsoláthraí a leagtar amach i gCaibidil 3 den Teideal seo a bhaint amach agus d'fhonn a chur ar chumas úsáideoirí an córas a thuiscint agus a úsáid go hiomchuí.
2. Beidh treoracha úsáide ag gabháil le córais intleachta saorga ardriosca i bhformáid dhigiteach iomchuí nó ar bhealach eile lena n-áireofar faisnéis ghonta, iomlán, cheart agus shoiléir a bheidh ábhartha, inrochtana agus sothuigthe d'úsáideoirí.
3. Maidir leis an bhfaisnéis dá dtagraítear i mír 2, sonrúfar an méid seo a leanas:
 - (a) céannacht agus sonraí teagmhála an oibreora agus, i gcás inarb infheidhme, céannacht agus sonraí teagmhála ionadaí údaráithe an oibreora;
 - (b) saintréithe, inniúlachtaí agus teorainneacha feidhmíochta an chórais intleachta saorga ardriosca, lena n-áirítear an méid seo a leanas:
 - (i) an cuspóir atá beartaithe dó, lena n-áirítear an suíomh sonrath geografach, iompraíochta nó feidhmiúil ina bhfuil sé beartaithe an córas IS ardriosca a úsáid;
 - (ii) an leibhéal cruinnis, lena n-áirítear a méadrachtaí, agus an leibhéal stóinseachta agus cibearshlándála dá dtagraítear in Airteagal 15, a ndearnadh an córas intleachta saorga ardriosca a thástáil agus a bhailíochtú ina leith agus ar féidir a bheith ag súil leis, agus aon imthosca atá ar eolas agus intuartha a d'fhéadfadh tionchar a imirt ar an leibhéal cruinnis, stóinseachta agus cibearshlándála a mheastar a bheith ann;
 - (iii) aon imthosca atá ar eolas nó intuartha, a bhaineann le húsáid an chórais intleachta saorga ardriosca i gcomhréir leis an gcuspóir atá beartaithe dó, a bhféadfadh rioscaí a bheith mar thoradh orthu don tsláinte agus don tsábháilteacht nó do chearta bunúsacha dá dtagraítear in Airteagal 9(2);

- (iv) i gcás inarb iomchuí, iompraíocht an chórais maidir le daoine sonracha nó grúpaí daoine sonracha a mbeartaítear an córas a úsáid ina leith;
 - (v) nuair is iomchuí, sonraíochtaí le haghaidh na sonraí ionchuir, nó le haghaidh aon fhaisnéis ábhartha eile i dtéarmaí na dtacar sonraí oiliúna, bailíochtaithe agus tástála arna n-úsáid, agus an chríoch atá beartaithe don chóras intleachta saorga á cur san áireamh;
 - (vi) nuair is iomchuí, cur síos ar aschur ionchasach an chórais.
- (c) na hathruithe ar an gcóras intleachta saorga ardriosca agus ar a fheidhmíocht arna réamhchinntiú ag an soláthraí tráth an mheasúnaithe comhréireachta tosaigh, más ann dó;
 - (d) na bearta formhaoirseachta daonna dá dtagraítear in Airteagal 14, lena n-áirítear na bearta teicniúla arna gcur i bhfeidhm chun léirmhíniú na n-úsáideoirí ar aschur na gcóras intleachta saorga a éascú;
 - (e) na hacmhainní ríomhaireachtúla agus na hacmhainní crua-earraí is gá, agus saolré ionchasach an chórais intleachta saorga ardriosca agus aon bhearta cothabhála agus cúraim is gá, lena n-áirítear a minicíocht, chun feidhmiú cuí an chórais intleachta saorga sin a áirithiú, lena n-áirítear a mhéid a bhaineann le nuashonruithe bogearraí;
 - (f) tuairisc ar an sásra a áirítear sa chóras intleachta saorga lenar féidir le húsáideoirí na logaí a bhailiú, a stóráil agus a léirmhíniú, i gcás inarb ábhartha.

Airteagal 14

Formhaoirseacht dhaonna

1. Déanfar córais intleachta saorga ardriosca a dheardh agus a fhorbairt le huirlisí iomchuí comhéadain duine le meaisín ar bhealach lenar féidir le daoine nádúrtha iad a mhaoirsiú go héifeachtach le linn na tréimhse ina bhfuil an córas intleachta saorga in úsáid.

2. Beidh sé d’aidhm ag an bhformhaoirseacht dhaonna na rioscaí don tsláinte, don tsábháilteacht nó do chearta bunúsacha a d’fhéadfadh teacht chun cinn a chosc nó a íoslaghdú nuair a úsáidtear córas intleachta saorga ardriosca i gcomhréir leis an gcríoch atá beartaithe dó nó faoi choinníollacha mí-úsáide atá measartha intuartha, go háirithe nuair a leanann na rioscaí sin de bheith ann d’ainneoin chur i bhfeidhm na gceanglas eile a leagtar amach sa Chaibidil seo.
3. Áiritheofar formhaoirseacht dhaonna trí cheann amháin nó trí gach ceann de na cineálacha beart seo a leanas:
- (a) bearta arna sainaitheint agus arna dtógáil sa chóras intleachta saorga ardriosca ag an soláthraí nuair is indéanta go teicniúil, sula gcuirfear é ar an margadh nó i mbun seirbhíse;
 - (b) bearta arna sainaitheint ag an soláthraí sula gcuirfear an córas intleachta saorga ardriosca ar an margadh nó sula gcuirfear i mbun seirbhíse é, bearta atá iomchuí don úsáideoir a chur chun feidhme.
4. Chun míreanna 1 go 3 a chur chun feidhme, déanfar an córas intleachta saorga ardriosca a sholáthar don úsáideoir sa chaoi go ndéanfar daoine nádúrtha a mbeidh formhaoirseacht dhaonna sannta dóibh, de réir mar is iomchuí agus comhréireach leis na himthosca, a chumasú an méid seo a leanas a dhéanamh:
- (a) acmhainneachtaí agus teorainneacha an chórais intleachta saorga ardriosca a thuiscint agus a bheith in ann faireachán cuí a dhéanamh ar a oibriú;
 - (b) fanacht ar an eolas faoin gclaonadh a d’fhéadfadh a bheith ann brath go huathoibríoch ar an aschur arna tháirgeadh ag córas intleachta saorga ardriosca (‘claontacht uathoibríthe’);
 - (c) aschur an chórais intleachta saorga ardriosca a léirmhíniú i gceart, agus na huirlisí agus na modhanna léirithe atá ar fáil, mar shampla, á gcur san áireamh;
 - (d) a chinneadh, in aon chás ar leith, gan úsáid a bhaint as an gcóras intleachta saorga ardriosca nó gan neamhaird a thabhairt in aon slí eile, aschur an chórais intleachta saorga ardriosca a shárú nó a aisiompú;
 - (e) idirghabháil a dhéanamh maidir le hoibriú an chórais intleachta saorga ardriosca nó cur isteach ar an gcóras le cnaipe ‘stad’ nó trí nós imeachta eile den chineál sin.

5. Maidir leis na córais intleachta saorga ardriosca dá dtagraítear i bpointe 1(a) d'Iarscríbhinn III, beidh na bearta dá dtagraítear i mír 3 de chineál a áiritheoidh, ina theannta sin, nach ndéanfaidh an t-úsáideoir aon ghníomh ná cinneadh ar bhonn an tsainaitheantais a dhéanfar leis an gcóras mura mbeidh fíorú agus dearbhú ar leithligh déanta air ag beirt daoine nádúrtha ar a laghad. Ní bheidh feidhm ag an gceanglas maidir le fíorú ar leithligh a dhéanfaidh beirt daoine nádúrtha ar a laghad maidir le córais intleachta saorga ardriosca a úsáidtear chun críoch fhorfheidhmiú an dlí, imirce, rialaithe teorann nó tearmainn, i gcásanna ina bhfuil cur i bhfeidhm an cheanglais sin díréireach de réir dhlí an Aontais nó an dlí náisiúnta.

Airteagal 15

Cruinneas, stóinseacht agus cibearshlándaíl

1. Déanfar córais intleachta saorga ardriosca a dhearadh agus a fhorbairt sa chaoi is go mbainfidh siad amach, i bhfianaise na críche atá beartaithe dóibh, leibhéal iomchuí cruinnis, stóinseachta agus cibearshlándaíla, agus go bhfeidhmeoidh siad go comhsheasmhach ar feadh a saolré.
2. Sna treoracha úsáide a ghabhann le córais intleachta saorga ardriosca dearbhófar a leibhéal chruinnis agus a méadrachtaí cruinnis ábhartha.
3. Beidh córais intleachta saorga ardriosca athléimneach a mhéid a bhaineann le hearráidí, fabhtanna nó neamhréireachtaí a d'fhéadfadh tarlú sa chóras nó sa timpeallacht ina n-oibríonn an córas, go háirithe mar gheall ar a n-idirghníomhú le daoine nádúrtha nó córais eile.

Féadfar stóinseacht na gcóras intleachta saorga ardriosca a bhaint amach trí réitigh iomarcaíochta teicniúla, lena bhféadfaí pleananna cúltaca nó pleananna atá slán i gcás teipe a áireamh.

Maidir le córais intleachta saorga ardriosca a leanann de bheith ag foghlaim tar éis iad a bheith curtha ar an margadh nó curtha i mbun seirbhíse, déanfar iad a fhorbairt ar bhealach ina ndíothaítear nó ina laghdaítear a oiread is féidir an riosca go n-imreodh aschuir a d'fhéadfadh a bheith claonta tionchar ar ionchur le haghaidh oibríochtaí sa todhchaí ('lúba aischothaithe') agus go dtugtar aghaidh orthu le bearta maolaithe iomchuí.

4. Beidh córais intleachta saorga ardriosca athléimneach maidir le hiarrachtaí tríú páirtithe a n-úsáid nó a bhfeidhmíocht a athrú trí theacht i dtír ar leochaileachtaí an chórais.

Maidir leis na réitigh theicniúla atá dírithe ar chibearshlándaíl na gcóras intleachta saorga ardriosca a áirithiú, beidh siad iomchuí sna himthosca ábhartha agus do na rioscaí.

Maidir leis na réitigh theicniúla chun aghaidh a thabhairt ar leochaileachtaí a bhaineann go sonrach leis an intleacht shaorga, i gcás inarb iomchuí, áireofar sna réitigh sin bearta chun ionsaithe atá dírithe ar an tacar sonraí oiliúna a ionramháil ('nimhiú sonraí'), ionchuir atá ceaptha ionas go ndéanfadh an tsamhail botún mar gheall orthu ('samplaí sáraíochta'), nó lochtanna na samhla, a chosc agus a rialú.

CAIBIDIL 3

OIBLEAGÁIDÍ SHOLÁTHRAITHE AGUS ÚSÁIDEOIRÍ NA gCÓRAS INTLEACHTA SAORGA ARDRIOSCA MAR AON LE PÁIRTITHE EILE

Airteagal 16

Oibleagáidí sholáthraithe na gcóras intleachta saorga ardriosca

Déanfaidh soláthraithe córas intleachta saorga ardriosca an méid seo a leanas:

- (a) a áirithiú go bhfuil a gcórais intleachta saorga i gcomhréir leis na ceanglais a leagtar amach i gCaibidil 2 den Teideal seo;
- (aa) a n-ainm nó a dtrádainm cláraithe nó a dtrádmharc cláraithe agus an seoladh lenar féidir dul i dteagmháil leo a léiriú ar an gcóras intleachta saorga ardriosca, nó i gcás nach féidir é sin a dhéanamh, ar an bpacáistíocht nó sa doiciméadacht a ghabhann leis an gcóras, de réir mar is infheidhme;
- (b) córas bainistíochta cáilíochta a chur i bhfeidhm lena gcomhlíontar Airteagal 17;
- (c) an doiciméadacht theicniúil dá dtagraítear in Airteagal 18 a choimeád;

- (d) nuair atá siad faoina rialú, na logaí a ghineann a gcórais intleachta saorga ardriosca go huathoibríoch, dá dtagraítear in Airteagal 20, a choimeád;
- (e) a áirithiú go gcuirtear an nós imeachta ábhartha um measúnú comhréireachta, dá dtagraítear in Airteagal 43, i bhfeidhm ar an gcóras intleachta saorga ardriosca sula gcuirfear ar an margadh é nó sula gcuirfear i mbun seirbhíse é;
- (f) na hoibleagáidí maidir le clárú dá dtagraítear in Airteagal 51(1) a chomhlíonadh;
- (g) na bearta ceartaitheacha is gá dá dtagraítear in Airteagal 21 a dhéanamh mura bhfuil an córas intleachta saorga i gcomhréir leis na ceanglais a leagtar amach i gCaibidil 2 den Teideal seo;
- (h) údarás inniúil ábhartha an Bhallstáit inar chuir siad an córas intleachta saorga ar fáil, nó inar chuir siad i mbun seirbhíse é, a chur ar an eolas, agus i gcás inarb iomchuí, an comhlacht faoina dtugtar fógra, faoin neamhchomhlíonadh agus faoi aon bheart ceartaitheach a rinneadh;
- (i) an mharcáil CE a ghreamú dá chóras intleachta saorga ardriosca chun comhréireacht leis an Rialachán seo a léiriú i gcomhréir le hAirteagal 49;
- (j) arna iarraidh sin d'údarás inniúil náisiúnta, comhréireacht an chórais intleachta saorga ardriosca leis na ceanglais a leagtar amach i gCaibidil 2 den Teideal seo a léiriú.

Airteagal 17

Córas bainistíochta cáilíochta

1. Cuirfidh soláthraithe córas intleachta saorga ardriosca córas bainistíochta cáilíochta i bhfeidhm lena n-áiríteofar go gcomhlíonfar an Rialachán seo. Déanfar an córas sin a dhoiciméadú ar bhealach córasach agus in ord, i bhfoirm beartais, nósanna imeachta agus treoracha i scríbhinn, agus beidh, ar laghad, na gnéithe seo a leanas san áireamh leis sin:
 - (a) straitéis maidir le comhlíonadh rialála, lena n-áirítear comhlíonadh na nósanna imeachta um measúnú comhréireachta agus na nósanna imeachta chun modhnuithe ar na córais intleachta saorga a bhainistiú;

- (b) teicnící, nósanna imeachta agus gníomhaíochtaí córasacha atá le húsáid maidir le dearadh, rialú deartha agus fíorú deartha an chórais intleachta saorga ardriosca;
- (c) teicnící, nósanna imeachta agus gníomhaíochtaí córasacha atá le húsáid maidir le forbairt, rialú cáilíochta agus dearbhú cáilíochta an chórais intleachta saorga ardriosca;
- (d) nósanna imeachta iniúchóireachta, scrúdaithe agus bailíochtaithe atá le déanamh roimh an gcóras intleachta saorga ardriosca a fhorbairt, lena linn agus ina dhiaidh, agus a mhinice is gá iad a dhéanamh;
- (e) sonraíochtaí teicniúla, lena n-áirítear caighdeáin, atá le cur i bhfeidhm agus, i gcás nach gcuirfear na caighdeáin chomhchuibhithe ábhartha i bhfeidhm ina n-iomláine, na modhanna atá le húsáid chun a áirithiú go gcomhlíonann an córas intleachta saorga ardriosca na ceanglais a leagtar amach i gCaibidil 2 den Teideal seo;
- (f) córais agus nósanna imeachta um bainistíocht sonraí, lena n-áirítear bailiú sonraí, anailísíocht sonraí, lipéadú sonraí, stóráil sonraí, scagadh sonraí, mianadóireacht sonraí, comhiomlánú sonraí, coinneáil sonraí agus aon oibríocht eile maidir leis na sonraí a fheidhmítear roimh chórais ardriosca intleachta saorga a chur ar an margadh agus a chur i mbun seirbhíse agus chun na gcríoch sin;
- (g) an córas bainistíochta riosca dá dtagraítear in Airteagal 9;
- (h) córas faireacháin iarmhargaidh a chur ar bun, a chur chun feidhme agus a chothabháil i gcomhréir le hAirteagal 61;
- (i) nósanna imeachta a bhaineann le teagmhas tromchúiseach a thuairisciú i gcomhréir le hAirteagal 62;
- (j) cumarsáid le húdaráis inniúla náisiúnta, le húdaráis inniúla, lena n-áirítear údaráis earnála, a láimhseáil, trí rochtain a thabhairt ar shonraí nó trí thacú léi, le comhlachtaí a dtugtar fógra dóibh, le hoibreoírí eile, le custaiméirí nó le páirtithe leasmhara eile;
- (k) córais agus nósanna imeachta maidir le taifid a choimeád ar gach doiciméad agus faisnéis ábhartha;

- (l) bainistiú acmhainní, lena n-áirítear bearta a bhaineann le slándáil an tsoláthair;
- (m) creat cuntasachta lena leagtar amach freagrachtaí na bainistíochta agus na foirne eile maidir le gach gné a liostaítear sa mhír seo.
2. Beidh cur chun feidhme na ngnéithe dá dtagraítear i mír 1 comhréireach le méid eagraíocht an tsoláthraí.
- 2a. I gcás soláthraithe córas intleachta saorga ardriosca atá faoi réir oibleagáidí maidir le córais bainistíochta cáilíochta faoi dhlí earnála ábhartha an Aontais, féadfaidh na gnéithe a dtugtar tuairisc orthu i mír 1 a bheith mar chuid de na córais bainistíochta cáilíochta a bhunaítear de bhun an dlí sin.
3. I gcás soláthraithe ar institiúidí creidmheasa iad atá faoi réir ceanglais maidir lena rialachas, socrúithe nó próisis inmheánacha faoi reachtaíocht seirbhísí airgeadais an Aontais, measfar go gcomhlíontar an oibleagáid córas bainistíochta cáilíochta a chur i bhfeidhm, cé is moite de mhír 1, pointí (g), (h) agus (i) trí na rialacha maidir le socrúithe nó próisis rialachais inmheánaigh de bhun na reachtaíochta seirbhísí airgeadais ábhartha a chomhlíonadh. Sa chomhthéacs sin, cuirfear san áireamh aon chaighdeán comhchuibhithe dá dtagraítear in Airteagal 40 den Rialachán seo.

Airteagal 18

Doiciméadacht a choimeád

1. Déanfaidh an soláthraí, ar feadh tréimhse dar críoch 10 mbliana tar éis an córas intleachta saorga a chur ar an margadh nó i mbun seirbhíse, an méid seo a leanas a choimeád ar fáil do na húdaráis inniúla náisiúnta:
- (a) an doiciméadacht theicniúil dá dtagraítear in Airteagal 11;
- (b) an doiciméadacht a bhaineann leis an gcóras bainistíochta cáilíochta dá dtagraítear in Airteagal 17;
- (c) an doiciméadacht a bhaineann leis na hathruithe arna bhformheas ag na comhlachtaí a dtugtar fógra dóibh i gcás inarb infheidhme;

- (d) na cinntí agus na doiciméid eile a d'eisigh na comhlachtaí a dtugtar fógra dóibh i gcás inarb infheidhme;
- (e) dearbhú comhréireachta an Aontais Eorpaigh dá dtagraítear in Airteagal 48.
- 1a. Cinnfidh gach Ballstát na coinníollacha faoina bhfanfaidh an doiciméadacht dá dtagraítear i mír 1 ar fáil do na húdaráis inniúla náisiúnta ar feadh na tréimhse a shonraítear sa mhír sin i gcásanna ina mbreithneofaí ina fhéimheach é soláthraí nó a ionadaí údaráithe atá bunaithe ar a chríoch nó ina gcuireann sé deireadh lena chuid gníomhaíochtaí roimh dheireadh na tréimhse sin.
2. Maidir le soláthraithe ar institiúidí airgeadais iad atá faoi réir ceanglais maidir lena rialachas, socruithe nó próisis inmheánacha faoi reachtaíocht seirbhísí airgeadais an Aontais, coinneoidh siad an doiciméadacht theicniúil mar chuid den doiciméadacht a choimeádtar faoi reachtaíocht seirbhísí airgeadais ábhartha an Aontais.

Airteagal 19

Measúnú comhréireachta

1. Déanfaidh soláthraithe córas intleachta saorga ardriosca a áirithiú go gcuirtear an nós imeachta ábhartha um measúnú comhréireachta i bhfeidhm ar a gcórais i gcomhréir le hAirteagal 43 sula gcuirfear ar an margadh iad nó sula gcuirfear i mbun seirbhíse iad. I gcás inar léiríodh comhlíontacht na gcóras intleachta saorga leis na ceanglais a leagtar amach i gCaibidil 2 den Teideal seo tar éis an mheasúnaithe comhréireachta sin, tarraingeoidh na soláthraithe suas dearbhú comhréireachta an Aontais i gcomhréir le hAirteagal 48 agus déanfaidh siad an mharcáil comhréireachta CE a ghreamú de i gcomhréir le hAirteagal 49.
2. [scriosta]

Airteagal 20

Logaí a ghintear go huathoibríoch

1. Maidir le soláthraithe córas intleachta saorga ardriosca, coimeádfaidh siad na logaí, dá dtagraítear in Airteagal 12(1), a ghineann córas intleachta saorga ardriosca go huathoibríoch, sa mhéid go bhfuil na logaí sin faoina rialú de bhua socrú conarthach leis an úsáideoir nó ar shlí eile de réir an dlí. Coimeádfaidh siad iad ar feadh thréimhse 6 mhí ar a laghad, mura bhforáiltear a mhalairt i ndlí an Aontais nó sa dlí náisiúnta is infheidhme, go háirithe i ndlí an Aontais maidir le cosaint sonraí pearsanta.
2. Maidir le soláthraithe ar institiúidí airgeadais iad atá faoi réir ceanglais maidir lena rialachas, socrúite nó próisis inmheánacha faoi reachtaíocht seirbhísí airgeadais an Aontais, coinneoidh siad na logaí a ghineann a gcórais intleachta saorga ardriosca go huathoibríoch mar chuid den doiciméadacht a choimeádtar faoi reachtaíocht seirbhísí airgeadais ábhartha an Aontais.

Airteagal 21

Gníomhaíochtaí ceartaitheacha

Soláthraithe córas intleachta saorga a mheasann, nó a bhfuil cúis mhaith acu a mheas, nach bhfuil córas intleachta saorga a chuir siad ar an margadh nó a chuir siad i mbun seirbhíse i gcomhréir leis an Rialachán seo, déanfaidh siad, i gcás inarbh infheidhme, na cúiseanna a fhiosrú láithreach i gcomhar leis an úsáideoir a thuairiscigh agus déanfaidh siad na bearta ceartaitheacha is gá láithreach chun an córas sin a thabhairt chun comhréireachta, chun é a astarraingt nó chun é a aisghairm, de réir mar is iomchuí. Cuirfidh siad na dáileoirí, agus, i gcás inarb infheidhme, an t-ionadaí údaraithe agus na hallmhaireoirí, ar an eolas faoin gcóras intleachta saorga ardriosca dá réir sin.

Airteagal 22

Dualgas maidir le faisnéis

I gcás ina bhfuil riosca ag baint le córas intleachta saorga de réir bhrí Airteagal 65(1) agus gurb eol do sholáthraí an chórais an riosca sin, cuirfidh an soláthraí sin údaráis inniúla náisiúnta na mBallstát inar chuir sé an córas ar fáil ar an eolas, mar aon leis an gcomhlacht faoina dtugtar fógra a d'eisigh deimhniú don chóras intleachta, i gcás inarb iomchuí, go háirithe maidir leis an neamhchomhlíonadh agus maidir le haon bheart ceartaitheach a rinneadh.

Airteagal 23

Comhar leis na húdaráis inniúla

Maidir le soláthraithe córas intleachta saorga ardriosca, arna iarraidh sin d'údarás inniúil náisiúnta, cuirfidh siad an fhaisnéis agus an doiciméadacht uile is gá ar fáil don údarás sin chun a léiriú go gcomhlíonann an córas intleachta saorga ardriosca na ceanglais a leagtar amach i gCaibidil 2 den Teideal seo, i dteanga is furasta d'údarás an Bhallstáit lena mbaineann a thuiscint. Ar iarraidh réasúnaithe a fháil ó údaráis inniúla náisiúnta, tabharfaidh soláthraithe córas intleachta saorga ardriosca rochtain don údarás sin ar na logaí, dá dtagraítear in Airteagal 12(1), a ghineann córas intleachta saorga ardriosca go huathoibríoch, sa mhéid go bhfuil na logaí sin faoina rialú de bhua socrú conarthach leis an úsáideoir nó ar shlí eile de réir an dlí.

Airteagal 23a

Coinníollacha a ghabhann le daoine eile a bheith faoi réir oibleagáidí soláthraí

1. Measfar gur soláthraí córais intleachta saorga ardriosca é aon duine nádúrtha nó dlítheanach chun críocha an Rialacháin seo agus beidh sé faoi réir oibleagáidí an tsoláthraí faoi Airteagal 16, in aon cheann de na cásanna seo a leanas:
 - (a) i gcás ina gcuireann siad a n-ainm nó a dtrádmharc ar chóras intleachta saorga ardriosca atá curtha ar an margadh nó i mbun seirbhíse cheana, gan dochar do shocruithe conarthacha lena sonraítear go leithdháilfear na hoibleagáidí ar shlí eile;

- (b) [scriosta]
- (c) i gcás ina modhnaíonn siad go substaintiúil córas intleachta saorga ardriosca a cuireadh ar an margadh nó i mbun seirbhíse cheana;
- (d) i gcás ina modhnaíonn sé an chríoch a bhí beartaithe do chóras intleachta saorga nach córas ardriosca é, a cuireadh ar an margadh nó i mbun seirbhíse cheana, ar bhealach a dhéanann córas intleachta saorga ardriosca den chóras sin;
- (e) i gcás ina gcuireann siad córas intleachta saorga ilchuspóireach ar an margadh nó i mbun seirbhíse mar chóras intleachta saorga ardriosca nó mar chomhpháirt de chóras intleachta saorga ardriosca.
2. Sna himthosca dá dtagraítear i mír 1, pointe (a) nó (c), ní mheasfar a thuilleadh gur soláthraí é an soláthraí a chuir an córas intleachta saorga ardriosca ar an margadh ar dtús nó i mbun seirbhíse ar dtús chun críocha an Rialacháin seo.
3. Maidir le córais intleachta saorga ardriosca ar comhpháirteanna sábháilteachta táirgí iad a bhfuil feidhm ag na gníomhartha dlí a liostaítear i Roinn A d'Iarscríbhinn II maidir leo, measfar gurb é monaróir na dtáirgí sin soláthraí an chórais intleachta saorga ardriosca agus beidh sé faoi réir na n-oibleagáidí faoi Airteagal 16 i gceachtar de na cásanna seo a leanas:
- (i) i gcás ina gcuirtear an córas intleachta saorga ardriosca ar an margadh in éineacht leis an táirge faoi ainm nó faoi thrádmharc mhonaróir an táirge;
- (ii) i gcás ina gcuirtear an córas intleachta saorga ardriosca i mbun seirbhíse faoi ainm nó faoi thrádmharc mhonaróir an táirge tar éis don táirge a bheith curtha ar an margadh.

Airteagal 24

[scriosta]

Airteagal 25
Ionadaithe údaraithe

1. Sula gcuirfidh siad a gcórais intleachta saorga ar fáil san Aontas ainmneoidh soláthraithe atá bunaithe lasmuigh den Aontas, trí shainordú i scríbhinn, ionadaí údaraithe atá bunaithe san Aontas.
2. Feidhmeoidh an t-ionadaí údaraithe na cúraimí arna sonrú sa sainordú a gheofar ón soláthraí. Chun críocha an Rialacháin seo tabharfar de chumhacht, leis an sainordú, don ionadaí údaraithe na cúraimí seo a leanas, agus iad sin amháin, a chur i gcrích:
 - (-a) a fhíorú go bhfuil dearbhú comhréireachta an Aontais agus an doiciméadacht theicniúil arna tarraingt suas agus go ndearna an soláthraí nós imeachta um measúnú comhréireachta iomchuí;
 - (a) sonraí teagmhála an tsoláthraí a cheap an t-ionadaí údaraithe, cóip de dhearbhú comhréireachta an Aontais, an doiciméadacht theicniúil agus, más infheidhme, an deimhniú arna eisiúint ag an gcomhlacht faoina dtugtar fógra, a choimeád ar fáil do na húdaráis inniúla náisiúnta agus do na húdaráis náisiúnta dá dtagraítear in Airteagal 63(7), ar feadh tréimhse dar críoch 10 mbliana tar éis an córas intleachta saorga ardriosca a chur ar an margadh nó a chur i mbun seirbhíse;
 - (b) ar iarraidh réasúnaithe, an fhaisnéis agus an doiciméadacht uile is gá, lena n-áirítear an fhaisnéis agus an doiciméadacht a choimeádtar de réir pointe (b), a chur ar fáil d'údarás inniúil náisiúnta chun a léiriú go gcomhlíonann córas intleachta saorga ardriosca na ceanglais a leagtar amach i gCaibidil 2 den Teideal seo, lena n-áirítear rochtain ar na logaí, dá dtagraítear in Airteagal 12(1), a ghineann an córas intleachta saorga ardriosca go huathoibríoch sa mhéid atá na logaí sin faoi rialú an tsoláthraí de bhua socrú conarthach leis an úsáideoir nó ar shlí eile de réir an dlí;
 - (c) comhoibriú le húdaráis náisiúnta inniúla, ar iarraidh réasúnaithe, maidir le haon bheart a dhéanfaidh na húdaráis sin i ndáil leis an gcóras intleachta saorga ardriosca sin.

- (d) na hoibleagáidí clárúcháin dá dtagraítear in Airteagal 51(1) a chomhlíonadh agus, má dhéanann an soláthraí féin clárú an chórais, a fhíorú go bhfuil an fhaisnéis dá dtagraítear in Iarscríbhinn VIII, Cuid II, 1 go 11, ceart.

Déanfaidh an t-ionadaí údaraithe an sainordú a fhoirceannadh má tá cúiseanna leordhóthanacha aige lena mheas go ngníomhaíonn an soláthraí ar neamhréir lena oibleagáidí faoin Rialachán seo. I gcás den sórt sin, cuirfidh sé údarás um fhaireachas margaidh an Bhallstáit ina bhfuil sé bunaithe, agus, i gcás inarb infheidhme, an comhlacht ábhartha faoina dtugtar fógra, ar an eolas láithreach faoi fhoirceannadh an tsainordaithe agus faoi na cúiseanna atá leis.

Beidh an t-ionadaí údaraithe faoi dhliteanas dlíthiúil i leith chórais intleachta saorga lochtacha ar an mbonn céanna leis an soláthraí, agus go comhpháirteach agus go leithleach leis an soláthraí, i leith a dhliteanais fhéideartha faoi Threoir 85/374/CEE ón gComhairle.

Airteagal 26

Oibleagáidí allmhaireoirí

1. Sula gcuirfear córas intleachta saorga ardriosca ar an margadh, áiritheoidh allmhaireoirí an chórais sin go bhfuil córas den sórt sin i gcomhréir leis an Rialachán seo trína fhíorú:
 - (a) gur chuir soláthraí an chórais intleachta saorga sin an nós imeachta ábhartha um measúnú comhréireachta dá dtagraítear in Airteagal 43 i bhfeidhm;
 - (b) gur tharraing an soláthraí suas an doiciméadacht theicniúil i gcomhréir le hIarscríbhinn IV;
 - (c) go bhfuil an mharcáil comhréireachta CE is gá ar an gcóras agus go bhfuil dearbhú comhréireachta an Aontais agus na treoracha úsáide is gá ag gabháil leis;
 - (d) gur cheap an soláthraí an t-ionadaí údaraithe dá dtagraítear in Airteagal 25.

2. I gcás ina bhfuil cúiseanna go leor ag allmhaireoir a mheas nach bhfuil córas intleachta saorga ardriosca i gcomhréir leis an Rialachán seo, nó gur falsaíodh é, nó gur cuireadh doiciméadacht fhalsaithe leis, ní chuirfidh sé an córas ar an margadh go dtí go mbeidh an córas intleachta saorga sin tugtha chun comhréireachta. I gcás ina bhfuil riosca ag baint leis an gcóras intleachta saorga ardriosca de réir bhrí Airteagal 65(1), cuirfidh an t-allmhaireoir soláthraí an chórais intleachta saorga, na hionadaithe údaraithe agus na húdaráis um fhaireachas margaidh ar an eolas faoi sin.
3. Déanfaidh allmhaireoirí a léiriú sa chóras intleachta saorga, a n-ainm nó a dtrádainm cláraithe nó a dtrádmharc cláraithe agus a seoladh teagmhála, nó i gcás nach bhféadfar é sin a dhéanamh, ar an bpacáistíocht nó sa doiciméadacht a ghabhann leis an gcóras.
4. Áiritheoidh allmhaireoirí fad is atá córas intleachta saorga ardriosca faoina bhfreagracht agus i gcás inarb infheidhme, nach gcuirfear comhlíonadh na gceanglas a leagtar amach i gCaibidil 2 den Teideal seo i mbaol leis na dálaí stórála nó iompair.
 - 4a. Coinneoidh allmhaireoirí, go ceann tréimhse dar críoch 10 mbliana tar éis an córas intleachta saorga a chur ar an margadh nó i mbun seirbhíse, cóip den deimhniú arna eisiúint ag an gcomhlacht faoina dtugtar fógra, i gcás inarb infheidhme, de na treoracha úsáide agus de dhearbhú comhréireachta an Aontais Eorpaigh.
5. Cuirfidh allmhaireoirí ar fáil d'údaráis inniúla, ar iarraidh réasúnaithe, an fhaisnéis agus an doiciméadacht uile is gá, lena n-áirítear an fhaisnéis agus an doiciméadacht a choimeádtar i gcomhréir le mír 5, chun a léiriú go gcomhlíonann córas intleachta saorga ardriosca na ceanglais a leagtar amach i gCaibidil 2 den Teideal seo, i dteanga is éasca don údarás inniúil náisiúnta sin a thuiscint. Chun na críche sin, áiritheoidh siad freisin gur féidir an doiciméadacht theicniúil a chur ar fáil do na húdaráis sin.
 - 5a. Oibreoidh allmhaireoirí i gcomhar le húdaráis inniúla náisiúnta maidir le haon ghníomhaíocht a dhéanfaidh na húdaráis sin i ndáil le córas intleachta saorga, arb iad a d'allmhairigh.

Airteagal 27

Oibleagáidí na ndáileoirí

1. Sula gcuirfidh dáileoirí córas intleachta saorga ardriosca ar fáil ar an margadh, fíoróidh siad go bhfuil an mharcáil comhréireachta CE is gá sa chóras, go bhfuil cóip de Dhearbhú Comhréireachta an Aontais Eorpaigh agus na teoracha úsáide is gá ag gabháil leis, agus gur chomhlíon an soláthraí agus an t-allmhaireoir, de réir mar is infheidhme, a gcuid oibleagáidí a leagtar amach in Airteagal 16(b) agus Airteagal 26(3) faoi seach.
2. I gcás ina measann dáileoir, nó a bhfuil cúis aige a mheas, nach bhfuil córas intleachta saorga ardriosca i gcomhréir leis na ceanglais a leagtar amach i gCaibidil 2 den Teideal seo, ní chuirfidh sé an córas intleachta saorga ardriosca sin ar an margadh go dtí go mbeidh an córas sin tugtha chun comhréireachta leis na ceanglais sin. Thairis sin, i gcás ina bhfuil riosca ag baint leis an gcóras de réir bhrí Airteagal 65(1), cuirfidh an dáileoir soláthraí nó allmhaireoir an chórais, de réir mar is infheidhme, ar an eolas faoi sin.
3. Áiritheoidh allmhaireoirí fad is atá córas intleachta saorga ardriosca faoina bhfreagracht agus i gcás inarb infheidhme, nach gcuirfear comhlíonadh na gceanglas a leagtar amach i gCaibidil 2 den Teideal seo i mbaol leis na dálaí stórála nó iompair.
4. Dáileoir a mheasann, nó a bhfuil cúis aige a mheas, nach bhfuil córas intleachta saorga a chuir sé ar fáil ar an margadh i gcomhréir leis na ceanglais a leagtar amach i gCaibidil 2 den Teideal seo, déanfaidh sé na bearta ceartaitheacha is gá chun an córas sin a thabhairt chun comhréireachta leis na ceanglais sin, chun é a astarraingt nó chun é a aisghairm, nó áiritheoidh sé go ndéanfaidh an soláthraí, an t-allmhaireoir nó aon oibreoir ábhartha, de réir mar is iomchuí, na bearta ceartaitheacha sin. I gcás ina bhfuil riosca ag baint leis an gcóras intleachta saorga ardriosca de réir bhrí Airteagal 65(1), cuirfidh an dáileoir údaráis inniúla náisiúnta na mBallstát inar chuir sé an táirge ar fáil ar an eolas maidir leis sin, agus tabharfaidh sé tuairisc, go háirithe, ar an neamhchomhlíonadh agus ar aon bheart ceartaitheach a rinneadh.

5. Ar iarraidh réasúnaithe ó údarás inniúil náisiúnta, cuirfidh dáileoirí córas intleachta saorga ardriosca an fhaisnéis agus an doiciméadacht uile faoina gcuid gníomhaíochtaí mar a thuairiscítear i míreanna 1 go 4.
- 5a. Oibreoidh dáileoirí i gcomhar le húdaráis inniúla náisiúnta maidir le haon ghníomhaíocht a dhéanfaidh na húdaráis sin i ndáil le córas intleachta saorga, arb iad a dháileoir.

Airteagal 28

[scriosta]

Airteagal 29

Oibleagáidí úsáideoirí na gcóras intleachta saorga ardriosca

1. Bainfidh úsáideoirí córas intleachta saorga úsáid as na córais sin i gcomhréir leis na treoracha úsáide a ghabhann leo, de bhun mhíreanna 2 agus 5 den Airteagal seo.
- 1a. Sannfaidh úsáideoirí formhaoirseacht dhaonna do dhaoine nádúrtha a bhfuil an inniúlacht, an oiliúint agus an t-údarás is gá acu.
2. Tá na hoibleagáidí i míreanna 1 agus 1a gan dochar d'oibleagáidí eile úsáideoirí faoi dhlí an Aontais nó faoin dlí náisiúnta agus do rogha an úsáideora a acmhainní féin agus a ghníomhaíochtaí féin a eagrú chun na bearta formhaoirseachta daonna arna gcur in iúl ag an soláthraí a chur chun feidhme.
3. Gan dochar do mhír 1, sa mhéid go bhfeidhmíonn an t-úsáideoir smacht ar na sonraí ionchuir, áiritheoidh an t-úsáideoir sin go mbeidh na sonraí ionchuir ábhartha i bhfianaise na críche atá beartaithe don chóras intleachta saorga ardriosca.

4. Cuirfidh úsáideoirí an fhorghairseacht dhaonna chun feidhme agus déanfaidh siad faireachán ar oibriú an chórais intleachta saorga ardriosca ar bhonn na dtreoracha úsáide. Nuair a bheidh cúiseanna acu chun a mheas go bhféadfadh riosca a bheith ag baint leis an gcóras intleachta saorga de réir bhrí Airteagal 65(1) mar thoradh ar an úsáid i gcomhréir leis na treoracha úsáide, cuirfidh siad an soláthraí nó an dáileoir ar an eolas agus cuirfidh siad úsáid an chórais ar fionraí. Cuirfidh siad an soláthraí nó an dáileoir ar an eolas freisin nuair a shainaithníonn siad aon teagmhas tromchúiseach agus nuair a idirbhriseann siad úsáid an chórais intleachta saorga. Mura féidir leis an úsáideoir teagmháil a dhéanamh leis an tsoláthraí, beidh feidhm ag Airteagal 62 *mutatis mutandis*. Ní chumhdófar leis an oibleagáid sin sonraí oibríochtúla íogaire úsáideoirí córas intleachta saorga ar údaráis forfheidhmithe dlí iad.

I gcás úsáideoirí ar institiúidí creidmheasa iad atá faoi réir ceanglais maidir lena rialachas, socruithe nó próisis inmheánacha faoi reachtaíocht seirbhísí airgeadais an Aontais, measfar go gcomhlíontar an oibleagáid faireacháin a leagtar amach sa chéad fhomhír trí na rialacha maidir le socruithe, próisis agus sásraí an rialachais inmheánaigh de bhun na reachtaíochta seirbhísí airgeadais ábhartha a chomhlíonadh.

5. Maidir le húsáideoirí córas intleachta saorga ardriosca, coimeádfaidh siad na logaí, dá dtagraítear in Airteagal 12(1), a ghintear go huathoibríoch leis an gcóras intleachta saorga ardriosca sin sa mhéid go bhfuil na logaí sin faoina rialú. Coimeádfaidh siad iad ar feadh tréimhse 6 mhí ar a laghad, mura bhforáiltear a mhalairt i ndlí an Aontais nó sa dlí náisiúnta is infheidhme, go háirithe i ndlí an Aontais maidir le cosaint sonraí pearsanta.

Maidir le húsáideoirí ar institiúidí airgeadais iad atá faoi réir ceanglais maidir lena rialachas, socruithe nó próisis inmheánacha faoi reachtaíocht seirbhísí airgeadais an Aontais, coinneoidh siad na logaí mar chuid den doiciméadacht a choimeádtar de bhun reachtaíocht seirbhísí airgeadais ábhartha an Aontais.

- 5a. Maidir le húsáideoirí córas intleachta saorga ardriosca ar údaráis phoiblí, gníomhaireachtaí nó comhlachtaí iad, cé is moite d'údaráis forfheidhmithe dlí, rialaithe teorann, inimirce nó tearmainn, comhlíonfaidh siad na hoibleagáidí clárúcháin dá dtagraítear in Airteagal 51. I gcás ina fhaigheann siad amach nár cláraíodh an córas a bheartaíonn siad a úsáid i mbunachar sonraí an Aontais dá dtagraítear in Airteagal 60, ní úsáidfidh siad an córas sin agus cuirfidh siad an soláthraí nó an dáileoir ar an eolas.

6. Bainfidh úsáideoirí córas intleachta saorga ardriosca úsáid as an bhfaisnéis arna soláthar faoi Airteagal 13 chun a n-oibleagáid measúnú tionchair ar chosaint sonraí a dhéanamh faoi Airteagal 35 de Rialachán (AE) 2016/679 nó Airteagal 27 de Threoir (AE) 2016/680, i gcás inarb infheidhme.
- 6a. Oibreoidh úsáideoirí i gcomhar le húdaráis inniúla náisiúnta maidir le haon ghníomhaíocht a dhéanfaidh na húdaráis sin i ndáil le córas intleachta saorga, arb iad a úsáideoir.

CAIBIDIL 4

NA HÚDARÁIS A THUGANN FÓGRA AGUS NA COMHLACHTAÍ FAOINA dTUGTAR FÓGRA

Airteagal 30

Na húdaráis a thugann fógra

1. Déanfaidh gach Ballstát ar a laghad údarás amháin a thugann fógra a ainmniú nó a chur ar bun, údarás a bheidh freagrach as na nósanna imeachta is a gá a chur ar bun agus a dhéanamh leis na comhlachtaí um measúnú comhréireachta a mheasúnú, a ainmniú agus maidir le fógra a thabhairt dóibh mar aon le maidir le faireachán a dhéanamh orthu.
2. Féadfaidh na Ballstáit a chinneadh go ndéanfaidh comhlacht náisiúnta creidiúnaithe an measúnú agus an faireachán dá dtagraítear i mír 1, de réir bhrí Rialachán (CE) Uimh. 765/2008 agus i gcomhréir leis.
3. Bunófar, eagrófar agus riarfar údarás a thugann fógra ar bhealach chun aon choinbhleacht leasa le comhlachtaí um measúnú comhréireachta a sheachaint agus chun go gcaomhnófar oibiachtúlacht agus neamhchlaontacht a ghníomhaíochtaí.

4. Eagrófar údaráis a thugann fógra ar bhealach a áiritheoidh gur daoine inniúla, nach ionann iad agus na daoine a rinne an measúnú ar na comhlachtaí sin, a dhéanfaidh cinntí a bhaineann le fógra a thabhairt do chomhlachtaí um measúnú comhréireachta.
5. Ní thairgfídh ná ní sholáthróidh na húdaráis a thugann fógra aon ghníomhaíocht a dhéanann comhlachtaí um measúnú comhréireachta ná seirbhísí comhairliúcháin ar bhonn tráchtála nó ar bhonn iomaíoch.
6. Déanfaidh na húdaráis a thugann fógra rúndacht na faisnéise a fhaigheann sé a choimirciú i gcomhréir le hAirteagal 70.
7. Beidh líon leordhóthanach de phearsanra inniúil ag na húdaráis a thugann fógra le húsáid chun a gcúraimí a fheidhmiú i gceart.
8. [scriosta]

Airteagal 31

Iarratas ar fhógra ó chomhlacht um measúnú comhréireachta

1. Déanfaidh comhlachtaí um measúnú comhréireachta iarratas ar fhógra a chur faoi bhráid an údaráis a thugann fógra de chuid an Bhallstáit ina bhfuil siad bunaithe.
2. Beidh ag gabháil leis an iarratas ar fhógra tuairisc ar na gníomhaíochtaí measúnaithe comhréireachta, an modúl nó na modúil mheasúnaithe comhréireachta agus na córais intleachta saorga a mhaíonn an comhlacht um measúnú comhréireachta go bhfuil sé inniúil ina leith, chomh maith le deimhniú creidiúnaithe, más ann dó, arna eisiúint ag comhlacht creidiúnaithe náisiúnta lena ndearbhaítear go gcomhlíonann an comhlacht um measúnú comhréireachta na ceanglais a leagtar síos in Airteagal 33. Cuirfear isteach aon doiciméad bailí a bhaineann le hainmniúcháin an chomhlachta is iarratasóir faoina dtugtar fógra faoi aon reachtaíocht chomhchuibhithe eile de chuid an Aontais.

3. I gcás nach féidir leis an gcomhlacht um measúnú comhréireachta lena mbaineann deimhniú creidiúnaithe a sholáthar, soláthróidh sé don údarás a thugann fógra an fhianaise dhoiciméadach uile is gá chun a chomhlíontacht leis na ceanglas a leagtar síos in Airteagal 33 a fhíorú agus a aithint agus chun faireachán rialta a dhéanamh air sin. Maidir le comhlachtaí faoina dtugtar fógra a ainmnítear faoi aon reachtaíocht chomhchuibhithe eile de chuid an Aontais, féadfar gach doiciméad agus deimhniú atá nasctha leis na hainmniúcháin sin a úsáid chun tacú lena nós imeachta ainmniúcháin faoin Rialachán seo, de réir mar is iomchuí. Tar éis don chomhlacht faoina dtugtar fógra a bheith ainmnithe, déanfaidh sé an doiciméadacht dá dtagraítear i míreanna 2 agus 3 a nuashonrú aon uair a tharlaíonn athruithe ábhartha, le cur ar chumas an údaráis atá freagrach as comhlachtaí faoina dtugtar fógra faireachán a dhéanamh ar chomhlíonadh leanúnach na gceanglas go léir a leagtar amach in Airteagal 33 agus é sin a fhíorú.

Airteagal 32

Nós imeachta um fhógra a thabhairt

1. Maidir leis na húdaráis a thugann fógra, féadfaidh siad fógra a thabhairt do na comhlachtaí um measúnú comhréireachta a bhfuil na ceanglais a leagtar síos in Airteagal 33 comhlíonta acu, agus do na comhlachtaí sin amháin.
2. Na húdaráis a thugann fógra, tabharfaidh siad fógra faoi na comhlachtaí sin don Choimisiún agus do na Ballstáit eile tríd an uirlis leictreonach um fhógra a thabhairt arna forbairt agus arna bainistiú ag an gCoimisiún.
3. Beidh san fhógra dá dtagraítear i mír 2 tuairisc iomlán ar na gníomhaíochtaí um measúnú comhréireachta, ar an modúl nó ar na modúil um measúnú comhréireachta agus ar na córais intleachta saorga lena mbaineann agus ar fhianú ábhartha na hinniúlachta. I gcás nach mbeidh fógra bunaithe ar dheimhniú creidiúnúcháin dá dtagraítear in Airteagal 31(2), déanfaidh an t-údarás a thugann fógra fianaise dhoiciméadach a sholáthar don Choimisiún agus do na Ballstáit eile lena ndearbhaítear inniúlacht an chomhlachta um measúnú comhréireachta mar aon leis na socruithe a bheidh i bhfeidhm lena áirithiú go ndéanfar faireachán rialta ar an gcomhlacht sin agus go leanfaidh sé de bheith ag comhlíonadh na gceanglas a leagtar síos in Airteagal 33.

4. Ní fhéadfaidh an comhlacht um measúnú comhréireachta lena mbaineann gníomhaíochtaí comhlachta faoina dtugtar fógra a fheidhmiú ach amháin mura ndéanann an Coimisiún ná na Ballstáit eile aon agóidí ina choinne laistigh de 2 sheachtain ó thráth déanta fógra ó údarás a thugann fógra i gcás deimhniú creidiúnaithe dá dtagraítear in Airteagal 31(2) a bheith ann nó laistigh de 2 mhí ó thráth déanta fógra ó údarás a thugann fógra i gcás fianaise dhoiciméadach dá dtagraítear in Airteagal 31(3) a bheith san fhógra.
5. [scriosta]

Airteagal 33

Na ceanglais i dtaca leis na comhlachtaí faoina dtugtar fógra

1. Maidir le comhlacht sin faoina dtugtar fógra, bunófar é faoin dlí náisiúnta agus beidh pearsantacht dhlítheanach aige.
2. Comhlíonfaidh comhlachtaí faoina dtugtar fógra na ceanglais maidir le heagrúcháin, bainistíocht cáilíochta, acmhainní agus próisis is gá chun na cúraimí sin a chomhlíonadh.
3. Beidh an struchtúr eagrúcháin, leithdháileadh freagrachtaí, na línte tuairiscithe agus oibriú na gcomhlachta faoina dtugtar fógra de chineál lena n-áirithítear go bhfuil muinín i bhfeidhmíocht an chomhlachta faoina dtugtar fógra agus i dtorthaí na ngníomhaíochtaí um measúnú comhréireachta a dhéanann sé.
4. Beidh comhlachtaí faoina dtugtar fógra neamhspleách ar sholáthraí córais intleachta saorga ardriosca a ndéanann siad gníomhaíochtaí um measúnú comhréireachta ina leith. Beidh comhlachtaí faoina dtugtar fógra neamhspleách freisin ar aon oibreoir eile a bhfuil leas eacnamaíoch aige sa chóras intleachta saorga ardriosca a ndéantar measúnú air, agus ar aon iomaitheoir de chuid an tsoláthraí chomh maith.
5. Eagrófar agus oibreofar na comhlachtaí faoina dtugtar fógra sa chaoi go gcaomhnófar neamhspleáchas, oibiachtúlacht agus neamhchlaontacht a gcuid gníomhaíochtaí. Déanfaidh na comhlachtaí faoina dtugtar fógra struchtúr agus nósanna imeachta a dhoiciméadú agus a chur chun feidhme chun neamhchlaontacht a choimirciú agus chun prionsabail na neamhchlaontachta a chur chun cinn agus a chur i bhfeidhm ar fud na heagraíochta agus ina ngníomhaíochtaí measúnaithe agus i measc a gcuid foirne.

6. Beidh nósanna imeachta doiciméadaithe i bhfeidhm ag comhlachtaí faoina dtugtar fógra lena áirithiú go n-urramóidh foirne, coistí, fochuideachtaí agus fochonraitheoirí na gcomhlachtaí sin agus aon chomhlacht comhlachais nó foireann de chuid comhlachtaí seachtracha rúndacht na faisnéise i gcomhréir le hAirteagal 70 a thagann ina seilbh le linn fheidhmiú na ngníomhaíochtaí um measúnú comhréireachta, ach amháin i gcás ina gceanglaítear nochtadh na faisnéise sin de réir an dlí. Beidh sé de cheangal ar fhoireann an chomhlachta faoina dtugtar fógra rúndacht ghairmiúil a urramú maidir leis an bhfaisnéis uile a gheofar le linn a gcuid cúraimí faoin Rialachán seo a chur i gcrích, ach amháin i ndáil le húdaráis a thugann fógra sa Bhallstát ina gcuirtear a gcuid gníomhaíochtaí i gcrích.
7. Beidh ag comhlachtaí faoina dtugtar fógra nósanna imeachta maidir le feidhmiú na ngníomhaíochtaí ina dtugtar aird chuí ar mhéid gnóthais, ar an earnáil ina n-oibríonn sé, ar a struchtúr agus ar a chasta atá an teicneolaíocht lena mbaineann.
8. Beidh árachas dliteanais iomchuí ag na comhlachtaí faoina dtugtar fógra le haghaidh a ngníomhaíochtaí um measúnú comhréireachta, ach amháin i gcás ina nglacann an Ballstát ina bhfuil siad lonnaithe dliteanas i gcomhréir leis an dlí náisiúnta, nó i gcás ina bhfuil an Ballstát sin féin freagrach go díreach as an measúnú comhréireachta.
9. Beidh sé de chumas ag comhlachtaí faoina dtugtar fógra na cúraimí ar fad a thugtar dóibh faoin Rialachán seo a chur i gcrích leis an oiread ionracais ghairmiúil is féidir agus leis an inniúlacht is gá sa réimse sonrath, bíodh na cúraimí sin á ndéanamh ag na comhlachtaí faoina dtugtar fógra féin nó thar a gceann agus faoina bhfreagracht.
10. Beidh go leor inniúlachtaí inmheánacha ag na comhlachtaí faoina dtugtar fógra chun gur féidir leo meastóireacht éifeachtach a dhéanamh ar na cúraimí a dhéanann páirtithe seachtracha thar a gceann. Beidh foireann leordhóthanach riaracháin, theicniúil, dhlíthiúil agus eolaíoch ar fáil don chomhlacht faoina dtugtar fógra i gcónaí, foireann ag a bhfuil taithí agus eolas a bhaineann leis na teicneolaíochta intleachta saorga, na sonraí agus an ríomhaireacht sonraí ábhartha agus leis na ceanglais a leagtar amach i gCaibidil 2 den Teideal seo.

11. Beidh comhlachtaí faoina dtugtar fógra rannpháirteach i ngníomhaíochtaí comhordúcháin dá dtagraítear in Airteagal 38. Ina theannta sin, glacfaidh siad páirt go díreach in eagraíochtaí Eorpacha um chaighdeánú, nó déanfar ionadaíocht orthu sna heagraíochtaí sin, nó áiritheoidh siad go bhfuil siad ar an eolas faoi na caighdeáin ábhartha agus cothrom le dáta ina leith.
12. [scriosta]

Airteagal 33a

Toimhde maidir le comhréireacht le ceanglais a bhaineann le comhlachtaí faoina dtugtar fógra

I gcás ina léireoidh comhlacht um measúnú comhréireachta a chomhréireacht leis na critéir a leagtar síos sna caighdeáin chomhchuibhithe ábhartha nó sna codanna díobh a bhfuil a gcuid tagairtí foilsithe in *Iris Oifigiúil an Aontais Eorpaigh*, toimhdeofar go gcomhlíonfaidh an comhlacht na ceanglais a leagtar amach in Airteagal 33 a mhéid a chumhdaítear na ceanglais sin leis na caighdeáin chomhchuibhithe is infheidhme.

Airteagal 34

Fochuideachtaí comhlachtaí faoina dtugtar fógra agus fochonraitheoireacht acu

1. I gcás ina ndéanfaidh comhlacht faoina dtugtar fógra cúraimí sonracha i dtaca le measúnú comhréireachta a chur amach ar fochonradh nó i gcás ina bhféadfaidh an comhlacht dul ar iontaoibh fochuideachta, áiritheoidh sé go gcomhlíonann an fochonraitheoir nó an fhochuideachta na ceanglais a leagtar amach in Airteagal 33 agus cuirfidh sé an t-údarás a thugann fógra ar an eolas faoi sin dá réir.
2. Glacfaidh comhlachtaí faoina dtugtar fógra freagracht iomlán as na cúraimí a dhéanann fochonraitheoir nó fochuideachta cibé áit a mbeidh sé bunaithe.
3. Ní fhéadfar gníomhaíochtaí a chur amach ar fochonradh ná ní fhéadfaidh fochuideachta iad a dhéanamh ach amháin le comhaontú ón soláthraí.

4. Déanfar na doiciméid ábhartha a bhaineann le measúnú ar cháilíochtaí an fhochonraitheora nó na fochuideachta, maille leis na doiciméid a bhaineann leis an obair a dhéanfaidh an fochonraitheoir nó an fhochuideachta faoin Rialachán seo, a choinneáil ar fáil don údarás a thugann fógra go ceann tréimhse 5 bliana ó dháta foirceanta na gníomhaíochta fochonraitheoireachta.

Airteagal 34a

Oibleagáidí oibríochtúla na gcomhlachtaí faoina dtugtar fógra

1. Fíoróidh comhlachtaí faoina dtugtar fógra comhréireacht an chórais intleachta saorga ardriosca i gcomhréir leis na nósanna imeachta um measúnú comhréireachta dá dtagraítear in Airteagal 43.
2. Déanfaidh comhlachtaí faoina dtugtar fógra a ngníomhaíochtaí a fheidhmiú agus ualaí nach bhfuil gá leo ar sholáthraithe á seachaint acu, agus aird chuí á tabhairt ar mhéid gnóthais, ar an earnáil ina n-oibríonn sé, ar a struchtúr agus ar a chasta atá an córas intleachta saorga ardriosca lena mbaineann. Ar an gcaoi sin, urramóidh an comhlacht faoina dtugtar fógra mar sin féin an méid smachta agus an leibhéal cosanta a éilítear go gcomhlíonfaidh an chórais intleachta saorga ardriosca le ceanglais an Rialacháin seo.
3. Déanfaidh na comhlachtaí faoina dtugtar fógra an doiciméadacht ábhartha uile, lena n-áirítear doiciméadacht an tsoláthraí, a chur ar fáil agus a chur faoi bhráid an údaráis a thugann fógra dá dtagraítear in Airteagal 30, arna iarraidh sin orthu, ionas go mbeidh an t-údarás sin in ann dul i mbun a ghníomhaíochtaí maidir le measúnú, ainmniú, fógra a thabhairt, faireachán agus chun an measúnú a leagtar amach sa Chaibidil seo a éascú.

Airteagal 35

Uimhir aitheantais agus liostaí na gcomhlachtaí faoina dtugtar fógra faoin Rialachán seo

1. Sannfaidh an Coimisiún uimhir aitheantais do chomhlachtaí faoina dtugtar fógra. Sannfaidh sé uimhir aonair fiú i gcás ina dtugtar fógra faoi chomhlacht faoi roinnt gníomhartha de chuid an Aontais.

2. Déanfaidh an Coimisiún liosta de na comhlachtaí faoina dtugtar fógra faoin Rialachán seo, lena n-áireofar na huimhreacha aitheantais arna sannadh dóibh agus na gníomhaíochtaí ar tugadh fógra ina dtaobh, agus cuirfear ar fáil don phobal é. Áiritheoidh an Coimisiún go mbeidh an liosta cothrom le dáta i gcónaí.

Airteagal 36
Athruithe ar na fógraí

1. Tabharfaidh an t-údarás a thugann fógra fógra don Choimisiún agus do na Ballstáit eile maidir le haon athruithe ábhartha ar fhógra a thabhairt faoi chomhlacht faoina dtugtar fógra tríd an uirlis leictreonach fógra dá dtagraítear in Airteagal 32(2).
2. Beidh feidhm ag na nósanna imeachta a bhfuil tuairisc orthu in Airteagail 31 agus 32 maidir le leathnú ar raon feidhme an fhógra. I gcás athruithe ar an bhfógra cé is moite de leathnú ar an raon feidhme, beidh feidhm ag na nósanna imeachta a leagtar síos sna míreanna seo a leanas.

I gcás ina gcinnfidh an comhlacht faoina dtugtar fógra deireadh a chur lena ghníomhaíochtaí um measúnú comhréireachta, cuirfidh sé sin in iúl don údarás a thugann fógra agus do na soláthraithe lena mbaineann, a luaithe is féidir agus má shocraítear deireadh a chur le gníomhaíochtaí, bliain amháin roimh dó deireadh a chur lena chuid gníomhaíochtaí. Féadfaidh na deimhnithe a bheith fós bailí go ceann tréimhse sealadach 9 mí tar éis deireadh a chur le gníomhaíochtaí an chomhlachta faoina dtugtar fógra ar choinníoll gur dhearbhaigh comhlacht eile faoina dtugtar fógra i scríbhinn go ngabhfaidh sé na freagrachtaí air féin maidir leis na córais intleachta saorga a chumhdaítear faoi na deimhnithe sin. Déanfaidh an comhlacht faoina dtugtar fógra measúnú iomlán ar na córais intleachta saorga lena mbaineann faoi dheireadh na tréimhse sin roimh deimhnithe nua a eisiúint do na córais sin. I gcás ina bhfuil an comhlacht faoina dtugtar fógra tar éis deireadh a chur lena chuid gníomhaíochtaí, tarraingeoidh an t-údarás a thugann fógra siar an t-ainmniú.

3. I gcás ina bhfuil cúiseanna leordhóthanacha ag údarás a thugann fógra a mheas nach bhfuil na ceanglais a leagtar síos in Airteagal 33 á gcomhlíonadh a thuilleadh ag comhlacht faoina dtugtar fógra, nó go bhfuil sé ag mainneachtain a chuid oibleagáidí a chomhall, déanfaidh an t-údarás a thugann fógra, ar choinníoll go raibh an deis ag an gcomhlacht faoina dtugtar fógra a chuid tuairimí a chur in iúl, fógra a shrianadh, a chur ar fionraí nó a tharraingt siar, de réir mar is iomchuí, ag brath ar a thromchúisí atá mainneachtain an chomhlachta na ceanglais sin a chomhlíonadh nó na hoibleagáidí sin a chomhall. Cuirfidh sé an Coimisiún agus na Ballstáit eile ar an eolas láithreach dá réir sin.
4. I gcás inar cuireadh ainmniú comhlachta faoina dtugtar fógra ar fionraí, inar cuireadh srian air nó ina ndearnadh é a tharraingt siar ina iomláine nó i bpáirt, déanfaidh sé na monaróirí lena mbaineann a chur ar an eolas laistigh de 10 lá ar a dhéanaí.
5. I gcás ina ndéantar fógra a shrianadh, a chur ar fionraí nó a tharraingt siar, glacfaidh an t-údarás a thugann fógra na céimeanna iomchuí lena áirithiú go ndéanfar comhaid an chomhlachta faoin dtugtar fógra a choinneáil agus cuirfidh sé ar fáil iad d'údarás a thugann fógra i mBallstáit eile agus d'údarás um fhaireachas margaidh arna iarraidh sin dóibh.
6. I gcás ina ndéanfar ainmniú a shrianadh, a chur ar fionraí nó a tharraingt siar, déanfaidh an t-údarás a thugann fógra an méid seo a leanas:
 - (a) measúnú ar an tionchar atá ar na deimhnithe a eisiúnn an comhlacht faoina dtugtar fógra;
 - (b) tuarascáil lena gcuid fionnachtana a chur faoi bhráid an Choimisiúin agus na mBallstát eile, laistigh de 3 mhí tar éis fógra faoi na hathruithe ar an bhfógra a thabhairt;
 - (c) ceangal a chur ar an gcomhlacht faoina dtugtar fógra aon deimhniú a eisíodh go míchuí a chur ar fionraí nó a tharraingt siar, laistigh de thréimhse réasúnta ama a chinnfidh an t-údarás chun comhréireacht na gcóras intleachta saorga atá ar an margadh a áirithiú;
 - (d) an Coimisiún agus na Ballstáit a chur ar an eolas faoi dheimhnithe ar iarr sé iad a chur ar fionraí nó a tharraingt siar;

- (e) gach faisnéis ábhartha a chur ar fáil d'údarás inniúla náisiúnta an Bhallstáit ina bhfuil a oifig chláraithe ag an soláthraí maidir leis na deimhnithe a bhfuil sé ag iarraidh iad a chur ar fionraí nó a tharraingt siar. Déanfaidh an t-údarás inniúil sin na bearta iomchuí is gá chun baol ionchasach do shláinte, do shábháilteacht nó do chearta bunúsacha a sheachaint.
7. Cé is moite de na deimhnithe a eisíodh go míchuí agus i gcás ina ndéanfar an fógra a chur ar fionraí nó a shrianadh, leanfaidh na deimhnithe de bheith bailí sna cúinsí seo a leanas:
- (a) dhearbhaigh an t-údarás a thugann fógra, laistigh d'aon mhí amháin tar éis an chur ar fionraí nó an tsrianta, nach ann do bhaol don tsláinte, don tsábháilteacht nó do chearta bunúsacha maidir le deimhnithe a ndearnadh difear dóibh de bharr na fionraí nó an tsrianta agus tá amlíne agus gníomhaíochtaí curtha in iúl ag an údarás a thugann fógra a mbeifear ag súil ina leith go ndéanfaidh siad an fhionraí nó an srianadh a réiteach; nó
- (b) tá sé dearbhaithe ag an údarás a thugann fógra nach ndéanfar aon deimhnithe a bhaineann leis an bhfionraí a eisiúint, a leasú, nó a atheisiúint, le linn na fionraí nó an tsrianta, agus go luafaidh an t-údarás an bhfuil an cumas ag an gcomhlacht faoina dtugtar fógra leanúint d'fhaireachán a dhéanamh agus de bheith freagrach as deimhnithe atá ann cheana a eisíodh do thréimhse na fionraí nó an tsrianta. I gcás ina gcinnfidh an t-údarás atá freagrach as comhlachtaí faoina dtugtar fógra nach bhfuil an cumas ag an gcomhlacht faoina dtugtar fógra tacú le deimhnithe atá ann cheana féin a eisíodh, soláthróidh an soláthraí d'údarás inniúla náisiúnta an Bhallstáit ina bhfuil a oifig chláraithe ag an soláthraí córais a chumhdaítear leis an deimhniú, laistigh de 3 mhí ón bhfionraí nó ón srianadh, dearbhú i scríbhinn go bhfuil feidhmeanna an chomhlachta faoina dtugtar fógra i ndáil le faireachán a dhéanamh ar na deimhnithe agus le bheith freagrach astu á nglacadh ag comhlacht cáilithe eile faoina dtugtar fógra, ar bhonn sealadach, le linn na tréimhse fionraí nó srianta.
8. Cé is moite de na deimhnithe a eisíodh go míchuí, agus i gcás ina ndéanfar an t-ainmniú a tharraingt siar, leanfaidh na deimhnithe de bheith bailí go ceann tréimhse 9 mí sna cúinsí seo a leanas:

- (a) tá sé dearbhaithe ag an údarás inniúil náisiúnta an Bhallstáit ina bhfuil a oifig chláraithe ag an soláthraí córais intleachta saorga a chumhdaítear leis an deimhniú nach ngabhann aon baol don tsláinte, don tsábháilteacht ná do chearta bunúsacha leis na córais atá i gceist; agus
- (b) tá sé dearbhaithe ag comhlacht eile faoina dtugtar fógra i scríbhinn go nglacfaidh sé chuige láithreach na freagrachtaí maidir leis na córais sin agus go mbeidh measúnú orthu curtha i gcrích laistigh de 12 mhí ón uair a rinneadh an t-ainmniú a tharraingt siar.

Sna cúinsí dá dtagraítear sa chéad mhír, féadfaidh údarás inniúil náisiúnta an Bhallstáit ina bhfuil a áit ghnó ag an soláthraí córais a chumhdaítear leis an deimhniú síneadh ama a chur le bailíocht shealadach na ndeimhnithe ar feadh tréimhsí breise 3 mhí, gan a bheith níos faide ná 12 mhí san iomlán.

Cuirfidh an t-údarás inniúil náisiúnta nó an comhlacht faoina dtugtar fógra a ghlacann feidhmeanna an chomhlachta faoina dtugtar fógra a mbeidh tionchar ag an athrú san fhógra air an Coimisiún, na Ballstáit eile agus na comhlachtaí eile faoina dtugtar fógra ar an eolas faoin méid sin gan mhoill.

Airteagal 37

Agóid in aghaidh inniúlacht na gcomhlachtaí faoina dtugtar fógra

1. Déanfaidh an Coimisiún, i gcás inar gá, imscrúdú ar gach cás ina bhfuil cúiseanna amhrais ann an gcomhlíonann comhlacht faoina dtugtar fógra na ceanglais a leagtar síos in Airteagal 33.
2. Cuirfidh an t-údarás a thugann fógra gach faisnéis ar fáil don Choimisiún, má iarrtar sin, maidir leis an bhfógra a tugadh don chomhlacht faoina dtugtar fógra lena mbaineann.
3. Áiritheoidh an Coimisiún gur ar mhodh rúin a dhéileálfar leis an bhfaisnéis rúnda uile a fhaightear le linn a chuid imscrúduithe de bhua an Airteagail seo, i gcomhréir le hAirteagal 70.

4. I gcás ina bhfionnfaidh an Coimisiún nach gcomhlíonann comhlacht faoina dtugtar fógra na ceanglais a leagtar síos in Airteagal 33, nó nach gcomhlíonann sé iad a thuilleadh, cuirfidh sé na cúiseanna le fionnadh den sórt sin in iúl don údarás a thugann fógra agus iarraidh sé air na bearta ceartaitheacha is gá a dhéanamh, lena n-áirítear an t-ainmniú a chur ar fionraí, a shrianadh nó a aistarraingt más gá. Má theipeann ar an údarás a thugann fógra na bearta ceartaitheacha is gá a dhéanamh, féadfaidh an Coimisiún, trí bhíthin gníomhartha cur chun feidhme, an fógra a chur ar fionraí, a shrianadh nó a tharraingt siar. Glacfar an gníomh cur chun feidhme sin i gcomhréir leis an nós imeachta scrúdúcháin dá dtagraítear in Airteagal 74(2).

Airteagal 38

Comhordú na gcomhlachtaí faoina dtugtar fógra

1. Áiritheoidh an Coimisiún, maidir leis na córais intleachta saorga ardriosca, go gcuirfeadh ar bun comhordúchán agus comhar iomchuí idir comhlachtaí faoina dtugtar fógra atá gníomhach i nósanna imeachta um measúnú comhréireachta de bhun an Rialacháin seo agus go n-oibreofar mar is ceart iad i bhfoirm grúpa eárnála de chomhlachtaí faoina dtugtar fógra.
2. Áiritheoidh an t-údarás a thugann fógra go mbeidh na comhlachtaí a dtugann siad fógra fúthu rannpháirteach in obair an ghrúpa sin, go díreach nó trí bhíthin ionadaithe ainmnithe.

Airteagal 39

Comhlachtaí um measúnú comhréireachta i dtríú tíortha

Maidir le comhlachtaí um measúnú comhréireachta arna mbunú faoi dhlí tríú tír a bhfuil comhaontú tugtha i gcrích ag an Aontas léi, féadfar na comhlachtaí sin a údarú chun gníomhaíochtaí comhlachtaí faoina dtugtar fógra a dhéanamh faoin Rialachán seo, ar choinníoll go gcomhlíonann siad na ceanglais in Airteagal 33.

CAIBIDIL 5

CAIGHDEÁIN, MEASÚNÚ COMHRÉIREACHTA, DEIMHNITHE, CLÁRÚ

Airteagal 40

Caighdeáin chomhchuibhithe

1. Córais intleachta saorga ardriosca nó córais intleachta saorga ilchuspóireacha atá i gcomhréir le caighdeáin chomhchuibhithe nó le codanna díobh, agus ar foilsíodh a dtagairtí in *Iris Oifigiúil an Aontais Eorpaigh*, measfar iad a bheith i gcomhréir leis na ceanglais a leagtar amach i gCaibidil 2 den Teideal seo nó, de réir mar is infheidhme, le ceanglais a leagtar amach in Airteagal 4a agus Airteagal 4b, sa mhéid a chumhdaítear na ceanglais sin leis na caighdeáin sin.
2. Agus iarraidh ar chaighdeánú á heisiúint aige chuig eagraíochtaí Eorpacha um chaighdeánú i gcomhréir le hAirteagal 10 de Rialachán (AE) Uimh. 1025/2012, sonrúidh an Coimisiún go bhfuil na caighdeáin comhleanúnach, soiléir agus dréachtaithe ar shlí a bhfuil sé mar aidhm acu, go háirithe, na cuspóirí seo a leanas a chomhlíonadh:
 - (a) a áirithiú go bhfuil córais intleachta saorga a chuirtear ar an margadh nó i mbun seirbhíse san Aontas sábháilte agus go n-urramaíonn siad luachanna an Aontais agus go ndéanann siad uathriail straitéiseach oscailte an Aontais a neartú;
 - (b) go ndéantar infheistíocht agus nuálaíocht san intleacht shaorga a chur chun cinn, lena n-áirítear trí dheimhneacht dhlíthiúil a mhéadú, chomh maith le hiomaíochas agus fás mhargadh an Aontais;
 - (c) go bhfeabhsaítear rialachas il-gheallsealbhóra, a dhéanann ionadaíocht ar gheallsealbhóirí ábhartha uile na hEorpa (e.g. lucht tionscail, FBManna, an tsochaí shibhialta, taighdeoirí);
 - (d) go rannchuidítear le neartú an chomhair dhomhanda maidir le caighdeánú i réimse na hintleachta saorga atá comhsheasmhach le luachanna agus leasanna an Aontais.

Iarrfaidh an Coimisiún ar na heagraíochtaí Eorpacha um chaighdeánú fianaise a sholáthar faoina n-iarrachtaí na cuspóirí thuas a chomhlíonadh.

Airteagal 41

Sonraíochtaí coiteanna

1. Tugtar de chumhacht don Choimisiún, tar éis dó dul i gcomhairle leis an mBord Eorpach um an Intleacht Shaorga dá dtagraítear in Airteagal 56, gníomhartha cur chun feidhme a ghlacadh i gcomhréir leis an nós imeachta scrúdúcháin dá dtagraítear in Airteagal 74(2) lena mbunaítear sonraíochtaí teicniúla coiteanna le haghaidh na gceanglas a leagtar amach i gCaibidil 2 den Teideal seo, nó, de réir mar is infheidhme, le ceanglais a leagtar amach in Airteagal 4a agus in Airteagal 4b, i gcás inar comhlíonadh na coinníollacha seo a leanas:
 - (a) nach bhfuil aon tagairt do chaighdeáin chomhchuibhithe lena gcumhdaítear na hábhair inní ábhartha maidir le sábháilteacht nó le cearta bunúsacha foilsithe in *Iris Oifigiúil an Aontais Eorpaigh* i gcomhréir le Rialachán (AE) Uimh. 1025/2012;
 - (b) gur iarr an Coimisiún, de bhun Airteagal 10(1) de Rialachán (AE) Uimh. 1025/2012, ar cheann amháin nó níos mó d'eagraíochtaí Eorpacha um chaighdeánú caighdeán comhchuibhithe a dhréachtú do na ceanglais a leagtar amach i gCaibidil 2 den Teideal seo;
 - (c) nár ghlac aon cheann de na heagraíochtaí Eorpacha um chaighdeánú leis an iarraidh dá dtagraítear i bpointe (b) ná nach ndéantar na caighdeáin chomhchuibhithe lena dtugtar aghaidh ar an iarraidh sin a sheachadadh laistigh den sprioc-am a leagtar síos i gcomhréir le hAirteagal 10(1) de Rialachán (AE) Uimh. 1025/2012 nó nach gcomhlíonann na caighdeáin sin an iarraidh.
- 1a. Sula n-ullmhóidh sé dréachtghníomh cur chun feidhme, cuirfidh an Coimisiún in iúl don choiste dá dtagraítear in Airteagal 22 de Rialachán (AE) Uimh. 1025/2012 go measann sé go bhfuil na coinníollacha i mír 1 comhlíonta.
2. Le linn luathchéim ullmhúcháin an dréachtghnímh cur chun feidhme lena mbunaítear an tsonraíocht choiteann, comhlíonfaidh an Coimisiún na cuspóirí dá dtagraítear in Airteagal 40(2) agus baileoidh sé tuairimí na gcomhlachtaí ábhartha nó na ngrúpaí saineolaithe ábhartha arna mbunú faoi dhlí earnála ábhartha an Aontais. Bunaithe ar an gcomhairliúchán sin, ullmhóidh an Coimisiún an dréachtghníomh cur chun feidhme.

3. Córais intleachta saorga ardriosca nó córais intleachta saorga ilchuspóireacha atá i gcomhréir leis na sonraíochtaí coiteanna dá dtagraítear i mír 1, measfar iad a bheith i gcomhréir leis na ceanglais a leagtar amach i gCaibidil 2 den Teideal seo nó, de réir mar is infheidhme, le ceanglais a leagtar amach in Airteagal 4a agus Airteagal 4b, sa mhéid a chumhdaítear na ceanglais sin leis na sonraíochtaí coiteanna sin.
4. Nuair a fhoilseofar tagairtí do chaighdeán comhchuibhithe in *Iris Oifigiúil an Aontais Eorpaigh*, aisghairfear gníomhartha cur chun feidhme dá dtagraítear i mír 1, lena gcumhdaítear na ceanglais a leagtar amach i gCaibidil 2 den Teideal seo nó ceanglais a leagtar amach in Airteagal 4a agus in Airteagal 4b, de réir mar is infheidhme.
5. I gcás ina mheasann Ballstát nach ndéanann sonraíocht choiteann na ceanglais a leagtar amach i gCaibidil 2 den Teideal seo nó na ceanglais a leagtar amach in Airteagal 4a agus in Airteagal 4b, de réir mar is infheidhme, a chomhlíonadh ina n-iomláine, cuirfidh sé an Coimisiún ar an eolas ina leith le míniú mionsonraithe agus déanfaidh an Coimisiún measúnú ar an bhfaisnéis sin agus, más iomchuí, leasóidh sé an gníomh cur chun feidhme lena mbunaítear an tsonraíocht choiteann atá i gceist.

Airteagal 42

Toimhde comhréireachta le ceanglais áirithe

1. Maidir le córais intleachta saorga ardriosca atá oilte agus tástáilte ar shonraí a léiríonn an suíomh sonrath geografach, iompraíochta nó feidhmiúil ina mbeartaítear iad a úsáid, measfar na córais sin a bheith i gcomhréir leis na ceanglais faoi seach a leagtar amach in Airteagal 10(4).

2. Maidir le córais intleachta saorga ardriosca nó córais intleachta saorga ilchuspóireacha atá deimhnithe nó ar eisíodh ráiteas comhréireachta ina leith faoi scéim cibearshlándála de bhun Rialachán (AE) 2019/881 ó Pharlaimint na hEorpa agus ón gComhairle³³ agus ar foilsíodh a dtagairtí in *Iris Oifigiúil an Aontais Eorpaigh*, measfar iad a bheith i gcomhréir leis na ceanglais maidir le cibearshlándáil a leagtar amach in Airteagal 15 den Rialachán seo a mhéid a chumhdaítear na ceanglais sin leis an deimhniú cibearshlándála nó leis an ráiteas comhréireachta nó le codanna díobh.

Airteagal 43

Measúnú comhréireachta

1. Maidir le córais intleachta saorga ardriosca a liostaítear i bpointe 1 d'Iarscríbhinn III, más rud é, agus é á léiriú go gcomhlíonann córas intleachta saorga ardriosca na ceanglais a leagtar amach i gCaibidil 2 den Teideal seo, gur chuir an soláthraí i bhfeidhm na caighdeáin chomhchuibhithe dá dtagraítear in Airteagal 40, nó, i gcás inarb infheidhme, na sonraíochtaí coiteanna dá dtagraítear in Airteagal 41, roghnóidh an soláthraí ceann de na nósanna imeachta seo a leanas:

- (a) an nós imeachta um measúnú comhréireachta bunaithe ar rialú inmheánach dá dtagraítear in Iarscríbhinn VI; nó
- (b) an nós imeachta um measúnú comhréireachta bunaithe ar mheasúnú ar an gcóras bainistíochta cáilíochta agus ar mheasúnú ar an doiciméadacht theicniúil, i gcomhar le comhlacht faoina dtugtar fógra, dá dtagraítear in Iarscríbhinn VII.

Más rud é, agus é á léiriú aige go gcomhlíonann córas intleachta saorga ardriosca na ceanglais a leagtar amach i gCaibidil 2 den Teideal seo, nár chuir an soláthraí i bhfeidhm na caighdeáin chomhchuibhithe dá dtagraítear in Airteagal 40, nó nár chuir sé i bhfeidhm na caighdeáin chomhchuibhithe sin ach i bpáirt, nó i gcás nach ann do na caighdeáin chomhchuibhithe sin agus nach bhfuil na sonraíochtaí coiteanna dá dtagraítear in Airteagal 41 ar fáil, leanfaidh an soláthraí an nós imeachta um measúnú comhréireachta a leagtar amach in Iarscríbhinn VII.

³³ Rialachán (AE) 2019/881 ó Pharlaimint na hEorpa agus ón gComhairle an 17 Aibreán 2019 maidir le ENISA (Gníomhaireacht an Aontais Eorpaigh um Chibearshlándáil) agus maidir le deimhniú i ndáil le cibearshlándáil theicneolaíocht na faisnéise agus na cumarsáide agus lena n-aisghairtear Rialachán (AE) Uimh. 526/2013 (an Gníomh um Chibearshlándáil) (IO L 151, 7.6.2019, lch. 1).

Chun críoch an nós imeachta um measúnú comhréireachta dá dtagraítear in Iarscríbhinn VII, féadfaidh an soláthraí aon cheann de na comhlachtaí faoina dtugtar fógra a roghnú. Nuair a bheidh sé beartaithe an córas a chur i mbun seirbhíse ag údaráis forfheidhmithe dlí, údaráis inimirce nó údaráis tearmainn chomh maith le hinstiúidí, comhlachtaí nó gníomhaireachtaí an Aontais, gníomhóidh an t-údarás um fhaireachas margaidh dá dtagraítear in Airteagal 63(5) nó (6), de réir mar is infheidhme, mar chomhlacht faoina dtugtar fógra.

2. Maidir le córais intleachta saorga ardriosca dá dtagraítear i bpointí 2 go pointe 8 d'Iarscríbhinn III agus maidir le córais intleachta saorga ilchuspóireacha dá dtagraítear i dTeideal 1a, leanfaidh soláthraithe an nós imeachta um measúnú comhréireachta bunaithe ar rialú inmheánach dá dtagraítear in Iarscríbhinn VI, nach ndéantar foráil leis maidir le rannpháirtíocht comhlachta faoina dtugtar fógra.
3. Maidir le córais intleachta saorga a bhfuil feidhm ag na gníomhartha dlí a liostaítear in Iarscríbhinn II, roinn A, maidir leo, leanfaidh an soláthraí an measúnú comhréireachta ábhartha de réir mar a cheanglaítear faoi na gníomhartha dlí sin. Beidh feidhm ag na ceanglais a leagtar amach i gCaibidil 2 den Teideal seo maidir leis na córais intleachta saorga ardriosca sin agus beidh siad mar chuid den mheasúnú sin. Beidh feidhm freisin ag pointí 4.3., 4.4., 4.5. agus ag an gcúigiú mír de phointe 4.6 d'Iarscríbhinn VII.

Chun críoch an mheasúnaithe sin, na comhlachtaí faoina dtugtar fógra ar tugadh fógra fúthu faoi na gníomhartha dlí sin, beidh siad i dteideal rialú a dhéanamh ar chomhréireacht na gcórais intleachta saorga ardriosca leis na ceanglais a leagtar amach i gCaibidil 2 den Teideal seo, ar choinníoll go ndearnadh measúnú ar chomhlíontacht na gcomhlachtaí faoina dtugtar fógra leis na ceanglais a leagtar síos in Airteagal 33(4), (9) agus (10) i gcomhthéacs an nós imeachta um fhógra a thabhairt faoi na gníomhartha dlí sin.

I gcás ina ligeann na gníomhartha dlí a liostaítear i roinn A d'Iarscríbhinn II gur féidir le monaróir an táirge roghnú gan a bheith páirteach i measúnú comhréireachta tríú páirtí, ar choinníoll gur chuir an monaróir sin na caighdeáin chomhchuibhithe uile i bhfeidhm lena gcumhdaítear na ceanglais ábhartha uile, ní fhéadfaidh an monaróir sin úsáid a bhaint as an rogha sin ach amháin má tá caighdeáin chomhchuibhithe nó, i gcás inarb infheidhme, na sonraíochtaí coiteanna dá dtagraítear in Airteagal 41 curtha i bhfeidhm aige freisin, lena gcumhdaítear na ceanglais a leagtar amach i gCaibidil 2 den Teideal seo.

4. [scriosta]

5. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 73 chun Iarscríbhinn VI agus Iarscríbhinn VII a thabhairt cothrom le dáta i bhfianaise an dul chun cinn teicniúil.
6. Tugtar de chumhacht don Choimisiún gníomhartha tarmligthe a ghlacadh chun míreanna 1 agus 2 a leasú d'fhonn na córais intleachta saorga ardriosca dá dtagraítear i bpointe 2 go pointe 8 d'Iarscríbhinn III a chur faoi réir an nós imeachta um measúnú comhréireachta dá dtagraítear in Iarscríbhinn VII nó codanna de. Glacfaidh an Coimisiún na gníomhartha tarmligthe sin, agus éifeachtacht an nós imeachta um measúnú comhréireachta á cur san áireamh aige bunaithe ar an rialú inmheánach dá dtagraítear in Iarscríbhinn VI maidir leis na rioscaí don tsláinte, don tsábháilteacht, agus do chosaint na gceart bunúsach a thugtar leis na córais sin, a chosc nó a íoslaghdú chomh maith le hinfhaighteacht inniúlachtaí leordhóthanacha na gcomhlachtaí faoina dtugtar fógra.

Airteagal 44

Deimhnithe

1. Maidir le deimhnithe arna n-eisiúint ag comhlachtaí faoina dtugtar fógra i gcomhréir le hIarscríbhinn VII, déanfar iad a tharraingt suas i dteanga is éasca do na húdaráis ábhartha sa Bhallstát ina bhfuil an comhlacht faoina dtugtar fógra bunaithe a thuiscint.
2. Beidh deimhnithe bailí feadh na tréimhse a luaitear orthu, tréimhse nach faide ná cúig bliana. Ar iarratas ón soláthraí, féadfar bailíocht an deimhnithe a shíneadh ar feadh tréimhsí breise, nach mbeidh aon cheann acu níos faide ná cúig bliana, bunaithe ar athmheasúnú i gcomhréir leis na nósanna imeachta um measúnú comhréireachta is infheidhme. Beidh aon fhorlíonadh ar dheimhniú bailí fad is bailí don deimhniú a fhorlíonann sé.
3. Má chinneann comhlacht faoina dtugtar fógra nach bhfuil na ceanglais a leagtar síos i gCaibidil 2 den Teideal seo á gcomhlíonadh ag córas intleachta saorga a thuilleadh, déanfaidh sé an deimhniú a eisíodh a chur ar fionraí, a aistarraingt nó cuirfidh sé aon srian air, agus prionsabal na comhréireachta á chur san áireamh, ach amháin má dhéantar comhlíonadh na gceanglas sin a áirithiú le beart ceartaitheach iomchuí a dhéanfaidh an soláthraí laistigh de spriocdháta a leagtar síos ag an gcomhlacht faoina dtugtar fógra. Tabharfaidh an comhlacht faoina dtugtar fógra na cúiseanna lena chinneadh.

Airteagal 45

Achomharc in aghaidh chinntí na gcomhlachtaí faoina dtugtar fógra

Beidh nós imeachta achomhairc ar fáil i gcoinne chinntí na gcomhlachtaí faoina dtugtar fógra.

Airteagal 46

Oibleagáidí faisnéise na n-údarás faoina dtugtar fógra

1. Cuirfidh na comhlachtaí faoina dtugtar fógra an méid seo a leanas in iúl don údarás a thugann fógra:
 - (a) aon deimhniú maidir le measúnú ar dhoiciméadacht theicniúil de chuid an Aontais, aon fhorlíonadh a ghabhann leis na deimhnithe sin, formheasanna ar chóras bainistíochta cáilíochta a eisítear i gcomhréir le ceanglais Iarscríbhinn VII;
 - (b) aon diúltú, srianadh, fionraí nó aistarraingt a rinneadh ar dheimhniú maidir le measúnú ar dhoiciméadacht theicniúil de chuid an Aontais nó ar fhorpheas ar chóras bainistíochta cáilíochta arna eisiúint i gcomhréir le ceanglais Iarscríbhinn VII;
 - (c) aon imthosca a dhéanann difear do raon feidhme an fhógra nó do choinníollacha an fhógra;
 - (d) aon iarratas ar fhaisnéis a gheobhaidh siad ó údaráis faireachais margaidh maidir lena ngníomhaíochtaí um measúnú comhréireachta;
 - (e) má iarrtar air é, gníomhaíochtaí um measúnú comhréireachta a dhéantar laistigh de raon feidhme a bhfógra agus aon ghníomhaíocht eile a dhéantar, lena n-áirítear gníomhaíochtaí trasteorann agus fochonraitheoireacht.
2. Cuirfidh gach comhlacht faoina dtugtar fógra na comhlachtaí eile faoina dtugtar fógra ar an eolas faoi na nithe seo a leanas:
 - (a) formheasanna ar chóras bainistíochta cáilíochta a dhiúltaigh sé, a chuir sé ar fionraí nó a aistarraing sé, agus, arna iarraidh sin dó, formheasanna córais cáilíochta a d'eisigh sé;

- (b) Deimhnithe de chuid an Aontais maidir le measúnú ar dhoiciméadacht theicniúil nó aon fhorlíonadh orthu a dhiúltaigh sé, a aistarraing sé, a chuir sé ar fionraí nó ar chuir sé srian orthu ar shlí eile, agus, arna iarraidh sin dó, na deimhnithe agus/nó na forlíontaí orthu a d'eisigh sé.
3. Soláthróidh gach comhlacht faoina dtugtar fógra faisnéis ábhartha maidir le saincheisteanna a bhaineann le torthaí diúltacha, agus, arna n-iarraidh sin, torthaí dearfacha um measúnú comhréireachta do chomhlachtaí eile faoina dtugtar fógra a dhéanann gníomhaíochtaí comhchosúla um measúnú comhréireachta lena gcumhdaítear na córais intleachta saorga céanna.
4. Déanfar na hoibleagáidí dá dtagraítear i míreanna 1 go 3 a chomhlíonadh i gcomhréir le hAirteagal 70.

Airteagal 47

Maolú ar nós imeachta um measúnú comhréireachta

1. De mhaolú ar Airteagal 43 agus ar iarraidh a bhfuil údar leis, féadfaidh aon údarás um fhaireachas margaidh a údarú córais intleachta saorga ardriosca shonracha a chur ar an margadh nó a chur i mbun seirbhíse laistigh de chríoch an Bhallstáit lena mbaineann, ar chúiseanna eisceachtúla a bhaineann leis an tslándáil phoiblí nó le cosaint beatha agus sláinte daoine, le cosaint an chomhshaoil agus le príomhshócmhainní tionsclaíocha agus bonneagair a chosaint. Is ar feadh tréimhse teoranta ama a bheidh an t-údarú sin, fad a bheidh na nósanna imeachta um measúnú comhréireachta is gá á gcur i gcrích, agus na cúiseanna eisceachtúla lena dtugtar údar maith leis an maolú á gcur san áireamh. Tabharfar faoi na nósanna imeachta sin gan moill mhíchuí.
- 1a. I gcás práinne a bhfuil údar maith léi ar chúiseanna eisceachtúla a bhaineann leis an tslándáil phoiblí nó i gcás garbhagairt shonrach, shuntasach agus láithreach ar bheatha nó ar shábháilteacht fhisiceach daoine nádúrtha, féadfaidh údaráis forfheidhmithe dlí nó údaráis cosanta sibhialta córas intleachta saorga ardriosca sonrach a chur i mbun seirbhíse gan an t-údarú dá dtagraítear i mír 1 ar choinníoll go n-iarrtar an t-údarú sin le linn na húsáide nó ina diaidh gan moill mhíchuí, agus má dhiúltaítear an t-údarú sin, cuirfear deireadh lena úsáid láithreach agus cuirfear deireadh láithreach le torthaí agus aschuir uile na húsáide sin.

2. Ní eiseofar an t-údarú dá dtagraítear i mír 1 ach amháin má chinneann an t-údarás um fhaireachas margaidh go gcomhlíonann an córas intleachta saorga ardriosca ceanglais Chaibidil 2 den Teideal seo. Tabharfaidh an t-údarás um fhaireachas margaidh fógra don Choimisiún agus do na Ballstáit eile faoi aon údarú arna eisiúint de bhun mhír 1. Ní chumhdófar leis an oibleagáid sin sonraí oibríochtúla íogaire maidir le gníomhaíochta údaráis forfheidhmithe dlí.
3. [scriosta]
4. [scriosta]
5. [scriosta]
6. Maidir le córais intleachta saorga ardriosca a bhaineann le táirgí a chumhdaítear le reachtaíocht comhchuibhithe an Aontais dá dtagraítear in Iarscríbhinn II Roinn A, ní bheidh feidhm ach ag na maolú ar nósanna imeachta um measúnú comhréireachta a bhunaítear sa reachtaíocht sin.

Airteagal 48

Dearbhú Comhréireachta an Aontais Eorpaigh

1. Déanfaidh an soláthraí dearbhú comhréireachta AE arna shíniú i scríbhinn nó go leictreonach a tharraingt suas le haghaidh gach córais intleachta saorga agus coimeádfaidh sé é ar fáil do na húdaráis inniúla náisiúnta ar feadh 10 mbliana tar éis an córas intleachta saorga a chur ar an margadh nó i mbun seirbhíse. Leis an dearbhú comhréireachta AE, sainaitheofar an córas intleachta saorga dá bhfuil sé tarraingthe suas. Déanfar cóip den dearbhú comhréireachta AE a chur faoi bhráid na n-údarás inniúil náisiúnta ábhartha arna iarraidh sin.
2. Sonrófar i ndearbhú comhréireachta AE go gcomhlíonann an córas intleachta saorga ardriosca atá i gceist na ceanglais a leagtar amach i gCaibidil 2 den Teideal seo. Beidh i ndearbhú comhréireachta AE an fhaisnéis a leagtar amach in Iarscríbhinn V agus aistreofar é go dtí teanga is éasca d'údaráis inniúla náisiúnta an Bhallstáit nó na mBallstát ina gcuirfear an córas intleachta saorga ardriosca ar fáil a thuiscint.

3. I gcás ina bhfuil córais intleachta saorga ardriosca faoi réir reachtaíocht chomhchuibhithe Aontais eile lena n-éilítear dearbhú comhréireachta AE freisin, déanfar dearbhú comhréireachta AE aonair a tharraingt suas i ndáil le gach reachtaíocht de chuid an Aontais is infheidhme maidir leis an gcóras intleachta saorga ardriosca. Áireofar sa dearbhú an fhaisnéis uile is gá chun reachtaíocht chomhchuibhithe an Aontais a shainathint lena mbaineann an dearbhú.
4. Trí dhearbhú comhréireachta AE a tharraingt suas, glacfaidh an soláthraí freagracht as comhlíonadh na gceanglas a leagtar amach i gCaibidil 2 den Teideal seo. Coinneoidh an soláthraí an dearbhú comhréireachta AE cothrom le dáta de réir mar is iomchuí.
5. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 73 chun críche ábhar dhearbhú comhréireachta AE a leagtar amach in Iarscríbhinn V a thabhairt cothrom le dáta agus chun eilimintí is gá i bhfianaise an dul chun cinn theicniúil a thabhairt isteach.

Airteagal 49

Marcáil comhréireachta CE

1. Beidh an mharcáil comhréireachta CE faoi réir na bprionsabal ginearálta a leagtar amach in Airteagal 30 de Rialachán (CE) Uimh. 765/2008.
2. Déanfar an mharcáil CE a ghreamú go feiceálach inléite doscriosta maidir le córais intleachta saorga ardriosca. Mura bhfuil sé sin indéanta nó mura bhfuil gá léi mar gheall ar chineál an chórais intleachta saorga ardriosca, greamófar í den phacáistíocht nó den doiciméadacht a ghabhann leis an gcóras, de réir mar is iomchuí.
3. I gcás inarb infheidhme, i ndiaidh na marcála CE, beidh uimhir aitheantais an chomhlachta faoina dtugtar fógra atá freagrach as na nósanna imeachta um measúnú comhréireachta a leagtar amach in Airteagal 43. Cuirfear an uimhir aitheantais in iúl freisin ar aon ábhar fógraíochta ar a luaitear go bhfuil na ceanglais maidir le marcáil CE á gcomhlíonadh ag an gcóras intleachta saorga.

Airteagal 50

[scriosta]

Airteagal 51

Oibreoirí ábhartha agus córais intleachta saorga ardriosca a liostaítear in Iarscríbhinn III a chlárú

1. Sula ndéanfar córas intleachta saorga ardriosca a liostaítear in Iarscríbhinn III cé is moite de na córais intleachta saorga ardriosca dá dtagraítear in Iarscríbhinn III, pointí 1, 6 agus 7 i réimsí fhorfheidhmiú an dlí, bhainistiú imirce, tearmainn agus rialaithe teorann, agus na gcórais intleachta saorga ardriosca dá dtagraítear in Iarscríbhinn III pointe 2, a chur ar an margadh nó a chur i mbun seirbhíse, déanfaidh an soláthraí agus i gcás inarb infheidhme, an t-ionadaí údaraithe, iad féin a chlárú i mbunachar sonraí an Aontais dá dtagraítear in Airteagal 60. Déanfaidh an soláthraí nó, i gcás inarb infheidhme, an t-ionadaí údaraithe, a gcórais a chlárú sa bhunachar sonraí sin freisin.
2. Sula n-úsáidfidh siad córas intleachta saorga ardriosca a liostaítear in Iarscríbhinn III, cláróidh úsáideoirí córas intleachta saorga ardriosca ar údaráis, gníomhaireachtaí nó comhlachtaí poiblí iad, nó eintitis atá ag gníomhú thar a gceann, iad féin i mbunachar sonraí an Aontais dá dtagraítear in Airteagal 60 agus roghnóidh siad an córas a bheartaíonn siad a úsáid.

Ní bheidh feidhm ag na hoibleagáidí a leagtar síos san fhomhír roimhe seo maidir le húdaráis, gníomhaireachtaí nó comhlachtaí forfheidhmithe dlí, rialaithe teorann, inimirce nó tearmainn, ná maidir le húdaráis, gníomhaireachtaí nó comhlachtaí a úsáideann córais intleachta saorga ardriosca dá dtagraítear in Iarscríbhinn III pointe 2, ná maidir le heintitis a ghníomhaíonn thar a gceann.

TEIDEAL IV

OIBLEAGÁIDÍ TRÉDHEARCACHTA DO SHOLÁTHRAITHE AGUS D'ÚSÁIDEOIRÍ CÓRAS INTLEACHTA SAORGA ÁIRITHE

Airteagal 52

Oibleagáidí trédhearcachta do sholáthraithe agus d'úsáideoirí córas intleachta saorga áirithe

1. Maidir le córais intleachta saorga atá ceaptha idirghníomhú le daoine nádúrtha, áiritheoidh soláthraithe go ndéanfar na córais sin a dheardh agus a fhorbairt ar bhealach a chuirfidh daoine nádúrtha ar an eolas go bhfuil siad ag idirghníomhú le córas intleachta saorga, ach amháin más léir sin ó thaobh duine nádúrtha atá eolasach, géarchúiseach agus cáiriseach, agus na himthosca agus comhthéacs na húsáide á gcur san áireamh. Ní bheidh feidhm ag an oibleagáid sin maidir le córais intleachta saorga arna n-údarú leis an dlí cionta coiriúla a bhrath, a chosc, a imscrúdú agus a ionchúiseamh, faoi réir coimircí iomchuí maidir le cearta agus saoirsí tríú páirtithe, ach amháin má bhíonn na córais sin ar fáil don phobal chun cion coiriúil a thuairisciú.
2. Cuirfidh úsáideoirí córais catagóirithe bhithmhéadraigh daoine a nochtar an córas dóibh ar an eolas faoi oibriú an chórais. Ní bheidh feidhm ag an oibleagáid sin maidir le córais intleachta saorga arna n-úsáid le haghaidh catagóiriú bithmhéadrach, a cheadaítear de réir dlí chun cionta coiriúla a bhrath, a chosc agus a imscrúdú, faoi réir coimircí iomchuí do chearta agus saoirsí tríú páirtithe.
- 2a. Cuirfidh úsáideoirí córais aitheanta mothúcháin daoine nádúrtha a nochtar an córas dóibh ar an eolas faoi oibriú an chórais. Ní bheidh feidhm ag an oibleagáid sin maidir le córais intleachta saorga a úsáidtear chun mothúcháin a aithint, ar córais iad a cheadaítear de réir an dlí chun cionta coiriúla a bhrath, a chosc agus a imscrúdú, faoi réir coimircí iomchuí do chearta agus saoirsí tríú páirtithe.

3. Maidir le húsáideoirí córais intleachta saorga a ghineann nó a chúblálann inneachar íomhá, fuaimne nó físe atá cosúil go suntasach le daoine, nithe, áiteanna nó eintitis nó teagmhais eile atá ann cheana agus a bhfeicfear do dhuine go bhfuil sé barántúil nó firinneach ach go bhfuil sé bréagach ('domhainbhrionnú'), nochtfaidh na húsáideoirí sin gur gineadh nó gur cúbláladh an t-ábhar go saorga.

Ní bheidh feidhm ag an gcéad fhomhír, áfach, i gcás ina bhfuil an úsáid údaráithe le dlí chun cionta coiriúla a bhrath, a chosc, a imscrúdú agus a ionchúiseamh nó i gcás inar cuid de shaothar nó de chláir atá cruthaitheach, aorach, ealaíonta nó ficseanúil é an t-ábhar faoi réir coimircí iomchuí do chearta agus saoirsí tríú páirtithe.

- 3a. Déanfar an fhaisnéis dá dtagraítear i míreanna 1 go 3 seo a sholáthar do dhaoine nádúrtha ar bhealach soiléir agus inaitheanta, ar a dhéanaí tráth a dhéanfar an chéad idirghníomhaíocht nó an chéad nochtadh.
4. Ní dhéanfaidh míreanna 1, 2, 2a agus 3 agus 3a difear do na ceanglais agus na hoibleagáidí a leagtar amach i dTeideal III den Rialachán seo agus beidh siad gan dochar d'oibleagáidí trédhearcachta eile d'úsáideoirí córas intleachta saorga a leagtar síos i ndlí an Aontais nó sa dlí náisiúnta.

TEIDEAL V

BEARTA CHUN TACÚ LEIS AN NUÁLAÍOCHT

Airteagal 53

Bosca gainimh rialála IS

- 1a. Féadfaidh údaráis inniúla náisiúnta boscaí gainimh rialála IS a bhunú chun córais intleachta saorga nuálacha a fhorbairt, a chur faoi oiliúint, a thástáil agus a bhailíochtú faoi mhaoirseacht dhíreach, treoir agus tacaíocht ón údarás inniúil náisiúnta, sula gcuirfear na córais sin ar an margadh nó i mbun seirbhíse. D'fhéadfadh sé go n-áireofaí sna boscaí gainimh rialála sin tástáil i bhfiordhálaí a ndéanann na húdaráis inniúla náisiúnta maoirseacht orthu.

- 1b. [scriosta]
- 1c. I gcás inarb iomchuí, oibreoidh údaráis inniúla náisiúnta i gcomhar le húdaráis ábhartha eile agus féadfaidh siad rannpháirtíocht gníomhaithe eile laistigh d'éiceachóras na hintleachta saorga a cheadú.
- 1d. Ní dhéanfaidh an tAirteagal seo difear do bhoscaí gainimh rialála eile arna mbunú faoin dlí náisiúnta nó faoi dhlí an Aontais, lena n-áirítear i gcásanna ina bhfuil nasc idir na táirgí nó na seirbhísí a dhéantar a thástáil iontu agus úsáid córas nuálach intleachta saorga. Áiritheoidh na Ballstáit leibhéal iomchuí comhair idir na húdaráis a dhéanann maoirseacht ar na boscaí gainimh eile sin agus na húdaráis inniúla náisiúnta.
1. [scriosta]
- 1a. [scriosta]
- 1b. Beidh sé d'aidhm ag bunú na mboscaí gainimh rialála IS faoin Rialachán seo rannchuidiú le ceann amháin nó níos mó de na cuspóirí seo a leanas:
- (a) nuálaíocht agus iomaíochas a chothú agus forbairt éiceachórais IS a éascú;
 - (b) rochtain ar mhargadh an Aontais do chórais intleachta saorga a éascú agus dlús a chur léi, go háirithe nuair a sholáthraíonn fiontair bheaga agus mheánmhéide (FBManna) iad, lena n-áirítear gnólachtaí nuathionscanta;
 - (c) deimhneacht dhlíthiúil a fheabhsú agus rannchuidiú le comhroinnt dea-chleachtas trí chomhar leis na húdaráis a bhfuil baint acu leis an mbosca gainimh rialála IS d'fhonn a áirithiú go gcomhlíonfar amach anseo an Rialachán seo agus, i gcás inarb iomchuí, le reachtaíocht eile de chuid an Aontais agus na mBallstát;
 - (d) cur le foghlaim rialála fhianaisebhunaithe.
2. [scriosta]

- 2a. Beidh rochtain ar na boscaí gainimh rialála IS ar fáil d'aon soláthraí nó soláthraí ionchasach córais intleachta saorga a chomhlíonann na critéir incháilitheachta agus roghnúcháin dá dtagraítear i mír 6(a) agus ar roghnaigh na húdaráis inniúla náisiúnta é tar éis an nós imeachta roghnúcháin dá dtagraítear i mír 6(b). Féadfaidh soláthraithe nó soláthraithe ionchasacha iarratais a chur isteach freisin i gcomhpháirtíocht le húsáideoirí nó le haon tríú páirtithe ábhartha eile.

Beidh rannpháirtíocht sa bhosca gainimh rialála IS teoranta do thréimhse atá íomchuí do chastacht agus do scála an tionscadail. Féadfaidh an t-údarás inniúil náisiúnta síneadh a chur leis an tréimhse sin.

Beidh rannpháirtíocht sa bhosca gainimh rialála IS bunaithe ar phlean sonrath dá dtagraítear i mír 6 den Airteagal seo, arna chomhaontú idir an rannpháirtí nó na rannpháirtithe agus an t-údarás inniúil náisiúnta nó na húdaráis inniúla náisiúnta, de réir mar is infheidhme.

3. Le rannpháirtíocht i mboscaí gainimh rialála IS, ní dhéanfar difear do chumhachtaí maoirseachta agus ceartaitheacha na n-údarás inniúil a bhfuil an bosca gainimh á maoirsiú acu. Feidhmeoidh na húdaráis sin a gcumhachtaí maoirseachta ar bhealach solúbtha laistigh de theorainneacha na reachtaíochta ábhartha, agus a gcumhachtaí lánroghnacha á n-úsáid acu nuair a bheidh forálacha dlíthiúla á gcur chun feidhme acu maidir le tionscadal bosca gainimh IS ar leith, agus é mar chuspóir acu tacú leis an nuálaíocht san intleacht shaorga san Aontas.

Ar choinníoll go n-urramóidh an rannpháirtí nó na rannpháirtithe plean an bhosca gainimh agus na téarmaí agus coinníollacha dá rannpháirtíocht mar a thagraítear dóibh i mír 6(c) agus go leanfaidh siad de mheon macánta an treoir a thug na húdaráis, ní fhorchuirfidh na húdaráis aon fhíneálacha riaracháin as sárú ar reachtaíocht infheidhme an Aontais nó na mBallstát a bhaineann leis an gcóras intleachta saorga atá á maoirsiú sa bhosca gainimh, lena n-áirítear forálacha an Rialacháin seo.

4. Beidh na rannpháirtithe fós faoi dhliteanas faoin reachtaíocht dliteanais is infheidhme de chuid an Aontais agus na mBallstát i leith aon damáiste a dhéantar le linn a rannpháirtíochta i mbosca gainimh rialála IS.

4a. Arna iarraidh sin do sholáthraí nó do sholáthraí ionchasach an chórais intleachta saorga, soláthróidh an t-údarás inniúil náisiúnta, i gcás inarb infheidhme, cruthúnas i scríbhinn ar na gníomhaíochtaí a rinneadh sa bhosca gainimh agus ar éirigh leo. Cuirfidh an t-údarás inniúil náisiúnta tuarascáil imeachta ar fáil freisin ina sonrú na gníomhaíochtaí a rinneadh sa bhosca gainimh agus na torthaí gaolmhara agus na torthaí foghlama. D'fhéadfadh údarás faireachais margaidh nó comhlachtaí faoina dtugtar fógra, de réir mar is infheidhme, an cruthúnas i scríbhinn agus an tuarascáil imeachta sin a chur san áireamh i gcomhthéacs nósanna imeachta um measúnú comhréireachta nó seiceálacha faireachais margaidh.

Faoi réir na bhforálacha rúndachta in Airteagal 70 agus le comhaontú ó rannpháirtithe an bhosca gainimh, údarófar an Coimisiún Eorpach agus an Bord um Intleacht Shaorga rochtain a fháil ar na tuarascálacha imeachta agus cuirfidh siad san áireamh iad, de réir mar is iomchuí, agus a gcúraimí faoin Rialachán seo á bhfeidhmiú acu. Má aontaíonn an rannpháirtí agus an t-údarás inniúil náisiúnta go sainráite leis sin, féadfar an tuarascáil imeachta a chur ar fáil go poiblí tríd an ardán faisnéise aonair dá dtagraítear in Airteagal 55(3)(b).

4b. Déanfar na boscaí gainimh rialála IS a dhearadh agus a chur chun feidhme ar bhealach a éascóidh, i gcás inarb ábhartha, comhar trasteorann idir na húdarás inniúla náisiúnta.

5. Cuirfidh na húdarás inniúla náisiúnta tuarascálacha bliantúla ar fáil go poiblí maidir le cur chun feidhme na mboscaí gainimh rialála IS, lena n-áirítear dea-chleachtais, ceachtanna a foghlaimíodh agus moltaí maidir lena mbunú agus, i gcás inarb ábhartha, maidir le cur i bhfeidhm an Rialacháin seo agus reachtaíocht eile de chuid an Aontais a ndéantar maoirseacht uirthi laistigh den bhosca gainimh. Cuirfear na tuarascálacha bliantúla sin faoi bhráid an Bhoird um Intleacht Shaorga agus cuirfidh an Bord achoimre ar na dea-chleachtais, na ceachtanna a foghlaimíodh agus na moltaí uile ar fáil go poiblí. An oibleagáid seo i ndáil le tuarascálacha bliantúla a chur ar fáil go poiblí, ní chumhdóidh sí sonraí oibríochtúla íogaire maidir le gníomhaíochta na n-údarás forfheidhmithe dlí, rialaithe teorann, inimirce nó tearmainn. Cuirfidh an Coimisiún agus an Bord um Intleacht Shaorga, i gcás inarb iomchuí, na tuarascálacha bliantúla san áireamh agus a gcúraimí faoin Rialachán seo á bhfeidhmiú acu.

5b. Áiritheoidh an Coimisiún go mbeidh faisnéis faoi bhoscaí gainimh rialála IS, lena n-áirítear faisnéis faoi na boscaí sin a bhunaítear faoin Airteagal seo, ar fáil tríd an ardán faisnéise aonair dá dtagraítear in Airteagal 55(3)(b).

6. Na rialacha mionsonraithe agus na coinníollacha maidir le bunú agus oibriú na mboscaí gainimh rialála IS faoin Rialachán seo, glacfar iad trí ghníomhartha cur chun feidhme i gcomhréir leis an nós imeachta scrúdúcháin dá dtagraítear in Airteagal 74(2).

Tacóidh na módúlachtaí agus na coinníollacha a mhéid is féidir le solúbthacht d'údaráis inniúla náisiúnta a mboscaí gainimh rialála IS a bhunú agus a oibriú, nuálaíocht agus foghlaim rialála a chothú agus cuirfear san áireamh go háirithe leo imthosca agus acmhainneachtaí speisialta na FBManna rannpháirteacha, lena n-áirítear gnólachtaí nuathionscanta.

Sna gníomhartha cur chun feidhme sin, áireofar na príomhphrionsabail choiteanna maidir leis an méid a leanas:

- a) an incháilitheacht agus an roghnú don rannpháirtíocht sa bhosca gainimh rialála IS;
- b) an nós imeachta maidir le cur i bhfeidhm, rannpháirtíocht, faireachán, imeacht ón mbosca gainimh rialála IS agus foirceannadh an bhosca, lena n-áirítear plean an bhosca gainimh agus an tuarascáil imeachta;
- c) na téarmaí agus na coinníollacha is infheidhme maidir leis na rannpháirtithe.

7. Agus údaráis inniúla náisiúnta ag féachaint an ndéanfar tástáil i bhfiordhálaí a údarú arna maoirsiú faoi chuimsiú bosca gainimh rialála IS arna bhunú faoin Airteagal seo, comhaontóidh siad go sonrach leis na rannpháirtithe maidir le téarmaí agus coinníollacha na tástála sin agus go háirithe maidir leis na coimircí iomchuí d'fhonn cearta bunúsacha, sláinte agus sábháilteacht a chosaint. I gcás inarb iomchuí, comhoibreoidh siad le húdaráis inniúla náisiúnta eile d'fhonn cleachtais chomhsheasmhacha a áirithiú ar fud an Aontais.

Airteagal 54

Próiseáil bhreise ar shonraí pearsanta chun córais intleachta saorga áirithe a fhorbairt chun leas an phobail sa bhosca gainimh rialála IS

1. Sa bhosca gainimh rialála IS, sonraí pearsanta a bhailítear go dleathach chun críoch eile, féadfar iad a phróiseáil chun córais intleachta saorga nuálacha áirithe a fhorbairt, a thástáil a thraenáil sa bhosca gainimh faoi na coinníollacha carnacha seo a leanas:
 - (a) Déanfaidh údarás poiblí nó duine nádúrtha nó dlítheanach eile arna rialú ag an dlí poiblí nó ag an dlí príobháideach na córais intleachta saorga nuálacha a fhorbairt chun leas poiblí substaintiúil a chosaint i gceann amháin nó níos mó de na réimsí seo a leanas:
 - (i) [scriosta]
 - (ii) sábháilteacht agus sláinte phoiblí, lena n-áirítear galair a chosc, a rialú agus a chóireáil agus córais cúraim sláinte a fheabhsú;
 - (iii) cáilíocht an chomhshaoil a chosaint agus a fheabhsú, lena n-áirítear an t-aistriú glas, maolú ar an athrú aeráide agus oiriúnú don athrú aeráide;
 - (iv) inbhuanaitheacht fuinnimh, iompar agus soghluaisteacht;
 - (v) éifeachtúlacht agus cáilíocht an riaracháin phoiblí agus na seirbhísí poiblí;
 - (vi) An chibearshlándaíl agus athléimneacht na n-eintiteas criticiúil.
 - (b) go bhfuil gá leis na sonraí a phróiseálfar chun ceann amháin nó níos mó de na ceanglais dá dtagraítear i dTeideal III, Caibidil 2 a chomhlíonadh i gcás nach féidir na ceanglais sin a chomhlíonadh go héifeachtach trí shonraí anaithnide, sintéiseacha nó neamhphearsanta eile a phróiseáil;

- (c) go bhfuil sásraí faireacháin éifeachtacha ann chun a aithint an bhféadfadh aon ardriosca do chearta agus saoirsí na n-ábhar sonraí, mar a thagraítear dóibh in Airteagal 35 de Rialachán (AE) 2016/679 agus in Airteagal 39 de Rialachán (AE) 2018/1725, teacht chun cinn le linn thástáil an bhosca gainimh, agus go bhfuil sásra freagartha ann chun na rioscaí sin a mhaolú go pras agus, i gcás inar gá, deireadh a chur leis an bpróiseáil;
- (d) go bhfuil aon sonraí pearsanta atá le próiseáil i gcomhthéacs an bhosca gainimh i dtimpeallacht próiseála sonraí atá scartha ó thaobh feidhme, leithlisithe agus cosanta, atá faoi rialú na rannpháirtithe agus nach bhfuil rochtain ach ag daoine údairithe ar na sonraí sin;
- (e) nach bhfuil aon sonraí pearsanta a phróiseáiltear le bheith tarchurtha, aistrithe nó nach mbeidh rochtain ar shlí eile orthu ag páirtithe eile nach rannpháirtithe sa bhosca gainimh iad, mura rud é go ndéantar an nochtadh sin i gcomhréir le Rialachán (AE) 2016/679 nó, i gcás inarb infheidhme, le Rialachán 2018/725, agus gur chomhaontaigh na rannpháirtithe uile leis;
- (f) aon phróiseáil ar shonraí pearsanta i gcomhthéacs an bhosca gainimh, nach ndéanfaidh sí difear do chur i bhfeidhm chearta na n-ábhar sonraí mar a fhoráiltear dó faoi dhlí an Aontais maidir le cosaint sonraí pearsanta, go háirithe in Airteagal 22 de Rialachán (AE) 2016/679 agus Airteagal 24 de Rialachán (AE) 2018/1725;
- (g) aon sonraí pearsanta a phróiseáiltear i gcomhthéacs an bhosca gainimh, go mbeidh siad cosanta trí bhíthin bearta teicniúla agus eagrúcháin iomchuí agus go scriosfar iad nuair a bheidh deireadh leis an rannpháirtíocht sa bhosca gainimh nó nuair a bheidh deireadh le tréimhse choinneála na sonraí pearsanta;
- (h) go gcoinnítear logaí phróiseáil na sonraí pearsanta i gcomhthéacs an bhosca gainimh ar feadh thréimhse na rannpháirtíochta sa bhosca gainimh, mura bhforáiltear a mhalairt le dlí an Aontais nó leis an dlí náisiúnta;
- (i) go gcoinneofar i dteannta a chéile tuairisc iomlán mhionsonraithe ar an bpróiseas agus an bunús le hoiliúint, tástáil agus bailíochtú an chórais intleachta saorga mar aon le torthaí na tástála mar chuid den doiciméadacht theicniúil in Iarscríbhinn IV;

- (j) go bhfoilseofar ar shuíomh gréasáin na n-údarás inniúil achoimre ghearr ar an tionscadal intleachta saorga a forbraíodh sa bhosca gainimh, a chuspóirí agus na torthaí a bhfuiltear ag súil leo. Ní chumhdófar, leis an oibleagáid seo, sonraí oibríochtúla íogaire maidir le gníomhaíochta na n-údarás forfheidhmithe dlí, rialaithe teorann, inimirce nó tearmainn córais.
- 1a. Chun cionta coiriúla a chosc, a imscrúdú, a bhrath nó a ionchúiseamh nó chun pionóis choiriúla a fhorghníomhú, lena n-áirítear coimirceí a dhéanamh in aghaidh bagairtí ar an tslándáil phoiblí agus na bagairtí sin a chosc, beidh próiseáil sonraí pearsanta i mboscaí gainimh rialála IS bunaithe, faoi rialú agus faoi fhreagracht údarás forfheidhmithe dlí, ar dhlí sonrach de chuid Ballstáit nó de chuid an Aontais agus beidh sí faoi réir na gcoinníollacha carnacha céanna dá dtagraítear i mír 1.
2. Beidh mír 1 gan dochar do dhlíthe an Aontais nó na mBallstát lena leagtar síos an bunús do phróiseáil sonraí pearsanta is gá chun córais nuálacha intleachta saorga a fhorbairt, a thástáil agus a traenáil, i gcomhréir le dlí an Aontais maidir le cosaint sonraí pearsanta.

Airteagal 54a

Córais intleachta saorga ardriosca a thástáil i bhfiordhálaí lasmuigh de bhoscaí gainimh rialála IS

1. Féadfaidh soláthraithe nó soláthraithe ionchasacha na gcóras intleachta saorga ardriosca a liostaítear in Iarscríbhinn III tástáil a dhéanamh ar chórais intleachta saorga i bhfiordhálaí lasmuigh de bhoscaí gainimh rialála IS, i gcomhréir le forálacha an Airteagail seo agus leis an bplean tástála i bhfiordhálaí dá dtagraítear san Airteagal seo.

Sonrófar eilimintí mionsonraithe an phlean tástála i bhfiordhálaí i ngníomhartha cur chun feidhme arna nglacadh ag an gCoimisiún i gcomhréir leis an nós imeachta scrúdúcháin dá dtagraítear in Airteagal 74(2).

Beidh an fhoráil sin gan dochar do reachtaíocht an Aontais nó na mBallstát maidir le tástáil i bhfiordhálaí ar chórais intleachta saorga ardriosca a bhaineann le táirgí a chumhdaítear le reachtaíocht a liostaítear in Iarscríbhinn II.

2. Féadfaidh soláthraithe nó soláthraithe ionchasacha tástáil a dhéanamh ar na córais intleachta saorga ardriosca dá dtagraítear in Iarscríbhinn III i bhfiordhálaí tráth ar bith sula gcuirfear an córas intleachta saorga ar an margadh nó sula gcuirfear i mbun seirbhíse é ar a gconlán féin nó i gcomhpháirtíocht le húsáideoir ionchasach amháin nó níos mó.
3. Tástáil na gcóras intleachta saorga ardriosca i bhfiordhálaí faoin Airteagal seo, beidh sí gan dochar d'athbhreithniú eiteiciúil a d'fhéadfadh a bheith ag teastáil faoin dlí náisiúnta nó faoi dhlí an Aontais.
4. Ní fhéadfaidh soláthraithe nó soláthraithe ionchasacha an tástáil a dhéanamh i bhfiordhálaí ach amháin i gcás ina gcomhlíontar gach ceann de na coinníollacha seo a leanas:
 - (a) tá plean tástála i bhfiordhálaí tarraingthe suas ag an soláthraí nó ag an soláthraí ionchasach agus é curtha faoi bhráid an údaráis um fhaireachas margaidh sa Bhallstát nó sna Ballstáit ina bhfuil an tástáil i bhfiordhálaí le déanamh;
 - (b) nach ndearna an t-údarás um fhaireachas margaidh sa Bhallstát nó sna Ballstáit ina bhfuil an tástáil i bhfiordhálaí le déanamh aon agóid i gcoinne na tástála laistigh de 30 lá tar éis dí a bheith curtha isteach;
 - (c) go bhfuil an soláthraí nó an soláthraí ionchasach, cé is moite de na córais intleachta saorga ardriosca dá dtagraítear in Iarscríbhinn III, pointí 1, 6 agus 7 i réimsí fhorfheidhmiú an dlí, imirce, tearmainn agus bainistithe rialaithe teorann, agus na gcóras intleachta saorga ardriosca dá dtagraítear in Iarscríbhinn III pointe 2, tar éis an tástáil i bhfiordhálaí a chlárú i mbunachar sonraí an Aontais dá dtagraítear in Airteagal 60(5a) le huimhir aitheantais aonair uathúil uile-Aontais agus an fhaisnéis a shonraítear in Iarscríbhinn VIIIa;
 - (d) go bhfuil an soláthraí nó an soláthraí ionchasach atá ag déanamh na tástála i bhfiordhálaí bunaithe san Aontas nó go bhfuil ionadaí dlíthiúil ceaptha aige chun críoch na tástála i bhfiordhálaí atá bunaithe san Aontas;

- (e) ní dhéanfar sonraí a bhailítear agus a phróiseáiltear chun críoch na tástála i bhfíordhálaí a aistriú chuig tíortha lasmuigh den Aontas, ach amháin má sholáthraítear coimircí leis an aistriú agus leis an bpróiseáil atá coibhéiseach leo sin dá bhforáiltear faoi dhlí an Aontais;
- (f) ní mhaireann an tástáil i bhfíordhálaí níos faide ná mar is gá chun a chuspóirí a bhaint amach agus in aon chás ní mhaireann sí níos faide ná 12 mhí;
- (g) go ndéanfar daoine a bhaineann le grúpaí leochaileacha mar gheall ar a n-aois, míchumas coirp nó meabhrach, a chosaint go hiomchuí;
- (h) [scriosta]
- (i) i gcás ina n-eagraíonn soláthraí nó soláthraí ionchasach an tástáil i bhfíordhálaí i gcomhar le húsáideoir ionchasach amháin nó níos mó úsáideoirí ionchasacha, gur cuireadh an t-úsáideoir ionchasach sin nó na húsáideoirí ionchasacha sin ar an eolas faoi gach gné den tástáil atá ábhartha dá gcinneadh a bheith rannpháirteach, agus gur tugadh na teoracha ábhartha dóibh chun an córas intleachta saorga a úsáid dá dtagraítear in Airteagal 13; tabharfaidh an soláthraí nó an soláthraí ionchasach agus an t-úsáideoir/na húsáideoirí comhaontú i gcrích ina sonrú a róil agus a bhfreagrachtaí d'fhonn a áirithiú go gcomhlíonfar na forálacha maidir le tástáil i bhfíordhálaí faoin Rialachán seo agus faoi reachtaíocht infheidhme eile de chuid an Aontais agus de chuid na mBallstát;
- (j) go bhfuil toiliú feasach tugtha ag ábhair na tástála i bhfíordhálaí i gcomhréir le hAirteagal 54b, nó i gcás fhorfheidhmiú an dlí, i gcás nach bhféadfaí an córas intleachta saorga a thástáil dá ndéanfaí toiliú feasach a iarraidh, ní bheidh tionchar diúltach ag an tástáil féin ná ag toradh na tástála sna fíordhálaí ar an ábhar;
- (k) déanann an soláthraí nó an soláthraí ionchasach agus an t-úsáideoir/na húsáideoirí ionchasacha maoirseacht éifeachtach ar an tástáil i bhfíordhálaí le daoine atá cáilithe go cuí sa réimse ábhartha agus a bhfuil an cumas, an oiliúint agus an t-údarás is gá acu chun a gcúraimí a dhéanamh;
- (l) an méid a dhéanann an córas intleachta saorga a thuar, a mholadh nó a chinneadh, is féir é sin a aisiompú go héifeachtach nó neamhaird a thabhairt air.

5. Aon duine is ábhar don tástáil i bhfíordhálaí, nó a ionadaí nó a hionadaí arna ainmniú de réir dlí, de réir mar is iomchuí, féadfaidh sé nó sí, gan aon dochar dó nó di féin agus gan aon gá le húdar a thabhairt, tarraingt siar ón tástáil ag tráth ar bith trína thoiliú nó a toiliú feasach a chúlghairm. Ní dhéanfaidh tarraingt siar an toilithe difear do na gníomhaíochtaí a rinneadh cheana ná d'úsáid na sonraí a fuarthas bunaithe ar an toiliú feasach sular tarraingíodh siar é.
6. Aon teagmhas tromchúiseach a shainaithnítear le linn na tástála i bhfíordhálaí, déanfar é a thuairisciú don údarás náisiúnta um fhaireachas margaidh i gcomhréir le hAirteagal 62 den Rialachán seo. Glacfaidh an soláthraí nó an soláthraí ionchasach bearta maolaithe láithreacha nó, ina éagmais sin, cuirfidh sé an tástáil i bhfíordhálaí ar fionraí go dtí go ndéanfar an maolú sin nó cuirfidh sé deireadh léi. Bunóidh an soláthraí nó an soláthraí ionchasach nós imeachta chun an córas intleachta saorga a aisghairm go pras i gcás ina ndéanfaí an tástáil i bhfíordhálaí a fhoirceannadh.
7. Má dhéantar an tástáil i bhfíordhálaí a fhoirceannadh nó a fhionraí, tabharfaidh soláthraithe nó soláthraithe ionchasacha fógra don údarás náisiúnta um fhaireachas margaidh sa Bhallstát nó sna Ballstáit ina bhfuil an tástáil le déanamh faoi sin agus faoi na torthaí deiridh.
8. Beidh an soláthraí agus an soláthraí ionchasach faoi dhliteanas faoin reachtaíocht dliteanais is infheidhme de chuid an Aontais agus na mBallstát i leith aon damáiste a dhéantar le linn a rannpháirtíochta sa tástáil i bhfíordhálaí.

Airteagal 54b

Toiliú feasach lena bheith rannpháirteach i dtástáil i bhfíordhálaí lasmuigh de bhoscaí gainimh rialála IS

1. Chun críche tástála i bhfíordhálaí faoi Airteagal 54a, tabharfaidh ábhar na tástála toiliú feasach go deonach sula nglacfaidh sé nó sí páirt sa tástáil sin agus tar éis dó nó di a bheith curtha ar an eolas go cuí le faisnéis bheacht, shoiléir, ábhartha agus intuigthe maidir leis an méid seo a leanas:

- (i) cineál agus cuspóirí na tástála i bhfiordhálaí agus an mhíchaoithiúlacht a d'fhéadfadh a bheith bainteach lena rannpháirtíocht;
 - (ii) na dálaí ina ndéanfar an tástáil i bhfiordhálaí, lena n-áirítear cé chomh fada a mheastar go mbeidh an t-ábhar rannpháirteach inti;
 - (iii) cearta agus ráthaíochtaí an ábhair maidir lena rannpháirtíocht, go háirithe maidir lena cheart nó a ceart diúltú lena bheith rannpháirteach agus an ceart tarraingt siar ón tástáil i bhfiordhálaí ag tráth ar bith gan dochar agus gan gá le húdar a thabhairt;
 - (iv) na rialacha mionsonraithe chun a iarraidh go n-aisiompófaí an méid a dhéanann an córas intleachta saorga a thuar, a mholadh nó a chinneadh nó go ndéanfaí neamhaird de;
 - (v) uimhir aitheantais aonair uathúil uile-Aontais na tástála i bhfiordhálaí domhanda i gcomhréir le hAirteagal 54a(4c) agus sonraí teagmhála an tsoláthraí nó a ionadaí dlíthiúil ónar féidir tuilleadh faisnéise a fháil.
2. Déanfar an toiliú feasach a dhátú agus a dhoiciméadú agus tabharfar cóip don ábhar nó dá ionadaí nó dá hionadaí dlíthiúil.

Airteagal 55

Bearta tacaíochta d'oibreoírí, go háirithe FBManna lena n-áirítear gnólachtaí nuathionscanta

1. Déanfaidh na Ballstáit na bearta seo a leanas:
 - (a) rochtain tosaíochta a sholáthar do FBManna, lena n-áirítear gnólachtaí nuathionscanta, ar bhoscaí gainimh rialála IS sa mhéid go gcomhlíonann siad na critéir incháilitheachta agus roghnúcháin;
 - (b) gníomhaíochtaí sonracha ardaithe feasachta agus oiliúna a eagrú maidir le cur i bhfeidhm an Rialacháin seo, agus iad curtha in oiriúint do riachtanais na FBManna, lena n-áirítear gnólachtaí nuathionscanta, agus, de réir mar is iomchuí, údaráis phoiblí áitiúla;

- (c) i gcás inarb iomchuí, cainéal tiomnaithe cumarsáide a le FBManna, lena n-áirítear gnólachtaí nuathionscanta agus, de réir mar is iomchuí, údaráis phoiblí áitiúla, chun comhairle a chur ar fáil agus chun freagra a thabhairt ar cheisteanna faoi chur chun feidhme an Rialacháin seo, lena n-áirítear a mhéid a bhaineann le rannpháirtíocht i mboscaí gainimh rialála IS.
2. Cuirfear leasanna sonracha agus riachtanais shonracha na soláthraithe ar FBManna iad, lena n-áirítear gnólachtaí nuathionscanta, san áireamh agus táillí an mheasúnaithe comhréireachta faoi Airteagal 43 á socrú, agus na táillí sin á laghdú i gcomhréir lena méid, méid an mhargaidh agus táscairí ábhartha eile.
3. Déanfaidh an Coimisiúin na bearta seo a leanas:
- (a) arna iarraidh sin don Bhord um Intleacht Shaorga, teimpléid chaighdeánaithe a sholáthar do na réimsí a chumhdaítear leis an Rialachán seo;
- (b) ardán faisnéise aonair a fhorbairt agus a chothabháil lena soláthrófar faisnéis atá éasca le húsáid i ndáil leis an Rialachán seo do gach oibreoir ar fud an Aontais;
- (c) feachtais chumarsáide iomchuí a eagrú chun feasacht a mhúscailt maidir leis na hoibleagáidí a eascraíonn as an Rialachán seo;
- (d) cóineasú na ndea-chleachtas i nósanna imeachta soláthair phoiblí i ndáil le córais intleachta saorga a mheas agus a chur chun cinn.

Airteagal 54a

Maoluithe le haghaidh oibreoírí sonracha

1. Ní bheidh feidhm ag na hoibleagáidí a leagtar síos in Airteagal 17 den Rialachán seo maidir le micrifhiontair mar a shainmhínítear iad in Airteagal 2(3) den Iarscríbhinn a ghabhann le Moladh 2003/361/CE ón gCoimisiún maidir leis an sainmhíniú ar micrifhiontair, fiontair bheaga agus mheánmhéide, ar choinníoll nach bhfuil fiontair chomhpháirtíochta ná fiontair nasctha acu mar a shainmhínítear in Airteagal 3 den Iarscríbhinn chéanna.
2. Ní thuigfear as mír 1 go ndíolmhaítear na hoibreoírí sin ó aon cheanglais agus oibleagáidí eile a leagtar síos sa Rialachán seo a chomhlíonadh, lena n-áirítear iad sin a bhunaítear in Airteagail 9, 61 agus 62.
3. Ceanglais agus oibleagáidí le haghaidh córais intleachta saorga ilchuspóireacha a leagtar síos in Airteagal 4b, ní bheidh feidhm acu maidir le micrifhiontair, fiontair bheaga agus mheánmhéide, ar choinníoll nach bhfuil fiontair chomhpháirtíochta ná fiontair nasctha acu mar a shainmhínítear in Airteagal 3 den Iarscríbhinn a ghabhann le Moladh 2003/361/CE ón gCoimisiún maidir leis an sainmhíniú ar mhicrifhiontair agus ar fhiontair bheaga agus mheánmhéide.

TEIDEAL VI

RIALACHAS

CAIBIDIL 1

AN BORD EORPACH UM INTLEACHT SHAORGA

Airteagal 56

An Bord Eorpach um an Intleacht Shaorga a bhunú agus struchtúr an Bhoird sin

1. Bunaítear ‘an Bord Eorpach um Intleacht Shaorga’ (an Bord).
2. Ionadaí amháin ó gach Ballstát a bheidh ar an mBord. Beidh an Maoirseoir Eorpach ar Chosaint Sonraí rannpháirteach ann mar bhreathnóir. Freastalóidh an Coimisiún ar chruinnithe an Bhoird freisin gan páirt a ghlacadh sa vótáil.

Féadfaidh an Bord cuireadh a thabhairt d’údaráis, do chomhlachtaí nó do shaineolaithe náisiúnta agus de chuid an Aontais eile freastal ar na cruinnithe ar bhonn cás ar chás, i gcás inarb ábhartha dóibh na saincheisteanna a bheidh á bplé.

- 2a. Ainmneoidh na Ballstáit a n-ionadaí ar feadh tréimhse 3 bliana, agus féadfar iad a athnuachan uair amháin.
- 2aa. Áiritheoidh na Ballstáit i ndáil lena n-ionadaí ar an mBord an méid seo a leanas:
 - (i) go mbeidh na hinniúlachtaí agus na cumhachtaí ábhartha acu ina mBallstát chun rannchuidiú ar bhealach gníomhach le baint amach chúraimí an bhoird dá dtagraítear in Airteagal 58;
 - (ii) go ndéanfar iad a ainmniú mar phointe teagmhála aonair *vis-à-vis* an Bord agus, i gcás inarb iomchuí, agus riachtanais na mBallstát á gcur san áireamh, mar phointe teagmhála aonair do gheallsealbhóirí;

(iii) go mbeidh sé de chumhacht acu an chomhsheasmhacht agus an comhordú a éascú idir na húdaráis inniúla náisiúnta ina mBallstát maidir le cur chun feidhme an Rialacháin seo, lena n-áirítear trí shonraí agus faisnéis ábhartha a bhailiú chun a gcúraimí ar an mBord a chomhlíonadh.

3. Glacfaidh ionadaithe ainmnithe na mBallstát rialacha nós imeachta an Bhoird trí thromlach dhá thrían.

Leagfar síos sna rialacha nós imeachta, go háirithe, nósanna imeachta maidir leis an bpróiseas roghnúcháin, ré an tsainordaithe agus sonraíochtaí chúraimí an Chathaoirligh, na rialacha mionsonraithe maidir le vótáil, agus eagrú gníomhaíochtaí an Bhoird agus a fhoghrúpaí.

Bunóidh an Bord buan-fhoghrúpa a fheidhmeoidh mar ardán do gheallsealbhóirí chun comhairle a chur ar an mBord maidir le haon saincheist a bhaineann le cur chun feidhme an Rialacháin seo, lena n-áirítear maidir le gníomhartha cur chun feidhme agus tarmligthe a ullmhú. Chun na críche sin, tabharfar cuireadh le bheith páirteach an fhoghrúpa sin d'eagraíochtaí a dhéanann ionadaíocht ar leasanna sholáthraithe agus úsáideoirí córas intleachta saorga, lena n-áirítear FBManna agus gnólachtaí nuathionscanta, chomh maith le heagraíochtaí na sochaí sibhialta, ionadaithe daoine dá ndéantar difear, taighdeoirí, eagraíochtaí um chaighdeánú, comhlachtaí faoina dtugtar fógra, saotharlanna agus saoráidí tástála agus turgnamhaíochta. Bunóidh an Bord dhá bhuan-fhoghrúpa chun ardán comhair agus malartaithe a chur ar fáil i measc na n-údarás faireachais margaidh agus na n-údarás a thugann fógra maidir le saincheistanna a bhaineann le faireachas margaidh agus le comhlachtaí faoina dtugtar fógra faoi seach.

Féadfaidh an Bord buan-fhoghrúpaí nó foghrúpaí sealadacha eile a bhunú de réir mar is iomchuí chun scrúdú a dhéanamh ar cheisteanna sonracha. I gcás inarb iomchuí, féadfar cuireadh a thabhairt do na geallsealbhóirí dá dtagraítear san fhomhír roimhe seo bheith páirteach sna foghrúpaí sin nó teacht chuig cruinnithe sonracha na bhfoghrúpaí sin i gcáil breathnóirí.

3a. Déanfar an Bord a thugann fógra a eagrú agus a oibriú sa chaoi go gcoimirceofar oibiachtúlacht agus neamhchlaontacht a chuid gníomhaíochtaí.

4. Déanfaidh ionadaí amháin d'ionadaithe na mBallstát cathaoirleacht ar an mBord. Arna iarraidh sin don Chathaoirleach, tionólfaidh an Coimisiún na cruinnithe agus ullmhóidh sé an clár oibre i gcomhréir le cúraimí an Bhoird de bhun an Rialacháin seo agus lena rialacha nós imeachta. Cuirfidh an Coimisiún tacaíocht riaracháin agus anailíseach ar fáil le haghaidh gníomhaíochtaí an Bhoird de bhun an Rialacháin seo.

Airteagal 57

[scriosta]

Airteagal 58

Cúraimí an Bhoird

Tabharfaidh an Bord comhairle agus cúnaimh don Choimisiún agus do na Ballstáit chun cur i bhfeidhm comhsheasmhach agus éifeachtach an Rialacháin seo a éascú. Chun na críche sin féadfaidh an Bord go háirithe:

- (a) saineolas agus dea-chleachtais teicniúla agus rialála a bhailiú agus a chomhroinnt leis na Ballstáit;
- (b) rannchuidiú le comhchuibhiú cleachtas riaracháin sna Ballstáit, lena n-áirítear maidir leis an maolú ar na nósanna imeachta um measúnú comhréireachta dá dtagraítear in Airteagal 47, feidhmiú na mboscaí gainimh rialála agus na tástála i bhfiordhálaí dá dtagraítear in Airteagail 53, 54 agus 54a;
- (c) arna iarraidh sin don Choimisiún nó ar a thionscnamh féin, moltaí agus tuairimí i scríbhinn a eisiúint maidir le haon ábhair ábhartha a bhaineann le cur chun feidhme an Rialacháin seo agus lena chur i bhfeidhm comhsheasmhach, éifeachtach, lena n-áirítear:
 - (i) sonraíochtaí teicniúla nó caighdeáin atá ann faoi láthair i ndáil leis na ceanglais a leagtar amach i dTeideal III, Caibidil 2,
 - (ii) caighdeáin chomhchuibhithe nó sonraíochtaí coiteanna dá dtagraítear in Airteagail 40 agus 41 a úsáid,

- (iii) doiciméid treorach a ullmhú, lena n-áirítear na treoirínte maidir le fineálacha riaracháin dá dtagraítear in Airteagal 71 a shocrú;
- (d) comhairle a chur ar an gCoimisiún maidir le haon ghá le hIarscríbhinn III a leasú i gcomhréir le hAirteagail 4 agus 7, agus an fhianaise ábhartha atá ar fáil agus na forbairtí is déanaí sa teicneolaíocht á gcur san áireamh;
- (e) comhairle a chur ar an gCoimisiún agus gníomh tarmligthe nó cur chun feidhme á ullmhú de bhun an Rialacháin seo;
- (f) comhoibriú, de réir mar is iomchuí, le comhlachtaí, grúpaí saineolaithe agus líonraí ábhartha de chuid an Aontais, go háirithe i réimsí na sábháilteachta táirgí, na cibearshlándála, na hiomaíochta, na seirbhísí digiteacha agus meán, na seirbhísí airgeadais, na gcriptea-airgeadraí, na cosanta tomhaltóirí, na sonraí agus chosaint na gceart bunúsach;
- (g) rannchuidiú leis an gCoimisiún agus comhairle ábhartha a chur air i ndáil le forbairt na teorach dá dtagraítear in Airteagal 58a nó a iarraidh go ndéanfaí an treoir sin a fhorbairt;
- (h) cúnaimh a thabhairt in obair na n-údarás faireachais margaidh agus, i gcomhar leis na húdaráis faireachais margaidh lena mbaineann faoi réir a gcomhaontaithe, imscrúduithe faireachais margaidh trasteorann a chur chun cinn agus tacú leo, lena n-áirítear maidir le teacht chun cinn rioscaí de chineál sistéamach a d'fhéadfadh eascairt as córais intleachta saorga;
- (i) rannchuidiú le measúnú a dhéanamh ar riachtanais oiliúna d'fhoireann na mBallstát a bhfuil baint acu leis an Rialachán seo a chur chun feidhme;
- (j) comhairle a chur ar an gCoimisiún maidir le hábhair idirnáisiúnta a bhaineann leis an intleacht shaorga.

CAIBIDIL 1A

TREOIRLÍNTE ÓN gCOIMISIÚN

Airteagal 58a

Treoirlínte ón gCoimisiún maidir le chur chun feidhme an Rialacháin seo

1. Arna iarraidh sin do na Ballstáit nó don Bhord, nó ar a thionscnamh féin, eiseoidh an Coimisiún treoirlínte maidir le cur chun feidhme praiticiúil an Rialacháin seo, agus go háirithe maidir leis an méid seo a leanas
 - (i) na ceanglais dá dtagraítear in Airteagal 8(15) a chur i bhfeidhm;
 - (ii) na cleachtais a bhfuil toirmeasc orthu dá dtagraítear in Airteagal 5;
 - (iii) cur chun feidhme praiticiúil na bhforálacha a bhaineann le modhnú substaintiúil;
 - (iv) cur chun feidhme praiticiúil na gcoinníollacha aonfhoirmeacha dá dtagraítear in Airteagal 6, mír 3, lena n-áirítear samplaí i ndáil leis na córais intleachta saorga ardriosca dá dtagraítear in Iarscríbhinn III;
 - (v) cur chun feidhme praiticiúil na n-oibleagáidí trédhearcachta a leagtar síos in Airteagal 52;
 - (vi) an gaol idir an Rialachán seo agus reachtaíocht ábhartha eile de chuid an Aontais, lena n-áirítear maidir le comhsheasmhacht sa chaoi ina bhforfheidhmítear iad.

Agus treoirlínte mar sin á n-eisiúint aige, tabharfaidh an Coimisiún aird ar leith ar riachtanais FBManna, lena n-áirítear gnólachtaí nuathionscanta, údaráis phoiblí áitiúla agus na hearnálacha is dóchúla a ndéanfaidh an Rialachán seo difear dóibh.

CAIBIDIL 2

ÚDARÁIS INNIÚLA NÁISIÚNTA

Airteagal 59

Na húdaráis inniúla náisiúnta a ainmniú

1. [scriosta]
2. Bunóidh nó ainmneoidh gach Ballstát údarás amháin ar a laghad a thugann fógra agus údarás faireachais margaidh amháin ar a laghad mar údaráis inniúla náisiúnta chun críche an Rialacháin seo. Eagrófar na húdaráis inniúla náisiúnta sin sa chaoi go gcaomhnófar prionsabail oibiachtúlacht agus neamhchlaontacht a gcuid gníomhaíochtaí agus cúraimí. Ar choinníoll go n-urramófar na prionsabail sin, féadfaidh údarás ainmnithe amháin nó níos mó údarás ainmnithe na gníomhaíochtaí agus na cúraimí sin a dhéanamh, i gcomhréir le riachtanais eagraíochtúla an Bhallstáit.
3. Cuirfidh na Ballstáit an Coimisiún ar an eolas faoin ainmniú sin.
4. Áiritheoidh na Ballstáit go dtabharfar acmhainní airgeadais, trealamh teicniúil agus acmhainní daonna a bheidh leordhóthanach chun a gcúraimí faoin Rialachán seo a chomhlíonadh ar bhealach éifeachtach.
5. Faoin [bliain amháin tar éis theacht i bhfeidhm an Rialacháin seo] agus ina dhiaidh sin sé mhí roimh an spriocdháta dá dtagraítear in Airteagal 84(2), cuirfidh na Ballstáit an Coimisiún ar an eolas maidir le stádas na n-acmhainní airgeadais, an trealamh theicniúil agus na n-acmhainní daonna atá ag na húdaráis inniúla náisiúnta mar aon le measúnú ar a leordhóthanacht. Tarchuirfidh an Coimisiún an fhaisnéis sin chuig an mBord lena plé agus le haghaidh moltaí a d'fhéadfadh a bheith ann.
6. Éascóidh an Coimisiún an malartú taithí idir údaráis inniúla náisiúnta.

7. Féadfaidh na húdaráis inniúla náisiúnta comhairle a thabhairt maidir le cur chun feidhme an Rialacháin seo, lena n-áirítear comhairle atá curtha in oiriúint do sholáthraithe ar FBManna iad, lena n-áirítear gnólachtaí nuathionscanta. Nuair atá sé beartaithe ag na húdaráis inniúla náisiúnta treoir agus comhairle a thabhairt maidir le córas intleachta saorga i réimsí a chumhdaítear le reachtaíocht eile de chuid an Aontais, rachfar i gcomhairle leis na húdaráis inniúla náisiúnta faoin reachtaíocht sin, de réir mar is iomchuí. Thairis sin féadfaidh na Ballstáit pointe teagmhála lárnach amháin a bhunú le haghaidh cumarsáide le hoibreoírí.
8. Nuair a thagann institiúidí, gníomhaireachtaí agus comhlachtaí an Aontais faoi raon feidhme an Rialacháin seo, gníomhóidh an Maoirseoir Eorpach ar Chosaint Sonraí mar an t-údarás inniúil chun maoirseacht a dhéanamh orthu.

TEIDEAL VII

BUNACHAR SONRAÍ AN AONTAIS LE HAGHAIDH NA gCÓRAS INTLEACHTA SAORGA ARDRIOSCA A LIOSTAÍTEAR IN IARSCRÍBHINN III

Airteagal 60

Bunachar sonraí an Aontais le haghaidh na gcóras intleachta saorga ardriosca a liostaítear in Iarscríbhinn III

1. I gcomhar leis na Ballstáit, cuirfidh an Coimisiún bunachar sonraí de chuid an Aontais ar bun, agus déanfaidh sé é a chothabháil, ina mbeidh an fhaisnéis dá dtagraítear i mír 2 maidir leis na hoibreoírí agus na córais intleachta saorga ardriosca ábhartha a liostaítear in Iarscríbhinn III atá cláraithe i gcomhréir le hAirteagail 51 agus 54a. Agus sonraíochtaí feidhmiúla an bhunachair sonraí sin á socrú aige, rachaidh an Coimisiún i gcomhairle leis an mBord um Intleacht Shaorga.

2. Na sonraí a liostaítear in Iarscríbhinn VIII, Cuid I, déanfaidh na soláthraithe, na hionadaithe údaraithe agus na húsáideoirí ábhartha, de réir mar is infheidhme, iad a iontráil i mbunachar sonraí an Aontais nuair a chláraítear iad. Na sonraí a liostaítear in Iarscríbhinn VIII, Cuid II, 1 go 11, déanfaidh na soláthraithe, nó i gcás inarb infheidhme an t-ionadaí údaraithe, iad a iontráil i mbunachar sonraí an Aontais, i gcomhréir le hAirteagal 51. Na sonraí dá dtagraítear in Iarscríbhinn VIII, Cuid II, 12, déanfar iad a ghiniúint go huathoibríoch sa bhunachar sonraí bunaithe ar an bhfaisnéis arna soláthar ag na húsáideoirí ábhartha de bhun Airteagal 51(2). Na sonraí a liostaítear in Iarscríbhinn VIIIa, déanfaidh na soláthraithe ionchasacha nó na soláthraithe iad a iontráil sa bhunachar sonraí i gcomhréir le hAirteagal 54a.
3. [scriosta]
4. Ní bheidh aon sonraí pearsanta i mbunachar sonraí an Aontais, cé is moite den fhaisnéis a liostaítear in Iarscríbhinn VIII, agus beidh sé gan dochar d'Airteagal 70.
5. Is é an Coimisiún a bheith ina rialaitheoir ar bhunachar sonraí an Aontais. Cuirfidh sé tacaíocht theicniúil agus riaracháin leordhóthanach ar fáil do sholáthraithe, do sholáthraithe ionchasacha agus d'úsáideoirí.
- 5a. Faisnéis i mbunachar sonraí an Aontais a cláraíodh i gcomhréir le hAirteagal 51, beidh sí inrochtana don phobal. An fhaisnéis a cláraíodh i gcomhréir le hAirteagal 54a, ní bheidh sí inrochtana ach amháin d'údarais um fhaireachas margaidh agus don Choimisiún, mura rud é go bhfuil toiliú tugtha ag an soláthraí ionchasach nó ag an soláthraí go ndéanfaí an fhaisnéis sin a chur ar fáil don phobal freisin.

TEIDEAL VIII

FAIREACHÁN IARMHARGAIDH, COMHROINNT FAISNÉISE, FAIREACHAS MARGAIDH

CAIBIDIL 1

FAIREACHÁN IARMHARGAIDH

Airteagal 61

Faireachán iarmhargaidh arna dhéanamh ag soláthraithe agus plean faireacháin iarmhargaidh le haghaidh córais intleachta saorga ardriosca

1. Bunóidh soláthraithe córas faireacháin iarmhargaidh agus déanfaidh siad é a dhoiciméadú ar bhealach atá comhréireach leis na rioscaí a bhaineann leis an gcóras intleachta saorga ardriosca.
2. Chun gur féidir leis an soláthraí a mheas an gcomhlíonann na córais intleachta saorga na ceanglais a leagtar amach i dTeideal III, Caibidil 2 ar feadh a saolré, leis an gcóras faireacháin iarmhargaidh déanfar sonraí ábhartha a bhailiú, a dhoiciméadú agus a anailísiú, ar sonraí iad a fhéadfaidh úsáideoirí a sholáthar nó a fhéadfar a bhailiú ó fhoinsí eile maidir le feidhmíocht córas intleachta saorga ardriosca. Ní chumhdófar leis an oibleagáid sin sonraí oibríochtúla íogaire úsáideoirí córas intleachta saorga ar údarais forfheidhmithe dlí iad.
3. Beidh an córas faireacháin iarmhargaidh bunaithe ar phlean faireacháin iarmhargaidh. Beidh an plean faireacháin iarmhargaidh mar chuid den doiciméadacht theicniúil dá dtagraítear in Iarscríbhinn IV. Glacfaidh an Coimisiún gníomh cur chun feidhme lena leagtar síos forálacha mionsonraithe lena mbunófar teimpléad don phlean faireacháin iarmhargaidh agus liosta na n-eilimintí atá le cur san áireamh sa phlean.

4. Maidir le córais intleachta saorga ardriosca a chumhdaítear leis na gníomhartha dlí dá dtagraítear in Iarscríbhinn II, Roinn A, i gcás ina bhfuil córas agus plean faireacháin iarmhargaidh bunaithe cheana faoin reachtaíocht sin, measfar gur leor an doiciméadacht faireacháin iarmhargaidh a ullmhaíodh faoin reachtaíocht sin ar choinníoll gur úsáideadh an teimpléad dá dtagraítear i mír 3.

Beidh feidhm ag an gcéad fhomhír freisin maidir leis na córais intleachta saorga ardriosca dá dtagraítear i bpointe 5 d'Iarscríbhinn III arna gcur ar an margadh nó arna gcur i mbun seirbhíse ag institiúidí airgeadais atá faoi réir ceanglais maidir lena rialachas, socrúithe nó próisis inmheánacha faoi reachtaíocht seirbhísí airgeadais an Aontais.

CAIBIDIL 2

FAISNÉIS A CHOMHROINNT FAOI THEAGMHAIS THROMCHÚISEACHA

Airteagal 62

Sárúithe tromchúiseacha a thuairisciú

1. Soláthraithe córas intleachta saorga ardriosca a chuirtear ar mhargadh an Aontais, déanfaidh siad aon teagmhas tromchúiseach a thuairisciú d'údaráis um fhaireachais margaidh na mBallstát inar tharla an teagmhas sin.

Déanfar an fógra sin a thabhairt láithreach tar éis don soláthraí a shuí go bhfuil nasc cúisíoch idir an córas intleachta saorga agus an teagmhas tromchúiseach nó a shuí gur dócha ar bhonn réasúnach nasc mar sin a bheith ann, agus cibé cás é, déanfar an fógra a thabhairt tráth nach déanaí ná 15 lá tar éis don soláthraí teacht ar an eolas faoin teagmhas tromchúiseach.

2. Ar fhógra a fháil maidir le teagmhas tromchúiseach dá dtagraítear in Airteagal 3(44)(c) cuirfidh an t-údarás ábhartha um fhaireachas margaidh na húdaráis phoiblí náisiúnta nó na comhlachtaí poiblí náisiúnta dá dtagraítear in Airteagal 64(3) ar an eolas. Forbróidh an Coimisiún treoir thiomnaithe chun comhlíonadh na n-oibleagáidí a leagtar amach i mír 1 a éascú. Eiseofar an treoir sin 12 mhí ar a dhéanaí tar éis theacht i bhfeidhm an Rialacháin seo.

3. I gcás na gcóras intleachta saorga ardriosca dá dtagraítear i bpointe 5 d'Iarscríbhinn III arna gcur ar an margadh nó arna gcur i mbun seirbhíse ag soláthraithe ar institiúidí airgeadais iad atá faoi réir ceanglais maidir lena rialachas, socrúithe nó próisis inmheánacha faoi reachtaíocht seirbhísí airgeadais an Aontais, ní thabharfar fógra ach amháin faoi na teagmhais thromchúiseacha sin dá dtagraítear in Airteagal 3(44)(c).
4. Maidir le córais intleachta saorga ardriosca ar comhphárteanna sábháilteachta de chuid feistí iad, nó ar feistí iad féin, arna gcumhdach le Rialachán (AE) 2017/745 agus le Rialachán (AE) 2017/746, ní thabharfar fógra faoi theagmhais thromchúiseacha ach amháin i gcás iad sin dá dtagraítear in Airteagal 3(44)(c) agus tabharfar an fógra don údarás inniúil náisiúnta arna roghnú chun na críche sin ag an mBallstát inar tharla an teagmhas sin.

CAIBIDIL 3

FORFHEIDHMIÚ

Airteagal 63

Faireachas margaidh agus rialú córas intleachta saorga i margadh an Aontais

1. Beidh feidhm ag Rialachán (AE) 2019/1020 maidir le córais intleachta saorga a chumhdaítear leis an Rialachán seo. Mar sin féin, chun an Rialachán seo a fhorfheidhmiú go héifeachtach:
 - (a) aon tagairt d'oibreoir eacnamaíoch faoi Rialachán (AE) 2019/1020, tuigfear go gcuimsíonn sí na hoibreoirí uile a shainaithnítear in Airteagal 2 den Rialachán seo;
 - (b) aon tagairt do tháirge faoi Rialachán (AE) 2019/1020, tuigfear go gcuimsíonn sí gach córas intleachta saorga a thagann faoi raon feidhme an Rialacháin seo.

2. Mar chuid dá n-oibleagáidí tuairiscithe faoi Airteagal 34(4) de Rialachán (AE) 2019/1020, tuairisceoidh na húdaráis um fhaireachas margaidh don Choimisiún faoi thorthaí na ngníomhaíochtaí faireachais margaidh ábhartha faoin Rialachán seo.
3. I gcás córais intleachta saorga ardriosca a bhaineann le táirgí a bhfuil feidhm ag na gníomhartha dlí a liostaítear in Iarscríbhinn II maidir leo, is é an t-údarás um fhaireachas margaidh chun críocha an Rialacháin seo an t-údarás atá freagrach as gníomhaíochtaí faireachais margaidh a ainmnítear faoi na gníomhartha dlí sin nó, in imthosca a bhfuil údar leo agus ar choinníoll go ndéantar an comhordú a áirithiú, údarás ábhartha eile arna shainiú ag an mBallstát.

Na nósanna imeachta dá dtagraítear in Airteagail 65, 66, 67 agus 68 den Rialachán seo, ní bheidh feidhm acu maidir le córais intleachta saorga a bhaineann le táirgí a bhfuil feidhm ag gníomhartha dlí a liostaítear in Iarscríbhinn II, roinn A maidir leo, i gcás ina bhforáiltear cheana féin leis na gníomhartha dlí sin do nósanna imeachta a bhfuil an cuspóir céanna acu. I gcás mar sin, beidh feidhm ag na nósanna imeachta earnála sin ina n-ionad.

4. I gcás córais intleachta saorga ardriosca a chuirtear ar an margadh, a chuirtear i mbun seirbhíse nó a úsáideann institiúidí airgeadais arna rialú le reachtaíocht seirbhísí airgeadais an Aontais, is é an t-údarás faireachais margaidh chun críocha an Rialacháin seo an t-údarás náisiúnta ábhartha atá freagrach as maoirseacht airgeadais na n-institiúidí sin faoin reachtaíocht sin a mhéid atá baint dhíreach ag an gcóras intleachta saorga a bheith á chur ar an margadh, á chur i mbun seirbhíse nó á úsáid le soláthar na seirbhísí airgeadais sin.

De mhaolú ar an bhfomhír roimhe seo, in imthosca a bhfuil údar leo agus ar choinníoll go ndéantar an comhordú a áirithiú, féadfaidh an Ballstát údarás ábhartha eile a shainiú mar an t-údarás um fhaireachas margaidh chun críocha an Rialacháin seo.

Údaráis náisiúnta um fhaireachas margaidh a dhéanann maoirseacht ar institiúidí creidmheasa rialáilte arna rialáil faoi Threoir 2013/36/AE, atá rannpháirteach sa Sásra Maoirseachta Aonair (SMA) arna bhunú le Rialachán Uimh. 1204/2013 ón gComhairle, ba cheart dóibh tuairisciú gan mhoill don Bhanc Ceannais Eorpach aon fhaisnéis a shainaithnítear le linn a ngníomhaíochtaí faireachais margaidh a d'fhéadfadh a bheith ina hábhar spéise do chúraimí maoirseachta stuamachta an Bhainc Cheannais Eorpaigh mar a shonraítear sa Rialachán sin.

5. I gcás córais intleachta saorga ardriosca a liostaítear i bpointe 1(a) a mhéid a úsáidtear na córais chun críocha fhorfheidhmiú an dlí, agus pointí 6, 7 agus 8 d'Iarscríbhinn III, ainmneoidh na Ballstáit mar údaráis um fhaireachas margaidh chun críocha an Rialacháin seo na húdaráis náisiúnta a dhéanann maoirseacht ar ghníomhaíochtaí na n-údarás forfheidhmithe dlí, rialaithe teorann, inimirce, tearmainn nó na n-údarás breithiúnach, nó na húdaráis inniúla maoirseachta um chosaint sonraí faoi Threoir (AE) 2016/680, nó Rialachán 2016/679. Ní dhéanfaidh gníomhaíochtaí faireachais margaidh difear ar bhealach ar bith do neamhspleáchas na n-údarás breithiúnach ná ní chuirfidh siad isteach ar aon bhealach eile ar a ngníomhaíochtaí agus iad ag gníomhú ina gcáil bhreithiúnach.
6. Más rud é go dtagann institiúidí, gníomhaireachtaí agus comhlachtaí an Aontais faoi raon feidhme an Rialacháin seo, gníomhóidh an Maoirseoir Eorpach ar Chosaint Sonraí mar an t-údarás um fhaireachas margaidh.
7. Éascóidh na Ballstáit an comhordú idir údaráis um fhaireachas margaidh a ainmnítear faoin Rialachán seo agus údaráis nó comhlachtaí náisiúnta ábhartha eile a dhéanann maoirseacht ar chur i bhfeidhm reachtaíocht comhchuibhithe an Aontais a liostaítear in Iarscríbhinn II nó reachtaíocht eile de chuid an Aontais a d'fhéadfadh a bheith ábhartha do na córais intleachta saorga ardriosca dá dtagraítear in Iarscríbhinn III.
8. Gan dochar do na cumhachtaí arna soláthar faoi Rialachán (AE) 2019/1020, agus i gcás inarb ábhartha agus teoranta don mhéid is gá chun a gcúraimí a chomhlíonadh, tabharfar rochtain iomlán do na húdaráis um fhaireachas margaidh ar an doiciméadacht agus ar na tacair sonraí oiliúna, bailíochtaithe agus tástála a úsáideadh i bhforbairt an chórais intleachta saorga ardriosca, lena n-áirítear, i gcás inarb iomchuí agus faoi réir coimircí slándála, trí chomhéadain ríomhchláraithe feidhmchlár (API) nó trí mhodhanna agus uirlisí teicniúla iomchuí eile lena féidir rochtain cianda a thabhairt.
9. Tabharfar rochtain d'údaráis um fhaireachas margaidh ar chód foinseach an chórais intleachta saorga ardriosca ar iarraidh réasúnaithe agus ní thabharfar an rochtain sin dóibh ach amháin nuair a chomhlíontar na coinníollacha carnacha seo a leanas:

(a) Tá gá le rochtain ar chód foinseach chun measúnú a dhéanamh ar chomhréireacht an chórais intleachta saorga ardriosca leis na ceanglais a leagtar amach i dTeideal III, Caibidil 2, agus

(b) ídíodh na nósanna imeachta agus na fíoruithe tástála/iniúchta ar fad bunaithe ar na sonraí agus an doiciméadacht arna soláthar ag an soláthraí nó léiríodh nár leor iad.

10. Aon fhaisnéis agus doiciméadacht a fhaigheann na húdaráis um fhaireachas margaidh, caithfear léi i gcomhréir leis na hoibleagáidí rúndachta a leagtar amach in Airteagal 70.

11. Aon duine nádúrtha nó dlítheanach a bhfuil forais aige le ceapadh go ndearnadh sárú ar fhorálacha an Rialacháin seo, féadfaidh sé gearán a chur faoi bhráid an údaráis ábhartha um fhaireachas margaidh.

I gcomhréir le hAirteagal 11(3)(e) agus (7)(a) de Rialachán (AE) 2019/1020, cuirfear gearáin san áireamh chun críche gníomhaíochtaí faireachais margaidh a dhéanamh agus láimhseálfar iad i gcomhréir leis na nósanna imeachta tiomnaithe arna mbunú chuige sin ag na húdaráis um fhaireachas margaidh.

Airteagal 63a

Maoirseacht arna déanamh ag na húdaráis um fhaireachas margaidh ar thástáil i bhfíordhálaí

1. Beidh an inniúlacht agus na cumhachtaí ag na húdaráis um fhaireachas margaidh chun a áirithiú go mbeidh tástáil i bhfíordhálaí i gcomhréir leis an Rialachán seo.
2. I gcás ina ndéantar tástáil i bhfíordhálaí le haghaidh córais intleachta saorga a ndéantar maoirseacht orthu laistigh de bhosca gainimh rialála IS faoi Airteagal 54, fíoróidh na húdaráis um fhaireachas margaidh go bhfuil forálacha Airteagal 54a á gcomhlíonadh, mar chuid dá ról maoirseachta don bhosca gainimh rialála IS. Féadfaidh na húdaráis sin, de réir mar is iomchuí, cead a thabhairt don soláthraí nó don soláthraí ionchasach an tástáil i bhfíordhálaí a dhéanamh de mhaolú ar na coinníollacha a leagtar amach in Airteagal 54a(4) (f) agus (g).

3. I gcás ina gcuirfidh an soláthraí ionchasach, an soláthraí nó aon tríú páirtí an t-údarás um fhaireachas margaidh ar an eolas faoi theagmhas tromchúiseach nó i gcás ina mbeidh forais eile aige lena mheas nár comhlíonadh na coinníollacha a leagtar amach in Airteagail 54a agus 54b, féadfaidh sé na cinntí seo a leanas a dhéanamh ar a chríoch, mar is iomchuí:
- (a) an tástáil i bhfiordhálaí a chur ar fionraí nó deireadh a chur léi;
 - (b) a cheangal ar an soláthraí nó ar an soláthraí ionchasach agus ar an úsáideoir/na húsáideoirí aon ghné den tástáil a mhodhnú i bhfiordhálaí.
4. I gcás ina bhfuil cinneadh dá dtagraítear i mír 3 den Airteagal seo déanta ag údarás um fhaireachas margaidh nó ina bhfuil agóid déanta aige de réir bhrí Airteagal 54a(4)(b), léireofar forais an chinnidh nó na hagóide sa chinneadh nó san agóid féin mar aon leis na rialacha mionsonraithe agus na coinníollacha faoina bhféadfaí an soláthraí nó an soláthraí ionchasach cur i gcoinne an chinnidh nó na hagóide.
5. I gcás inarb infheidhme, ina mbeidh cinneadh dá dtagraítear i mír 3 den Airteagal seo déanta ag údarás um fhaireachas margaidh, cuirfidh sé na forais atá leis an gcinneadh sin in iúl do na húdaráis um fhaireachas margaidh sna Ballstáit eile ina ndearnadh an córas intleachta saorga a thástáil i gcomhréir leis an bplean tástála.

Airteagal 64

Cumhachtaí na n-údarás a chosnaíonn cearta bunúsacha

1. [scriosta]
2. [scriosta]

3. Maidir le húdaráis phoiblí náisiúnta nó comhlachtaí náisiúnta a dhéanann maoirseacht nó forfheidhmiú ar urramú na n-oibleagáidí faoi dhlí an Aontais lena gcosnaítear cearta bunúsacha, lena n-áirítear an ceart chun idirdhealaithe, i ndáil le húsáid na gcóras intleachta saorga ardriosca dá dtagraítear in Iarscríbhinn III, beidh sé de chumhacht acu aon doiciméadacht arna cruthú nó arna coimeád ar bun faoin Rialachán seo a iarraidh agus rochtain a fháil uirthi nuair atá gá leis sin chun na hinniúlachtaí faoina sainordú a chomhlíonadh laistigh de theorainneacha a ndlínse. Cuirfidh an t-údarás poiblí nó an comhlacht poiblí ábhartha an t-údarás um fhaireachas margaidh sa Bhallstát lena mbaineann ar an eolas faoi aon iarraidh den sórt sin.
4. Faoi 3 mhí tar éis theacht i bhfeidhm an Rialacháin seo, déanfaidh gach Ballstát na húdaráis phoiblí nó na comhlachtaí poiblí dá dtagraítear i mír 3 a shainaitheint agus cuirfidh sé liosta ar fáil go poiblí. Tabharfaidh na Ballstáit fógra faoin liosta sin don Choimisiún agus do na Ballstáit eile go léir agus coinneoidh siad an liosta cothrom le dáta.
5. I gcás nach leor an doiciméadacht dá dtagraítear i mír 3 chun a fháil amach ar tharla sárú ar oibleagáidí faoi dhlí an Aontais atá ceaptha cearta bunúsacha a chosaint, féadfaidh an t-údarás poiblí nó an comhlacht dá dtagraítear i mír 3 iarraidh réasúnaithe a chur faoi bhráid an údaráis um fhaireachas margaidh chun tástáil an chórais intleachta saorga ardriosca a eagrú trí mhodhanna teicniúla. Eagróidh an t-údarás um fhaireachas margaidh an tástáil trí dhlúthbhaint leis an údarás poiblí iarrthach nó leis an gcomhlacht poiblí iarrthach laistigh de thréimhse réasúnta ama tar éis na hiarrata.
6. Aon fhaisnéis agus aon doiciméadacht a gheobhaidh na húdaráis phoiblí náisiúnta nó na comhlachtaí poiblí náisiúnta dá dtagraítear i mír 3 de bhun fhorálacha an Airteagail seo, déileálfar léi sin i gcomhréir leis na hoibleagáidí rúndachta a leagtar amach in Airteagal 70.

Airteagal 65

An nós imeachta um déileáil le córais intleachta saorga a bhfuil riosca ag baint leo ar an leibhéal náisiúnta

1. Maidir le córais intleachta saorga a bhfuil riosca ag baint leo, tuigfear iad a bheith mar tháirge a bhfuil riosca ag baint leis mar a shainmhínítear in Airteagal 3, pointe 19 de Rialachán (AE) 2019/1020 a mhéid a bhaineann le rioscaí don tsláinte nó don tsábháilteacht nó do chearta bunúsacha daoine.
2. I gcás ina mbeidh cúiseanna leormhaithe ag an údarás um fhaireachas margaidh i mBallstát lena mheas go bhfuil riosca dá dtagraítear i mír 1 ag baint le córas intleachta saorga, déanfaidh siad meastóireacht ar an gcóras intleachta saorga lena mbaineann maidir le comhlíonadh na gceanglas agus na n-oibleagáidí uile a leagtar síos sa Rialachán seo. Nuair a shaináithnítear rioscaí do chearta bunúsacha, cuirfidh an t-údarás um fhaireachas margaidh na húdaráis nó na comhlachtaí poiblí náisiúnta ábhartha dá dtagraítear in Airteagal 64(3) ar an eolas freisin. De réir mar is gá, comhoibreoidh na hoibreoirí ábhartha leis na húdaráis um fhaireachas margaidh agus leis na húdaráis nó comhlachtaí poiblí náisiúnta eile dá dtagraítear in Airteagal 64(3).

Más rud é, agus an measúnú sin á dhéanamh, go gcinnfidh an t-údarás um fhaireachas margaidh nach gcomhlíonann an córas intleachta saorga na ceanglais a leagtar síos sa Rialachán seo, ceanglóidh sé gan aon mhoill mhíchuí ar an soláthraí gach beart ceartaitheach iomchuí a dhéanamh chun an córas intleachta saorga a thabhairt chun comhréireachta, nó chun é a aistarraingt ón margadh, nó chun é a aisghairm laistigh de thréimhse réasúnach a fhéadfaidh sé a fhorordú.

Cuirfidh an t-údarás um fhaireachas margaidh an comhlacht ábhartha faoina dtugtar fógra ar an eolas dá réir sin. Beidh feidhm ag Airteagal 18 de Rialachán (AE) Uimh. 2019/1020 maidir leis na bearta dá dtagraítear sa dara fomhír.

3. I gcás ina measann an t-údarás um fhaireachas margaidh nach bhfuil an neamhchomhlíonadh srianta dá chríoch náisiúnta, cuirfidh sé an Coimisiún agus na Ballstáit eile ar an eolas gan aon mhoill mhíchuí faoi thorthaí na meastóireachta agus faoi na gníomhaíochtaí a d'éiligh siad ar an oibreoir a dhéanamh.

4. Áiritheoidh an t-oibreoir go ndéantar gach beart ceartaitheach iomchuí i leith na gcóras intleachta saorga uile lena mbaineann atá curtha ar fáil aige ar an margadh ar fud an Aontais.
5. I gcás nach ndéanfaidh soláthraí córais intleachta saorga beart ceartaitheach laistigh den tréimhse dá dtagraítear i mír 2, déanfaidh an t-údarás um faireachas margaidh gach beart sealadach is iomchuí chun an córas intleachta saorga a thoirmeasc nó a shrianadh ó bheith á chur ar fáil ar an margadh náisiúnta sin, chun an táirge a aistarraingt ón margadh nó chun é a aisghairm. Tabharfaidh an t-údarás sin fógra don Choimisiún agus do na Ballstáit eile, gan aon mhoill mhíchúí, faoi na bearta sin.
6. San fhógra dá dtagraítear i mír 5 beidh na sonraí uile atá ar fáil, go háirithe an fhaisnéis is gá chun an córas intleachta saorga neamhchomhlíontach a shainaithint, áit tionscnaimh an chórais intleachta saorga, an cineál neamhchomhlíontachta agus an riosca a bhaineann leis, cineál agus fad na mbeart náisiúnta a rinneadh agus na hargóintí a rinne an t-oibreoir ábhartha. Tabharfaidh na húdaráis um faireachas margaidh le fios go háirithe cibé ar tharla an neamhchomhlíonadh i ngeall ar aon cheann nó níos mó de na nithe seo a leanas:
- (-a) neamhchomhlíonadh an toirmisc ar na cleachtais intleachta saorga dá dtagraítear in Airteagal 5;
 - (a) nár chomhlíon córas intleachta saorga ardriosca na ceanglais a leagtar amach i dTeideal III, Caibidil 2;
 - (b) go raibh easnaimh sna caighdeáin chomhchuibhithe nó sna sonraíochtaí coiteanna dá dtagraítear in Airteagail 40 agus 41 lena mbronntar toimhde comhréireachta.
 - (c) neamhchomhlíonadh na bhforálacha a leagtar amach in Airteagal 52;
 - (d) neamhchomhlíonadh na gceanglas agus na n-oibleagáidí dá dtagraítear in Airteagal 4a ó thaobh na gcóras intleachta saorga ilchuspóireach de;

7. Maidir leis na húdaráis um fhaireachas margaidh sna Ballstát nach iad an t-údarás um fhaireachas margaidh sa Bhallstáit atá ag tionscnamh an nós imeachta, cuirfidh siad an Coimisiún agus na Ballstáit eile ar an eolas gan aon mhoill mhíchúí faoi aon bheart arna ghlacadh agus faoi aon fhaisnéis bhreise atá acu a bhaineann le neamhchomhlíonadh an chórais intleachta saorga atá i gceist, agus, i gcás nach n-aontóidh siad leis an mbeart náisiúnta a bhfuil fógra tugtha faoi, faoina n-agóidí.
8. Más rud é, laistigh de 3 mhí tar éis dóibh an fógra dá dtagraítear i mír 5 a fháil, nach bhfuil aon agóid maidir le beart sealadach a ghlac Ballstát déanta ag Ballstát nó ag an gCoimisiún, measfar go bhfuil údar leis an mbeart sin. Tá an méid sin gan dochar do chearta nós imeachta an oibreora lena mbaineann i gcomhréir le hAirteagal 18 de Rialachán (AE) 2019/1020. Laghdófar an tréimhse dá dtagraítear sa chéad abairt den mhír seo go 30 lá i gcás neamhchomhlíonadh an toirmisc ar na cleachtais intleachta saorga dá dtagraítear in Airteagal 5.
9. Ina dhiaidh sin, áiritheoidh na húdaráis um fhaireachas margaidh i ngach Ballstát go ndéanfar bearta sriantacha iomchúí i leith an gcóras intleachta saorga lena mbaineann, amhail an táirge a aistarraingt óna margadh gan aon mhoill mhíchúí.

Airteagal 66

Nós imeachta coimirce an Aontais

1. Más rud é, laistigh de 3 mhí tar éis dóibh an fógra dá dtagraítear in Airteagal 65(5) a fháil, nó 30 lá i gcás neamhchomhlíonadh an toirmisc ar na cleachtais intleachta saorga dá dtagraítear in Airteagal 5, go ndéanann Ballstát agóidí i gcoinne beart a rinne Ballstát eile, nó más rud é go measann an Coimisiún go bhfuil an beart contrártha do dhlí an Aontais, rachaidh an Coimisiún i gcomhairle le húdarás um fhaireachas margaidh an Bhallstáit agus leis an oibreoir nó leis na hoibreoirí lena mbaineann gan aon mhoill mhíchúí agus déanfaidh sé meastóireacht ar an mbeart náisiúnta sin. Ar bhonn thorthaí na meastóireachta sin, cinnfidh an Coimisiún an bhfuil údar leis an mbeart náisiúnta nó nach bhfuil, laistigh de 9 mí, nó 60 lá i gcás neamhchomhlíonadh an toirmisc ar na cleachtais intleachta saorga dá dtagraítear in Airteagal 5, ag tosú leis an bhfógra dá dtagraítear in Airteagal 65(5). Tabharfaidh sé fógra faoin gcinneadh sin don Bhallstát lena mbaineann. Cuirfidh an Coimisiún na Ballstáit eile ar an eolas faoi chinneadh mar sin freisin.
2. Má mheasann an Coimisiún go bhfuil údar leis an mbeart arna dhéanamh ag údarás um fhaireachas margaidh an Bhallstáit ábhartha, áiritheoidh údarás um fhaireachas margaidh na mBallstát uile go ndéanfar bearta sriantacha iomchúí i ndáil leis an gcóras intleachta saorga lena mbaineann, amhail an córas intleachta saorga a tharraingt siar óna margadh gan aon mhoill mhíchúí, agus cuirfidh siad an Coimisiún ar an eolas dá réir sin. Má mheasann an Coimisiún nach bhfuil údar leis an mbeart náisiúnta, déanfaidh údarás um fhaireachas margaidh an Bhallstáit lena mbaineann an beart a tharraingt siar agus cuirfidh sé an Coimisiún ar an eolas dá réir.
3. I gcás ina meastar go bhfuil bonn cirt leis an mbeart náisiúnta agus go gceanglaítear neamhchomhlíonadh an chórais intleachta saorga le heasnaimh sna caighdeáin chomhchuibhithe nó sna sonraíochtaí coiteanna dá dtagraítear in Airteagail 40 agus 41 den Rialachán seo, cuirfidh an Coimisiún an nós imeachta dá bhforáiltear in Airteagal 11 de Rialachán (AE) Uimh. 1025/2012 i bhfeidhm.

Airteagal 67

Córais intleachta saorga comhlíontacha ardriosca nó ilchuspóireacha a bhfuil riosca ag baint leo

1. Más rud é, tar éis dó meastóireacht a dhéanamh faoi Airteagal 65, go gcinneadh údarás um fhaireachas margaidh an Bhallstáit, cé go bhfuil córas intleachta saorga ardriosca nó ilchuspóireacha i gcomhréir leis an Rialachán seo, go bhfuil riosca ag baint leis do shláinte nó do shábháilteacht daoine nó do chearta bunúsach, cuirfidh sé de cheangal ar an oibreoir ábhartha gach beart iomchuí a ghlacadh chun a áirithiú nach mbeidh riosca ag baint leis an gcóras intleachta saorga lena mbaineann a thuilleadh nuair a chuirfear ar an margadh é nó nuair a chuirfear i mbun seirbhíse é, chun an córas intleachta saorga a aistarraingt ón margadh nó a aisghairm gan aon mhoill mhíchúí laistigh de thréimhse a fhéadfaidh sé a fhorordú.
2. Áiritheoidh an soláthraí nó na hoibreoírí ábhartha eile go ndéanfar beart ceartaitheach maidir leis na córais intleachta saorga ar fad lena mbaineann a chuir sé ar fáil ar an margadh ar fud an Aontais laistigh den amlíne arna leagan síos ag údarás um fhaireachas margaidh an Bhallstáit dá dtagraítear i mír 1.
3. Cuirfidh an Ballstát an Coimisiún agus na Ballstáit eile ar an eolas láithreach. Áireofar san fhaisnéis sin na sonraí uile atá ar fáil, go háirithe na sonraí is gá chun go sainaitheofaí an córas intleachta saorga lena mbaineann, áit tionscnamh agus slabhra soláthair an chórais intleachta saorga, an cineál riosca a bhaineann leis agus cineál agus fad na mbearta náisiúnta a rinneadh.
4. Rachaidh an Coimisiún i gcomhairle leis an mBallstát lena mbaineann agus leis an oibreoir eacnamaíoch ábhartha gan aon mhoill mhíchúí agus déanfaidh sé meastóireacht ar na bearta náisiúnta a rinneadh. Ar bhonn thorthaí na meastóireachta sin, cinneadh an Coimisiún cé acu atá údar maith leis an mbeart nó nach bhfuil, agus i gcás inar gá, molfaidh sé bearta iomchuí.
5. Cuirfidh an Coimisiún a chinneadh in iúl do na Ballstáit lena mbaineann agus cuirfidh sé na Ballstáit eile ar fad ar an eolas.

Airteagal 68

Neamhchomhlíonadh foirmiúil

1. I gcás ina ndéanann údarás um fhaireachas margaidh i mBallstát aon cheann de na cinntí seo a leanas, cuirfidh sé de cheangal ar an oibreoir ábhartha deireadh a chur leis an neamhchomhlíonadh lena mbaineann, laistigh de thréimhse a fhéadfaidh sé a fhorordú:
 - (a) gur sárú é ar Airteagal 49 an mharcáil chomhréireachta a ghreamú;
 - (b) nár greamaíodh an mharcáil chomhréireachta;
 - (c) nár tarraingíodh suas dearbhú comhréireachta AE;
 - (d) nár tarraingíodh suas i gceart an dearbhú comhréireachta AE;
 - (e) nár greamaíodh uimhir aitheantais an chomhlachta faoina dtugtar fógra atá bainteach leis an nós imeachta um measúnú comhréireachta, i gcás inarb infheidhme;
2. I gcás ina leantar den neamhchomhlíonadh dá dtagraítear i mír 1, glacfaidh na Ballstáit lena mbaineann gach beart iomchuí chun an córas intleachta saorga a shrianadh nó a chosc óna chur ar an margadh nó lena áirithiú go ndéantar é a aisghairm nó a aistarraingt ón margadh.

Airteagal 68a

Saoráidí tástála de chuid an Aontais i réimse na hintleachta saorga

1. Ainmneoidh an Coimisiún saoráid tástála amháin nó níos mó de chuid an Aontais de bhun Airteagal 21 de Rialachán (AE) 1020/2019 i réimse na hintleachta saorga.

2. Gan dochar do ghníomhaíochtaí shaoráidí tástála an Aontais dá dtagraítear in Airteagal 21(6) de Rialachán (AE) 1020/2019, cuirfidh na saoráidí tástála de chuid an Aontais dá dtagraítear i mír 1 comhairle neamhspleách theicniúil nó eolaíoch ar fáil freisin arna iarraidh sin don Bhord nó d'údaráis um fhaireachas margaidh.

Airteagal 68b

Díorma lárnach saineolaithe neamhspleácha

1. Arna iarraidh sin don Bhord um Intleacht Shaorga, déanfaidh an Coimisiún, trí bhíthin gníomh cur chun feidhme, forálacha maidir le díorma lárnach saineolaithe neamhspleácha a chruthú, a chothabháil agus a mhaoiniú chun tacú leis na ghníomhaíochtaí forfheidhmiúcháin faoin Rialachán seo.
2. Roghnóidh an Coimisiún na saineolaithe agus áireofar iad sa díorma lárnach ar bhonn saineolas eolaíoch nó teicniúil cothrom le dáta i réimse na hintleachta saorga, agus an aird chúí á tabhairt ar na réimsí teicniúla a chumhdaítear leis na ceanglais agus na hoibleagáidí atá sa Rialachán seo agus do ghníomhaíochtaí na n-údarás um fhaireachas margaidh de bhun Airteagal 11 de Rialachán (AE) 1020/2019. Cinnfidh an Coimisiún líon na gcomhaltaí sa díorma i gcomhréir leis na riachtanais is gá.
3. Féadfaidh na cúraimí seo a leanas a bheith ar shaineolaithe:
 - (a) comhairle a thabhairt do na húdaráis um fhaireachas margaidh agus tacú leis an obair a bhíonn ar bun acu, arna iarraidh sin dóibh;
 - (b) tacú le himscrúduithe faireachais margaidh trasteorann dá dtagraítear in Airteagal 58(h), gan dochar do chumhachtaí na n-údarás um fhaireachas margaidh;
 - (c) comhairle agus tacaíocht a thabhairt don Choimisiún agus a dhualgais á gcomhlíonadh aige i gcomhthéacs an chláisail chosanta de bhun Airteagal 66.

4. Comhlíonfaidh na saineolaithe a gcúraimí ar bhealach neamhchlaontacht oibiachtúil agus áiritheoidh siad rúndacht na faisnéise agus na sonraí a fhaightear agus a gcúraimí agus a ngníomhaíochtaí á ndéanamh acu. Dréachtóidh gach saineolaí dearbhú leasanna a chuirfear ar fáil don phobal. Bunóidh an Coimisiún córais agus nósanna imeachta chun coinbhleachtaí leasa a d'fhéadfadh a bheith ann a bhainistiú go gníomhach agus a chosc.
5. Féadfar a cheangal ar na Ballstáit táillí a íoc as comhairle agus tacaíocht a fhaightear ó na saineolaithe. Glacfaidh an Coimisiún struchtúr agus leibhéal na dtáillí chomh maith le scála agus struchtúr na gcostas inghnóthaithe trí bhíthin an ghnímh cur chun feidhme dá dtagraítear i mír 1, agus na cuspóirí maidir le cur chun feidhme leordhóthanach an Rialacháin seo, costéifeachtúlacht agus a riachtanaí atá sé a áirithiú go mbeidh rochtain éifeachtach ag na Ballstáit uile ar shaineolaithe á gcur san áireamh.
6. Éascóidh an Coimisiún rochtain thráthúil ar na saineolaithe do na Ballstáit, de réir mar is gá, agus áiritheoidh sé go ndéanfar an meascán gníomhaíochtaí tacaíochta arna dhéanamh i saoráidí tástála an Aontais de bhun Airteagal 68a agus ag na saineolaithe de bhun an Airteagail seo a eagrú go héifeachtúil agus go gcuirfear an breisluach is fearr is féidir ar fáil leo.

TEIDEAL IX

CÓID IOMPAIR

Airteagal 69

Cóid Iompair le haghaidh cur chun feidhme deonach ceanglas sonrath

1. Déanfaidh an Coimisiún agus na Ballstáit tarraingt suas cód iompair a éascú, ar cóid iad atá ceaptha chun cur i bhfeidhm deonach na gcóras intleachta saorga a mholadh seachas córais intleachta saorga ardriosca lena mbaineann ceann amháin nó níos mó de na ceanglais a leagtar amach i dTeideal III, Caibidil 2 den Rialachán seo a mhéid is féidir, agus na réitigh theicniúla atá ar fáil lena bhféadfar na ceanglais sin a chur i bhfeidhm á gcur san áireamh.
2. Déanfaidh an Coimisiún agus na Ballstáit tarraingt suas cód iompair a éascú chun cur i bhfeidhm deonach na gceanglas maidir le gach córas intleachta saorga a mholadh, ceanglais a bhaineann, mar shampla, le hinbhuanaitheacht chomhshaoil, lena n-áirítear a mhéid a bhaineann le clársceidealú atá tíosach ar fhuinneamh, inrochtaineacht do dhaoine faoi mhíchumas, rannpháirtíocht geallsealbhóirí i ndearadh agus i bhforbairt na gcóras intleachta saorga agus éagsúlacht na bhfoirne forbartha ar bhonn cuspóirí soiléire agus príomhtháscairí feidhmíochta chun gnóthú na gcuspóirí sin a thomhas. Ina theannta sin, éascóidh an Coimisiún agus na Ballstáit, i gcás inarb iomchuí, tarraingt suas na gcód iompair is infheidhme ar bhonn deonach ag féachaint d'oibleagáidí na n-úsáideoirí i ndáil le córais intleachta saorga.
3. Féadfaidh soláthraithe aonair córas intleachta saorga, nó eagraíochtaí a dhéanann ionadaíocht orthu, nó iad araon, cóid iompair is infheidhme ar bonn deonach a tharraingt suas, lena n-áirítear i dteannta rannpháirtíocht úsáideoirí agus aon gheallsealbhóirí leasmhara agus a n-eagraíochtaí ionadaíoch nó, i gcás inarb iomchuí, féadfaidh úsáideoirí iad a tharraingt suas ag féachaint dá n-oibleagáidí. Féadfar córas intleachta saorga amháin nó níos mó a chumhdach le cóid iompair, agus aird á tabhairt ar chosúlacht chuspóir beartaithe na gcóras ábhartha.
4. Cuirfidh an Coimisiún agus na Ballstáit leasanna agus riachtanais shonracha soláthraithe ar FBManna iad, lena n-áirítear gnólachtaí nuathionscanta, san áireamh nuair atá tarraingt suas na gcód iompair dá dtagraítear san Airteagal seo á moladh agus á éascú acu.

TEIDEAL X

RÚNDACHT AGUS PIONÓIS

Airteagal 70

Rúndacht

1. Maidir leis na húdaráis inniúla náisiúnta, na comhlachtaí faoina dtugtar fógra, an Coimisiún, an Bord agus aon duine nádúrtha nó dlítheanach eile a bhfuil baint acu le cur i bhfeidhm an Rialacháin seo, cuirfidh siad, i gcomhréir le dlí an Aontais nó leis an dlí náisiúnta, na bearta iomchuí teicniúla agus eagraíochtúla ar bun chun rúndacht na faisnéise agus na sonraí a fhaightear agus a gcúraimí agus a ngníomhaíochtaí á ndéanamh acu a áirithiú sa chaoi is go gcosnófar an méid seo a leanas go háirithe:
 - (a) cearta maoinne intleachtúla, agus faisnéis rúnda ghnó nó rúin trádála duine nádúrtha nó duine dhlítheanaigh, lena n-áirítear cód foinseach, seachas na cásanna dá dtagraítear in Airteagal 5 de Threoir 2016/943 maidir le fios gnó agus faisnéis ghnó neamhnocta (rúin trádála) a chosaint i gcoinne iad a fháil, a úsáid agus a nochtadh go neamhdhleathach.
 - (b) cur chun feidhme éifeachtach an Rialacháin seo, go háirithe chun críocha cigireachtaí, imscrúduithe nó iniúchtaí;
 - (c) leasanna slándála poiblí agus leasanna slándála náisiúnta;
 - (d) sláine imeachtaí coiriúla nó riaracháin;
 - (e) sláine na faisnéise a aicmítear i gcomhréir le dlí an Aontais nó leis an dlí náisiúnta.

2. Gan dochar do mhír 1, maidir le faisnéis a mhalartaítear ar bhonn rúnda idir na húdaráis inniúla náisiúnta agus idir údaráis inniúla náisiúnta agus an Coimisiún, ní nochtfar an fhaisnéis sin gan dul i gcomhairle roimh ré leis an údarás inniúil náisiúnta tionscnaimh agus leis an úsáideoir nuair a úsáideann údaráis forfheidhmithe an dlí, údaráis rialaithe teorann, údaráis inimirce nó údaráis tearmainn córais intleachta saorga ardriosca dá dtagraítear i bpointí 1, 6 agus 7 d'Iarscríbhinn III, nuair a chuirfeadh nochtadh den sórt sin leasanna slándála poiblí agus leasanna slándála náisiúnta i mbaol. Ní chumhdófar leis an oibleagáid faisnéis a mhalartú sonraí oibríochtúla íogaire maidir le gníomhaíochta údaráis forfheidhmithe dlí, údaráis rialaithe teorann, údaráis inimirce nó údaráis tearmainn córais.

Maidir le húdaráis forfheidhmithe an dlí, na húdaráis inimirce agus na húdaráis tearmainn, i gcás inar soláthraithe córas intleachta saorga ardriosca iad dá dtagraítear i bpointí 1, i bpointe 6 agus 7 d'Iarscríbhinn III, fanfaidh an doiciméadacht theicniúil dá dtagraítear in Iarscríbhinn IV laistigh d'áitreabh na n-údarás sin. Áiritheoidh na húdaráis sin gur féidir leis na húdaráis um fhaireachas margaidh dá dtagraítear in Airteagal 63(5) agus (6), de réir mar is infheidhme, rochtain a fháil ar an doiciméadacht láithreach, arna iarraidh sin dóibh, nó cóip de a fháil. Ní cheadófar ach d'fhoireann an údaráis um fhaireachas margaidh a bhfuil an leibhéal iomchuí imréitigh slándála acu rochtain a fháil ar an doiciméadacht sin nó ar aon chóip de.

3. Ní dhéanfaidh míreanna 1 agus 2 difear do chearta ná d'oibleagáidí an Choimisiúin, na mBallstát agus a n-údarás ábhartha, agus na gcomhlachtaí faoin dtugtar fógra, maidir le malartú faisnéise agus scaipeadh rabhadh, lena n-áirítear i gcomhthéacs an chomhair thrasteorann, ná d'oibleagáidí na bpáirtithe lena mbaineann, chun faisnéis a chur ar fáil faoi dhlí coiriúil na mBallstát.

Airteagal 71

Pionóis

1. I gcomhréir leis na téarmaí agus na coinníollacha a leagtar síos sa Rialachán seo, leagfaidh na Ballstáit síos na rialacha maidir le pionóis, lena n-áirítear fineálacha riaracháin, is infheidhme maidir le sáruithe ar an Rialachán seo, agus glacfaidh siad na bearta uile is gá chun a áirithiú go gcuirfear chun feidhme iad mar is cuí agus go héifeachtach. Beidh na pionóis dá bhforáiltear éifeachtach, comhréireach agus athchomhairleach. Cuirfidh siad san áireamh go sonrath méid agus leasanna soláthraithe ar FBManna iad, lena n-áirítear gnólachtaí nuathionscanta, agus a n-inmharthanacht eacnamaíoch. Cuirfidh siad san áireamh freisin an bhfuil úsáid an chórais intleachta saorga i gcomhthéacs gníomhaíocht neamhghairmiúil phearsanta.
2. Tabharfaidh na Ballstáit fógra don Choimisiún faoi na rialacha sin agus na bearta sin gan mhoill agus faoi aon leasú ina dhiaidh sin a dhéanfaidh difear dóibh.
3. Maidir le neamhchomhlíonadh aon toirmisc ar na cleachtais intleachta saorga dá dtagraítear in Airteagal 5, beidh an neamhchomhlíonadh sin faoi réir fineálacha riaracháin suas le EUR 30 000 000 nó, más cuideachta é an ciontóir, faoi réir fineála suas le 6 % dá láimhdeachas bliantúil iomlán domhanda sa bhliain airgeadais roimhe sin, cibé acu is airde. I gcás FBManna, lena n-áirítear gnólachtaí nuathionscanta, beidh na fineálacha sin chomh hard le 3 % dá láimhdeachas bliantúil domhanda don bhliain airgeadais roimhe sin.
4. Beidh sáruithe ar an forálacha seo a leanas a bhaineann le hoibreoírí nó le comhlachtaí faoina dtugtar fógra faoi réir fineálacha riaracháin suas le EUR 20 000 000 nó, más cuideachta é an ciontóir, faoi réir fineála suas le 4 % dá láimhdeachas bliantúil iomlán domhanda sa bhliain airgeadais roimhe sin, cibé acu is airde:
 - (-a) oibleagáidí na soláthraithe de bhun Airteagail 4b agus 4c;
 - (a) oibleagáidí na soláthraithe de bhun Airteagal 16;
 - (b) oibleagáidí i gcás daoine áirithe eile de bhun Airteagal 23a;

- (c) oibleagáidí na n-ionadaithe údaraithe de bhun Airteagal 25;
- (d) oibleagáidí na n-allmhaireoirí de bhun Airteagal 26;
- (e) oibleagáidí na ndáileoirí de bhun Airteagal 27;
- (f) oibleagáidí na n-úsáideoirí de bhun Airteagal 29, míreanna 1 go 6a;
- (g) ceanglais agus oibleagáidí na gcomhlachtaí faoina dtugtar fógra de bhun Airteagail 33, 34(1), 34(3), 34(4), 34a;
- (h) oibleagáidí trédhearcachta i gcás soláthraithe agus úsáideoirí de bhun Airteagal 52.

I gcás FBManna, lena n-áirítear gnólachtaí nuathionscanta, beidh na fineálacha sin chomh hard le 2 % dá láimhdeachas bliantúil domhanda don bhliain airgeadais roimhe sin.

5. Maidir le soláthar faisnéise atá mícheart, neamhiomlán nó míthreorach do chomhlachtaí faoina dtugtar fógra agus d'údaráis inniúla náisiúnta mar fhreagra ar iarraidh, beidh sé faoi réir fineálacha riaracháin suas le EUR 10 000 000, nó, más cuideachta an é ciontóir, faoi réir fineála suas le 2 % dá láimhdeachas bliantúil iomlán domhanda sa bhliain airgeadais roimhe sin, cibé acu is airde. I gcás FBManna, lena n-áirítear gnólachtaí nuathionscanta, beidh na fineálacha sin chomh hard le 1 % dá láimhdeachas bliantúil domhanda don bhliain airgeadais roimhe sin.
6. Agus cinneadh á dhéanamh maidir le méid na fineála riaracháin i ngach cás aonair, cuirfear na himthosca ábhartha uile a bhaineann leis an gcás sonrach san áireamh agus tabharfar aird chuí ar an méid seo a leanas:
- (a) cineál, tromaíocht agus fad an tsáraithe agus a iarmhairtí;
 - (aa) cineál an tsáraithe a bheith déanta d'aon ghnó nó le faillí;
 - (ab) aon ghníomhaíocht arna déanamh ag an oibreoir chun an sárú a leigheas agus chun éifeachtaí díobhálacha féideartha an tsáraithe a mhaolú;

- (b) ar chuir údaráis eile um fhaireachas margaidh fineálacha riaracháin i bhfeidhm cheana féin i mBallstát eile ar an oibreoir céanna as an sárú céanna;
- (ba) ar chuir údaráis eile fineálacha riaracháin i bhfeidhm cheana féin ar an oibreoir céanna i leith sárúithe ar dhlí eile de chuid an Aontais nó ar dhlí náisiúnta eile, nuair a bhíonn sárúithe den sórt sin mar thoradh ar an ngníomhaíocht chéanna nó ar an neamhghníomh céanna ar sárú ábhartha ar an nGníomh seo é;
- (c) méid, láimhdeachas bliantúil agus sciar margaidh an oibreora a bhfuil an sárú á dhéanamh aige;
- (d) aon imthoisc ghéaraitheach nó mhaolaitheach eile is infheidhme maidir le dálaí an cháis, amhail sochair airgeadais a gnóthaíodh, nó cailteanais a seachnaíodh, go díreach nó go hindíreach, as an sárú.
7. Déanfaidh gach Ballstát na rialacha a leagan síos faoi cibé an bhféadfar, agus a mhéid a fhéadfar, fineálacha riaracháin a ghearradh ar údaráis agus ar chomhlachtaí poiblí a bunaíodh sa Bhallstát sin.
8. Ag brath ar chóras dlí na mBallstát, féadfar na rialacha maidir le fineálacha riaracháin a chur i bhfeidhm sa chaoi is go ngearrfaidh cúirteanna náisiúnta inniúla nó comhlachtaí eile na fineálacha de réir mar is infheidhme sna Ballstáit sin. Beidh éifeacht choibhéiseach ag cur i bhfeidhm na rialacha sin sna Ballstáit sin.
9. Beidh feidhmiú a chumhachtaí ag an údarás um fhaireachas margaidh faoin Airteagal seo faoi réir coimircí nós imeachta iomchuí i gcomhréir le dlí an Aontais agus le dlí Ballstáit, lena n-áirítear leigheas breithiúnach éifeachtach agus próis chúí.

Airteagal 72

Fíneálacha riaracháin ar institiúidí, gníomhaireachtaí agus comhlachtaí an Aontais

1. Féadfaidh an Maoirseoir Eorpach ar Chosaint Sonraí fíneálacha riaracháin a ghearradh ar institiúidí, gníomhaireachtaí agus comhlachtaí an Aontais a thagann faoi raon feidhme an Rialacháin seo. Agus cinneadh á dhéanamh maidir le fíneáil riaracháin a ghearradh agus maidir le méid na fíneála riaracháin i ngach cás aonair, cuirfear na himthosca ábhartha uile a bhaineann leis an gcás sonrath san áireamh agus tabharfar aird chuí ar an méid seo a leanas:
 - (a) cineál, tromaíocht agus fad an tsáraithe agus a iarmhairtí;
 - (b) an comhoibriú leis an Maoirseoir Eorpach ar Chosaint Sonraí chun an sárú a leigheas agus chun éifeachtaí díobhálacha féideartha an tsáraithe a mhaolú, lena n-áirítear aon cheann de na bearta a d'ordaigh an Maoirseoir Eorpach ar Chosaint Sonraí roimhe sin i gcoinne institiúid, ghníomhaireacht nó chomhlacht an Aontais lena mbaineann a chomhlíonadh, maidir leis an ábhar céanna;
 - (c) aon sárú den chineál céanna a rinne institiúid, gníomhaireacht nó comhlacht an Aontais roimhe;
2. Maidir le neamhchomhlíonadh aon toirmisc ar na cleachtais intleachta saorga dá dtagraítear in Airteagal 5, beidh an neamhchomhlíonadh sin faoi réir fíneálacha riaracháin suas le EUR 500 000.
3. Maidir le neamhchomhlíontacht an chórais intleachta saorga le haon cheanglas nó oibleagáid faoin Rialachán seo, seachas na ceanglais nó na hoibleagáidí a leagtar síos in Airteagail 5 agus 10, beidh an neamhchomhlíontacht sin faoi réir fíneálacha riaracháin suas le EUR 250 000.
4. Sula ndéantar cinneadh de bhun an Airteagail seo, tabharfaidh an Maoirseoir Eorpach ar Chosaint Sonraí deis d'institiúid, gníomhaireacht nó comhlacht an Aontais is ábhar do na himeachtaí atá á riar ag an Maoirseoir Eorpach ar Chosaint Sonraí éisteacht a fháil ar na nithe a bhfuil agóid ardaithe ag an Maoirseoir Eorpach ar Chosaint Sonraí ina leith. Ní bhunóidh an Maoirseoir Eorpach ar Chosaint Sonraí a chinntí ar aon ní ach amháin ar na heilimintí agus imthosca a raibh ar chumas na bpáirtithe lena mbaineann tuairim a thabhairt ina leith. Beidh dlúthbhaint ag na gearánaigh, más ann dóibh, leis na himeachtaí.

5. Déanfar cearta cosanta na bpáirtithe lena mbaineann a urramú go hiomlán le linn na n-imeachtaí. Beidh siad i dteideal rochtain a fháil ar chomhad an Mhaoirseora Eorpaigh ar Chosaint Sonraí, faoi réir leas dlisteanach daoine aonair nó gnólachtaí maidir lena gcuid sonraí pearsanta nó a gcuid rúin ghnó a chosaint.
6. Beidh cistí a bhailítear trí fhíneálacha a ghearradh faoin Airteagal seo ina ioncam de chuid bhuiséad ginearálta an Aontais.

TEIDEAL XI

TARMLIGEAN CUMHACHTA AGUS AN NÓS IMEACHTA COISTE

Airteagal 73

An tarmligean a fheidhmiú

1. Is faoi réir na gcoinníollacha a leagtar síos san Airteagal seo a thugtar an chumhacht don Choimisiún chun gníomhartha tarmligthe a ghlacadh.
2. Tabharfar tarmligean na cumhachta dá dtagraítear in Airteagal 7(1), Airteagal 7(3), Airteagal 11(3), Airteagal 43(5) agus (6) agus Airteagal 48(5) don Choimisiún go ceann tréimhse 5 bliana ó [*theacht i bhfeidhm an Rialacháin seo*].

Déanfaidh an Coimisiún, tráth nach déanaí ná 9 mí roimh dheireadh na tréimhse 5 bliana, tuarascáil a tharraingt suas maidir le tarmligean na cumhachta. Déanfar tarmligean na cumhachta a fhadú go hintuigthe go ceann tréimhsí comhfhaid, mura rud é go gcuireann Parlaimint na hEorpa nó an Chomhairle in aghaidh an fhadaíthe sin tráth nach déanaí ná 3 mhí roimh dheireadh gach tréimhse.

3. Féadfaidh Parlaimint na hEorpa nó an Chomhairle tarmligean na cumhachta dá dtagraítear in Airteagal 7(1), Airteagal 7(3), Airteagal 11(3), Airteagal 43(5) agus (6) agus Airteagal 48(5) a chúlghairm tráth ar bith. Le cinneadh chun cúlghairm a dhéanamh, cuirfear deireadh le tarmligean na cumhachta a shonraítear sa chinneadh sin. Gabhfaidh éifeacht leis an lá tar éis lá a fhoilsithe in *Iris Oifigiúil an Aontais Eorpaigh* nó ar dháta is déanaí a shonrófar sa chinneadh. Ní dhéanfaidh sé difear do bhailíocht aon ghnímh tharmligthe atá i bhfeidhm cheana.
4. A luaithe a ghlacfaidh sé gníomh tarmligthe, tabharfaidh an Coimisiún fógra, an tráth céanna, do Pharlaimint na hEorpa agus don Chomhairle faoi.
5. Ní thiocfaidh gníomh tarmligthe a ghlactar de bhun Airteagal 7(1), Airteagal 7(3), Airteagal 11(3), Airteagal 43(5) agus (6) agus Airteagal 48(5) i bhfeidhm ach amháin mura mbeidh aon agóid curtha in iúl ag Parlaimint na hEorpa nó ag an gComhairle laistigh de thréimhse 3 mhí tar éis fógra faoin ngníomh sin a thabhairt do Pharlaimint na hEorpa agus don Chomhairle nó más rud é, roimh dhul in éag na tréimhse sin, go mbeidh Parlaimint na hEorpa agus an Chomhairle araon tar éis a chur in iúl don Choimisiún nach ndéanfaidh siad aon agóid. Déanfar an tréimhse sin a fhadú 3 mhí ar thionscnamh Pharlaimint na hEorpa nó na Comhairle.

Airteagal 74

Nós imeachta coiste

1. Tabharfaidh coiste cúnaimh don Choimisiún. Beidh an coiste sin ina choiste de réir bhrí Rialachán (AE) Uimh. 182/2011.
2. I gcás ina ndéantar tagairt don mhír seo, beidh feidhm ag Airteagal 5 de Rialachán (AE) Uimh. 182/2011.

TEIDEAL XII

FORÁLACHA CRÍOCHNAITHEACHA

Airteagal 75

Leasú ar Rialachán (CE) Uimh. 300/2008

In Airteagal 4(3) de Rialachán (CE) 300/2008, cuirtear an fhomhír seo a leanas leis:

‘Agus bearta mionsonraithe á nglacadh a bhaineann le sonraíochtaí teicniúla agus nósanna imeachta chun trealamh slándála i ndáil le córais intleachta saorga a cheadú agus a úsáid, de réir bhrí Rialachán (AE) BBBB/XX [maidir leis an intleacht shaorga] ó Pharlaimint na hEorpa agus ón gComhairle*, cuirfear na ceanglais a leagtar amach i gCaibidil 2, Teideal III den Rialachán sin san áireamh.’

* Rialachán (AE) BBBB/XX [maidir leis an intleacht shaorga] (IO...).

Airteagal 76

Leasú ar Rialachán (AE) Uimh. 167/2013

In Airteagal 17 (5) de Rialachán (AE) Uimh. 167/2013, cuirtear an fhomhír seo a leanas leis:

‘Agus gníomhartha tarmligthe á nglacadh de bhun na chéad fhomhíre maidir le córais intleachta saorga ar comhpháirteanna sábháilteachta iad de réir bhrí Rialachán (AE) BBBB/XX [maidir leis an intleacht shaorga] ó Pharlaimint na hEorpa agus ón gComhairle*, cuirfear na ceanglais a leagtar amach i dTeideal III, Caibidil 2 den Rialachán sin san áireamh.

* Rialachán (AE) BBBB/XX [maidir leis an intleacht shaorga] (IO...).’

Airteagal 77

Leasú ar Rialachán (AE) Uimh. 168/2013

In Airteagal 22 (5) de Rialachán (AE) Uimh. 168/2013, cuirtear an fhomhír seo a leanas leis:

‘Agus gníomhartha tarmligthe á nglacadh de bhun na chéad fhomhíre maidir le córais intleachta saorga ar comhpháirteanna sábháilteachta iad de réir bhrí Rialachán (AE) BBBB/XX maidir leis [an intleacht shaorga] ó Pharlaimint na hEorpa agus ón gComhairle*, cuirfear na ceanglais a leagtar amach i dTeideal III, Caibidil 2 den Rialachán sin san áireamh.

* Rialachán (AE) BBBB/XX [maidir leis an intleacht shaorga] (IO...).’

Airteagal 78

Leasú ar Threoir 2014/90/AE

In Airteagal 8 de Threoir 2014/90/AE, cuirtear isteach an mhír seo a leanas:

‘4. Maidir le córais intleachta saorga ar comhpháirteanna sábháilteachta iad de réir bhí Rialachán (AE) BBBB/XX [maidir leis an Intleacht Shaorga] ó Pharlaimint na hEorpa agus ón gComhairle*, agus a ghníomhaíochtaí á ndéanamh aige de bhun mhír 1 agus le linn dó sonraíochtaí teicniúla agus caighdeáin tástála a ghlacadh i gcomhréir le míreanna 2 agus 3, cuirfidh an Coimisiún san áireamh na ceanglais a leagtar amach i dTeideal III, Caibidil 2 den Rialachán sin.

* Rialachán (AE) BBBB/XX [maidir leis an intleacht shaorga] (IO...).’

Airteagal 79

Leasú ar Threoir (AE) 2016/797

In Airteagal 5 de Threoir (AE) 2016/797, cuirtear an mhír seo a leanas leis:

‘12. Agus gníomhartha tarmligthe á nglacadh de bhun mhír 1 agus gníomhartha cur chun feidhme á nglacadh de bhun mhír 11 maidir le córais intleachta saorga ar comhpháirteanna sábháilteachta iad de réir bhrí Rialachán (AE) BBBB/XX [maidir leis an intleacht shaorga] ó Pharlaimint na hEorpa agus ón gComhairle*, cuirfear na ceanglais a leagtar amach i dTeideal III, Caibidil 2 den Rialachán sin san áireamh.

* Rialachán (AE) BBBB/XX [maidir leis an intleacht shaorga] (IO...).’.

Airteagal 80

Leasú ar Rialachán (AE) Uimh. 2018/858

In Airteagal 5 de Rialachán (AE) 2018/858, cuirtear an mhír seo a leanas leis:

‘4. Agus gníomhartha tarmligthe á nglacadh de bhun mhír 3 maidir le córais intleachta saorga ar comhpháirteanna sábháilteachta iad de réir bhrí Rialachán (AE) BBBB/XX [maidir leis an intleacht shaorga] ó Pharlaimint na hEorpa agus ón gComhairle*, cuirfear na ceanglais a leagtar amach i dTeideal III, Caibidil 2 den Rialachán sin san áireamh.

* Rialachán (AE) BBBB/XX [maidir leis an intleacht shaorga] (IO...).’.

Airteagal 81

Leasú ar Rialachán (AE) Uimh. 2018/1139

Leasaítear Rialachán (AE) 2018/1139 mar a leanas:

(1) In Airteagal 17, cuirtear an mhír seo a leanas leis:

‘3. Gan dochar do mhír 2, agus gníomhartha cur chun feidhme á nglacadh de bhun mhír 1 maidir le córais intleachta saorga ar comhpháirteanna sábháilteachta iad de réir bhrí Rialachán (AE) BBBB/XX [maidir leis an intleacht shaorga] ó Pharlaimint na hEorpa agus ón gComhairle*, cuirfear na ceanglais a leagtar amach i dTeideal III, Caibidil 2 den Rialachán sin san áireamh.

* Rialachán (AE) BBBB/XX [maidir leis an intleacht shaorga] (IO...).’

(2) In Airteagal 19, cuirtear an mhír seo a leanas leis:

‘4. Agus gníomhartha tarmligthe á nglacadh de bhun mhíreanna 1 agus 2 maidir le córais Intleachta Saorga ar comhpháirteanna sábháilteachta iad de réir bhrí Rialachán (AE) BBBB/XX [maidir leis an intleacht shaorga], cuirfear san áireamh na ceanglais a leagtar amach i dTeideal III, Caibidil 2 den Rialachán sin.’

(3) In Airteagal 43, cuirtear an mhír seo a leanas leis:

‘4. Agus gníomhartha cur chun feidhme á nglacadh de bhun mhír 1 maidir le córais Intleachta Saorga ar comhpháirteanna sábháilteachta iad de réir bhrí Rialachán (AE) BBBB/XX [maidir leis an intleacht shaorga], cuirfear san áireamh na ceanglais a leagtar amach i dTeideal III, Caibidil 2 den Rialachán sin.’

(4) In Airteagal 47, cuirtear an mhír seo a leanas leis:

‘3. Agus gníomhartha tarmhligthe á nglacadh de bhun mhíreanna 1 agus 2 maidir le córais Intleachta Saorga ar comhpháirteanna sábháilteachta iad de réir bhrí Rialachán (AE) BBBB/XX [maidir leis an intleacht shaorga], cuirfear san áireamh na ceanglais a leagtar amach i dTeideal III, Caibidil 2 den Rialachán sin.’

(5) In Airteagal 57, cuirtear an mhír seo a leanas leis:

‘Agus na gníomhartha cur chun feidhme sin á nglacadh maidir le córais Intleachta Saorga ar comhpháirteanna sábháilteachta iad de réir bhrí Rialachán (AE) BBBB/XX [maidir leis an intleacht shaorga], cuirfear san áireamh na ceanglais a leagtar amach i dTeideal III, Caibidil 2 den Rialachán sin.’

(6) In Airteagal 58, cuirtear an mhír seo a leanas leis:

‘3. Agus gníomhartha tarmhligthe á nglacadh de bhun mhíreanna 1 agus 2 maidir le córais Intleachta Saorga ar comhpháirteanna sábháilteachta iad de réir bhrí Rialachán (AE) BBBB/XX [maidir leis an intleacht shaorga], cuirfear san áireamh na ceanglais a leagtar amach i dTeideal III, Caibidil 2 den Rialachán sin.’

Airteagal 82

Leasú ar Rialachán (AE) Uimh. 2019/2144

In Airteagal 11 de Rialachán (AE) 2019/2144, cuirtear an mhír seo a leanas leis:

‘3. Agus gníomhartha cur chun feidhme á nglacadh de bhun mhír 2 maidir le córais intleachta saorga ar comhpháirteanna sábháilteachta iad de réir bhrí Rialachán (AE) BBBB/XX [maidir leis an intleacht shaorga] ó Pharlaimint na hEorpa agus ón gComhairle*, cuirfear na ceanglais a leagtar amach i dTeideal III, Caibidil 2 den Rialachán sin san áireamh.

* Rialachán (AE) BBBB/XX [maidir leis an intleacht shaorga] (IO...).’

Airteagal 83

Córais intleachta saorga ardriosca a cuireadh ar an margadh nó i mbun seirbhíse cheana féin

1. Ní bheidh feidhm ag an Rialachán seo maidir leis na córais intleachta saorga ar comhpháirteanna iad de na córais TF mhórsála arna mbunú leis na gníomhartha dlí a liostaítear in Iarscríbhinn IX agus a cuireadh ar an margadh nó i mbun seirbhíse roimh [12 mhí tar éis dháta chur i bhfeidhm an Rialacháin seo dá dtagraítear in Airteagal 85(2)], mura rud é go mbeidh athrú suntasach ar dhearadh an chórais intleachta saorga nó na gcóras intleachta saorga lena mbaineann, nó ar an gcríoch atá beartaithe dóibh.

Cuirfear na ceanglais a leagtar síos sa Rialachán seo san áireamh, i gcás inarb infheidhme, sa mheastóireacht ar gach córas mórsála TF a bhunaítear leis na gníomhartha dlí a liostaítear in Iarscríbhinn IX agus atá le cur i gcrích de réir mar a fhoráiltear sna gníomhartha sin faoi seach.

2. Beidh feidhm ag an Rialachán seo maidir leis na córais intleachta saorga ardriosca, seachas na córais dá dtagraítear i mír 1, a cuireadh ar an margadh nó a cuireadh i mbun seirbhíse roimh [dáta chur i bhfeidhm an Rialacháin seo dá dtagraítear in Airteagal 85(2)], más rud é, ón dáta sin ar aghaidh, go mbeidh na córais sin faoi réir athruithe suntasacha maidir lena ndearadh nó leis an gcríoch atá beartaithe dóibh.

Airteagal 84

Meastóireacht agus athbhreithniú

1. [scriosta]
- 1b. Déanfaidh an Coimisiún measúnú ar an ngá atá le leasú a dhéanamh ar an liosta atá in Iarscríbhinn III gach 24 mhí tar éis theacht i bhfeidhm an Rialacháin seo agus go dtí deireadh thréimhse an tarmligin cumhachta. Cuirfear torthaí an mheasúnaithe sin faoi bhráid Pharlaimint na hEorpa agus na Comhairle.

2. Faoin [3 bliana tar éis dháta chur i bhfeidhm an Rialacháin seo dtagraítear in *Airteagal 85(2)*], agus gach 4 bliana ina dhiaidh sin, cuirfidh an Coimisiún tuarascáil ar mheastóireacht agus athbhreithniú an Rialacháin seo faoi bhráid Pharlaimint na hEorpa agus na Comhairle. Cuirfear na tuarascálacha ar fáil go poiblí.
3. Sna tuarascálacha dá dtagraítear i mír 2, tabharfar aird shonrach ar an méid seo a leanas:
 - (a) stádas acmhainní airgeadais, trealamh teicniúil agus daonna na n-údarás inniúil náisiúnta chun na cúraimí a shanntar dóibh faoin Rialachán seo a dhéanamh go héifeachtach;
 - (b) staid na bpionós, agus go háirithe, staid na bhfíneálacha riaracháin dá dtagraítear in *Airteagal 71(1)*, arna gcur i bhfeidhm ag na Ballstáit maidir le sáruithe ar fhorálacha an Rialacháin seo.
4. Laistigh de [3 bliana tar éis dháta chur i bhfeidhm an Rialacháin seo dá dtagraítear in *Airteagal 85(2)*] agus gach 4 bliana ina dhiaidh sin, i gcás inarb iomchuí, déanfaidh an Coimisiún meastóireacht ar thionchar agus ar éifeachtacht na gcód iompair deonach chun cur i bhfeidhm na gceanglas a leagtar amach i dTeideal III, Caibidil 2 le haghaidh córais intleachta saorga a chothú seachas córais intleachta saorga ardriosca, mar aon le ceanglais bhreise eile maidir le córais intleachta saorga, más féidir, lena n-áirítear a mhéid a bhaineann le hinbhuanaitheacht comhshaoil.
5. Chun críoch mhíreanna 1a go 4, cuirfidh an Bord, na Ballstáit agus na húdaráis inniúla náisiúnta faisnéis ar fáil don Choimisiún ar iarraidh sin dó.
6. I gcur i gcrích na meastóireachtaí agus na n-athbhreithnithe dá dtagraítear i míreanna 1a go 4, cuirfidh an Coimisiún san áireamh na seasaimh agus na cinntí ó Pharlaimint na hEorpa, ón gComhairle, agus ó chomhlachtaí nó foinsí ábhartha eile chomh maith.
7. Más gá, tíolacfaidh an Coimisiún tograí iomchuí d'fhonn an Rialachán seo a leasú, ag cur san áireamh go háirithe forbairtí maidir leis an teicneolaíocht agus i bhfianaise staid an dul chun cinn sa tsochaí faisnéise.

Airteagal 85

Teacht i bhfeidhm agus cur i bhfeidhm

1. Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.
2. Beidh feidhm ag an Rialachán seo ón [36 mhí tar éis theacht i bhfeidhm an Rialacháin].
3. De mhaolú ar mhír 2:
 - (a) Beidh feidhm ag Teideal III, Caibidil 4 agus Teideal VI ón [12 mhí tar éis theacht i bhfeidhm an Rialacháin seo];
 - (b) Beidh feidhm ag Airteagal 71 ón [dáta dhá mhí dhéag tar éis theacht i bhfeidhm an Rialacháin seo].

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil,

Thar ceann Pharlaimint na hEorpa
An tUachtarán

Thar ceann na Comhairle
An tUachtarán

IARSCRÍBHINN I

[scriosta]



IARSCRÍBHINN II

LIOSTA DE REACHTAÍOCHT CHOMHCHUIBHITHE AN AONTAIS

Roinn A – Liosta de reachtaíocht chomhchuibhithe an Aontais bunaithe ar an gCreat Reachtach Nua

1. Treoir 2006/42/CE ó Pharlaimint na hEorpa agus ón gComhairle an 17 Bealtaine 2006 maidir le hinnealra, agus lena leasaítear Treoir 95/16/CE (IO L 157, 9.6.2006, lch. 24) [arna haisghairm leis an Rialachán maidir le hInnealra];
2. Treoir 2009/48/CE ó Pharlaimint na hEorpa agus ón gComhairle an 18 Meitheamh 2009 maidir le sábháilteacht bréagán (IO L 170, 30.6.2009, lch. 1);
3. Treoir 2013/53/AE ó Pharlaimint na hEorpa agus ón gComhairle an 20 Samhain 2013 maidir le hárthaí siamsaíochta agus árthaí pearsanta uisce agus lena n-aisghairtear Treoir 94/25/CE (IO L 354, 28.12.2013, lch. 90);
4. Treoir 2014/33/AE ó Pharlaimint na hEorpa agus ón gComhairle an 26 Feabhra 2014 maidir le comhchuibhiú dhlíthe na mBallstát i dtaca le hardaitheoirí agus le comhpháirteanna sábháilteachta le haghaidh ardaitheoirí. (IO L 96, 29.3.2014, lch. 251);
5. Treoir 2014/34/AE ó Pharlaimint na hEorpa agus ón gComhairle an 26 Feabhra 2014 maidir le comhchuibhiú dhlíthe na mBallstát a bhaineann le trealamh agus córais chosanta atá ceaptha chun úsáid in atmaisféir a d'fhéadfadh bheith pléascach (IO L 96, 29.3.2014, lch. 309);
6. Treoir 2014/53/AE ó Pharlaimint na hEorpa agus ón gComhairle an 16 Aibreán 2014 maidir le comhchuibhiú dhlíthe na mBallstát a bhaineann le trealamh raidió a chur ar fáil ar an margadh agus lena n-aisghairtear Treoir 1999/5/CE (IO L 153, 22.5.2014, lch. 62);
7. Treoir 2014/68/AE ó Pharlaimint na hEorpa agus ón gComhairle an 15 Bealtaine 2014 maidir le comhchuibhiú dhlíthe na mBallstát a bhaineann le brú-threalamh a chur ar fáil ar an margadh (IO L 189, 27.6.2014, lch. 164);

8. Rialachán (AE) 2016/424 ó Pharlaimint na hEorpa agus ón gComhairle an 9 Márta 2016 maidir le suiteálacha cábla-bhealaigh agus lena n-aisghairtear Treoir 2000/9/CE (IO L 81, 31.3.2016, lch. 1);
9. Rialachán (AE) 2016/425 ó Pharlaimint na hEorpa agus ón gComhairle an 9 Márta 2016 maidir le trealamh cosanta pearsanta agus lena n-aisghairtear Treoir 89/686/CEE ón gComhairle (IO L 81, 31.3.2016, lch. 51);
10. Rialachán (AE) 2016/426 ó Pharlaimint na hEorpa agus ón gComhairle an 9 Márta 2016 maidir le fearais a dhóinn breoslaí gásacha agus lena n-aisghairtear Treoir 2009/142/CE (IO L 81, 31.3.2016, lch. 99);
11. Rialachán (AE) 2017/745 ó Pharlaimint na hEorpa agus ón gComhairle an 5 Aibreán 2017 maidir le feistí leighis, lena leasaítear Treoir 2001/83/CE, Rialachán (CE) Uimh. 178/2002 agus Rialachán (CE) Uimh. 1223/2009 agus lena n-aisghairtear Treoracha 90/385/CEE agus 93/42/CEE ón gComhairle (IO L 117, 5.5.2017, lch. 1);
12. Rialachán (AE) 2017/746 ó Pharlaimint na hEorpa agus ón gComhairle an 5 Aibreán 2017 maidir le feistí leighis diagnóiseacha *in vitro* agus lena n-aisghairtear Treoir 98/79/CE agus Cinneadh 2010/227/AE ón gCoimisiún (IO L 117, 5.5.2017, lch. 176).

Roinn B. Liosta de reachtaíocht chomhchuibhithe eile de chuid an Aontais

1. Rialachán (CE) Uimh. 300/2008 ó Pharlaimint na hEorpa agus ón gComhairle an 11 Márta 2008 maidir le rialacha comhchoiteanna i réimse slándála na heitlíochta sibhialta agus lena n-aisghairtear Rialachán (CE) Uimh. 2320/2002 (IO L 97, 9.4.2008, lch. 72).
2. Rialachán (AE) Uimh. 168/2013 ó Pharlaimint na hEorpa agus ón gComhairle an 15 Eanáir 2013 maidir le ceadú agus le faireachas margaidh ar fheithiclí dhá nó trí roth agus cuadrothair (IO L 60, 2.3.2013, lch. 52);
3. Rialachán (AE) Uimh. 167/2013 ó Pharlaimint na hEorpa agus ón gComhairle an 5 Feabhra 2013 maidir le formheas agus le faireachas margaidh ar fheithiclí talmhaíochta agus foraoiseachta (IO L 60, 2.3.2013, lch. 1);
4. Treoir 2014/90/AE ó Pharlaimint na hEorpa agus ón gComhairle an 23 Iúil 2014 maidir le trealamh muirí agus lena n-aisghairtear Treoir 96/98/CE ón gComhairle (IO L 257, 28.8.2014, lch. 146);
5. Treoir (AE) 2016/797 ó Pharlaimint na hEorpa agus ón gComhairle an 11 Bealtaine 2016 maidir le hidir-inoibritheacht an chórais iarnróid laistigh den Aontas Eorpach, (IO L 138, 26.5.2016, lch. 44).
6. Rialachán (AE) 2018/858 ó Pharlaimint na hEorpa agus ón gComhairle an 30 Bealtaine 2018 maidir le ceadú mótarfheithiclí agus a leantóirí, agus córas, comhpháirteanna agus aonad teicniúil ar leithligh atá ceaptha le haghaidh feithiclí den sórt sin, agus faireachas margaidh orthu, lena leasaítear Rialachán (CE) Uimh. 715/2007 agus Rialachán (CE) Uimh. 595/2009 agus lena n-aisghairtear Treoir 2007/46/CE (IO L 151, 14.6.2018, lch. 1);

7. Rialachán (AE) 2019/2144 ó Pharlaimint na hEorpa agus ón gComhairle an 27 Samhain 2019 maidir le ceanglais chineálcheadaithe do mhótarfeithiclí agus a leantóirí, agus córais, comhphárteanna agus aonaid theicniúla ar leithligh le haghaidh feithiclí den sórt sin, a mhéid a bhaineann lena sábháilteacht ghinearálta agus cosaint na ndaoine atá i bhfeithiclí agus úsáideoirí soghonta bóthair, lena leasaítear Rialachán (AE) 2018/858 ó Pharlaimint na hEorpa agus ón gComhairle agus lena n-aisghairtear Rialacháin (CE) Uimh. 78/2009, (CE) Uimh. 79/2009 agus (CE) Uimh. 661/2009 ó Pharlaimint na hEorpa agus ón gComhairle agus Rialacháin (CE) Uimh. 631/2009, (AE) Uimh. 406/2010, (AE) Uimh. 672/2010, (AE) Uimh. 1003/2010, (AE) Uimh. 1005/2010, (AE) Uimh. 1008/2010, (AE) Uimh. 1009/2010, (AE) Uimh. 19/2011, (AE) Uimh. 109/2011, (AE) Uimh. 458/2011, (AE) Uimh. 65/2012, (AE) Uimh. 130/2012, (AE) Uimh. 347/2012, (AE) Uimh. 351/2012, (AE) Uimh. 1230/2012 agus (AE) 2015/166 ón gCoimisiún (IO L 325, 16.12.2019, lch 1.);
8. Rialachán (AE) 2018/1139 ó Pharlaimint na hEorpa agus ón gComhairle an 4 Iúil 2018 maidir le rialacha comhchoiteanna i réimse na heitlíochta sibhialta agus lena mbunaítear Gníomhaireacht Sábháilteachta Eitlíochta na hEorpa, agus lena leasaítear Rialachán (CE) Uimh. 2111/2005, Rialachán (CE) Uimh. 1008/2008, Rialachán (AE) Uimh. 996/2010, Rialachán (AE) Uimh. 376/2014 agus Treoir 2014/30/AE agus Treoir 2014/53/AE ó Pharlaimint na hEorpa agus ón gComhairle agus lena n-aisghairtear Rialachán (CE) Uimh. 552/2004 agus Rialachán (CE) Uimh. 216/2008 ó Pharlaimint na hEorpa agus ón gComhairle agus Rialachán (CEE) Uimh. 3922/91 ón gComhairle (IO L 212, 22.8.2018, lch. 1), a mhéid a bhaineann le dearadh, táirgeadh agus cur ar an margadh aerárthaí dá dtagraítear i bpointí (a) agus (b) d'Airteagal 2(1) de, i gcás ina mbaineann sé le haerárthaí gan foireann agus a n-innill, a liáin, a bpáirteanna agus a dtrealamh lena ndéantar cianrialú orthu.

IARSCRÍBHINN III
CÓRAIS INTLEACHTA SAORGA ARDRIOSCA DÁ dTAGRAÍTEAR IN
AIRTEAGAL 6(3)

I ngach ceann de na réimsí a liostaítear faoi phointí 1-8, meastar gur córais intleachta saorga ardriosca de bhun Airteagal 6(3) iad na córais intleachta saorga a luaitear go sonrach faoi gach litir:

1. Bithmhéadracht:
 - (a) Cianchóras sainaitheanta bithmhéadraí.

2. Bonneagar criticiúil:
 - (a) Córais intleachta saorga atá beartaithe lena n-úsáid mar chomhpháirteanna sábháilteachta i mbainistíocht agus in oibriú an bhonneagair dhigitigh chriticiúil, tráchta bóthair agus i soláthar uisce, gáis, téimh agus leictreachais.

3. Oideachas agus gairmoiliúint:
 - (a) Córais intleachta saorga atá beartaithe lena n-úsáid chun rochtain ar institiúidí oideachais agus gairmoiliúna nó ar chlár ar gach leibhéal a chinneadh nó chun daoine nádúrtha a ligeann isteach nó a shannadh chucu;
 - (b) Córais intleachta saorga atá beartaithe lena n-úsáid chun meastóireacht a dhéanamh ar thorthaí foghlama, lena n-áirítear nuair a úsáidtear na torthaí sin chun próiseas foghlama daoine nádúrtha a stiúradh in institiúidí oideachais agus gairmoiliúna nó i gclár ar gach leibhéal.

4. Fostaíocht, bainistiú fostaithe agus rochtain ar an bhféinfhostaíocht:
 - (a) Córais intleachta saorga atá beartaithe lena n-úsáid chun daoine nádúrtha a earcú nó a roghnú, go háirithe chun fógraí poist spriocdhírthe a fhógairt, chun scagthástáil nó scagadh a dhéanamh ar iarratais agus chun meastóireacht a dhéanamh ar iarrthóirí;

- (b) Intleacht shaorga atá beartaithe lena húsáid chun cinntí a dhéanamh maidir le caidrimh chonarthacha a bhaineann leis an obair a chur chun cinn agus a fhoirceannadh, chun tascanna a leithdháileadh ar bhonn iompraíocht aonair nó tréithe nó saintréithe pearsanta agus chun faireachán agus meastóireacht a dhéanamh ar fheidhmíocht agus ar iompraíocht daoine i gcaidrimh den sórt sin.
5. Rochtain ar sheirbhísí ríthábhachtacha príobháideacha agus ar sheirbhísí ríthábhachtacha poiblí agus sochair phoiblí agus tairbhiú díobh:
- (a) Córais intleachta saorga atá beartaithe lena n-úsáid ag údaráis phoiblí nó thar ceann údaráis phoiblí chun meastóireacht a dhéanamh ar incháilitheacht daoine nádúrtha le haghaidh sochair agus seirbhísí ríthábhachtacha cúnamh phoiblí, agus chun sochair agus seirbhísí den sórt sin a dheonú, a laghdú, a chúlghairm, nó a aiséileamh;
- (b) Córais intleachta saorga atá beartaithe lena n-úsáid chun meastóireacht a dhéanamh ar acmhainneacht chreidmheasa daoine nádúrtha nó chun a scór creidmheasa a bhunú, cé is moite de chórais intleachta saorga a chuireann soláthraithe ar micrifhiontair nó fiontair bheaga iad, mar a shainmhínítear san Iarscríbhinn a ghabhann le Moladh 2003/361/CE ón gCoimisiún, i mbun seirbhíse le haghaidh a n-úsáide féin;
- (c) Córais intleachta saorga atá beartaithe lena n-úsáid chun seirbhísí céadfheagartha éigeandála a sheoladh, nó chun tosaíocht a bhunú agus seirbhísí céadfheagartha éigeandála á seoladh, lena n-áirítear ag comhraiseoirí dóiteáin agus cúnamh leighis;
- (d) Córais intleachta saorga atá beartaithe lena n-úsáid le haghaidh measúnú riosca agus praghsála i ndáil le daoine nádúrtha i gcás árachas saoil agus árachas sláinte, cé is moite de chórais intleachta saorga a chuireann soláthraithe ar micrifhiontair nó fiontair bheaga iad, mar a shainmhínítear san Iarscríbhinn a ghabhann le Moladh 2003/361/CE ón gCoimisiún, i mbun seirbhíse le haghaidh a n-úsáide féin.
6. Forfheidhmiú an dlí:
- (a) Córais intleachta saorga atá beartaithe lena n-úsáid ag údaráis forfheidhmithe dlí nó thar a gceann chun measúnú a dhéanamh ar an riosca go ndéanfaidh duine nádúrtha cion nó go ndéanfaidh sé cion athuair nó ar an riosca go bhféadfadh duine nádúrtha a bheith ina íospartach cionta coiriúla;

- (b) Córais intleachta saorga atá beartaithe lena n-úsáid ag údaráis forfheidhmithe dlí nó thar a gceann mar bhrathadóirí éithigh agus uirlisí comhchosúla nó chun staid mhothúchánach duine nádúrtha a bhrath;
- (c) [scriosta]
- (d) Córais intleachta saorga atá beartaithe lena n-úsáid ag údaráis forfheidhmithe dlí nó thar a gceann chun meastóireacht a dhéanamh ar iontaofacht na fianaise agus cionta coiriúla á n-imscrúdú nó á n-ionchúiseamh;
- (e) Córais intleachta saorga atá beartaithe lena n-úsáid ag údaráis forfheidhmithe dlí nó thar a gceann chun tarlú nó atarlú ciona choiriúil iarbhír nó fhéideartha a thuar bunaithe ar phróifiliú daoine nádúrtha dá dtagraítear in Airteagal 3(4) de Threoir (AE) 2016/680 nó chun measúnú a dhéanamh ar thréithe agus saintréithe pearsantachta nó iompraíocht choiriúil daoine nádúrtha nó grúpaí san am atá thart;
- (f) Córais intleachta saorga atá beartaithe lena n-úsáid ag údaráis forfheidhmithe dlí nó thar a gceann le haghaidh próifiliú daoine nádúrtha dá dtagraítear in Airteagal 3(4) de Threoir (AE) 2016/680 le linn cionta coiriúla a bhrath, a imscrúdú nó a ionchúiseamh.
- (g) [scriosta]

7. Bainistíocht imirce, tearmainn agus rialaithe teorann:

- (a) Córais intleachta saorga atá beartaithe lena n-úsáid ag údaráis phoiblí inniúla nó thar a gceann mar bhrathadóirí éithigh agus uirlisí comhchosúla nó chun staid mhothúchánach duine nádúrtha a bhrath;
- (b) Córais intleachta saorga atá beartaithe lena n-úsáid ag údaráis phoiblí inniúla nó thar a gceann chun measúnú a dhéanamh ar riosca, lena n-áirítear riosca slándála, riosca imirce neamhrialta, nó riosca sláinte, riosca a bhaineann le duine nádúrtha a bhfuil sé beartaithe aige teacht isteach nó atá tar éis teacht isteach i gcóir Bhallstáit;

- (c) [scriosta]
- (d) Córais intleachta saorga atá beartaithe chun cúnamh a thabhairt d'údarais phoiblí inniúla nó thar a gceann chun scrúdú a dhéanamh ar na hiarratais ar thearmann, ar víosa nó ar cheadanna cónaithe agus na gearáin lena mbaineann maidir le hincháilitheacht na ndaoine nádúrtha a bhfuil iarratas ar stádas á dhéanamh acu a dheimhniú.

8. Próisis ceartais agus dhaonlathacha a riar:

- (a) Córais intleachta saorga atá beartaithe lena n-úsáid ag údarás breithiúnach nó thar a cheann chun fíoras agus an dlí a léirmhíniú agus chun an dlí a chur i bhfeidhm ar thacar coincréiteach fíoras.

IARSCRÍBHINN IV

DOICIMÉADACHT THEICNIÚIL dá dtagraítear in Airteagal 11(1)

Beidh an fhaisnéis seo a leanas ar a laghad sa doiciméadacht theicniúil dá dtagraítear in Airteagal 11(1), de réir mar is infheidhme maidir leis an gcóras intleachta saorga ábhartha:

1. tuairisc ghinearálta ar an gcóras intleachta saorga, lena n-áirítear an méid seo a leanas:
 - (a) an chríoch atá beartaithe don chóras, an duine/na daoine atá á fhorbairt, dáta agus leagan an chórais;
 - (b) an chaoi a n-idirghníomhaíonn an córas intleachta saorga nó an chaoi ar féidir é a úsáid chun idirghníomhú le crua-earraí nó bogearraí nach cuid iad den chóras intleachta saorga é féin, i gcás inarb infheidhme;
 - (c) na leaganacha de bhogearraí nó dochtarraí ábhartha agus aon cheanglas a bhaineann le leagan nuashonraithe;
 - (d) an tuairisc ar na foirmeacha uile ina gcuirtear an córas intleachta saorga ar an margadh nó ina gcuirtear i mbun seirbhíse é (e.g. pacáiste bogearra atá leabaithe i gcrua-earraí, in-íoslódáilte, API etc.);
 - (e) an tuairisc ar na crua-earraí ar a bhfuil sé beartaithe an córas intleachta saorga a rith;
 - (f) i gcás ina bhfuil an córas intleachta saorga ina chomhpháirt de tháirgí, de ghrianghraif nó de léaráidí ina léirítear gnéithe seachtracha, marcáil agus leagan amach inmheánach na dtáirgí sin;
 - (g) treoracha úsáide don úsáideoir agus, i gcás inarb infheidhme, treoracha suiteála;
2. Tuairisc mhionsonraithe ar eilimintí an chórais intleachta saorga agus ar an bpróiseas chun é a fhorbairt, lena n-áirítear an méid seo a leanas:
 - (a) na modhanna agus na céimeanna a rinneadh chun an córas intleachta saorga a fhorbairt, lena n-áirítear, i gcás inarb ábhartha, iontaoibh ar chórais agus ar uirlisí réamhoilte arna gcur ar fáil ag tríú páirtithe agus an chaoi a ndearna an soláthraí iad a úsáid, a chomhtháthú nó a mhodhnú;

- (b) sonraíochtaí deartha an chórais, eadhon loighic ghinearálta an chórais intleachta saorga agus na n-argartam; na roghanna deartha tábhachtacha lena n-áirítear an réasúnaíocht agus na toimhdí a rinneadh, maidir le daoine nó grúpaí daoine chomh maith a bhfuil sé beartaithe an córas a úsáid ina leith; na príomhroghanna aicmithe; an rud a bhfuil sé beartaithe an córas a dhearadh lena optamú agus ábharthacht na bparaiméadar éagsúil; cur síos ar aschur ionchasach an chórais; na cinní faoi aon chomhhabhtáil a d'fhéadfadh a bheith déanta maidir leis na réitigh theicniúla arna nglacadh chun na ceanglais a leagtar amach i dTeideal III, Caibidil 2 a chomhlíonadh;
- (c) tuairisc ar ailtireacht an chórais ina mínítear conas a thógann comhpháirteanna bogearraí ar a chéile nó conas a chuireann siad lena chéile agus conas a chomhtháthaítear iad sa phróiseáil fhoriomlán; na hacmhainní ríomhaireachta a úsáidtear chun an córas intleachta saorga a fhorbairt, chun oiliúint a chur air, é a thástáil agus a bhailíochtú;
- (d) i gcás inarb ábhartha, na ceanglais sonraí i dtéarmaí bileoga sonraí ina gcuirtear síos ar na modheolaíochtaí agus teicnící oiliúna agus ar na tacair sonraí oiliúna a úsáidtear, lena n-áirítear cur síos ginearálta ar na tacair sonraí sin, faisnéis maidir lena bhfoinse, a raon feidhme agus a bpríomh-shaintréithe; an chaoi a bhfuarthas agus a roghnaíodh na sonraí; nósanna imeachta lipéadaithe (e.g. i gcás foghlaim faoi mhaoirseacht), modheolaíochtaí glanta sonraí (e.g. asluitigh a bhrath);
- (e) measúnú ar na bearta formhaoirseachta daonna atá riachtanach i gcomhréir le hAirteagal 14, lena n-áirítear measúnú ar na bearta teicniúla atá riachtanach chun léirmhíniú na n-úsáideoirí ar aschur na gcóras intleachta saorga a éascú, i gcomhréir le hAirteagail 13 (3)(d);
- (f) i gcás inarb infheidhme, tuairisc mhionsonraithe ar athruithe réamhshocraithe ar an gcóras intleachta saorga agus ar a fheidhmíocht, in éineacht leis an bhfaisnéis ábhartha uile a bhaineann leis na réitigh theicniúla a glacadh chun a áirithiú go gcomhlíonann an córais intleachta saorga go leanúnach na ceanglais ábhartha a leagtar amach i dTeideal III, Caibidil 2;

- (g) na nósanna imeachta bailíochtaithe agus tástála a úsáideadh, lena n-áirítear faisnéis faoi na sonraí bailíochtaithe agus tástála a úsáideadh agus a bpríomh-shaintréithe; an mhéadracht a úsáidtear chun cruinneas, stóinseacht, cibearshlándaíl agus comhlíonadh ceanglas ábhartha eile a leagtar amach i dTeideal III, Caibidil 2 a thomhas, chomh maith le tionchair a d'fhéadfadh a bheith idirdhealaitheach; logaí tástála agus na tuarascálacha tástála uile arna ndátú agus arna síniú ag na daoine freagracha, lena n-áirítear maidir le hathruithe réamhshocráithe dá dtagraítear faoi phointe (f).
3. Faisnéis mhionsonraithe i ndáil le faireachán, feidhmiú agus rialú an chórais intleachta saorga, go háirithe maidir leis an méid seo a leanas: a inniúlachtaí agus a teorainneacha maidir le feidhmíocht, lena n-áirítear na céimeanna cruinnis le haghaidh daoine sonracha nó grúpaí daoine a bhfuil sé beartaithe an córas a úsáid ina leith agus an leibhéal foriomlán cruinnis i ndáil leis an gcríoch atá beartaithe dó; na torthaí neamhbheartaithe intuartha agus na foinsí riosca don tsláinte agus sábháilteacht, do chearta bunúsacha agus d'idirdhealú i bhfianaise na críche atá beartaithe don chóras intleachta saorga; na bearta formhaoirseachta daonna atá riachtanach i gcomhréir le hAirteagal 14, lena n-áirítear na bearta teicniúla a cuireadh i bhfeidhm chun léirmhíniú na n-úsáideoirí ar aschur na gcóras intleachta saorga a éascú; sonraíochtaí maidir le sonraí ionchuir, de réir mar is iomchuí;
4. Tuairisc mhionsonraithe ar an gcóras bainistíochta riosca i gcomhréir le hAirteagal 9;
5. Tuairisc ar na hathruithe ábhartha arna ndéanadh ag an soláthar ar an gcóras le linn a shaolré;
6. Liosta de na caighdeáin chomhchuibhithe a chuirtear i bhfeidhm go hiomlán nó go páirteach, a bhfuil a gcuid tagairtí foilsithe in Iris Oifigiúil an Aontais Eorpaigh; i gcás nár cuireadh caighdeáin chomhchuibhithe den sórt sin i bhfeidhm, tuairisc mhionsonraithe ar na réitigh a glacadh chun na ceanglais a leagtar amach i dTeideal III, Caibidil 2 a chomhlíonadh, lena n-áirítear liosta de na caighdeáin agus na sonraíochta teicniúla ábhartha eile a cuireadh i bhfeidhm;
7. Cóip den dearbhú comhréireachta AE;
8. Tuairisc mhionsonraithe ar an gcóras atá i bhfeidhm chun meastóireacht a dhéanamh ar fheidhmíocht an chórais intleachta saorga sa chéim iarmhargaidh i gcomhréir le hAirteagal 61, lena n-áirítear an plean faireacháin iarmhargaidh dá dtagraítear in Airteagal 61(3).

IARSCRÍBHINN V
DEARBHÚ COMHRÉIREACHTA AN AONTAIS EORPAIGH

Beidh i ndearbhú comhréireachta AE dá dtagraítear in Airteagal 48, an fhaisnéis seo uile a leanas:

1. Ainm agus cineál an chórais intleachta saorga agus aon tagairt bhreise gan athbhrí lenar féidir an córas intleachta saorga a shainaithint agus a rianú;
2. Ainm agus seoladh an tsoláthraí nó, más infheidhme, ainm agus seoladh a ionadaí údaráithe;
3. Ráiteas gur faoi fhreagracht aonair an tsoláthraí a eisítear an dearbhú comhréireachta AE;
4. Ráiteas go bhfuil an córas intleachta saorga atá i gceist i gcomhréir leis an Rialachán seo agus, más infheidhme, le haon reachtaíocht ábhartha eile de chuid an Aontais faoina bhforáiltear d'eisiúint dhearbhú comhréireachta AE;
5. Tagairtí d'aon chaighdeán comhchuibhithe ábhartha a úsáideadh nó d'aon sonraíocht chomhchoiteann eile lena ndearbhaítear go bhfuil sé i gcomhréir leis nó léi;
6. I gcás inarb infheidhme, ainm agus uimhir aitheantais an chomhlachta faoina dtugtar fógra, tuairisc ar an nós imeachta um measúnú comhréireachta agus sainaitheantais an deimhnithe a eisíodh;
7. Ionad agus dáta eisiúna an dearbhaithe, ainm agus feidhm an duine a shínigh é chomh maith le tásc don duine ar thar a cheann a shínigh an duine sin, síniú.

IARSCRÍBHINN VI
NÓS IMEACHTA UM MEASÚNÚ COMHRÉIREACHTA BUNAITHE AR RIALÚ
INMHEÁNACH

1. An nós imeachta um measúnú comhréireachta bunaithe ar rialú inmheánach, is é sin an nós imeachta um measúnú comhréireachta bunaithe ar phointí 2 go 4.
2. Fíoraíonn an soláthraí go bhfuil an córas bainistíochta cáilíochta i gcomhréir le ceanglais Airteagal 17.
3. Déanann an soláthraí scrúdú ar an bhfaisnéis atá sa doiciméadacht theicniúil chun measúnú a dhéanamh ar chomhlíontacht an chórais intleachta saorga leis na ceanglais fhíor-riachtanacha ábhartha a leagtar amach i dTeideal III, Caibidil 2.
4. Fíoraíonn an soláthraí freisin go bhfuil próiseas deartha agus forbartha an chórais intleachta saorga agus a fhaireachán iarmhargaidh dá dtagraítear in Airteagal 61 comhsheasmhach leis an doiciméadacht theicniúil.

IARSCRÍBHINN VII

COMHRÉIREACHT BUNAITHE AR MHEASÚNÚ AR CHÓRAS BAINISTÍOCHTA CÁILÍOCHTA AGUS AR MHEASÚNÚ AR AN DOICIMÉADACHT THEICNIÚIL

1. Réamhrá

Is í an chomhréireacht bunaithe ar mheasúnú ar an gcóras bainistíochta cáilíochta agus ar mheasúnú ar an doiciméadacht theicniúil an nós imeachta um measúnú comhréireachta bunaithe ar phointí 2 go 5.

2. Forbhreathnú

An córas bainistíochta cáilíochta formheasta chun córais intleachta saorga a dhearadh, a fhorbairt agus a thástáil de bhun Airteagal 17, déanfar scrúdú air i gcomhréir le pointe 3 agus beidh sé faoi réir faireachais mar a shonraítear i bpointe 5. Déanfar scrúdú ar dhoiciméadacht theicniúil an chórais intleachta saorga i gcomhréir le pointe 4.

3. Córas bainistíochta cáilíochta

3.1. Cuimseofar an méid seo a leanas in iarratas an tsoláthraí:

- (a) ainm agus seoladh an tsoláthraí agus, más é an t-ionadaí údaraithe a thaisceann an t-iarratas, a ainm agus a sheoladh siúd freisin;
- (b) liosta na gcóras intleachta saorga a chumhdaítear faoin gcóras bainistíochta cáilíochta céanna;
- (c) an doiciméadacht theicniúil le haghaidh gach córais intleachta saorga a chumhdaítear faoin gcóras bainistíochta cáilíochta céanna;
- (d) an doiciméadacht a bhaineann leis an gcóras bainistíochta cáilíochta lena gcumhdófar na gnéithe uile a liostaítear faoi Airteagal 17;

- (e) tuairisc ar na nósanna imeachta atá i bhfeidhm lena áirithiú go mbeidh an córas bainistithe cáilíochta leormhaith agus éifeachtúil i gcónaí;
- (f) dearbhú i scríbhinn nach bhfuil an t-iarratas céanna taiscthe le haon chomhlacht eile faoina dtugtar fógra.

3.2. Déanfaidh an comhlacht faoina dtugtar fógra an córas bainistíochta cáilíochta a mheasúnú, agus cinnfidh sé an gcomhlíonann sé na ceanglais dá dtagraítear in Airteagal 17.

Tabharfar fógra faoin gcinneadh don soláthraí nó dá ionadaithe údaraithe.

Beidh san fhógra sin conclúidí an mheasúnaithe ar an gcóras bainistíochta cáilíochta agus an cinneadh measúnaithe réasúnaithe.

3.3. Leanfaidh an soláthraí den chóras bainistíochta cáilíochta mar atá formheasta a chur chun feidhme agus a choinneáil ar bun ionas go mbeidh sé leordhóthanach agus éifeachtúil i gcónaí.

3.4. Tarraingeoidh an soláthraí aird an chomhlachta faoina dtugtar fógra ar aon athrú atá beartaithe ar an gcóras bainistíochta cáilíochta formheasta nó ar liosta na gcóras intleachta saorga a chumhdaítear leis.

Déanfaidh an comhlacht faoina dtugtar fógra scrúdú ar na hathruithe atá beartaithe agus cinnfidh sé an mbeidh an córas bainistíochta cáilíochta modhnaithe in ann leanúint de na ceanglais dá dtagraítear i bpointe 3.2 a chomhlíonadh nó an mbeidh gá le hathmheasúnú.

Tabharfaidh an comhlacht faoina dtugtar fógra fógra don soláthraí maidir lena chinneadh. Beidh san fhógra sin conclúidí an scrúdaithe ar na hathruithe, agus an cinneadh measúnaithe réasúnaithe.

4. Rialú ar an doiciméadacht theicniúil.

4.1. I dteannta an iarratais a leagtar síos i bpointe 3, déanfaidh soláthraí iarratas a thaisceadh lena rogha comhlachta faoina dtugtar fógra maidir le measúnú a dhéanamh ar an doiciméadacht theicniúil a bhaineann leis an gcóras intleachta saorga a bhfuil sé i gceist aige a chur ar an margadh nó a chur i mbun seirbhíse agus a chumhdaítear leis an gcóras bainistíochta cáilíochta dá dtagraítear i Roinn 3.

4.2. Beidh na nithe seo a leanas san iarratas:

- (a) ainm agus seoladh an tsoláthraí;
- (b) dearbhú scríofa nár taisceadh an t-iarratas céanna le haon chomhlacht eile faoina dtugtar fógra;
- (c) an doiciméadacht theicniúil dá dtagraítear in Iarscríbhinn IV.

4.3. Is é an comhlacht faoina dtugtar fógra a dhéanfaidh scrúdú ar an doiciméadacht theicniúil. I gcás inarb ábhartha agus teoranta don mhéid is gá chun a gcúraimí a chomhlíonadh, tabharfar rochtain iomlán don chomhlacht faoina dtugtar fógra ar na tacair sonraí oiliúna, bailíochtaithe agus tástála a úsáideadh, lena n-áirítear, i gcás inarb iomchuí agus faoi réir coimircí slándála, trí chomhéadain ríomhchláraithe feidhmchlár (API) nó trí mhodhanna agus uirlisí iomchuí eile lena féidir rochtain cianda a thabhairt.

4.4. Féadfaidh an comhlacht faoina dtugtar fógra a cheangal ar an soláthraí tuilleadh fianaise a sholáthar nó tuilleadh tástálacha a dhéanamh chun measúnú ceart a dhéanamh ar chomhréireacht an chórais intleachta saorga leis na ceanglais a leagtar amach i dTeideal III, Caibidil 2. Aon uair nach mbeidh an comhlacht faoina dtugtar fógra sásta leis na tástálacha a dhéanann an soláthraí, déanfaidh an comhlacht faoina dtugtar fógra tástálacha leordhóthanacha go díreach, de réir mar is iomchuí.

4.5. Tabharfar rochtain do chomhlachtaí faoina dtugtar fógra ar chód foinseach an chórais intleachta saorga ar iarraidh réasúnaithe agus ní thabharfar an rochtain sin dóibh ach amháin nuair a chomhlíontar na coinníollacha carnacha seo a leanas:

- (a) Beidh gá le rochtain ar chód foinseach chun measúnú a dhéanamh ar chomhréireacht an chórais intleachta saorga ardriosca leis na ceanglais a leagtar amach i dTeideal III, Caibidil 2, agus
- (b) baineadh triail as na nósanna imeachta agus na fíoruithe tástála/iniúchta bunaithe ar na sonraí agus an doiciméadú a chuir an soláthraí ar fáil nó léiríodh nár leor iad.

4.6. Tabharfar fógra faoin gcinneadh don soláthraí nó dá ionadaithe údaraithe. Beidh san fhógra sin conclúidí an mheasúnaithe ar an doiciméadacht theicniúil, agus an cinneadh measúnaithe réasúnaithe.

I gcás ina bhfuil an córas intleachta saorga i gcomhréir leis na ceanglais a leagtar amach i dTeideal III, Caibidil 2, eiseoidh an comhlacht faoina dtugtar fógra deimhniú AE maidir le measúnú ar dhoiciméadacht theicniúil. Ar an deimhniú sin beidh ainm agus seoladh an tsoláthraí, conclúidí an scrúdaithe, na coinníollacha bailíochta (más ann dóibh) agus na sonraí is gá chun an córas intleachta saorga a shainathint.

Beidh sa deimhniú agus sna hiarscríbhinní a ghabhann leis gach faisnéis ábhartha chun gur féidir comhréireacht an chórais intleachta saorga a mheas, agus chun gur féidir an córas intleachta saorga a rialú agus é in úsáid, i gcás inarb infheidhme.

I gcás nach bhfuil an córas intleachta saorga i gcomhréir leis na ceanglais a leagtar amach i dTeideal III, Caibidil 2, diúltóidh an comhlacht faoina dtugtar fógra deimhniú AE maidir le measúnú ar dhoiciméadacht theicniúil a eisiúint, cuirfidh sé é sin in iúl don iarratasóir agus tabharfaidh sé cúiseanna mionsonraithe lena dhiúltú.

I gcás nach gcomhlíonann an córas intleachta saorga an ceanglas a bhaineann leis na sonraí a úsáidtear chun oiliúint a chur air, beidh gá le hathoilíúint an chórais intleachta saorga sula ndéanfar iarratas ar mheasúnú comhréireachta nua. Sa chás sin, beidh breithnithe sonracha maidir leis na sonraí cáilíochta a úsáidtear chun oiliúint a chur ar an gcóras intleachta saorga, go háirithe maidir leis na cúiseanna le neamhchomhlíonadh, i gcinneadh measúnaithe réasúnaithe an chomhlachta faoina dtugtar fógra agus a dhiúltaíonn deimhniú AE maidir le measúnú ar dhoiciméadacht theicniúil a eisiúint.

- 4.7. Aon athrú ar an gcóras intleachta saorga a d'fhéadfadh difear a dhéanamh do chomhlíontacht an chórais intleachta saorga leis na ceanglais nó don chríoch atá beartaithe dó, déanfaidh an comhlacht faoina dtugtar fógra a d'eisigh an deimhniú AE maidir le measúnú ar dhoiciméadacht theicniúil an t-athrú sin a fhormheas. Cuirfidh an soláthraí an comhlacht sin faoina dtugtar fógra ar an eolas go bhfuil sé beartaithe aige aon cheann de na hathruithe thuasluaite a thabhairt isteach nó cuirfidh sé ar an eolas é má tá fhaigheann sé amach ar bhealach eile faoi athruithe den sórt sin a tharla. Déanfaidh an comhlacht faoina dtugtar fógra na hathruithe atá beartaithe a mheasúnú agus cinnfidh sé an éilítear measúnú nua comhréireachta leis na hathruithe atá beartaithe i gcomhréir le hAirteagal 43(4) nó an bhféadfaí aghaidh a thabhairt orthu trí bhíthin forlíonadh leis an deimhniú AE maidir le measúnú ar dhoiciméadacht theicniúil. Sa chás deiridh, déanfaidh an comhlacht faoina dtugtar fógra measúnú ar na hathruithe, tabharfaidh sé fógra don soláthraí faoina chinneadh, agus i gcás ina bhformheasfar na hathruithe, tabharfaidh sé forlíonadh don soláthraí leis an deimhniú AE maidir le measúnú ar dhoiciméadacht theicniúil.
5. Faireachas ar an gcóras bainistíochta cáilíochta formheasta.
- 5.1. Is é is cuspóir don fhaireachas a dhéanann an comhlacht faoina dtugtar fógra dá dtagraítear i bPointe 3 a áirithiú go gcomhlíonann an soláthraí téarmaí agus coinníollacha an chórais bainistíochta cáilíochta formheasta.
- 5.2. Chun críoch measúnaithe, tabharfaidh an soláthraí cead don chomhlacht faoina dtugtar fógra rochtain a fháil ar an áitreabh ina bhfuil dearadh, forbairt agus tástáil na gcóras intleachta saorga á ndéanamh. Thairis sin, roinnfidh an soláthraí an fhaisnéis uile is gá leis an gcomhlacht faoina dtugtar fógra.
- 5.3. Déanfaidh an comhlacht faoina dtugtar fógra iniúchtaí tréimhsiúla chun a áirithiú go gcoinneoidh an soláthraí an córas bainistíochta cáilíochta ar bun agus go gcuirfidh sé i bhfeidhm é, agus tabharfaidh sé tuarascáil iniúcháir don soláthraí. I gcomhthéacs na n-iniúchtaí sin, féadfaidh an comhlacht faoina dtugtar fógra tástálacha breise a dhéanamh ar na córais intleachta saorga ar eisíodh deimhniú AE maidir le measúnú ar dhoiciméadacht theicniúil ina leith.

IARSCRÍBHINN VIII

FAISNÉIS LE TÍOLACADH AR CHLÁRÚ OIBREOIRÍ AGUS CÓRAS INTLEACHTA SAORGA ARDRIOSCA I gCOMHRÉIR LE hAIRTEAGAL 51

Déanfaidh soláthraithe, ionadaithe údaraithe agus úsáideoirí ar údaráis phoiblí, gníomhaireachtaí nó comhlachtaí iad an fhaisnéis dá dtagraítear i gCuid I a thíolacadh. Áiritheoidh soláthraithe nó, nuair is infheidhme, ionadaithe údaraithe, go mbeidh an fhaisnéis maidir lena gcórais intleachta saorga ardriosca dá dtagraítear i gCuid II, 1 go 11 iomlán, ceart agus cothrom le dáta. Déanfaidh an bunachar sonraí an fhaisnéis a leagtar síos in II.12 a ghiniúint go huathoibríoch.

Cuid I. An fhaisnéis a bhaineann le hoibreoírí (ar chlárú na n-oibreoírí)

-1. An cineál oibreora (soláthraí, ionadaí údaraithe nó úsáideoir);

1. Ainm, seoladh agus sonraí teagmhála an tsoláthraí;
2. I gcás ina gcuireann duine eile an fhaisnéis isteach thar ceann an oibreora, ainm, seoladh agus sonraí teagmhála an duine sin;

Cuid II. Faisnéis a bhaineann leis an gcóras intleachta saorga ardriosca

1. Ainm, seoladh agus sonraí teagmhála an tsoláthraí
2. Ainm, seoladh agus sonraí teagmhála an ionadaithe údaraithe, i gcás inarb infheidhme;
3. Trádainm an chórais intleachta saorga agus aon tagairt bhreise gan athbhrí lenar féidir an córas intleachta saorga a shainaithint agus a rianú;
4. Tuairisc ar an gcríoch atá beartaithe don chóras intleachta saorga;
5. Stádas an chórais intleachta saorga (ar an margadh, nó i mbun seirbhíse; ní chuirtear ar an margadh é a thuilleadh/níl sé i mbun seirbhíse a thuilleadh, tá sé aisghairithe);
6. Cineál, uimhir agus dáta éaga an deimhnithe arna eisiúint ag an gcomhlacht faoina dtugtar fógra agus ainm nó uimhir aitheantais an chomhlachta sin faoina dtugtar fógra, i gcás inarb infheidhme;

7. Cóip scanta den deimhniú dá dtagraítear i bpointe 6, i gcás inarb infheidhme;
8. Na Ballstáit ina gcuirtear nó inar cuireadh an córas intleachta saorga ar an margadh, i mbun seirbhíse nó ar fáil san Aontas;
9. Cóip den dearbhú comhréireachta AE dá dtagraítear in Airteagal 48;
10. Treoracha leictreonacha úsáide;
11. URL chun tuilleadh eolais a fháil (roghnach).
12. Ainm, seoladh agus sonraí teagmhála na n-úsáideoirí

IARSCRÍBHINN VIIIa

FAISNÉIS ATÁ LE TÍOLACADH AR CHLÁRÚ NA gCÓRAS INTLEACHTA SAORGA ARDRIOSCA A LIOSTAÍTEAR IN IARSCRÍBHINN III I ndÁIL LE TÁSTÁIL I bhFÍORDHÁLAÍ I gCOMHRÉIR LE hAIRTEAGAL 54a

Cuirfear an fhaisnéis seo a leanas ar fáil agus coinneofar cothrom le dáta í ina dhiaidh sin i ndáil le tástáil i bhfíordhálaí a bheidh le clárú i gcomhréir le hAirteagal 54a:

1. Uimhir aitheantais aonair uathúil uile-Aontais na tástála i bhfíordhálaí;
2. Ainm agus sonraí teagmhála an tsoláthraí nó an tsoláthraí ionchasaigh agus na n-úsáideoirí a bhfuil baint acu leis an tástáil i bhfíordhálaí;
3. Tuairisc ghairid ar an gcóras intleachta saorga, ar an gcuspóir a bheartaítear leis agus ar fhaisnéis eile is gá chun an córas a shainathint;
4. Achoimre ar phríomhthréithe an phlean chun tástáil a dhéanamh i bhfíordhálaí;
5. Faisnéis maidir leis an tástáil i bhfíordhálaí a chur ar fionraí nó deireadh a chur léi.

IARSCRÍBHINN IX

REACHTAÍOCHT AN AONTAIS MAIDIR LE CÓRAIS TF AR MHÓR-SCÁLA I RÉIMSE NA SAOIRSE, NA SLÁNDÁLA AGUS AN CHEARTAIS

1. Córás Faisnéise Schengen
 - (a) Rialachán (AE) 2018/1860 ó Pharlaimint na hEorpa agus ón gComhairle an 28 Samhain 2018 maidir le húsáid Córás Faisnéise Schengen chun náisiúnaigh tríú tír atá ag fanacht go neamhdhleathach a fhilleadh (IO L 312, 7.12.2018, lch. 1).
 - (b) Rialachán (AE) 2018/1861 ó Pharlaimint na hEorpa agus ón gComhairle an 28 Samhain 2018 maidir le Córás Faisnéise Schengen a bhunú, a oibriú agus a úsáid i réimse na seiceálacha teorann, lena leasaítear an Coinbhinsiún lena gcuirtear Comhaontú Schengen chun feidhme, agus lena leasaítear agus lena n-aisghairtear Rialachán (CE) Uimh. 1987/2006 (IO L 312, 7.12.2018, lch. 14)
 - (c) Rialachán (AE) 2018/1862 ó Pharlaimint na hEorpa agus ón gComhairle an 28 Samhain 2018 maidir le Córás Faisnéise Schengen (SIS) a bhunú, a oibriú agus a úsáid i réimse an chomhair póilíneachta agus an chomhair bhreithiúnaigh in ábhair choiriúla, lena leasaítear agus lena n-aisghairtear Cinneadh 2007/533/CGB ón gComhairle agus lena n-aisghairtear Rialachán (CE) Uimh. 1986/2006 ó Pharlaimint na hEorpa agus ón gComhairle agus Cinneadh 2010/261/AE ón gCoimisiún (IO L 312, 7.12.2018, lch. 56).
2. An Córás Faisnéise Víosaí
 - (a) Togra le haghaidh RIALACHÁIN Ó PHARLAIMINT NA hEORPA AGUS ÓN gCOMHAIRLE lena leasaítear Rialachán (CE) Uimh. 767/2008, Rialachán (CE) Uimh. 810/2009, Rialachán (AE) 2017/2226, Rialachán (AE) 2016/399, Rialachán XX/2018 [An Rialachán maidir le hIdir-inoibritheacht], agus Cinneadh 2004/512/CE agus lena n-aisghairtear Cinneadh 2008/633/CGB ón gComhairle - COM(2018) 302 final. Le tabhairt cothrom le dáta a luaithe a ghlacfaidh na comhreachtóirí an Rialachán (Aibreán/Bealtaine 2021).

3. Eurodac

- (a) Togra leasaithe le haghaidh RIALACHÁN Ó PHARLAIMINT NA hEORPA AGUS ÓN gCOMHAIRLE maidir le bunú ‘Eurodac’ chun sonraí bithmhéadracha a chur i gcomparáid le chéile ar mhaithe le cur i bhfeidhm éifeachtach
- Rialachán (AE) XXX/XXX [Rialachán maidir le Bainistiú Tearmainn agus Imirce] agus Rialachán (AE) XXX/XXX [an Rialachán maidir le hAthlonnú], chun náisiúnach tríú tír nó duine gan stát atá ag fanacht go neamhdhleathach a shainathint, maidir le hiarrataí ó údaráis forfheidhmithe dlí na mBallstát agus ó Europol ar chomparáid le sonraí Eurodac chun críocha fhorfheidhmiú an dlí agus lena leasaítear Rialachán (AE) 2018/1240 agus (AE) 2019/818 – COM(2020) 614 final.

4. An Córas Dul Isteach-Imeachta

- (a) Rialachán (AE) 2017/2226 ó Pharlaimint na hEorpa agus ón gComhairle an 30 Samhain 2017 lena mbunaítear Córas Dul Isteach/Imeachta (EES) chun sonraí faoi dhul isteach agus imeacht agus sonraí faoi dhiúltú cead isteach náisiúnach tríú tír a chlárú agus iad ag trasnú teorainneacha seachtracha na mBallstát agus lena gcinntear na coinníollacha ar a dtabharfar rochtain ar EES chun críocha fhorghníomhú an dlí, agus lena leasaítear an Coinbhinsiún lena ndéantar Comhaontú Schengen a chur chun feidhme agus Rialachán (CE) Uimh. 767/2008 agus Rialachán (AE) Uimh. 1077/2011 (IO L 327, 9.12.2017, lch. 20).

5. an Córas Eorpach um Fhaisnéis agus Údarú Taistil

- (a) Rialachán (AE) 2018/1240 ó Pharlaimint na hEorpa agus ón gComhairle an 12 Meán Fómhair 2018 lena mbunaítear Córas Eorpach um Fhaisnéis agus Údarú Taistil (ETIAS) agus lena leasaítear Rialachán (AE) Uimh. 1077/2011, (AE) Uimh. 515/2014, (AE) 2016/399, (AE) 2016/1624 agus (AE) 2017/2226 (IO L 236, 19.9.2018, lch. 1).
- (b) Rialachán (AE) Uimh. 2018/1241 ó Pharlaimint na hEorpa agus ón gComhairle an 12 Meán Fómhair 2018 lena leasaítear Rialachán (AE) 2016/794 chun Córas Eorpach um Fhaisnéis agus Údarú Taistil (ETIAS) a bhunú (IO L 236, 19.9.2018, lch. 72).

6. An Córas Faisnéise Eorpach um Thaifid Choiriúla maidir le náisiúnaigh tríú tír agus daoine gan stát
- (a) Rialachán (AE) 2019/816 ó Pharlaimint na hEorpa agus ón gComhairle an 17 Aibreán 2019 lena mbunaítear córas láraithe leis na Ballstáit a shainaitheint ag a bhfuil faisnéis faoi chiontuithe náisiúnach tríú tír agus daoine gan stát (ECRIS-TCN) chun an Córas Faisnéise Eorpach um Thaifid Choiriúla a fhorlíonadh agus lena leasaítear Rialachán (AE) 2018/1726 (IO L 135, 22.5.2019, lch. 1).
7. Idir-inoibritheacht
- (a) Rialachán (AE) 2019/817 ó Pharlaimint na hEorpa agus ón gComhairle an 20 Bealtaine 2019 maidir le creat a bhunú le haghaidh idir-inoibritheacht idir córais faisnéise AE i réimse na dteorainneacha agus na víosaí, (IO L 135, 22.5.2019, lch. 27).
- (b) Rialachán (AE) 2019/818 ó Pharlaimint na hEorpa agus ón gComhairle an 20 Bealtaine 2019 maidir le creat a bhunú le haghaidh idir-inoibritheacht idir córais faisnéise AE i réimse an chomhair phóilínreachta agus an chomhair bhreithiúnaigh, an tearmainn agus na himirce (IO L 135, 22.5.2019, lch. 85).